



Early European Books, Copyright © 2011 ProQuest LLC.  
Images reproduced by courtesy of The Wellcome Trust, London.  
2148/A/1







Early European Books, Copyright © 2011 ProQuest LLC.  
Images reproduced by courtesy of The Wellcome Trust, London.  
2148/A/1





Early European Books, Copyright © 2011 ProQuest LLC.  
Images reproduced by courtesy of The Wellcome Trust, London.  
2148/A/1




Early European Books, Copyright © 2011 ProQuest LLC.  
Images reproduced by courtesy of The Wellcome Trust, London.  
2148/A/1



*Doct.*


2148<sup>(1)</sup>  
D. III A  
16/16

1055



E. BARCLAY-SMITH, M.D.







GA  
LIS F  
diti

AD F



And

Ch



46115  
GABRIE-  
LIS, FALLOPPII ME-  
DICI MUTINENSIS OB-  
seruationes Ana-  
tomicae.

AD PETRUM MANNAM,  
Medicum Cremonensem.



COLONIAE  
Apud hæredes Arnoldi Birckmanni.  
Anno M. D. LXII.  
Cum Gratia & Priuilegio Caf. Maiefta-  
tis ad decennium.





AD



cem, quo  
impelli fo  
duz, ve  
quz ad i  
nes valer  
tant. N  
uta fueri  
mos aliq  
maioris  
ris quaz



# AD LECTO.

rem.



Vm multæ eadē-  
q; satis graues repe-  
riantur causæ, qui-  
bus scriptores ad  
edēdos libros in lu-  
cem, quos priuatim scripserint,  
impelli solent: grauiores tamen  
duæ, utilitas atque honor,  
quæ ad idem inducere homi-  
nes valent, potissimùm ex-  
tant. Namque utilitas (si pri-  
uata fuerit) ita scriptorum ani-  
mos aliquando concitat, vt ipsi  
maioris, sed alióquin turpio-  
ris quæstus causa labores suos  
\* 2 per-



peruulgent, eorumque vilem  
mercaturam faciant, non sine a-  
liqua ipsius sapientiæ, è cuius  
vberimis fontibus scripta illa  
mānarint, infamia. Ex horum  
tamen numero illos planè ex-  
cipio, qui dura oppressi pauper-  
tate, vt se ipsos, ac coniuges,  
liberosque honestè alant, quæ-  
stus hoc genus faciunt: Cùm ii  
non solùm non infami dedeco-  
re, sed maximo potiùs hono-  
re sapientiam ipsam afficiant,  
vtpotè illam, quæ si animo di-  
sciplinarum ornamenta, corpo-  
ri quoque alimentum, accom-  
modum præstare queat. Sin au-  
tem publica fuerit hæc utilitas,  
eò etiam magis scriptores vrget,  
vt



vt publici commodi, omnium  
que hominum vsus rationem  
habeant: hi que ab hac perciti, la-  
bores, & lucubrationes suas per-  
pendentes, sæpeque ac sæpius  
(vt dicunt) ad Lydium lapidem  
reuocantes, si illas reliquis ho-  
minibus vsui futuras, omnium-  
que auribus dignas esse noue-  
rint, in vulgus libenter ædunt:  
ne auari vel illiberales erga ge-  
nus hominũ sint, neue esse vide-  
antur Maxima verò, ac prope-  
modum infinita est in hac re  
publicæ existimationis, vel com-  
munis gloriæ vis, & efficacitas.  
Quoniam cum maior pars illo-  
rum hominum, qui plurimum  
lucubrant æterna mētis sensa,

\* 3 &



& consilia scriptis explicare tentant, non solum pulcherrimis artibus, ac disciplinis ornatum, sed etiam optimis, & sanctissimis moribus fictum, atque ab omni vitiorum, præcipue verò auaritiæ & arrogantia labe carentem animum habeant. Cumque sibi nunquam tantum tribuant, quod existiment ipsorum scripta eius esse auctoritatis, ut alios docere valeant: ideò neque à priuata, neque publica utilitate impulsī suos libros nō exponunt: quod si tandem eos aliquando ædunt, illud profectò faciunt, primò, ut omnibus aliis pateat, eos otiosam ætatem, & sine ullo labore quietam minimè tra-



traduxisse: deinde, vt quę fuerint  
ipforum studia, & quantũ in  
iis laborarint, profecerintue, pa-  
riter indicent: siq; aliquid, quod  
laude, ac gloria dignum sit effe-  
cerint, vt inde honorem plu-  
rimum sibi acquirere valeant.  
Nam si ea, quę ædita sunt, auri-  
bus doctiorum digna esse non  
sint reperta, vituperium potiùs,  
quàm gloriam auctoribus suis  
pariunt. Quare qui honoris cau-  
sa libros ædunt, hoc primũ o-  
ptimè animo voluere debent,  
præcípites istas editiones nõ esse  
vllam laudem ipsis allaturas: sed  
si talia, quę alios docere possint,  
vnà cum illis ædita fuerint, hæc  
ornamento ac summo decori

\* 4      ipsis



ipsiserunt. Deinde timide quoque, si tales fuerint libri (cùm iudicio doctissimorum hominum eorum consilia pendenda exponantur) ipsos emittere debent: Quod quidem vsque ad finem obseruandum esse censeo: cùm videam doctissimos homines, plurimos, qui Græcè, vel Latinè, vel Italicè quoque scribentes ad extremum fermè vitæ libris aliquot æditis totam eam gloriam, & dignitatem, quam primis aut alteris sibi acquisiuerant, penitus extinxisse. Atque adhuc plures alios noui, qui cùm diu præclara doctrinæ fama floruerint, conscriptis tandem aliquot æditisque libris eam totam amisisse,  
aut



aut potius abieciſſe mihi viſi  
ſunt. Huius autem facti, ratio &  
cauſa eſt in promptu: Quoniam  
natura nobis eſt inſitum, vt  
iis in rebus, quas valdè ac diù  
proſitemur, aliquando etiam er-  
rare poſſimus, atque ſimul erre-  
mus. Quanquam autem, vt di-  
xi, priuata, aut comuni vtili-  
tate, vel gloria ipſa commoti ſcri-  
ptores vt plurimùm labores, ac  
lucubrationes ſuas aliis hōmi-  
nibus communicent: neutra ta-  
men me hæc cauſa impulit, do-  
ctiſſime lector, vt tibi libellum  
hunc exponerem. Non publicā  
aut priuata quidē vtilitas: Quo-  
niam ſemper ita immunis fui ab  
omni auaritiæ rubigine, vt ſi  
\* 5 non



nōn liberalis, tenax saltem com-  
muni etiam testimonio minimè  
dici debeam : neque rerum ege-  
stas ita me oppressit, vt tam diffi-  
cili, ancipitiq; ratione vitæ com-  
moda fuerint mihi paranda.

Neq; prætereà ita impudens,  
arrogansue sum, vt mihi persua-  
deam debile meum ingeniolum  
in hac arte à clarissimis viris ex-  
cultà, ea esse pariturum, quæ in  
vulgus emissa vniuerso hominū  
generi vsui esse debeant. Et  
quamuis quoque negare mi-  
nimè possim, me non ita esse  
gloriæ appetentem, vel laudis a-  
uidum, vt omnes alii, qui sapi-  
entiæ studio, & reliquis nobilio-  
ribus artibus sunt penitus dediti;  
Huius



Huius tamen rei ergò libellum  
hunc non peruulgavi, cùm opti-  
mè nouerim, ab oībus, q̄ ipsum  
legerint, laudis palmam nō esse  
obtenturum: Cùm tyrones in ar-  
tem minimè introducturus, aut  
veteranos quoque perpauca sit  
docturus, totusq̄ue paradoxis  
scateat, quæ admirationē poti-  
ùs parient, quàm quòd libro  
dignitatem addant. Sed quoni-  
am quā plurimi reperiuntur, qui  
aut scribēdo, aut publicè, priua-  
tīme profitendo, multa inue-  
nisse, quæ ab aliis minimè visa  
sint in hac arte, sibi arrogant, se-  
seq̄; alienis plumis ornantes, vti  
Aescopæus graculus, ea, quæ ab  
aliis, aut à me ipso, vel potiùs à  
meis



meis discipulis audientes malè  
didicerunt, pro suis ædunt, &  
venditant: & aliquando ita sibi  
arrogant, vt eadē distorta & cor-  
rupta exponant.

Præterea quoque, cùm audi-  
am aliquot ex meis amantissi-  
mis auditoribus, quos in hac ar-  
te summa cum diligentia erudi-  
ui, vt dictis suis auctoritatem,  
ac pondus aliquod addant, sese  
mihi opponere ac sententiis me-  
is aduersari, easque aliquando  
distortas, & falsas (quales ne qui-  
dem somniârim) referre: Ideò  
nè decipiaris, candide Lector, li-  
bellum hunc tui gratia ædo: vt si  
quando in anatome horū men-  
tio inciderit, habeas, vnde hæc  
colli-



colligere, verosq; ipsorum au-  
ctores agnoscere possis. Librum  
hunc ante quatuor annos scripse-  
ram, rogatus à Clarissimo viro  
Petro Māna philosopho, ac me-  
dico doctissimo, antequam de  
vita decederet: Cui quidem ro-  
ganti nihil negare vnquam po-  
tueram, ob summam illam au-  
toritatem, ac existimationem,  
in qua apud me erat, & meritò  
quidem. Quoniam si externa, at-  
que simul interna hominum or-  
namenta alienos animos sibi cō-  
ciliare possunt: Tot & tanta in  
hoc sanctissimo viro erant, vt nō  
solū meum atque omniū do-  
ctorum, qui ipsum nouerant, a-  
nimum sibi conciliare, sed ar-  
ctissi-



ctissimè etiā deuincere potuerint  
Is enim ex nobili ac satis diuite  
familia Cremonēsi oriundus, in  
doctissimū philosophum ac me-  
dicum euadens, atque ob id vlti-  
mò Mediolanensium Duci ma-  
ximè charus (medicus enim fami-  
liaris ipsi fuit) plurimis in hac arte  
medica honoribus perfunctus,  
nunquam à studio literarum re-  
cessit: Cumq; adhuc quasi senio  
cōfectus esset, literas Grēcas Ca-  
tonis exemplo didicit, in planta-  
rum historia semper diligens, ac  
assiduus fuit. Sed præ cæteris ita  
Anatomix incubuit, vt nil ma-  
gis, neq; vnquam legendo, me-  
ditandoq; nisi mors illum inua-  
fisset, defatigatus esset.

Hunc



Hunc ergò librum , vt tanto  
viro satisfacerem scripsi , tibi que  
nunc, ne in iis, quæ dixi, decipia-  
ris, communico . Quòd si mihi  
tandem sorte obtigerit, vt quæ  
in ipso continentur tibi satisfaci-  
ant, dignaq; doctorum auribus  
esse videantur , non leue procul  
dubio honoris, & laudis lucrum  
inde faciam: quamuis non hac,  
sed ea, quam dixi, causa in lucem  
e'dam. Tu verò meum hoc  
institutum æqui boni-  
que facias, quæso,  
& Vale.

GABRIE.







# GABRIELIS FAL.

LOPPII OBSERVATIO-  
NES ANATOMICAE.

AD PETRVM MANNAM  
*medicum Cremonensem.*



ECREVERAM IAM multò antea, quàm hæc ad te scriberem, doctissimè Manna, me nihil vnquam, quod ad anatomem pertineret, scriptis esse commédaturum: Ad quod quidem genus instituti non leui impellebar ratione, dum absolutissimum Andreae Vesalij opus anatomicum legerem: in quo mihi videbatur nihil posse desiderari, quod aut ad copiam partium explicatarum, aut situm, aut magnitudinem, aut substantiam, aut speciem vel vsum, aut deniq;, quod ad integerrimam humani corporis historiam pertineret. Hinc enim colligebam diuinũ hoc Vesalij monumentum perpetuò duraturũ esse, neque vnquam ex animo, aut me-

A mo-



moria posterorum elapsurum: meq; vel  
quoscunque alios frustra enixuros, si  
vellemus eandem hanc prouinciam opti-  
mè, ac integerrimè administratam rursus  
aggredi. Quoniam alterutrum è duo-  
bus necessarium videbatur: aut vt ea-  
dem, & fortasse ineptius referendo,  
scripta nostra ne legerentur efficere-  
mus, aut vt contraria, vel saltem ab  
ijs, quæ in eo volumine reperiuntur,  
diuersa tradentes, ab omnibus, & meritò  
irrideremur. Hac igitur de causa in eadē  
sententia plures annos, ne dicam men-  
ses perstiti, donec aliquantis per gran-  
dior in hac arte anatomica factus, atque  
etiam audacior auctoritate ipsius Vesa-  
lij redditus, cū quasi solidiores animi  
mei vires persentirem: primū disquire  
re cepi, atque etiam iudicium meum in-  
terponere tentavi inter Galenum & Ve-  
salium ipsum, quisnam illorū magis ad  
veritatem accesserit in maximis illis cō-  
trouerſijs, ac aduersarijs sententijs, quæ  
inter ipsos vel (vt rectius dicam) inter v-  
triusque sectæ anatomicos versantur.  
Nōsti enim plurimos reperiri doctissi-  
mos viros nostrorum temporum, qui  
omni-



3  
omnibus viribus Galeni partes tueantur:  
alios verò, qui & adhuc plures sunt, ita  
Vesalij dogmata defendere, vt ne vel la-  
tum quidem vnguem ab ipsis recedere  
audeant. In hoc itaque iudicio, quamuis  
non negârim, me illud vnum obseruâsse,  
nempè quod optimus anatomicus An-  
dreas Vesalius, veluti exercitus victoriæ  
ardore ac impetu actus, sæpè aliquid ten-  
tat, quod minùs, aut ad gloriam propri-  
am conducit, aut optimis Ducibus ac  
Imperatoribus satisfacit: Galenum ali-  
quando in verbis potiùs, quàm in sen-  
tentijs carpit, aliquando mutilum (quod  
facere debuerat) minimè excusat, ac sæ-  
pe indigniùs, quàm anatomicum, philo-  
sophum, ac medicum tam insignem de-  
ceret, carpit, & accusat. In hoc tamen  
(inquam) iudicio, vt ingenuè verita-  
tem illam, quam mihi videor, longa ex-  
ercitatione assequutus, fatear, non di-  
cam in maiori, sed in maxima aduersa-  
rum sententiarum parte pedibus etiam  
ipsis ego in sententiam diuini Vesa-  
lij veni, atque nunc persisto. Quod  
optimè semper mihi celsisse video:  
Quoniam cùm in publicis gymnasijs

A 2 Pi-



4  
Pisano scilicet, & Patauino, vbi tot præ-  
clari philosophi, atque medici profiten-  
tur, vbi tot diuina auditorum plurimo-  
rum ingenia excoluntur, magis semper  
Vesalij, quàm Galeni partibus fauerim,  
nunquam aliquem virum doctum, aut  
probum inueni, qui hoc meum insti-  
tutum accusarit. plurimos equidem  
(ne inficias eam) reperi, qui ob exerci-  
tationem optimæ iuuentutis, Galeni  
partes tutati mecum sæpiùs discepta-  
runt, at tandem ex his nullus vnquam à  
me inuentus est, qui iugulato propemo-  
dum sensu, veritatem ipsam fateri nolue-  
rit, hacque actus relicto Galeni placito,  
ad Vesalium non accesserit. Post hoc au-  
tem iudicium confirmatis adhuc ma-  
gis animi viribus querere cepi, an in hac  
arte, in qua Hippocrates primùm, de-  
inde Aristoteles, prætereà Erasistratus,  
Marinus, ac Herophilus, & tandem Ga-  
lenus errauit, solus Vesalius reperiatur,  
qui nihil vnquam dormitando, non  
solùm hos diuinos scriptores, sed etiam  
Homerum ipsum aliquando ( vt fertur  
in adagio ) dormitantem, superarit, seu  
potiùs aliquid sit ab ipso prætermis-  
sum,



3  
sum. vel non satis integrè enarratum,  
seu aliquid distortum, vel ab historia  
partium corporis humani discrepans, in  
illius volumine anatomico reperiatur.  
In hoc multùm re vera varias ob causas  
fudaui, primùm, quia tentavi rem per se  
difficilissimam: secundùm, quia in verba  
magistri iuratus, atque illius auctoritati  
plurimùm tribuens non audebam ex ijs  
carceribus, quos ipse arti imposuit egre-  
di: tertium, quod & grauissimum est,  
quòd publicam notam pertimescebam,  
momosque etiam ipsos auribus meis  
obgánientes iam tum audire videbar.  
Hæc tamen omnia satis strenuè supera-  
ui. Nam rei difficultatem summo stu-  
dio, labore, & vigilijs plurimis vici,  
Magistri reuerentiam, & timorem ip-  
sius exemplo leniui. Quoniam vti Vesa-  
lius non in scholis quidem viux vocis  
auditor, sed in musæo ( quia librorum  
omnium, qui ab ipso scripti sunt helluo  
eximius fuerit) Galeni discipulus factus  
non ipsius auctoritate deterritus est,  
quin plurima arti adderet, quæ à præ-  
ceptore eius prætermissa erant: Ita &  
ego in illius schola ( quia eius scripta  
A 3 dili-



diligenter legerim) versatus alacrius in hoc pariter artem iuuare tentavi. Postremo testimonio integerrimæ conscientie nixus, ac plurimorum doctissimorum hominum, qui mea hæc præsentēs viderunt, atque manibus etiam tractarunt, apertè cognoui, momos istos veluti fuitiles, vanasque umbras, ita esse timendos, quæ per se dissolutæ in fumum abeunt: cùm præcipuæ in his controuersijs nullus alius iudex constituatur, quàm homo ipse, atque partes illæ, quibus humani animi organum conflatur. His hærens, ac innitens fundamentis, quædam reperi (etsi non plurima) quibus tanquam nouis inuentis ars hæc nostra ornari, atque aliquantulum (absit fastus) augeri potest. Quæ cùm obseruârim, statim mutata priori sententia scriptis notavi, ac disposui, & commentarios mihi feci, quos decreueram nonum vsque in annum premere, antequam alijs communicarem, opportunè tamen æditurus, ne publicæ vtilitati inuidere, nèue Dei optimi munus suppressere, aut meos labores, sudoresq; merita apud posteros corona, si qua digni forent

de



7  
defraudare viderer. Quam verò magni  
ponderis apud ingenuos quosque sit ve-  
ritas, ex hac tota historia, quam tibi retu-  
li, non solum noui, sed sensu etiam ipso  
percepi, cum grauissimorum hominum  
auctoritates, præceptorum doctissimo-  
rum documenta, communemque apud  
omnes scriptorum existimationem, qua-  
si negligens veritatem ipsam rerum an-  
te oculos tantum semper habuerim, il-  
lamque solam colere ausus sim, multos ali-  
os in hoc doctissimos viros imitatus.  
Quare, qui scribendo nostram hanc ar-  
tem, quam sapientiam vocamus, aut vo-  
ce græca φιλοσοφία illustrarunt, haud  
grauiter ferre debent, quando adhuc su-  
perstitentes sint, si qui illorum scriptis do-  
ctiores facti aliquid arti addant, quod  
veritati quam ipsi sensu, aut ratiocinatio-  
ne inuenere, omnibus numeris respon-  
deat. Neque illi, qui postremo loco scri-  
bunt, nimia audacia, vel petulantia ad  
priores accusare debent, eoque minus, cum  
illorum scriptis adiuti, tales in sapien-  
tiam progressus habuerint, quibus fa-  
cti doctiores artem illustriorem red-  
dere potuerunt, ni velint ingrati, aut

A 4 impij



impij animi notā subire: quoniā vtrunq;  
hoc veritatis ipsius leges dictant.

Hoc meum institutum (vt ad ipsum redeam) doctissime Petre, ad vltimū vsq; calcem, nisi tu impedimento esses, perduxissem. Verū auctoritati, ac estimationi, qua apud me plurimū vales, deesse non potui, quin statim, cū de voluntate tua certior sum factus, arrepto calamo partem aliquam eorum ad te scribam, quibus carere artem anatomicam, vel potiū aliorum anatomicorum scripta obseruavi. Hoc libēter (mihi crede) subterfugerem, sed nescio quo vultu philosopho sapientissimo, medico experientissimo, homini ætate ac moribus grauissimo, & de me quoque optimè merito, tibi inquam patri amantissimo hoc officij genus negare possim. Quare scribendum est, lubensque scribo. Sed antequam ad enarrationem veniam, hæc audi. Primū cū ista ad te scribam, ea synceri animi puritate hoc facio, veluti si Patauinae scholæ medicis, ac philosophis vel ad Galenū, aut ad Vesaliū ipsum scriberem. Quare si quid erroris in his lucubrationibus erit deprehensum, id  
nullo



9  
nullo dolo, sed integra conscientia scias  
fuisse patratum, meq; in nominandis ali-  
js anatomicis, ac præcipuè ipso Vesalio.  
& in ijs explicandis rebus, in quibus ab  
his dissentiam, nulla unquam petulanti  
oratione, aut accusatione turpi esse usu-  
rum, cùm nullam aucupem gloriam ex  
dedecore alieno, sciamq; neminem gra-  
tis esse pungendum, offendendumue.  
Quamobrem in te vno vellem omnes a-  
natomicos contineri, vt ab illis hoc exo-  
rarem, quod nunquam sibi persuadeant,  
me aut vanæ ambitionis causa, aut vt il-  
los offendam scribere, sed vt potiùs tibi  
ac veritati, quæ mihi patuit, satisfaciam.  
Postremò à te quoque peto, quòd mihi  
liceat vti breui oratione, & quasi per ca-  
pita hæc recensere: præcipuè cùm volu-  
men anatomicum moliar, in quo anato-  
men integram complectar, atque minu-  
tissima quæq; ad hanc artem pertinentia.  
Illud erit quamplurimis figuris exorna-  
tum, quæ corpus humanum, & simias e-  
tiam, vt Galeni dogmata faciliora sint,  
exprimant. Neq; hæ imagines solùm e-  
iusdem generis partes, ac similes inter se  
continebunt, sed etiam diuersis ex clas-

A 5 sibus



sibus inter se simul complicatas, veluti in ipsomet corpore humano cōnectuntur, indicabunt. Sed ad Rhombum tandem rediens, ac ad præsentem institutionem, in ipsa talem seruabo ordinem, vt primùm quæ circa ossa obseruârim scribâ, secundùm, quæ ad musculos pertineant, tertiùm, quæ circa venas, arterias, & nervos à me visa sint, quartùm, quæ in visceribus abdominis, aut thoracis sint obseruanda, vltimò, verò quæ circa capitis partes notârim, explicabo.

Disputationem satis longam in scholis instituere, atque eandem etiam perficere soleo de natura, & de causis ossium, ac reliquis omnibus, quæ ad ipsa pertinent. Quæ quoniam à me luculenter descripta est in opere anatomico, cuius mentionem feci, cumque locus hic eam minimè requirat: ideo ipsam prætermitto, atque ad ossium partes descendens, processus scilicet ac appendices, vnum quod obseruavi, referam.

Plurimæ sunt ossium partes, quas ab anatomicis processus vocari leges, aut audies, cùm tamē appendices sint, veluti  
in



in secunda cervicis vertebra tuberculū  
 illud, quod dentis formam exprimit, vn-  
 de & nomē tota vertebra accepit, ab ana-  
 tomicis processus vocatur, cū tamen  
 appendix sit. In scapulis quoque interi-  
 or processus appendix est, non autem, vt  
 dicunt anatomici, processus, in femore  
 τροχαντήρ, maior secundum anatomicos  
 processus dicitur, cū tamen appendix  
 sit & dici debeat. Os quoque illud acu-  
 tum, quod iuxta mammillarem proces-  
 sum in capite prominet, συλοειδής proces-  
 sus ab anatomicis vocatur, cū re vera  
 appendix sit. Neque vt aliqui opinati  
 sunt, hæ ossiū partes processus appellatæ,  
 appendices postea adiunctas habent, sed  
 ipsæmet totæ appendices sunt, quod eti-  
 am in quàm plurimis alijs, præter has,  
 quas dixi, ego obseruavi. Nam cū ana-  
 tomicis consentio, Processum esse ossis  
 partem legitimam non adnatam, sed ex  
 ipsomet osse enatam, ac prorumpentem,  
 quæque nihil ab osse differat, vt in  
 maxilla inferiore apparet. At cū ista à  
 me dicta in foetus formatione ossa sint,  
 aut cartilagine distinctæ, & tales ali-  
 quot annis post formationem per-  
 durent,



durent, procul dubio non processus, sed appendices appellandæ sunt. De usu autem appendicum non loquar, cum ad anatomicam speculationem, quam in opere maiori perficiam, pertineat hæc tractatio. Sed vnum hoc tibi promitto, me ibi esse verum appendicum usum proditurum, quod à nullo, quantumvis docto anatomico, adhuc factum est.

In ossium cõmissuris explicandis, scriptores parùm inter se cõcordes reperio. Neq; eorũ diuisiones aut classes, in quas officium compages disponũt, mihi arriident. Quoniã aliqua addunt, quæ non sunt, & quædam alia, quæ adsunt, præmittũt: nec prætereà nuda capita proponũt, vnde diuisiones hæ ortũ ducant, quare ego, vt habeas, quid cum aliorum scriptis in hac re conferre possis, quandã partitionem subiungam, quàm octo annos ante in scholis meis auditoribus iam communicauì, ex hac cognoscere poteris, non solùm anatomicarum vocum, quæ ad articulos pertinent vim, sed etiam veras ipsas differentias, quibus variæ compaginum species constituentur.

ARTI-



13

ARTICVLI IN OMNES  
*suas species diuisio.*

**T**Res sunt, Māna, manifestiores differētię,  
quibus structurarū varietas in ossibus cō-  
tinetur. Mediū, per quod ossa cōmittun-  
tur. Proportio eorū inter se. Et finis ad quem à  
natura sunt factę. Inter quas mediū, quo iun-  
gūtur, & ipsa ἀναλογία primū locū, mea sentē-  
tia, obtinere, ac veluti cōmissurā totā formare  
vidētur. Sine enim vtroq3, aut horū alterutro  
nunquā ossa cōmitti possunt. Nā quod ad me-  
dium attinet, nunquam costę ossibus pectoris  
optimē copulari poterunt, cū nulla adsit p-  
portio, nisi intercedat media cartilago vtriusq3  
maximē respondens. In capite verò tanta est  
analogia tū ossiū inter se, tū cavitatum, ipicu-  
lorumq3, vt sine ligamento etiā simul iungan-  
tur. At coxę cum femore magna inest similitu-  
do, ac proportio: cui tamen additur & mediū,  
quo coniunguntur. Quare his exemplis actus,  
ad articulos componendos, medium & propor-  
tionem maioris momenti esse existimo (cū ipsa  
sint, quę ossa iungant) quam finem ipsum, ad  
quem fuerūt à natura destinati. Propterea à stru-  
cturę differentias, quę à medio sumuntur pri-  
mo loco ponam, secundo, quę ab analogia, ter-  
tio, eas quę sumuntur à fine. Nec reliquas mi-  
noris momenti prætēmittam, quę vel ab effi-  
ciente causa, vel à numero, aut partibus ossium  
colliguntur,

Ossium



Per coalitum, nullo diuisionis relicto vestigio, in qua coniunctionis specie ita simul coalescunt ossa, ut vnum tantum esse videantur, ac præterea fiant. Huiusmodi commissura *σύνφωσις*, & *ἔνωσις* ab antiquis Græcis, Galeno teste vocabatur, eo quod ossa simul coalescerent, quod triplici de causa fieri solet, vel:

Offium commissura, quæ Græci *ἔνωσις*, *σύνφωσις*, *σύνταξις*, ὁμίλια, vel etiam Hippocratica voce *σύντρυξις* vocant, fit cum ipsa iunguntur simul, vel:

Est autem obseruandum, Hippocratem variè usurpare voces istas, *σύνφωσις*, & *συνφύεσθαι*. Nam aliquando propriè usurpat, ut cum tertio de fracturis, textu tertio vulnera, quæ coalescunt *συνφύεσθαι* dixerit, pariter cum & coniunctionem in maxilla *σύνφωσις* vocârît, secundo de articulis textu 33. Usurpat etiam minùs propriè vocabula ista, articulum explicans, ut cum 3. de fract. 55. offium brachij coniunctionem *σύνφωσις* vocat, & cum 4. de Artic. 29. commissuras manus digitorum, ac pedis *σύνφωσις* appellat.

Sine coalitu.

Anatu-



18  
A natura ipsa generante, atq; ossa simul, dū  
ipsa perficit coniungente. Quod genus in ap-  
pendicibus oībus ossium apparet, pro exēplo  
etiam addi potest συμφυσις vna in osse fron-  
tis, in maxilla vna, in occipitis osse quater-  
næ, in osse, quod a cunei forma σφινγοειδής  
à Græcis vocatur binę, ternæ in qualibet ver-  
tebra, excepta secunda cervicis, in qua qua-  
ternæ insunt, in vtroq; auriū foramine vna  
pponatur, in osse pectoris plures, ternæ aut  
quaternæ in iliū osse. Et vt vno verbo dicā,  
in his, & reliq; ossib; tot sunt συμφυσις & co-  
alitus, quot appēdices. Nā in humero, q; sur-  
sum & deorsum appēdicē habet, binę insunt,  
in femore quaternæ, qā vnica donatur appē-  
dice in parte, qua iungitur cum tibia; altera  
circa caput superius; tertia est τροχαντήρ μί-  
σος vocatus: quarta verò appendix est τρο-  
χαντήρ μέσος, vel μικρός dictus.

Natura pristinam vnitatē restituente, vt in  
ossibus fractis, quæ ferruminantur. Nam in  
his aliquando ipsius calli coniungentis vesti-  
gium nullum apparet, quod constat in cal-  
uariæ fracturis ferruminatis, & in ossibus  
infantium tenerrimis.

Natura, quæ nō ex intento, sed necessitate  
materiæ coacta, in symphyssi ope suo abutitur,  
veluti fit, dū ossa capitis delectis futuris ob seniū  
cōnascuntur, vel cum prima cervicis vertebra  
capiti cōiungitur, ob hanc vel aliā causam: pa-  
riter cū duæ vertebre inter se, aut radius & cu-  
bitus (quod sæpè obseruauimus) coalescunt.

Sine



Sine coa-  
licu, nulla  
que facta  
vnitate, i-  
ta, vt ossa  
distincta  
semp ma-  
neant, ac  
vnūq; q;  
suā natu-  
rā seruet.  
Hec cōmis-  
sura ἄρ.  
ὀσθ. voca-  
tur à græ-  
cis, à no-  
stris verò,  
articulus.  
(quāq; vtra  
que hæc  
vox aliud  
magis p-  
priè signi-  
ficet) in  
q u iun-  
guntur ossa  
vel:

Nulla interueni-  
ente copula, aut  
medio, quo ossa  
colligentur, sed  
suomet corpore  
ac materie inter  
se ipsa committū-  
tur. Hæc cōposi-  
tio συνάφωσις  
ab antiquis Græcis  
dicta est, quæ quis  
de duobus sit mo-  
dis, vel:

Per se iunctis ossibus;  
cū extrema s. sua sub-  
stantia cōnectuntur.  
Quæ cōiunctio addita  
analogia fit in modū,  
vel:

Per accidens. i. per ali-  
am cōmissurā. In hac  
n. specie ossa iunguntur  
inuiç sine ligamēto,

verū coniuncta seruatur, nō suamet substā-  
tia, sed merito alterius commissuræ, & hæc  
addita pportione, quæ linea recta, aut cir-  
culari, aut composita quadret, constituunt  
συνάφωσις, quæ ἄρμονία à Græcis dicta  
est. Huc etiam spectare videtur coniunctio  
illa, quæ aliquādo, quamuis in vnguē fiat,  
in capite, vel in facie ita laxa est, vt alijs  
hinc inde aptis futuris p se dehiscat. Per li-  
neā cōpositā rectā harmonia manifesta est  
in naso. Per circularē aut cōpositā in secūdo  
osse malarū, qd in interno oculi angulo col-  
locatur & aliquādo in  
parte squamosa ossis  
temporum reperitur.

Aliqua interueni-  
ente copula.



29  
Duarū terrarū, q̄ aduersis spiculis iungantur,  
ob quā serratę cōiunctiōis similitudinē, hęc  
cōmissura *σπρωειδης* à Græcis vocatur, at-  
q; inter capitis ossa sæpè ac sepiùs reperitur.

Vnguū ac pellicularum illarum, quę à Græ-  
cis *ἀγγυμοι* dictę vngues circundant, vnde  
ortum ducit cōmissura *σύνκυσσις ὀνυχας*,  
id est, in vnguē dicta, cuius exemplum  
etiam in ossibus capitis inuenitur.

Pannorum simul confutorum. Atq; hæc  
à Græcis *ἑμφη*, id est, sutura vocatur, quam  
maxima ex parte in caluaria videmus, quā  
q̄ noīe futurę & eā, q̄ ad vnguis, & eā, quę ad  
terrę similitudinē fit, auctores sæpè noīent.

Clauī atq; excipiētis ipsum cauitatis, quę  
cōmissura in dētibus cū suis alueolis appare-  
Talisq; constituta *σύνσπρωσις*, à Græcis *σύν-  
σπρωσις* vocata est. Quāquā hoc genus etiā inter  
ea, q̄ medio cōiunguntur, videatur cōnumeran-  
dū. Nā in alueolis malarū (vt testatur anatomi-  
ci) est veluti quoddā carneū glutē & cicū quaq;  
intunt gingiue, qbus dētes illis validiūs aggluti-  
nātur. Tamē cū illa caro ita pauca sit, vt vix o-  
culis sit manifesta, cumq; gingiue aliquando  
sint hinc inde ita erosæ, vt dētes minimē tan-  
gant, ipsiq; nihilominus in alueolis suis cōti-  
ueantur, nec cadāt: postremò cū plurimos den-  
tes ita fixos malis ac maxillæ videam, vt etiā  
in cadauere aridiori glutine ac gingiuis corru-  
ptis, difficilimē loco moueātur, aut auellātur,  
sub hoc genere potius talem coniunctionem  
colloco, quam sub illo, quod medium habet.

B

Ali.



Aliqua inter  
ueniēte copu-  
la, vel medio  
quo colligan-  
tur ossa, meri-  
to cuius medi-  
fit cōmissura  
ab antiquissi-  
mis scriptori-  
bus (vt existi-  
mo) *διὰ τὴν ὁμο-  
σιον* dicta. Quod  
aut ita appel-  
lari debeat, i-  
feri patebit.  
Hæc præterea  
de articula-  
tio non sem-  
per eadem ve-  
nitur copu-  
la, sed aliquā-  
do;

Nervæa est, à qua  
talis *διὰ τὴν ὁμο-  
σιον* species *συνέ-  
σιον* dicta est:  
quæ ob variam  
adiunctam ana-  
logiā, qua inter  
se ossa copulatur,  
in varias distin-  
guitur species:  
aut enim alterū  
os

Carnea &c. ▲

Cartilaginea  
vel mixta, &c. B.

Cardinis more cū al-  
tero cōiungitur, vna  
de structura ipsa *γλῶσσος* vocata  
est: quæ quidem fit a-  
liquando inter duo  
ossa tantum, vel vno  
in articulo: & aliquā-  
do inter tria, vel duo  
bus in articulis:

Axis more in alterū  
inseritur, quod velu-  
ti rotæ rationem ha-  
bet, addito ipsius in-  
gyrum motu & ma-  
nifesto, veluti, si cir-  
ca axem rota moue-  
retur: Quod in prima  
& secunda cervicis  
vertebra apparet, cū  
superior ad proces-  
sum secundæ ita alli-  
getur, veluti rota ad  
axem. Hæc commis-  
sura proprio destitu-  
ta est noīe, verū imi-  
tationis gratia *τροχῶς*  
*ἄξος* appellari potest.

Cavum valdè, &c. C

Cavū leniter, &c. D  
Inter



19  
Inter duo ossa tantū, cūm alterum ex his ha-  
bet aliqd' cauū recipiēs, & pcessū aliqūē reco-  
ptum: ac vice versa alterū os pariter cauū re-  
cipiēs & pcessū receptū possidet. Quodqdē fi-  
ri potest, aut ī vna eadēne ossiū parte cū ma-  
gno ac manifesto motu, veluti ī cubiti arti-  
culo, vel ī secūdo & tertio, quo ossa digitorū  
cōiūgūtur: Aut ī varijs, distīctisq; horū duorū  
ossiū partib. cū satis īsigni motu, veluti in ra-  
dio & cubito simul iūctis. Quāq; aut hoc gen<sup>9</sup>  
articulatiōis vltimū γγγλυμοειδης verē nō  
sit appellādū, cū ī ipso vn<sup>9</sup> nō sit tātū articu-  
l<sup>9</sup>, sed gemini, alter qdē supior, alter verō īfe-  
rior: quorū vterq; ad suū gen<sup>9</sup> articuli refer-  
ri debet: ideoq; nos ī obseruādis istī<sup>9</sup> differē-  
tijs, aut pferēdis varijs exēplis nō īmorabi-

(mur.

Inter tria verō ossa sit. Cūm illud, qd' mediū  
est recipitur ab vtroq; extremo osse, veluti in  
forib<sup>9</sup> antiquorum cardinatis, cardo masculus  
appellat<sup>9</sup> recipiebatur ā fœmina infra supraq;  
Hui<sup>9</sup> cardinatē cōpagis exēplum adest ī maxil-  
la: cūm vtrūq; ipsius extremum caput ā caui-  
tatib. vtriusq; ossis tēporum excipiat<sup>9</sup>. Hac de  
causa Cels. hunc articulum cardinis modo fie-  
ri dixit. Fit etiā iter tria ossa, cūm illud qd' est  
medium alterum ex extremis recipit, ab altero  
verō recipitur: veluti fit ī ipsis vertebrib, q̄s π̄i  
κ̄iνα & π̄ ginglymum cōiungi dixit Hipp. 3. de  
Arti. tex. 34. & Galenus in lib. de ossibus. Cōiun-  
ctiōnes has auctoritate Celsi Hipp. ad cardina-  
tā commissuram retulit: cūm tamen re vera, si  
velimus vnicā ossis cū osse cōiunctiōē, & nō  
geminas simul obseruāre, nihil cū cardine si-  
militudinis habeāt.

¶ 2

Δ 18



Διάσπασιν vocat Galen<sup>9</sup> commissurā, quā  
 habet ἐναρξη κίνηση. Cuius auctoritati tantū  
 tribuo, v<sup>t</sup> hoc verum esse credendum iudicē.  
 Neq<sup>3</sup> id, quod dicturus sum, velim quāvis ad-  
 uersum hanc sententiam feratur, quod auda-  
 cia, aut peruicaciae potius, quā indicāda ve-  
 ritatis desiderio adscribas. Nam ego adduci nō  
 possum, vocem hanc ratione ipsius motus fuisse  
 huic generi articuli impositā. Rationem autē  
 audi. Ἀσπασιν frequenter apud Hippocratē, Ga-  
 leno etiā teste, alterū tantū atq<sup>3</sup> rotundū co-  
 hærentium inter se ossium significat. Aliquan-  
 do non rotundum, sed illud, quod cauum est,  
 atque rotundum excipit: rarō vtrunque simul,  
 vel integram cōmissuram notat. Ab hac voce  
 Ἀσπασιν deducta est, coniunctionem, atque cō-  
 missuram ipsorum Ἀσπασιν significans, quæ cō-  
 iunctio si arctē & sine vinculo medio fiat συ-  
 νάσπασιν, vocanda est. Quoniam vox illa σύψ,  
 ossium ipsorum maximā, firmissimamq<sup>3</sup>, quæ  
 suomet corpore fiat, iuncturā significat. Quod  
 si laxior sit ista articulatio, neque ossa suomet  
 corpore cōiungantur, sed ad hanc conseruā-  
 dam ligamentum, vel medium quoddam ne-  
 cessariō addatur, tunc διάσπασιν mea sentē-  
 tia est vocanda. Nam cum Ἀσπασιν v<sup>t</sup> dicebā,  
 significet per se coniunctionem ossium, addita  
 præpositione, δια, opus est, quod talis significa-  
 tio augeatur, vel imminuatur, vel in contras-  
 riū mutetur, aut motus aliū sue rei modus ex-  
 primatur, aut (quod rarissimum est) eadem pe-  
 nitus significatio maneat. Verū quāuis δια  
 in mixtione sensum imminuat, v<sup>t</sup> apud Hip-  
 po.



29

po. 3. de fract. tex. 51. in voce *ἡκινῆματ*, &  
 in verbo *ἡκινῆσθαι* apud eundem lib. 2. de  
 artic. tex. 12. quæ significant motum imminu-  
 tū, vt Galenus ipse 4. lib. de artic. cōm. tex. 441  
 testatur. In hac tamen voce non est dicendum  
*ἡκ*, diminuere, ita vt *ἡκῶσθαι* paruum arti-  
 culum significet. Deinde quamuis *ἡμφασιν*, at-  
 que intensiōem, aut modum perfectiorem si-  
 gnificet, vt apud Hipp. 2. de fract. tex. 68. in ver-  
 bo *ἡτείναν*, tamen in hac voce *ἡκῶσθαι*  
 vt i opinor, id non facit, cum hæc, nec perfecti-  
 or, nec etiā solidior species sit articuli, quā  
 illa, quæ contrā diuisa *συνῶσθαι* appellatur.  
 Quod autem nihil agat, nihilq; cum hac voce  
*ῶσθαι* significatum immutet, haud credides-  
 rim. Quid igitur dicendum? cum aliquid agat  
 in hac compositione, neq; significatum corrū-  
 pat, neque eundem immineat, augeátue. Non  
 ob id ego dixerim, motum manifestum, aut nō  
 manifestum adiunctum exprimere, sed potius  
 in hanc veniam sententiam, quod in hac voce  
 eandem vim seruet, quam quasi propriam ex-  
 tra compositionem habet. Nam vox ista quā-  
 dam veluti *μεισδρία* notat, quod etiam in ali-  
 quot alijs vocibus cōpositis facit, vt apud Hip-  
 pocratem in 2. de fract. tex. 37. in voce *ἡκῶ-  
 σθαι* apparet, dum loquitur de appendice supe-  
 riori ipsius tibiæ. Nam per *ἡκῶσιν* intelligit  
 partem quandam ossæam processus modo pro-  
 minentem in ipsa appendice, quæ inter capita  
 media femoris inferiora inseritur. Hæc eadem  
 vox etiam apud Galenū in 5. de admin. ana-  
 to. explicat lineam quandam neruosam, quæ  
 B 1 meo



22  
 media inseritur, ac distinguit inter musculos  
 abdominis rectos, & flexum illorum, qui the-  
 racem mouent. Quamobrem *διὰ τὴν ὁστέωσιν* etiā  
 erit coniunctio ossium per medium aliquod  
 compacta & laxior, quā sit ipsa *συνέπρωσις*.  
 Quod etiam hac ratione confirmare possum.  
 Nam in 3. de artic. comm. tex. 37. inquit *πρὸς ὅσον*  
*ἵππεσσι*, quod est quasi per commissuram appē-  
 sum esse, idem significare, quod *ἀνθρώπων*.  
 Præterea Hipp. 2. de artic. tex. 3. *διὰ τὴν ὁστέωσιν*  
 & *ἐκ τῆς ὁστέωσιν*, pro eodem posuit, quod etiam  
 in commento Galenus testatur. Vnde ex his  
 colligere possumus, fictis vocibus *ἐνέπρωσις*,  
*πρὸς ὅσον* & *διὰ τὴν ὁστέωσιν* eandem colligas-  
 tionem, in qua os ab osse dependeat, ex prime-  
 re. Et si dependet cum non alteri sua substantia  
 affigatur: opus est aliquod medium ligamētum  
 reperiri, quo id fiat. Sic q̄ *διὰ τὴν ὁστέωσιν* erit com-  
 missura per *μεσότητιν*, vt dicam mediationē  
 elicuius facta. Vltimò addamus, quod Hipp. lo-  
 co dicto, tanquam opposita opponit *διὰ τὴν ὁστέωσιν*  
 & *συνέπρωσιν*. Nam inquit, Mala quidem im-  
 mota manet, quia *συνέπρωται* quasi sua sub-  
 stantia, nec per aliud arctē infixā est capiti. Et  
 subiungit, non autem *διὰ τὴν ὁστέωσιν*, id est laxa  
 compage, & per aliud ligamentum coniungi-  
 tur, neque in his vocibus motum subintelligē-  
 dum censeo, quoniam absurdum hoc esset, Ma-  
 la immota manet, quia iungitur immobili cō-  
 missura, & non commissura motus magni, ac  
 manifesti, nam esset idem referre varijs verbis.  
 Quare rationibus his & ea præcipuē quod nul-  
 libi (quod meminerim) legi apud scriptores  
 Græ-



Græcos *Αἰδ*, motum manifestum, aut mag-  
 num significare. His inquam rationibus colli-  
 gam. *ἡ δὲ σφωσις* commissuram ossium esse in-  
 terueniente medio vel copula factam, quā tan-  
 dem motus magnus & manifestus, aut paruus  
 ac inmanifestus sequi possit. Nam dubium mi-  
 nimè est ossa ligamento coniungi, ut articulus  
 moueri possit, veluti illa, in quibus motus non  
 requiritur, non ligamento, sed suamet substan-  
 tia copulantur. Hæcque sententia in quam-  
 plurimis articulis intelligenda est, quoniam a-  
 liquot ex ipsis reperiuntur, qui ligamen-  
 to nexi, motu destituuntur, veluti  
 in pube, atque in lateribus os-  
 sis sacri, & fortasse eti-  
 am in fibula, ac  
 tibia.

B 4

Cauum



C

Cauū ualdē est,  
alterū uerò mul-  
tūm prominēs,  
quod in profun-  
dam cauitatem  
inſeritur, indē-  
que commiſſu-  
ra puenit, quæ  
tertia eſt Διάγ.  
ὅσος & ſpe-  
cies, uocatur-  
quæ ἰναρθρω-  
σις, quæ habet  
motum aut:

Paruum, aut non ualdē mani-  
feſtum, ueluti articulatio  
ſeptimi cum ſecundo & pri-  
mò oſſibus carpi.

Magnum ualdē et manifeſtū,  
ut in humeri articulo cum ca-  
uitate ſcapulæ, quā κοτύλη  
uocat Hipp. in tibia ac talo, in  
primo oſſe ad iūcturā manus,  
& radio. In prima etiam ar-  
ticatione pedis & manus.  
Sed omnes iſtæ ἰναρθρωσις  
leuioreſ admodū ſunt: illa  
autem, quæ reperitur in ſemo-  
re & coxa, perfectiſſima &  
exquiſitiſſima eſt.

Cauum



Magnus, uti inter primum et  
secundum pollicis os.

D

Cavum leniter  
est, alterum ue-  
rò leniter pro-  
minens, quibus  
simul copulatis  
fit ea species,  
quæ à prælo di-  
citur. Sub  
qua uariât etiâ  
articuli ratio-  
ne motus, qui  
aliquâdo adest,  
aut:

Paruus et manifestus, ut in  
articulis ossium metacarpi in-  
ter se, et cum quibusdam eti-  
am ipsius carpi.

[Nullo aut saltem paruo et  
immanifesto, ut inter prima  
pedis et tarsi ossa, ac in mul-  
tis alijs articulis cum tarsi, tunc  
carpi, quæ ita leui prælo di-  
iunguntur, ut nec tantillū mo-  
ueri possint, et quasi per har-  
moniam coniuncta uidean-  
tur.

B

5

Carnea,



## A.

Carnea, à qua quidem specie uinculi species quoq; fit *διὰ τὸ πῶς*, quæ *συσσῆνωσις* uocata est. Vnum autem est notandum, quod ista *συσσῆνωσις* duplex est: una, de qua loquuntur Chirurghi medici, quæ est restitutio solutæ continuitatis quodammodo in integrum, in quacunq; corporis parte, quæ fit crescente carne, atque cauum explente. Altera est, de qua loquuntur anatomici, quæ nil aliud est, quàm colligatio ossium extremorum simul carneo uinculo facta. Hæc q; de articulationis species est: quanquam Galenus improprie hæc inter species *συμφύσεως* ad illam Chirurgicā fortasse *συσσῆνωσιν*, quæ reuera *σύμφυσις* est, respiciens connumeret. In qua anatomica *συσσῆνωσι* illud etiam est obseruandum, quod carnosæ partes ad exornandos potius articulos additæ sint, uel adiuuandas ueras ac nerueas copulas, quàm quod ipsæ per se primò articulos coniungant. Hæc pariter diuidi potest in quatuor species ratione analogiæ ossium, quemadmodum diuidebatur *συνιπύρωσις*, ueluti in:



[
τῖττυλμορ, cuius exemplum reperitur in  
 ipsis uertebrais, cum musculi illi dorsales ipsas  
 simul colligare uideantur. Aliud exem-  
 plum est in radio & cubito, cum muscu-  
 li, qui pronam, aut supinam reddunt ma-  
 num, præter primum mouendi munus: con-  
 iunctionem etiam hanc cardinatam aliquan-  
 tisper coniungant.

τροχὸς δ' αὖ, cuius exemplum non ita in  
 promptu habemus, nisi dicere uelimus, mu-  
 sculos illos, qui septimo in loco à me enume-  
 rantur inter mouentes caput, uim etiam ha-  
 bere coniungendæ primæ uertræ ceruicis  
 cum secunda, inter quas talis dearticulationis  
 species continetur.

ζυὰρθωσρ, cuius exempla sunt in arti-  
 culo femoris & coxæ, nec non in illo, quo  
 humerus & scapula iunguntur: cum hi à  
 carnibus tecti colligari etiam quodammodo  
 uideantur.

ἀστὸς δ' αὖ, cuius exēplum in prōptu nō est.  
 Carti-



## B

Cartilaginea  
uel mixta copu-  
la ex nerui sub-  
stantia & car-  
tilagine, quæ  
mixta materia  
ὁμιχρὸν λεγέ-  
ται vocatur. Cū  
itaq; à cartila-  
gine iūgitur ar-  
ticulus σὺν-  
δρωσις uocatus  
est, cuius iuxta  
analogiā uariæ  
esse possunt spe-  
cies, ueluti:

ἰνὸν, cuius ob parti-  
tionē ipsam mentionē feci,  
nō quod exēplum inuenerim.

τροχὸν, de qua idē dici-  
mus, quod de cardinata specie.

ὀστρεὸν, cū paruo motu,  
qualis reperitur in articulo  
pectoris, cum iugulo.

ἀκροῦ, cum motu mani-  
festo, uti in articulo acromij  
& iuguli uel in articulis, qui-  
bus uertebraarū tantum corpo-  
ra inter se ligamēto cartilagi-  
neo coniūguntur, quanq; har-  
moniam tales articuli, quo ad  
pportionē, æmulētur. Sine mo-  
tu uerò ἀκροῦ erit, cōiun-  
ctio illa, quæ est inter os sacrū,  
& ossa iliū, & quæ inter ossa  
pubis repitur, etsi ista posteri-  
or harmoniā quoq; æmuletur.

Iam



Iam ad ossa reuertamur, & primùm ad caluariam ipsam, cuius formam naturalem satis doctè explicârunt anatomici omnes, atque vti hæc etiam variet, mouerunt. Verùm aliqui reperiuntur, qui quartam deprauatæ figuræ in caluaria speciem dari asserunt, eandemque proponi ab Hippocrate affirmant, à quibus ego libenter exorarem Hippocratis locum, in quo legere possim quartam hanc figuram. Nam cum Galeno consentio dari non posse, credoque me pariter vidisse Venetijs puerum quendam stolidum, qui pro exemplo quartæ huius figuræ proponitur, cùm tamen sui capitis figura ab hac multùm, meo iudicio, distaret.

Quare à te peto, cùm sis in hoc genere obseruationum valde versatus, vt si quam aliquando figuram huic similem videris, mihi significes, aut istud à Ioanne Baptista Capredono anatomico (vti nosti) exercitatissimo quæras, & locum Hippocratis, si in illum vnquam incideris, mihi demonstres, nam ingenuè fateor, ipsum ignoro.

In sagittali vocata futura obseruaui:  
quod



quod in omnibus puerulis, quos non paucos vnus anni secui, vsque ad narium ossa semper pertingit. Ita vt in omnibus puerulis, qui tenerrimi sunt, frontis os ex duabus constare partibus reperierim. In aliquot quidem vsque ad primum septenarium: in aliquot vero infra, raro in adultioribus reperi, semper autem ac perpetuo in ijs, qui annum vnum non accesserant. Neque adhuc obseruare potui, an vera sit anatomicorum regula: quod futura sagittalis producat vsque ad nares in ijs, quibus lata admodum & angulosa sit frons. Vti falsum esse optimè noui, quod hæc eadem futura sagittalis aliquando in infantibus occipitij os vsque ad medullæ spinalis foramen diuidat. Nam ego plurimos puerulos & vnus anni, & sex mensium, & duorum, & vnus quoque tantum ab exortu secui. Secui etiam & non paucos ante tempus maturitatis æditos, qui octo, aut septem, aut sex mensium spatium in vtero impleuerāt, neque vnquam hoc miraculum in his reperire potui. Cùm tamen in omnibus fermè, qui nōdum sextum vitæ mens-

sem



sem attigere, viderim occipitij os in extremo apice superiori quandam diuisionem continere, quæ ad sagittalem definit. Verùm nunquam hanc ad medullæ foramen pertingentem inspicere potui. Hocque illud vnum est, quod aut me, aut alios anatomicos (quod magis arridet) decepit. Quare hoc ita constituto ab errore minimè vindicari possunt, qui asserunt os, quod à lambdoide futura describitur, ex quinque, aut septem aliquando ossibus constare.

Sepenumero etiam miratus sum, quomodo fieri potuerit, ut proportio illa futurarum, ac prominentiarum capitis tradita à Magno Hippocrate, ita probata sit ab omnibus anatomicis, quorum ego notitiam aliquam habere potui. Quod omnes vno ore asserant, Quoties anterior capitis prominentia perit, perit & cornalis futura. Dum perit posterior prominentia, perit quoque lambdoidis futura. Cùm autem vtrique protuberantia deletur, ambæ etiam deletur futuræ, atque harum loco vnà reperitur, quæ mediū caput per longū, & altera, quæ medium per transversum fecat



secat, inuicemque se secantes  $\chi\iota\sigma\mu\acute{o}\nu$  faciunt, quem nostri decussationē appellant. Quæ opinio quantum à vero declinet, omnes, qui uti ego feci, in hac re laborare voluerint, apertè cognoscere poterunt. Nam primùm Ferrariæ, tùm Florentiæ, ac præterea ubicunque locorum mihi licuit, ingentes ossium acervos, ac strues maximas euoluere, hac potissimum de causa, plurimas caluarias, quæ penitus rotundæ essent uidi, cum omnibus futuris. Vidi infinitas propemodùm sine hac vel illa prominētia, in quibus tamen non deērat hæc vel illa futura. Vidi in aliquibus oblitteratam coronalem, & tamen prominebat frons. Vidi oblitteratam lambdoiden, & nihilo secius prominebat occipitium. Vidi etiam capita sine vlla penitus futura, nullæque deērant prominentiæ. Gloriari non possum, me vnquam vidisse decussationem illam in caluaria, neque hominem alloquutus sum, qui ipsam viderit. Præterea, ut ingenuè sententiam meam tibi aperiam, nunquam obseruaui aliquam futuram oblitteratam, ac ex toto delatam, nisi in caluarijs senum, si rectè senum caluarias



caluarias cognoscere potui, assumpto  
 veritatis argumento, à crassitie ossis, ac  
 duritie, atque ab ipsius caluariæ ampli-  
 tudine. Cùm igitur ob vetustatem tan-  
 tùm ipsius animantis hæreant futuræ,  
 quod symptoma procul omni dubio  
 non accidit in prominentijs capitis, non  
 video hanc necessariam esse consequen-  
 tiam: Occiput non prominet: ergo vacat  
 futura, vel vice versa: Deest hæc futura,  
 ergo & prominentia. Neque summope-  
 rè confirmat in hac sententia, quod vi-  
 deam in regione temporum, in qua tan-  
 tùm abest, vt adsint prominentiæ, quod  
 ibi maximè caluarię oēs sunt depresso, a-  
 desse futuras manifestissimas, & satis per-  
 uias. Neque datur locus obiectioni,  
 quòd futuræ hæ non sint, neque futu-  
 rarum nomine ab antiquis, præcipuè  
 ab Hippocrate donatæ fuerint, quod  
 in 9. de usu part. notauit Galenus. Quo-  
 niam potissimùm futurarum vsum ha-  
 bent, cùm ligamentum & vasa, quibus  
 περιεργασίον, & dura membrana cerebri  
 iunguntur, admittant: atque ab Hip-  
 pocrate (si liber de locis in homini-  
 bus Hippocraticus est) futuræ vocantur.

C Quam-



Quamobrem enixè à te peto, atque ab omnibus alijs doctis viris, vt quid de hoc dogmate statuendum sit, quærant, ac publicis in monumentis librorum collocent.

In quinque ipsius capitis proprijs futuris, consentio cum alijs anatomicis. In sexta tamen ab aliquibus proposita dissentio. Primò, quia illa futura non est, sed potiùs harmonia quædam, etsi hoc quidem leue sit. Secundò, quia cùm os illud ad cribri imaginem formatum non tantum capiti, aut cavitati caluariæ inseruiat, sed etiam narium amplitudini ea sui parte, qua spongiam exprimit, & spongiosum ob id ab Hippo. est vocatum, ac simul cavitati vtriq̃ue oculis continendis destinata famuletur, ea parte, quam diuinus Vesalius opinatus est, esse os distinctum, ac pro tertio malarum recensuit, cùm tamen re vera istius cribri ossis communis sit pars. Nam cùm multiplex sit, cribrosa parte ipsi capiti, spongiosa narium cavitati, plana verò ac lata oculorum sedi inseruit. Quamobrem si futura diuidens os *πολυμορφον* vocatum, à reliquis ossibus non inter proprias capitis, sed inter com-



communes futuras connumeratur, pariter hæc pro sexta propria non est censenda, cum os vel rectius partē ossis describat, quod capiti & maxillæ commune est. Si quis autem istius ossis veram imaginem cognoscere voluerit, non ipsum perpendat in adultis tantum, in quibus cum difficile à reliquis auellatur, frangitur, sed in puerulis vnius anni, nam in his luce meridiana clariùs cognoscet. Et tertium malarum os dictum & spongiosum, & illud, quod cribrosum appellamus, esse vnius, atque eiusdem ossis partes, quod etiam in adultis percipere poterit, sed magna opus est diligentia, videbitque, quantum decipiantur ij, qui nituntur ostendere, duo ossa spōgiofa ab hoc cribro distincta, quæ aliquando à carie Gallica exedantur, cum partes annexæ & connatæ dicto ossi sint.

Occipitij os tribus ex partibus constare proditum est. Vna quidem, quæ à foramine medullæ spinalis incipit, ac desinit ad fines basilaris vocati ossis. Quod autem reliquū est totum, à sagittali futura diuisum constat in puerulis duabus ex partibus. Alij publicè in scholis aliquan-



do afferunt, hoc os ex quinque partibus,  
vel ex septem in puerulis cōstare. Quod  
vtrunque, ni decipior, à veritate alie-  
num mihi videtur. Quoniam in omni-  
bus puerulis, quasi vsque ad integri an-  
ni finem, quatuor tantum partes reperi-  
untur. Neque ex pluribus, aut paucio-  
ribus natura debuerat hoc os compin-  
gere, vt apertissimè constabit: cū in  
opere magno vsus diuisionum & ap-  
pendicum ipsorum ossium, quæ postea  
obliterantur, leges. Dictæ autem partes  
hæ sunt. Prima est tota ea ossis amplitu-  
do, cui hæret cerebellum, quæ uè a veris  
lambdoidis cruribus continetur. Hæc  
semper vna est, neque vnquam in du-  
as partes diuisa. Quamuis in summo api-  
ce aliquando sectio quædam, sed bre-  
uis admodum appareat. Huic adduntur  
secunda, & tertia, quæ foraminis magni  
latera efformant, & *κρημὴν* vocatas emi-  
nencias continentes, ab additamentis  
lambdoidis futuræ describuntur. Quar-  
ta, ac vltima pars ea est, quæ secundam  
& tertiam copulans foramen antero-  
ri in parte perficit, describiturque hæc  
ab extremis additamentis lambdoidis,  
atque



37  
atque linea illa , quæ additamenta dicta coniungens , occipitij os ab axillari distinguit. Hæc ab alijs anatomicis dissentiens obseruauit.

De mammillari capitis processu gemino loquentes anatomici, in hæc communem veniunt sententiam. Quod factus sit non solum pro inferendis musculis quibusdam, qui caput mouet, sed etiam, ut sua ampla cauitate, qua insculptus est organis, auditorijs inferuiat. Quod vltimum non vnde quaque a me probatur, cum in puerulis auditus organum (sicuti reliqua sensuum instrumeta) integerrimum sit, quod probant prima, secunda, & tertia cauitas, incus, malleolus, & stapes ossicula minima, quæ partes omnes integerrimæ sunt, neque per transfuersum pilum in puero vnus diei distant ab iisdem in sene decrepito. Cum itaque integrum & perfectum sit organum, atque mammillaris processus. tunc temporis fermè nullus sit, nec cauernas habeat, non dicendum est, quod concameratæ illæ cauitates, quæ postea succedunt, ob auditorium organum sint factæ: quoniam necessario antequam dictæ cauernæ

C 3      inscul-



insculpantur, ipsum organum imperfectius fuisse fatemur, quod tamen minimè fateri debemus. Quare sequetur eundem usum has habere, quem reliquæ cavitates possident, quæ in basilari osse, atque malis post ortum sensim sculpuntur, cùm eadem ratione atque eodem tempore fermè fiant. De hoc autem usu alibi dicam.

Prope mammillares processus, scio quod obseruâris geminas, veluti acus osseas, quas anatomici fermè omnes processus vocant, atque *πλκκτρά* à calcariis effigie, vel *γραφουδῆς* à scriptorio calamo, vel *συλοειδῆς* à columnæ figura, & rectitudine appellant. Quamuis non desint inepti, qui *συλοειδῆς* scriptorio stylo similes interpretentur. Has acus *βελονοειδῆς* etiam dictas, non esse processus (vt suprâ quoque notavi) assero, sed appendiculas. Nam in nuper natis pueris osseæ non sunt, sed cartilaginee, dumque augescunt corpora, ipsæ etiam crescunt, osseæque fiunt, atque ad quartam fermè annorum septimanam usque per diuturnam elaxationem, vt accidit in appendicibus tenerrimorum ossium de-



dehiscunt, separarique possunt, quod nunquam in veris processibus accidere reperiēs.

In ossibus temporum plurima sunt antra & cavitates, inter quas tres sunt præcipuè, & magni momenti factæ à natura, ut auditus ipsius organa, & neruum anatomicorum expansum, purioremque innatum, aut complantatum ab istis vocatum aërem contineant. Hæ ab aliquot anatomicis satis imperfectè, ab aliquot verò falsò descriptæ sunt. Igitur quales sint, audi: & uti collocata in se organa contineant. Incipiam primò ab exterioribus, atque ab illo præcipuè meatu, qui  $\pi\epsilon\sigma\theta\alpha\kappa\epsilon\varsigma$  dicitur. Hic meatus (loquor de parte ossea denudata à perioestio, atque à cartilagineo auriculæ canali) dum formatur à natura osseus annulus est, distinctus à reliquis subiectis partibus ossis temporum, qui ut ego obseruaui, in caluarijs puerorum fermè vsque ad septimum mensem per cocturam seiungi potest. Quoniam cartilagine (ut multæ aliæ appendices) reliquo ossi incrustatus est. Huius rei causam fuisse opinor, mēbranulā tympani, q̄ in



intimo meatu, primâq; cauitate reperi-  
 tur. Nam vt illa in formatione mollius  
 aliquod haberet principiū vnde texe-  
 retur: natura hoc interstitium cartilagi-  
 neum inter os reliquum & meatum, vel  
 annulum dictum apposuit, cui sublimi-  
 retur membrana. Extēditur autem ipsa,  
 non per transuersum, sed obliquè, velu-  
 ti, si scriptorium calamum ea parte, qua  
 derafum & attemperatum dicitur, ten-  
 sa membrana obstruamus: hæc enim nō  
 per transuersum, sed obliquè calamum  
 claudet. Idem fit à membrana in hoc na-  
 turali meatu, qui postea oblitterata cru-  
 sta vnitur reliquo ossi & crescit, canalis-  
 que ossi effigiem integram exprimit.  
 Causa autem istius obliquæ positionis  
 membranæ est (vti opinor) primò, vt mē-  
 brana magis recta respiceret cauitatem  
 primam, quæ ipso meatu elatior est, de-  
 inde, ne illius aër, aut aqua, aut quic-  
 quam aliud, quod meatum ingrediatur  
 recta hanc membranam petat, ipsamque  
 lædat. Ictus enim obliquus minùs lædit,  
 quàm qui recta fertur. Ab hac itaq; mē-  
 branula, quæ myringa auris vocatur à  
 barbaris falsè credentibus, ipsam à tenui  
 cere-



cerebri meninge oriri incipit prima  
 cauitas, maiorq; alijs duabus, quæ tym-  
 panum semper à me vocabitur, ob eam,  
 quam habet cum militari tympano si-  
 militudinem. Locus istius præcipuè est  
 inter radices mamillaris processus, & se-  
 dem illam, cui caput maxillæ inseritur  
 ad articulum. Atque principium pro-  
 cessus illius, qui petrosus vocatur, ma-  
 gisque in interna caluaria conspicuus  
 est, insculptum in intimis præcordijs  
 hoc tympanum continet. In tympano  
 tria sunt obseruanda. Primùm, ossicula  
 tria. Secundùm, fenestræ geminæ. Terti-  
 um, canalís quidam, veluti aqueductus:  
 quibus tanquam  $\pi\acute{\alpha}\rho\epsilon\pi\rho\upsilon\pi$  quarto in loco  
 addi posset corpus quoddã, quod veluti  
 nerueum filum videtur. Tria autem ea  
 ossicula sunt admodum parua, & inter  
 se duobus articulis compacta, in qui-  
 bus incrustatio cartilaginosa eadem a-  
 dest, quæ in reliquis articulorum gene-  
 ribus reperitur. Hæc antiquis anatomi-  
 cis (si eorum scriptis fidem præstamus)  
 ignota fuere, primusque, qui in lucem  
 produxerit, fuit Iacobus Carpenfis, pri-  
 mus quoq; pcul omni dubio anatomicæ

C 5 artis,



artis, quàm Vesalius postea perfecit, restaurator. Nam in isagoge anatomica, & in commentarijs in Mundini anatomicen luculentam duorum ossiculorum mentionem fecit, quorum historiam postea diuinus Vesalius expoliuit, atque alterum quod prius est malleolum, alterum verò incudem à similitudine appellauit, simulque optimè descripsit. Tertium (si nolumus debita laude quenquam defraudare) inuenit, ac promulgauit primus Ioannes Philipphus ab Ingrassia Siculus Philosophus, ac medicus doctissimus, dum Neapolitano in Gymnasio publicè anatomicen doceret, atque etiam theoricam & practicam (vt aiunt) medicinam profiteretur. Nam vir ille, vt patet ex ipsius scriptis æditis, ita in omnibus artis nostræ partibus exercitatus est, vt consummatissimus medicus cum sit, meritò etiam haberi, & dici possit. Qua autem ratione tertium hoc ossiculum postea diuulgatum sit, audi. Anno Domini millesimo quingentesimo quadragesimo octauo, quo ego primùm Pisis profiteri cœpi, cum neque à Vesalio, qui multò antea, neque à Columbo

ciuo



ciue tuo, qui anno proximè superiori anatomem Pisis tractauerat, nulla fuisset facta mentio istius ossis, dum eam ego celebrarem, ad me venit quidam auditor meus iuuenis doctissimus, qui (si rectè memini) doctoratus ornamentis iam insignis erat, Ingrassiæque affinitate coniunctus (nomen nunc memoria haud retineo) hicque me monuit Ioannem Philippum tertium officulum in tympano inuenisse, quod stapedis nomine ob figuram appellârit. Ego hac re commotus, adhibito maiori studio officulum lætus inueni, statimque publicè protuli, omnibus admirantibus. Atque præterea Bartholomeo Madio sanctissimæ memoriæ medico doctissimo ac celeberrimo, per epistolam communicaui, scripsi etiam de hac re quibusdam amicis, qui Romæ erant, de qua, vt rescripsere, à Columbo, qui paulò antè anatomem tractârat, nihil audiuerant, neq; ab vlllo alio, cùm in Italia tunc tēporis, vno excepto, Ioanne Baptista Cannano medico & anatomico celeberrimo, nullus alius præter dictos reperirent, qui doctè anatomem publicam docere potuisset. Hæc vera



vera est diuulgati inuenti historia . Et quamuis aliquādo meum hoc dixerim, alijque illud idem de se affirmārint: Deus tamen gloriosus scit, Ingrassiē fuisse inuentum. Atque cū stapedis, aut stafæ nostrorum patrum effigiem gestet, meritō stapedis nomine ab eodem fuisse donatum . Nam superiorum temporum stapedes erant veluti triangulares orbes, sine alio distincto foramine, per quod postea in nostris additum lorum traduceretur: situs istorum ossiculorum est talis . Malleolus, qui prior est, caudam vel pediculum insertum membranę interna in facie habet, caput verō sursum tollitur versus anteriora. Huic capiti insidet incus, vel dens secundum ossiculum ea sui parte, quę latior est, & leni quadam cauitate tuberculum dictum excipit . Cumque incus gemina crura possideat, altero quod breuius, crassiusq; & elatius est, hæret parieti ipsius tympani, ea in parte, qua aquæductus labitur: altero verō oblongiori, graciliq;, ac decliui cōiungitur cū stapedis apice: qui quidē stapes sua basi alteram, quę est superior, tympani fenestram claudit.

Extrema



**Extrema** verò horum ossium, quibus in articulum coagmentantur, cartilagine, vti dixi, illita sunt, ac mollibus quibusdam membranulis ligamenti vice colligantur, mobiliaque sunt. Nam agitata, vel concussa myringa malleolus mouetur, & incus, & stapes, aut aperto sinu acu quadam vno ex his ossiculis agitato, reliqua duo simul etiam consentiunt. Si locus hic mihi concederet, vt possem sententiam meam de sono diffusè & clarè explicare, quis sit vsus istorum ossium, & fortasse verus proponere: sed nimis longū esset & ab instituto alienū, ideo alibi hoc scriptū reperies.

Secūdum, quod in hoc tympano obseruare debes, geminæ sunt fenestræ. Altera elatior & quasi in media concameratione tympani collocata, quam stapedis basis claudit: Figura istius oualis penitus est, quæ aperta definit in secūdā cavitatem, quam labyrinthum nominabo. Altera verò humilior est, rotundaque & ad posteriora cavitatis declinans, quæ per os penetrans in geminum canalem aut viam finditur, quarū viarū vna in dictum labyrinthum, altera in tertiam

cavita-



cauitatem cochlearem, vel cochleam à me dictam tendit, hæc secunda fenestra nullo osse clauditur, cùm tamen prior stapedis basi semper clausa maneat.

Tertiùm, quod ego obseruatione dignum existimo, canalis quidam osseus est, qui recto huius cauitatis quasi subte ditur, exitque extra caluariam post radicem clariùs inter illam, ac mamillarem processum. Principium autem ipsius est intra caluariam. Nam si rectè inspicias, videbis quintum par neruorum, à reliquis anatomicis ita vocatum, extendi ad medium fermè processum ossis temporum, quem internum atque petrosum appellamus, illuc tensum hoc par ingreditur in canalem quendam insculptum, in quo latens in duas finditur partes, alteram quidem magnam, alteram verò parvam & gracilem valdè duriolemque. Hæc posterior perforato osse occulto quodam canali, versus anteriora capitis serpît: deindè reflexa, tympanumq; ingressa, proprio hoc canali osseo deorsum & posteriora versus ad pinna ipsius auriculæ radicē erūpit, & disseminatur, vt suo loco dicam, Via igitur  
istius



istius nervi canalis hic est, de quo lo-  
 quor, & aquæductum à similitudine ap-  
 pello, quem mea sententia non bene  
 nōrunt reliqui anatomici, cū tortuo-  
 sum, vel capreolarē, vel cochlearem ali-  
 quando esse dicant, aut quod peius est,  
 cæcum meatum etiam appellent: non si-  
 ne errore: cū sciant cæcum vocari  
 intestinum, quia aditum habeat, exitum-  
 que minimè. At sic meatus exitum ha-  
 bet manifestiorem ipso aditu. Quod si  
 tertiam cauitatem cochleam à me dictā  
 cæcum meatum (cū nullum veluti co-  
 chlearum testæ exitum habeat) appella-  
 rent, rectè quidem facerent, verū ab  
 isto meatu nullus postea nervus labi-  
 tur ad exteriora à quinto pari, vt fit per  
 dictum aquæductum, vel canalem. Hæc  
 curato mi suauiissime pater, vt Capredo-  
 nus noster, qui alter Herophilus in ana-  
 tome mihi videtur, summa diligētia de-  
 lecta tibi exponat, quoniam voluptatē  
 non leuem hinc percipies.

Quartū, quod *πάρεστρον* appella-  
 ui, cū ad ossa minimè pertineat, quodq;  
 in hoc tympano obseruandum videtur,  
 est filū, vel chorda quædā tenuissima,  
 quæ



quæ per medium tympanum percurrēs incumbit, vel attenditur illi articulo tantum, quo stapes cum altero crure incis dis copulatur. Quidam neruulum id esse opinati sunt. Ego quid sit, apertè fateor, ignoro. Aliquando arteriola, aliquando neruus videtur, pro neruo quidem ostendi, verum, ut dixi, hæsitans, atque pro neruo in posterum indicabo, donec in meliorem sententiam animus inclinet. Tu pro acerrimo tuo ingenio enitêris veritatem discutere, atque discussam mihi communicabis. Hæc verò satis sint de tympano.

Secunda cavitas illa est, quæ labyrinthus potest appellari, in radice petrosi processus insculpta. Ab hac tres cuniculi oriuntur, & in eandem redeunt circulares penitus, à quibus nomen accepit ipsa cavitas. Quorum unus est inferior, qui ab anteriori parte cavitatis diuertēs versus exteriora, ac deinde reflexus in eandem cavitatem per posteriorem angulum recurrit. Alter cuniculus oritur ab eodem anteriori cavitatis angulo, sursumque elatus, quasi ad ὀφθαλμοειδὲς facto semicirculo iterum in cavitatem per angulum



gulum posteriorem regreditur. Tertius oritur & occidit, aut finit in posteriori angulo cavitatis, nam inde ortus, perforatoque osse circulari quodam canali exteriora versus, illuc item reuertitur. Cum igitur hæc cavitas valdè minor priore tot habeat meatus & cuniculos, meritò labyrinthus dicetur, in quam prospicit fenestra ovalis clausa à stapede, & altera orbicula, quæ etiam in cæcam cavitatem tendit, de qua iam loquar.

Est itaque tertia dicta cavitas valdè minor duabus superioribus, atque insculpta reperitur in eodem processu petroso, in latere ipsius anteriori, interque hanc & canalem illum, in quem primùm quinti paris nerui gemini, durus scilicet & mollis integri ingrediuntur, tenuissimum quoddam intestitium osliū continetur. Nam in eodem situ partes sunt, verùm canalis in medio processu, cavitas verò in anteriori ipsius latere est collocata, quæ duobus aut tribus gyris in morem cochleæ constat, neque exitum habet. Vnde cochlea, vel cochlearis cavitas, vel cæca etiam est dicenda. Hæc in intima superficie veluti etiam secunda

D caui-



cauitas & cuniculi eiusdem, & omnes etiam dentium naturales cauitates, membranula quadam molissima ac tenuissima vestiuntur, quæ an sit neruus expansus, an aliud, non refert. Hoc tamen certò scio, tria aut quatuor reperiri foramina minima, quæ in tertiam hanc & secundam cauitatem pertingunt à canali dicto, quem primùm nerui quinti paris subingrediuntur per hos meatus paruos neruuli à quinto pari dictæ membranæ communicari, aut ipforum facultas & vires possunt, vel quod verisimile est, à dictis propaginibus membranula ortū ducit. Summa verò diligentia & arte ista veniunt tractanda. Quoniā meatus dicti ita parui ac exiles sunt, vt vix capillum aliquando admittant. Principium verò cæcæ cauitatis oritur à secunda illa fenestra vel meatu, quem secundo in loco in tympano descripsi, qui que bifidus effectus in labyrinthum quoque declinat. De vsu verò & causis horum omnium alio in libro dicam.

Ad octauū os capitis ita ab anatomicis vocatum venio, ὀστέον à græcis dictum, quod mutilatū suis partibus, cū commune



commune fit capiti & maxillæ, tantum  
 inter propria capitis recensuerunt. Nam,  
 ut supra quoque à me dictum est, parte  
 ea, quæ cribrum foraminibus emulatur,  
 caluariæ cavitatem explet. Illa verò, quæ  
 ὀστέον vocari potest, & à qua fortasse  
 Hippocrates totum os ὀστέον appellauit,  
 ad narium cavitatem formandam con-  
 currit, atque etiā oculi cavitatem, quam  
 orbitam appellant. Nam os illud, quod  
 à diuino Vesalio tertio in loco recense-  
 tur inter illa, quæ malas explent, per se  
 distinctum os non est, sed pars ipsius  
 spōgiosi, spongiosum verò totum ad-  
 ditamentum est, vel pars coli: quem-  
 admodum etiam processus ille medius,  
 qui descendens partes narium superio-  
 res discriminat, eiusdem coli pars cen-  
 senda est. Hæcque meridiana luce cla-  
 riora sunt, quàm ut probatione egeāt.  
 Quamobrem totum os ὀστέον quadrup-  
 lici partium genere constabit. Prima sit  
 processus ille superior, qui iacet inter  
 papillares cerebri processus, vera odora-  
 tus instrumenta. Secunda pars illa, quæ  
 cribri modo perforata est, sustinetque  
 membranā iisdē foraminibus peruiam.

D 2 à qua



à qua parte totum os cribri vel coli nomen sibi acquisiuit. Tertia sit processus alius in inferna parte situs, qui priori ex aduerso respondet, partemque narium superiorem distinguit. Quarta est spongiosa pars, atque cauernulis prædita, à qua totum (vt dixi) os etiam *σφουδα* fuit vocatum, quæue vtrunque narium superiorum cauitatem explet, oculique intimam orbitam perficit, quod os distinctum omnes anatomici numerârunt, atque etiam indicârunt in publicis dissectionibus, ijs exceptis, qui à me admoniti, aut à meis auditoribus errorem agnoscunt, maleque prætereà erga me grati sunt. Cùm igitur colum tot particulis constet, etiâ in tenerrimis puerulis, totq; efformandis partibus inseruiat, inter communia ossa erit recensendum, non autem octauo in loco inter ossa capitis tantum. Vsum, situm, & compages dicti coli præsens locus nõ requirit, eoque minùs, cùm à Vesalio hæc optime explicata sunt.

*Σφουδα* os describentes anatomici prætermiserunt, quod in generatiõe ex quatuor partib' cõstat, quæ sensum possent



stea ita connascuntur, vt cum infans ad  
septimum mensem, post ortum suum per-  
uenerit, vix distinctæ appareant. Partes  
autem hæ ita scribantur. Prima atque  
eadem crassior est, quæ quasi vera basis  
totius ossis videtur, mediamque pro-  
pemodum basim capitis occupat, &  
transuersa linea dirimitur ab extremo  
additamento ossis lambdoidis. Huius  
tanta est longitudo, quanta est magni-  
tudo sellæ, quam insculptam habet ad  
continendam glandulam, quæ ex in-  
fundibulo cerebri pituitam colligit  
secundum anatomicos. Eadem cum se-  
cunda parte copiosa cartilagine copu-  
latur, quæ quidem secunda pars ea pe-  
nitus est, cui visorij nerui simul copu-  
lati primò hærent, atque disiuncti, dum  
oculos petunt, foramina inurunt. Hæc  
veluti alas geminas osseas possidet de-  
xtram & sinistram rimam efficientes,  
quæ maximè omnium in intima oculi  
cauitate apparent, atque transitum se-  
cundæ neruorum coniugationi, dum  
oculos petunt, atque aliquot alijs ter-  
tiæ, quartæ, & octauæ propaginibus  
ministrant. In hac eadem secunda par-

D 3 te



te in pueris (quamuis spongiosa sit) nulla adest cauitas, aut sinus vsque ad integrum annum. In adultis verò geminus reperitur & satis amplus, qui post primum exactum annum fieri incipit, & pro ossium incremento magnus, aut paruus adest. Hic quoque sinus vestitur tenuissima quadam membrana, aut pellicula, veluti vestiuntur etiam cauitates geminae, quæ in osse frontis & malis contentæ sunt, quæque pariter in nuper natis caluarijs non reperiuntur, sed interea, dum adolescunt ossa fiunt. In dictis sphenoidis sinibus quædam anatomicorum sententiæ non placent. Quarum vna est, quod in ipsis pauca & mollis admodum medulla contineatur, hoc autem nunquam videre potui, sed semper aut vacuos inueni, aut pituita quadam viscida imbutos. Alia sententia est à quibusdam publicè promulgata, quòd sinus hi cum sinibus ijs, qui gemini in osse frontis supra oculos & nares continentur, sint continui, quæ sententia falsa est, quoniam, vt illi in superiorem anterioremue narium cauitatem declināt, ita hi in eādem amplitudinem posteriorem



rem prorumpunt, spatiumque duorum  
 transuersorum digitorum in adultis in-  
 ter hos iacet, quod totum ab osse spon-  
 gioso occupatur. Tertia & magis suspe-  
 cta sententia est quorundam aliorum,  
 nempe, quod aër attractus per nares in-  
 grediatur cavitates geminas frontis, i-  
 bi que tamdiu seruetur, donec fluat ad  
 hos sinus à quibus ad cerebrum idem  
 aër attrahitur pro materia spirituum. Hanc  
 sententiam coarguit, & ridiculam indi-  
 cat defectus dictorum omnium sinuum  
 in pueris per integrum annum, & aliquan-  
 do etiam diuturniore temporis spatio,  
 in quibus tamē spiritus naturales recre-  
 antur. Ex his ego colligo licere cuique  
 philosophari, at non semper sine errore.  
 Verum redeamus ad secundam partem  
 dicti ossis. In hac, qua respicit palatum,  
 quidam clauus, & ceu palus osseus inest,  
 cui affigitur os satis longum ac latum in  
 ortu cartilagineum, vomeri vel cultro  
 potius in aratro vomer præeunti si-  
 mile, quod ab aliquot anatomicis negle-  
 ctum magnam operam in distinguenda  
 narium cavitate dextra & sinistra præstat.  
 Succedunt postea tertia & quarta pars,

D 4 quæ in-



quæ invicem simillimæ sunt, vna dextra, alia sinistra, in his sunt processus alati, & quicquid inter illam primam oblongam in oculorum cavitate positam, atque osse temporum continetur. In dictis quoque partibus sunt foramina illa, per quæ quinti paris nervorum propago minor, secundum diuinum Vesaliū defertur ad temporum musculos, item illa, per quæ secundum eundem maior portio tertij paris & totum quartum par deferuntur ad linguam & palatum (quanquam hæc aliter multò se habeant, vt in explicatione dictorum nervorum audies), Item illa, per quæ vera ramuli arteriæ soporalis per membranam duram distribuendi feruntur. Hæ partes vna à dextris, & altera à sinistris cartilagine colligantur cum prima tantum parte ac solidiore totius cunei formis, deinde versa in os cartilagine ita connascuntur, vt ex tot partibus vnum tantum os *πολύμορφον* meritò dictum resultet, cuius profectò si à me dictis ea addes, quæ optimè à reliquis anatomicis tradita sunt de ipsius figura, situ, atq; usu, integrā historiā habebis.

In os-



In ossibus capitis, & in futuris illis, quibus iungitur aut proprijs, aut communibus, quædam alia addere possem, quæ cum non sint admodum magni momenti, prætermittam, atque ad malas ipsas descendam, vno hoc interim obseruato, quod frontis os in pueris semper geminum est, à sagittali diuisum per integrum annum, & aliquando etiam vsque ad septennium diuisio hæc apparet, quæ postea coalescentibus ossibus obliteratur, atque rarissimè in adultis reperitur.

In numero ossiũ malarum (loquor de proprijs) primò à relijs anatomicis dissentio. Nam diuinus Vesalius tertium addit in utroque latere, positum in oculi orbita, quod pars coli est, quare his demptis decem tantum erunt descripta ossa ab ipso. Aliquot alij sunt, qui ut numerum augeant, ac tredecim ossa numerent, spongiosa illa duo addunt, quorum mentio facta est in cribro, seu collo: verum uti constat decipiuntur, cum illæ sint communis ossis partes, non autem propria malarum ossa. Quare ego certò assero, vndecim tantum esse ossa malarũ:

D 5 Pri-



Primum, secundum, quartum, quintum,  
& sextum Vesalij, oblitterato tertio, quæ  
postea ingeminata decem sunt, hisque  
addatur illud, quod vomeris figura con-  
stat, ut undecim fiant.

In futuris etiam malarum dissentio,  
primum à Galeno, quoniam futurarum  
enumeratio, quam ipse in libro de ossi-  
bus facit, falsa est non solum in homini-  
bus, sed etiam in simijs, canibus, & bru-  
tis ferè omnibus, quæ ego videre potui.  
Quamvis ab aliquot anatomicis falsa in  
hominibus, at in simijs, & canibus vera  
dicatur. Præterea dissentio ab ijs, qui  
publicè testantur, reperiri futuram sub  
palato pertransuersum ad vtrunque ca-  
ninum pertinentem, quæ in pueris pa-  
tet; in adultis verò ita oblitteretur, ut nul-  
lum ipsius relinquatur vestigium. Nam  
reperio hanc diuisionem, vel rimam po-  
tius esse, quàm futuram, cum os ab osse  
non separet, neque in exterioribus ap-  
pareat, vel cum os cum osse non con-  
iungat, quod futurarum munus est, si  
sub articulo contineri debent. Præterea  
non mihi videtur hæc diuisio magis cõ-  
spicua in pueris, quàm in adultis, in qui-  
bus



bus paucissimis, atque ijsdem senioribus vidi hanc esse oblitteratam. Vltimò addam in quarto, secundum Vesalium, malarum osse reperiri cauitatem insignem, & ita amplam aliquando, vt in illa articulus vltimus pollicis ipsius manus delitescere possit. Hæc in pueris nulla reperitur, illis crescentibus postea fit, atque tenuissima pellicula interna in facie vestitur, ac sæpè ac sæpiùs muco repleta est. Quis autem sit vsus huius & aliarum cauitatum, quarum mentionem feci, aliàs dicam.

In maxillæ partibus maximam illam controuersiam legisti, quæ inter Vesalium & Galenum ipsum versatur? Hic enim ex duabus partibus constare asserit: ille ex vna tantum, quid ego obseruârim, dicam. In omnibus puerulorum cadaueribus, quæ ego secui, annum non excedentium, reperi maxillam semper constare ex duabus partibus osseis copiosa cartilagine medio in mento coniunctis, ita, vt cultro molliter per medium currente seiungi potuerint. In ijs verò, qui annum excesserant, magnam adhuc istius diuisionis partem repperi. In aliquot  
etiam



etiam, qui septennēs erant vestigia adhuc quædam inerant. Idem mihi accidit secanti caudatæ simiæ pullum, hîc in Italia ortum, nam dissectam maxillam in mento reperi. In omnibus autem alijs caudatis & non caudatis simijs, quas plurimas secui, integrâ semper repperi, vti feci in omnibus hominibus vltra septimum annum mortuis. Quamobrem pro Galeno dici posset, ipsum de tenerima maxilla loquutum fuisse. Quòd si aduersarius respondeat, non decere dogmata de imperfectis partibus assumere, sed de perfectis esse tractandum, Addas, hac quoque causa, errâsse omnes anatomicos, qui de appendicibus ita diffusè loquuti sunt, cùm ille in imperfectis tantum ossibus, non autem in adultis reperiuntur.

Sed vellem, vt mecum obseruares, mi doctissimè Petre, miram alueolorum in malis & maxilla quoque naturam, quæ ea est, vt cùm ossea sint, cerea tamē propemodùm videantur, nullamque stabilem formam aut numerum habeant. Nam ex his quidam renascuntur, quidam pereunt & obliterantur, quod fortasse



tasse incredibile videtur. Ac scias me hæc haud finxisse, sed in quàmplurimis sectionibus priuatis ac publicis diligentissimè obseruata meis oculatis auditoribus indicasse. Talis autem est istorum alueolorum natura. Quotiescunque aliquis dens euellitur, neque nouus repullulat, alueolus statim ille constrigitur, atque consolidescit, nullumque ipsius vestigium apparet. Imò si cadat dens vnus, ac nouus pro ipso subrogetur, nouum pariter priori oblitterato sibi excauat alueolum. Ex quo ego colligo, quòd vti vsque ad extremum seniũ in dentibus remanet virtus, qua crescāt & formam capiant: idem etiam in malis & maxilla accidit, ideoque circa septuagesimum annum aliquando erumpentibus genuinis dentibus noui formantur alueoli, & in vltimo quoque senio cadentibus ipsis, alueoli occecātur, quòd non fieret, nisi viuifica illa vis formatrix, adhuc in ossibus viuens, reperiretur.

Ad dentes venio, in quibus dimittam disputationem de numero ipsorum, & radicibus, quibus hærent: sed descendā formationem, in qua vnum obseruavi,  
quod



quod omnes dentes in se habent cauitatem magnam, aut paruum pro ratione molis ipsorum, quæ cauitas linitur quadam membrana tenuissima, exactissimoque sensu prædita, quæ in causa est, ut dentes sentire videantur. Hinc est, quod caloris & frigoris sensum habet: humidi autem vel sicci nullum, neque etiam solutione continui dolent, nisi hæc ad membranâ pertingat. Rationem puto hanc esse, quoniam duri aut molli, aut sicci vel humidi qualitas statim non communicatur membranæ, & ideo nullus sensus adest. At spiritus, qui in substantia dentium continetur, à calefacientibus, aut refrigerantibus patiens, statim à parte post partem alterationem membranæ communicat, & inde sensus fit, quia membrana patitur. At in soluta unionem, in attritione, & collimatione, cum nil patiatur membrana, nullus dolor aut sensus adest. Aliquot reperiuntur anatomici, qui afferunt (vti audio) membranam hanc conflari ex arteria, vena, & nervulo simul mistis, quæ tria vasa ad singulos dentes pertingunt. Verum hæc sententia penitus similis illi videtur, quæ  
anato-



anatomici aliquot antiquiores assererent,  
 ex nervo, cute, & carne, atque ossibus si-  
 mul mixtis vngues constare, vt testatur  
 Galenus in secundo de Adm. Anato.  
 Quod ad radices dentium neruuli, ve-  
 nulæque, & arteriolæ perueniant, non  
 est negandum. Verum qua ratione ij,  
 qui diuisionem tenerrimæ maxillæ in  
 mento non viderunt, possint vasorum  
 ita tenuium mixtionem Lynceis oculis  
 perspicere, non assequor, dicant, quic-  
 quid velint. Nam si in intima cauitate  
 dentes videtur pulsare, dum inflāmatio-  
 nem patiuntur, vt diuinus Galenus a-  
 liquando expertus est, id accidit, quia  
 ad radicem dentis pertingit arteriola,  
 quæ fortassè minima cauitatem ingre-  
 ditur, (quāuis hoc oculi nō assequamur)  
 non autem, quia hæc vasa simul mista  
 membranam pariant. Quoniam for-  
 ma arteriæ tunc corrupta esset, & per  
 consequens, pulsandi actus. Sinus iste  
 totum occupat dentem, ea excepta  
 parte, quæ gingiuis denudata est, quæ  
 solidior ob cibos atterendos requireba-  
 tur. In hoc quoque caries dolorosa sub-  
 nascitur, vermesque aliquando colli-  
 guntur,



guntur, qui hominem mirum in modum excruciant. Quare optimè ipsum obseruabis.

Sed hoc vnum audi in ijsdem dentibus, quod minimè placet. Anatomici quia vident in puerulis aliquando euelli dentes, qui in extremo imperfecti sunt, atque molles, & quasi cauati, in hanc sententiam venère, dentes appendicibus donari, quæ cadant subcrefcēte reliquo dentis cuiusque exordio. Quod re vera minimè dixisset diuinus Vesalius, si in perficienda arte (quod genus laudis minimè illi detrahi potest) diligentissimè obseruasset puerulorum caluarias, & præcipuè eorum, qui per abortum imperfecti adhuc nascuntur. Quare vt rem hanc optimè cognoscas, de dentibus tibi pauca quædam differam.

Dentes duo habent tempora, quibus gignantur. Alterum quidem in vtero post malarum generationem, quo tempore duodecim numero formantur in malis, & totidem in maxilla, sex scilicet in vtroque latere dextro, & sex in vtroque sinistro: ex quibus quatuor sunt incisoriij vocati, gemini canini, & sex maxilla-



xillares, tres scilicet in vno quoque late-  
 re collocati, qui omnes dentes, sed im-  
 perfecti, ac sine radicibus latitant in suis  
 alueolis, qui pariter duodecim sunt sub  
 integris ipsis gingiuis, vt ego pluribus  
 in cadaueribus obseruaui. Notandum  
 tamen est, quod semel, aut bis ad sum-  
 mum in hac prima dentium generatio-  
 ne in maxilla, aut superioribus malis  
 quatuor tantum reperi maxillares gemi-  
 nos vtrinque, qui quatuor collecti ad-  
 ditisque reliquis sex denarium nume-  
 rum tam in malis, quam in maxilla ex-  
 plerunt. Dentes hi dum nascitur puer,  
 diuersa ex materia constāt, altera ossea  
 & dura, altera molli. Nā prior pars, qua  
 erupturi sunt, ossea & caua, posterior ve-  
 rò mollis admodum & humida est, atq;  
 pellicula quadam tenui vestita videtur,  
 quod etiam in origine pennarum, dum  
 adhuc teneræ sunt, apparet. Quoniā pars  
 illa, quæ extra cutem prominet, cornea  
 & dura est, illa autem, quæ in alis latitat  
 mollis, humidāue, & ceu sanguis, vel pi-  
 tuita cōcreta apparet. Ita in his dētibus,  
 quod primū est, durum ac osseū: quod  
 mediū aut vltimū latet, illud molle, & ve-

E luti



luti concretum phlegma videtur. Hoc erumpentibus ipsis sensim, & sensim obdurescit, osseumque fit, & intus excavatum in radices formatur. Quamobrem accidit, quod si nos elixemus caluariam nuper nati, sed perfecti pueri, per cocturam dissipata parte posteriore ita molli, ea tantum, quæ ossea gingivas excessura erat, relinquatur, & pro dente agnoscatur. Quod si cruda caluaria fecetur, pars etiam posterior nulla difficultate poterit cognosci, quæ in viuente animali sensim & sensim obdurescit, & ossea, vti dictum est, facta spatio plurimum annorum formatur. Quare accidit, vt circa septimum annum, aut paulò ultra citraue euulsi dentes, aut à suppullulantibus expulsi imperfecti, & quasi appendices quarundam radicum, quæ adhuc relictæ sint, videantur. Quoniam lacerato dente pars mollis cum pellicula ipsa relictæ sit in alueolo, aut à supplantæ alio, qui priorẽ extrudit, sit corrupta.

Alterum verò tempus, quo dentes gignuntur, est, postquam in mundum venerit fœtus, ante septimum annum. Nā latetibus quibusdā seminarijs generationis



67  
rationis in malarum ossibus, decem gi-  
gnuntur dentes in vtraque, superiori  
scilicet & inferiori: quinque in latere  
dextro, & quinque in sinistro. Ex his,  
quatuor sunt incisoriij duo, canini, &  
quatuor maxillares, quorum maxilla-  
rium duo sunt illi, qui proximè cani-  
nos sequuntur, duo quoque illi sunt,  
qui à philosophis & græcis *σοφρονιστες*  
& à nostris genuini vocantur. Ex istis sex  
anteriores dum erumpunt, primores  
extrudunt, atque in eorum loca succe-  
dunt, quod si accidat casu, aut occulta a-  
liqua de causa, aut negligentia nutricum  
primores minimè vellantur, aut per se  
cadant, posteriores hi nihilo seciùs stra-  
ta sibi via per novos alueolos in malis  
quidem ut plurimum extrà, in maxilla  
verò intrò erumpunt. (Quamvis etiam  
variet ratio hæc) videturque novus den-  
tium ordo exortus, qui historicos pari-  
ter & anatomicos sæpè delusit. Ex reli-  
quis quatuor, qui maxillares sunt, duo  
ultimi genuini nunquam alios sua è se-  
de exturbant, cum circa tertiâ annorum  
septimanam, & ulterius etiam usque  
ad decimam exoriuntur. Alij verò duo  
E a aliquan-



aliquando primores maxillares expellunt, aliquando (quod frequentius est) ad latus eorum exorti numerum omnium augent. Loca in quibus primùm crescunt, secundi ordinis dentes sunt. Genuinorum quidem extremi malarum fines. Maxillarium verò locus, immediatè sub radice illius maxillaris est, qui in generatione fœtus primus post caninos sequitur, qui quæ aliquando à nouo expellitur, (vti dictum est) aliquando autem non, sed inter ipsum atque caninum proximum nouus sibi sedem collocat. Caninorum autem sedes est sub extrema radice vtriusque canini veteris, quæ cùm in malis ipsis sit valdè alta, inferiorem quasi oculi ambitum, ac foramen illud, per quod tertij paris nervus ad faciei partem illam emittitur, tangit. Incisoriorum prætereà illorum, qui in vno latere sunt (nam duo sunt dextri & duo sinistri) alter, qui exterior est inter caninum & incisorium subiectum, alter verò inter hunc & illum pariter incisorium, qui interior est, locum fortitur. Qui omnes postea dentes, dissipato osse erumpentes in auras veniunt, extrusis



extrusis aut eadentibus ijs , qui prius  
 extabant. In ipsis autem generatiōis mo-  
 dum hunc obseruauī. A viuifica faculta-  
 te agente spiritu ( vti opinor ) excauatur  
 os, simulq; gignitur folliculus membra-  
 neus, qui geminum apicem possidet, al-  
 terum posteriorem, cui neruulus, & ar-  
 teriola, & venula applicantur, alterū ve-  
 rò priorem, à quo veluti cauda quædam  
 pendet neruea, quæ per foramē ossis an-  
 gustissimum ad latus illius dentis, cui  
 nouus successurus est, vsque ad gingiuas  
 egreditur. In hoc folliculo concrefcit ma-  
 teria quædam alba, tenaxque, & tandem  
 dens ipse in priori tantū parte osseus,  
 & in posteriori ex materia dicta constās,  
 quod etiam in ijs , qui in vtero geniti  
 sunt, accidit. Erumpit autem vnusquisq;  
 dens per id foramen dilatatū, per quod  
 antea angustissimum existens transmit-  
 tebatur, folliculi cauda à me dicta: Atq;  
 folliculus dirumpitur, & dens nudus,  
 durusque extat, temporisque successu  
 in partibus posterioribus perficitur.  
 Hæc multo sudore, & lōgo tēporis spa-  
 tio, adhibitaq; omni diligentia vera esse  
 obseruauī, neque subitò, si tu laborem

E 3      hunc



hunc vnà cum Capredono nostro subire volueris, quin sis historiam hanc approbaturus.

Multa sunt foramina in ossibus malorum, atque ipsius caluariæ, in quorum numero, & vsu, à reliquis anatomicis discrepo, sed quoniam fortasse, quæ maioris sint momenti, expectas, ideò alibi de his tractabo.

Asserunt anatomici os, quod à similitudine *ὀστέου* dicitur, habere additamenta superiora, quibus iungatur cum processu styloide, quæ additamenta nunc tribus, nunc quatuor ossiculis & quasi internodijs consent, quorum vtrunque nunquam ego videre potui, sed ferè semper reperi additamenta hæc vni-  
co osse & satis breui ac gracili constare, quod ad styloidem processum nequicquam pertingeret. Verùm illi per ligamentum nerueum satis longum adnectebatur. Sæpè ac sæpiùs etiam reperi corpora mollia, qualia sunt fœminarum, habere os *ὀστέον* sine his additamentis superioribus, ipsorumque loco adesse ligamenta eadè longiora, quæ ab hyoidis osse medio, vsq; ad styloidem vtrunque



que peruenirent. Vellem vt hoc in os-  
se diligenter vsum peculiarem, ac po-  
tissimum perpenderes, de quo ego à re-  
liquis anatomicis dissentiens, alibi tra-  
ctabo.

Sub osse dicto collocatur larynx, con-  
stans ex quatuor cartilaginibus, prima  
quidem scutiformi, ita ab anatomicis di-  
cta, altera quæ ab anulí, quam habet si-  
militudine, *κρινουίδης* dici potest, quam-  
uis ab anatomicis sine nomine sit dimis-  
sa: tertia ex duabus constat, quas pro v-  
na tantum recensent anatomici: & *ἀγυ-  
ραιουίδης* vocant. Hacque ratione quatu-  
tor sunt. Ex dictis primam & secun-  
dam reperi aliquando in valde senibus  
osseas factas, neque solum in decrepi-  
tis, sed etiam in primo senio constitu-  
tis. Tertiam verò, vel vt rectius dicam,  
tertiam & quartam osseam nunquam  
vidi. Neque possum illorum opinio-  
nem probare, qui laryngem osseam,  
non autem cartilagineam esse volunt.  
Quod si aliquando cartilaginea reperi-  
tur, imperfectam tunc esse asserunt. Quo-  
niam natura destinavit partem hanc,  
vt ossea esset, non autem cartilaginea.

E 4 Qua



Quæ sententia, si vera esset, sequeretur homines integrum vocis organum, usque ad consistentem ætatem non habere: quod minimè concedi potest. Deinde, si illud corpus cartilagineum, quod temporis successu osseum fit, dum cartilagineum est, si imperfectum dici debet, procul dubio cartilaginee illæ, quæ costas cum osse pectoris iungunt, imperfectæ dici debent. Quoniam in vetustissimis animalibus osseæ fiunt, quod tamen minimè dici debet, cum valde perfectiores sint, dum puræ cartilaginee sunt, quod ex usu ipsarum facile patere potest. Vnum notaui in prima laryngis cartilagine, quod quando ossea fit, primum obdurescere incipit, in partibus lateralibus lineaque illa media prominens, veluti angulus cartilagineus relinquitur à summo ad imum, qui tandem & ipse osseus fit. Hoc posset quibusdam non valdè exercitatis imponere, dum crederent istam cartilaginem geminam esse, non autem vnicam. Verùm si rem in senioribus valdè quæsierint, reperient omnia ossea, erroremque facile agnoscere poterunt. Quamobrem te vnum oro, quod



quod Capredonum meum admoneas,  
vrgeasque, vt omni adhibito studio hæc  
obseruet, & si quid contrarium adinve-  
nerit, mihi quoq; significet.

Ad dorsum venio & totam medullæ  
spinam, in qua ab anatomicis dissentio,  
cùm ipsi asserant, maiora esse foramina  
vertebrarum superiorum, quàm inferio-  
rum, quod falsum est, vna accepta pri-  
ma: nisi magnitudinem hanc metian-  
tur cum amplitudine totius vertebræ.  
Nam maius est foramen secundæ & ter-  
tiæ ceruicis, respectu magnitudinis ver-  
tebræ ipsius, quàm sit foramen secundæ,  
aut tertiæ lumborum eadem seruata ra-  
tione. Verùm si conferantur foramina  
inter se, quod ipsi anatomici faciunt,  
dum medullam continuò, cùm descen-  
dit, magis diminui, & ob hæc foramina  
angustiora reddi asserunt, non possum  
ego artes ipsorum tueri, aut ab accusatio-  
ne vindicare.

Credo præterea, quod à Capredono  
nostro audiueris, me opinari vnà cum re-  
liquis anatomicis, vertebrarū corpora  
appendices habere supra, infraque.  
Quā sententiā diligentius postea rumi-

E s nans



nans, reperi aliqua ex parte falsam. Nam re vera appendices non sunt, sed extrema ipsius ligamenti cartilaginei vertebrae intercedentis, quæ in ambitu exteriori, semilunari quodam circulo duriora, atq; ossea facta supercilium dictorum corporum, anteriori tantum in parte augent. Verum in media aut posteriori parte, ubi foramen medullæ adest, nihil tale reperies. Hinc accidit, quod in durissimis vertebrae coctis aut crudis, cum ipsorum corpora nudata sunt à ligamento, adest quidam veluti colis semilunaris, qui ab anteriori margine ad posteriorem usque partem declivis est. Hoc verum experimentum confirmat præterea ratio, quoniam si sciamus verum appendicium usum, aperte cognoscemus, nullum in his ossibus ipsarum esse opus.

Verum in his vertebrae vnum observato, quæso, quod ego maxima cum animi voluptate fortasse primus observavi. Ipsas ex tribus partibus osseis, dum oritur puer, & quasi per integrum annum constare: quarum una est corpus ipsum, geminae reliquæ illæ sunt, quæ foraminis medullæ latera efformant. Ho-  
corpo-



corporis lateribus dextro & sinistro, & inter se, vbi spina est, cartilagine ligatur, quæ postea ossa facta iuncturas delet. Hoc in omnibus verum est, excepta secunda, quæ ex quatuor partibus constat, corpore videlicet, & duabus posterioribus, quæ latera constituunt, & quarto dente, qui quamuis processus vocetur ab omnibus anatomicis: est tamen re vera appendix, nuclearis figuræ, quæ postea ita ligatur conuersis omnibus cartilaginibus in os, vt pars vertebræ & processus, potius quàm appendix esse videatur. De prima vertebra tecum liberè agam, doctissime Pater, (ingenuitatem quæso agnosce) hæc me decepit, quoniam in pueris, qui maturè orti statim mortui sunt, mihi visa est constare ex quinque partibus, in aliquot verò alijs ex tribus tantum. Cum ex quinque constabat, tales erant. Prima illa erat, quæ anterior loco corporis collocata cum dente ligatur. Secunda & tertia laterales erant, in quibus cum inferiores, tum superiores sinus insculpti sunt, atq; hæ dictæ partes secunda & tertia aliquando mihi visæ sunt puræ cartilagines. Quarta præterea



& quinta illæ erant, quæ reliquum totum foramen perficiebāt. Cùm igitur secunda & tertia puræ cartilagines essent, tres tantùm partes osseas reperi, primam scilicet, quartam, & quintam. Sed hoc apertè fateor, me ob tenuitatem non ita certò eius historiam, sicuti reliquarum omnium, tenere. Verùm mihi parcas, quoniam non omnia possumus omnes. Alius superueniet, qui aliqd addens hæc mea perpoliet, aut ego, ni vires desint, idem in alio opere perficiam.

De ea posteriori parte vertebrarum, qua spina constituitur, scias ipsam totam cartilagineam esse, ac deinde osseam factam, appendicis modo reliquis partibus adglutinari.

Transuersi processus vertebrarū thoracis, antequam durum fiat animal, multa in extremis donantur cartilagine, quæ deinde ossea facta, & tuberculum, & cavitatem, vel sinum cui inseritur, costa efficit, videturque & est appendix dictorum processuum.

Thoracis vertebrae vndecim nunquā videre potui, duodecim semper repperi, duobus cadaueribus & maribus quidem exceptis,



exceptis, in quibus ob adauctum numerum à duabus costulis ita paruis, vt rudimenta costarum potiùs, quàm costæ viderentur, tredecim repperi vertebrae: verùm in lumbis quatuor tantum numerabantur. Atque coarticulatio illa, quæ in reliquis hominibus in duodecima esse solet, in his cadaueribus nihil variabat.

Antiquiores anatomici, quod dixerint os sacrum ex tribus, aut quatuor constare vertebrae, accusantur acerrimè à recentioribus. Quoniam istud os constet ex vertebrae sex, aliquando autem ex quinque, vt ipsi asserunt. Ego autem obseruaui, frequentius ex quinque partibus, quàm ex sex constare, vnumque aliud notaui, quod quotiescunque in corporibus à me dissectis, reperi os sacrum ex partibus sex constare, καὶ ἑξ ἑξ τριβὺς tantum factus erat, & in quibus repperi καὶ ἑξ ἑξ ex quatuor constare, in iisdem sacrum ex quinque tantum inueni.

His præterea addas, quod in nuper natis puerulis, partes sacri ossis vt reliquæ superiores vertebrae ex tribus constāt particulis, corpore scilicet, & duabus, quæ latera posteriora constituunt, foramenq;



menque medullæ perficiunt: quæ etiam partes ita vniuntur postea, vt nihil diuisionum appareat.

De coccyge, quæ habeo dicenda, hæc sunt. Ipsum totum, dum oritur puer, esse cartilagineum, & quatuor ex partibus constare, si sacrum ex quinque, vti dictum est, ossibus factum sit, ex tribus vero tantum, si sacrum ex ossibus sex constiterit. Cartilagines istæ usque ad septimum ferè annum naturam suam seruât, præcipuè tres extremæ: postea incipiunt in ossium naturam verti, itaque solidari vt non tria ossa, sed vnum tantum (cùm simul connascantur) fiant. Figura harum partium non rotunda, sed lata est, totumque os in rostrum veluti acutum definit.

At magnæ admirationis mihi datur occasio: cùm videam à Galeno propositum coccygem, qui neque humani, neque simiarum dicto ossi respōdet. Quoniam ex tribus ossibus à Galeno descriptis: tertium, quod & vltimum est in simijs non caudatis, à me non reperitur perforatum, neque per illud medium medullæ extremū egreditur, vti asserit



rit Galenus. Neque etiam inter ipsum  
 & secundum oritur tertium neruorum  
 par, ex ijs tribus, quæ à coccyge prodi-  
 re idem testatur. Talisque præterea est  
 istorum trium ossium structura, vt po-  
 tius (si mihi liceat ab antiquorum pla-  
 citis recedere) dicendum sit, esse alteram  
 ossis sacri partem, quàm coccygem:  
 quod quidem sacrum os in simijs quo-  
 que ex sex partibus constet, careatq; coc-  
 cyge, cum illo minimè egerit hoc ani-  
 mal. Primò, quia vt sine cauda esset, à  
 Natura est constitutū, cuius caudæ pars,  
 vel cuius loco coccyx in quamplurimis  
 animalibus reperitur. Secundò, cum si-  
 mia habeat nates præter modum graci-  
 les, imò sine natibus animal sit, ideò nõ  
 egebat tanta dorfi productione. Nam  
 coccyx in hominibus est, veluti addita-  
 mentum dorso additum ob ipsum po-  
 dicem tantum. Quoniam propter ampli-  
 tudinem natium intestinum rectum e-  
 rat producendum, aliter incommoda fu-  
 isset secum egestio: cumque Natura ad  
 hoc egeret osse, cui musculum ani, to-  
 tamque sedem alligaret, quòue intesti-  
 num ipsum fulciret, hac ratiõe, vt ego o-  
 pinor,



pinor, in hominibus additus est coccyx. Quare cum fimia non caudata minimè egeret coccyge, meritò Natura parte hac illam mutilauit. Diuinus autem preceptor Galenus, cum coccygis factam mentionem legisset in scriptis Herophili fortasse, aut alterius, ultimam ossis sacri partē in fimia illi ascripsit. Hæc mihi pater coniectura sit, non autem lex lata, confirmatæue. Iam verò in caudatis fimijs quomodo res ista sit constituenda, non ita mihi compertum est: Non ob eā quidem rationem, quòd omnia apertis oculis non inspiciam, mihiq̃ue tota res nota non sit, sed quoniam reperio vertebrarum magnum esse numerum (octo enim sunt) per quas medulla extrema transit, & à quibus neruorum vltima paria oriuntur, vltima excepta, per quam mediam extremum medullæ elabitur in neruum simplicē formatum. Ex his autem ossibus quatuor sunt, quæ maximā connexionem, & figuræ proportionem inter se habent. Hæc eadem superiora & maiora sunt, quorū duo priora cum ossibus iliū cōnectuntur. Ab his quatuor neruorum paria prodeūtia, veluti ab  
osse



osse hominum sacro ad anteriora æquè  
 ac ad posteriora feruntur. Post hæc se-  
 quuntur alia quatuor, per quæ media fer-  
 tur medulla, neruique inde exorti ad  
 latera posteriora, vti in vertebra dorsi  
 tantum disseminantur, per sinus à pro-  
 cessibus ascendentibus, & descenden-  
 tibus factos elapsi. In extremo autem  
 illorum reliquæ medullæ, vt dixi, finiunt.  
 Dictorum verò ossium connexio, & fi-  
 gura tantam analogiam inter se habent,  
 vt vnius classis profectò sint. Quare ego  
 dixerim, aut omnia hæc ossa, quæ octo  
 sunt numero, sacrum in caudatis simijs  
 explere, & quicquid ossium vltra hæc  
 est additum ad exornandum caudam,  
 pro coccyge illud totum fuisse adiun-  
 ctum: Aut priora quatuor sacrum os ex-  
 plere, & reliqua, quæ subsequuntur, qua-  
 tuor coccygem, quod consentaneum  
 erit sententiæ Galeni, cum in 12 de vsu  
 partium cap. 12. sacrum os ex quatuor  
 constare partibus dixerit. Hæc de osse  
 sacro & coccyge tam simiarum, quàm  
 hominum satis dicta sint.

De costarum numero quid dicā? nihil  
 aliud habeo, quàm quod nunquam vn-

F de-



decim inuenerim, duodecim ferme  
semper, bis autem ad summum vnam su-  
peradditam reperi, credoque maiori  
ex parte illos, qui vndecim se vidisse te-  
stantur, inter coquendum duodecimam  
aut amisisse, aut nimia coctura eliquasse:  
Addam caput illud summum, quo verte-  
brarum corporibus hærent costæ. ap-  
pendicem esse, veluti appendices quo-  
que sunt reliquorum ossium capita, qui-  
bus inuicem articulantur. Idem assero  
de processibus illis, quibus costæ iun-  
guntur, cum transuersis processibus  
vertebrarum, nam appendices re ve-  
ra sunt, non processus. Si aliquando  
legeris apud aliquem anatomicum scri-  
ptorem, quod costarum partes, quæ ver-  
tebris alligantur, sint duriores, ac solidi-  
ores reliquis, istius rei memor sis, me con-  
trarium penitus reperisse, cum medias ac  
laterales partes in iisdem longè duriores  
viderim.

Mirum fortasse tibi uideri poterit,  
quod ego asseram omnes, quos hucusq;  
legerim scriptores, in osse pectoris de-  
scribendo negligentiores, quàm par e-  
rat, fuisse. Veruntamen sententiæ meæ  
postea



postea acquiesces, si primò obseruaue-  
 ris Galenum loquentem de osse pecto-  
 ris simiarum, dixisse in libro de ossibus  
 ad tyrones, illud ex septem tantum os-  
 sibus constare, quæ synarthrosi cohære-  
 ant. Quod ego fallum reperi in omni-  
 bus simijs, quas adhuc secui. Nam in il-  
 lis (de non caudatis loquor) octo semper  
 ossa inueni, atque illud, quod octauum  
 prætermittitur à Galeno, quodque re ue-  
 ra ob cartilaginem mucronatam factum  
 est, longiùs reliquis omnibus uidi, quod  
 etiam negligentia crimen auget. De-  
 inde si in memoriam reuocabis ea, quæ  
 à recentioribus de his partibus di-  
 cta sunt (tres enim vel ad summum  
 quatuor esse asserunt) eos negligentio-  
 res fuisse reperiēs. Nam si de numero  
 ossium loquuntur, quibus constat to-  
 tum os pectoris, quādo formatur foetus,  
 errant, cū dicunt, quatuor vel tria esse.  
 Quoniam vno excepto primo, reli-  
 quæ partes penitus cartilagines sunt.  
 Sin autem de numero illo verba faciūt,  
 quo constat os, dū puer oritur, aut dum  
 vnus mensis est, adhuc errant, Quoniā  
 octo tunc numero sunt ossa, cartilagine

F 2 multa



multa inter se distincta, quorum septem  
 pro cartilaginibus costarum compagi-  
 nandis, & octauum pro mucronata car-  
 tilagine fuit factum. Quod si de adultis  
 & perfectis corporibus loquantur, tan-  
 tum abest, ut verus sit propositus nume-  
 rus, quod vnicum os, ut plurimum re-  
 peritur. Quamobrem quid ego obseruâ-  
 rim, audi. Generatur hoc os & necessa-  
 riò ob articulos costarum ex pluribus  
 cartilaginibus, quæ postea ossa fiunt,  
 suntque octo numero, ut etiam in simijs  
 apparet, tot enim sūt ossa pectoris, quot  
 sunt integrarum costarum paria, at in  
 homine sunt septem ista paria. Septem  
 ergo erunt & partes istius ossis. Et quo-  
 niam mucronata cartilago fundamen-  
 tum, cui hæret, requirebat, ob id octa-  
 uum est additum. Ossa autem hæc quo-  
 tidie duriora fiunt, & per integrum fer-  
 mē annorum septennium distincta ma-  
 nent. Hoc exacto coniungi statim inci-  
 piunt, & pauciora fieri, ita ut sex tantum  
 appareant, vno facto osse ex quarto &  
 quinto, & alio ex sexto & septimo, Præ-  
 terea verò vnio hæc magis crescit, &  
 quatuor tantum reperiuntur ossa, facto  
 coalitu



coalitu inter tertium, quartum, quintum, sextum & septimum, ita, ut unicum os tantum appareat. Nam quod latius ac primum erat os, in hoc censu adhuc integrum manet. Idem accidit secundo & idem ultimo, cui hæret cartilago mucronata. Reliqua omnia media in unicum os conflantur, numerusque quaternarius resultat, qui etiam temporis cursu ac durescente corpore oblitteratur, cum facto coalitu inter secundum & tertium, tria tantum remaneant. Accedente autem homine ad virilem ætatem, os ultimum vnitur secundo ex pluribus facto, & duo tantum remanent, primum scilicet illud, quod latius genitum est, & alterum, quod ex illis septem est conflatum. Verum post consistentiæ annos, quo tempore etiam capitis futuræ oblitterari aliquando incipiunt, accidit, ut articulus, qui inter duo hæc ossa continetur, per coalitum deleatur, & unicum os tantum fiat. Hæc ego in multis cadaueribus variarum ætatum dissectis summa diligentia obseruaui, quæ, si volueris, poteris certò cognoscere maxima ex parte vera esse.



In scapularum historia à reliquis anatomis in hoc primùm dissentio: quia asserunt officulum internum, quod rostri modo prominet prope cotylen, processum esse, atque aliquot ex his asserunt ipsum appendice donari. At ego testor processum minimè esse, sed appendicem penitus, neque noua alia appendice donari, cum tota in generatione cartilaginea sit, atque ossea deinde fiat, & appendicum modo scapulæ per cartilaginem ad septennium vsque adglutinetur. Hoc exacto cartilago media in os vertitur, officulumque ipsum processus & non appendix apparet, hacque ratione anatomicos decipit.

Vellem, mi pater, ut cum dabitur otium, mea causa tantillum subires laboris in inuestiganda veritate. Quid sibi voluerit Hippocrates, in primo de Artic. statim in initio, ubi pluries mentionem facit ἀγκυρῆς & ἰνὸς μῖδος, mihi que postea significares, quid per has voces intellexerit bonus ille senex. Quoniam video anatomicos minimè inter se concordēs. Nam (ut à posteriori voce incipiam) Vesalius & alij anatomici  
ab



ab ipso fumentes asserunt, musculū del-  
toiden *ἰπωμίδα* vocari: quod ego apud  
nullum scriptorem veterem adhuc re-  
perire potui. Legi quidem apud Gale-  
num hunc musculum *τῷ ἰπωμίδῳ*, vel  
*πρὸς ἰπωμίδα*, vel musculum *τῇ ἰπωμίδῃ*  
*καταληφόντα* vocari, & apud Oribasium  
25. collectorum similiter appellari ob-  
seruaui. Deinde legi apud Ruffum E-  
phesium in primo & secundo de appel-  
latione partium hominis hæc verba. *Τὰ*  
*δὲ ἀπὸ τῶν πινόντων τῶν τοῦ σῶματος καθήκεν*  
*τὰ ἰπωμίδας*, quæ sententia eadem peni-  
tūs cum sententia Galeni est, qui in pri-  
mum de Arti. Hip. contex. 4. ait: *ἰπωμίδας*  
*δὲ, τὸ ἐπὶ πᾶσι τῶν σῶματος μέρους ἐπιτείνοντο ὡς*  
*ἐπὶ τὸν τράχηλον*. ex quibus colligere pos-  
sumus, quicquid vltra humerum ad cer-  
uicem vsque continetur, illud totum  
*ἰπωμίδα* vocari, quod contra falsum  
videtur esse ex sententia alia Galeni in  
eodē libro in comm. tex. 61. & alibi, vbi  
de deltoide musculo loquitur. Item ex  
sententia Oribasij loco dicto, quoniam  
vti scribūt, muscul⁹ *δελτοειδὴς* epomida  
occupat. Si ergo deltoides, vt ī anatome  
apparet, nō est ī regiōe supra humerū ad



cervicem vsque: sed infra acromium, atque epomida occupat ex auctoritate horum: sequetur inconstanter epomidis locum esse assignatum. Hanc varietatem auget Pollux, qui lib. 2. ait, κλειδῶν ἂν τὸ μὲν πρὸς ὤμοπλατεῖς ἰπωμῖς, & paulò infrà subdit. Τὸ μὲν ὑπὲρ χορτὸν βραχίονος, ἀκρωμία καὶ ὤμος κεφαλὴ καὶ ἰπωμῖς, &c. Vt ergo colligamus, si vox ista ἰπωμῖς est musculus deltoides: vel est regio, quā occupat hic musculus: vel illa est, quæ inter cervicem & humerum iacer: vel est claviculæ pars scapulis coniuncta, vel tandem brachij ipsius summum caput. Meritò dixi, anatomicos ipsos inter se minimè consentire: atque lucis loco maximas huic parti tenebras inspersisse. Quid igitur apud Hipp. per ἰπωμῖδα intelligendum sit, penes te iudicium esto. Ego hanc coniecturam, ne tacitus difficultatem proposuisse videar, in medium afferam. Cùm ὤμος apud Hipp. duo significet, & articulum ipsum humeri, & brachij etiam caput, quod in articulo continetur, ἰπωμῖδα vocari autumo externum illud caput, ac minus, quod partim ab appendice, partim vero à



rò à brachij osse, qua iunctum est ap-  
 pendici, formatur. Quanquam Vesali-  
 us totam appendici ascribat, quod ta-  
 men nihil refert. Tuberculum hoc par-  
 uus veluti humerus est, maiori ac vero  
 humero superadditus, vnde ἰσσωμῖς di-  
 cta est. Hoc à deltoide musculo occu-  
 patur, atque digitis ipsis in viuentibus  
 quoque hominibus tangi potest, &  
 quēadmodum ἰπικυδῖς vocatur à qui-  
 busdam patella, vt testatur Galenus in  
 secundo de officina Medici comm. tex.  
 14. Vel vt rectiùs dicam: cū ab Hipp.  
 in lib. de Artic. ἰσσωμῖς vocetur in ge-  
 nu tuberculum illud acutius, quod à  
 patella formatur, ita etiam ἰπωμῖς di-  
 citur tuberculum hoc acutius ab Hip-  
 pocrate, vti ego opinor, totaque eti-  
 am regio, quæ ab ipso occupatur, sub  
 ἰσσωμῖδος nomine cognoscitur. Con-  
 iecturam hanc tibi propono, vt ipsius  
 iudex sis, atque etiam seuerus vindex,  
 si à veritate aberrare videatur.

De acromio loquens Galenus in li-  
 bro de ossibus ait, quod ab anatomicis  
 quibusdam ἀκρωμίου vocatur articulus  
 ille, quo iugulum & spina scapularum

F 5 simul



simul iunguntur, & quotiescūq; mentionē  
 facit dicti articuli Galenus, & κρῶμιον sem-  
 per appellat, & aliquando etiam κρῶμι-  
 αῖον, vt in quinto de Anat. admin. cap. ter-  
 tio fecit. Alij fuere, qui κρῶμιον dixerūt  
 esse quoddam ossiculum tertium, quod  
 inter iugulum & spinam scapularū col-  
 locatum sit. Huius sententiæ fuit Eude-  
 mus, vt testatur Ruffus Ephesius in pri-  
 mo de appellatione partium corporis  
 humani, atque Galenus hanc eandem  
 opinionem ascribit Hipp. in quinto de  
 Anat. admin. cap. 3. & in 13. de usu part.  
 11. Quanquam in posteriori loco non vi-  
 deatur ipsi seni hoc adscribere, sed poti-  
 ūs in hanc sententiam loqui. Verū, qui  
 viderit priorem locum, cognoscet ex  
 mente Hippocratis in hoc posteriori es-  
 se loquutum, neque tantæ inconstantie,  
 & vanitatis esse redarguendum Galenū.  
 Quoniam in libro de ossibus variā quo-  
 rundam anatomicorum opinioē pro-  
 ponit, in quinto de Anat. admin. Hipp.  
 sententiam explicat. in 13. verò de usu  
 part. illius ossis tertij, quod ex auctori-  
 tate Hipp. & aliorum quorundam in ho-  
 minibus reperitur, usum disquirat. Quā-  
 obrem



obrem hæc inconstantia dici minimè debet, eoque minùs, cùm ipse articulum iuguli & scapularum ἀκρώμιον fere semper appellârit. Ab his dissentit diuinus Vesalius, & schola anatomica, quæ ab ipso sumpsit, cùm apertè asserant ἀκρώμιον esse processum ipsum, qui spinæ scapularum additus cum iugulo in articulum iungitur, hancque Hipp. mentem fuisse, in primo de Artic. planè testatur. Alij quoque fuere anatomici, qui per ἀκρώμιον intellexerunt ligamentum iuguli & scapularum: Huius sententiæ fuit Ruffus Ephesius, atque diuinus Hippo. à quo Ruffus accepit. nam legimus in primo de Artic. tex. comm. 16. hæc verba de acromio, quæ postea Ephesius descripsit. Εἰ δὲ τοῦτο ὁ συνδεσμός τῆς κλινίδος, καὶ τῆς ὀμοπλάτης: ex quibus verbis apertè colligimus, Hipp. per ipsum acromium, aut ligamentum, quo articulus iungitur, aut articulum ipsum scapularum & clauiculæ intellexisse. Quoniam ego reperio duas voces apud Hippocratem ἀκρώμιον scilicet, & τὸ τοῦ ἀκρωμίου σύνδεσμον, in eodem primo de Artic. quæ mihi videntur res diuersas significare,



re,proboque hac ratione. Si enim posterior idem significaret cum priore, os acromij, secundum Hipp. esset ligamentum, quod non est dicendum. Quare duo sunt, quæ his vocibus explicantur, cumque duo sint, ego quærens, quodnam sit hoc os acromij, nullum aliud inuenio, quàm scapularum processum, cui mandat Hippo. in quadam humeri prolapsi restitutione pedem imponi, ac deorsum propelli. Si itaque hoc erit ἀκρωμίου ὀστέον procul dubio ex mente Hippocratis ἀκρωμίου nihil aliud erit, quàm ligamentum dictum, aut articulus inter claviculam & scapulas, qui quamuis etiam reperiatur in simijs, humano penitus similis, ob id non accusandus est Hipp. quia dixerit in hoc articulo variare naturam hominis ab alijs animalibus. Quoniam eorum infinitus est numerus, quæ iugulo & articulo hoc carent, atque excepta simia, ea etiam animalia, quæ hoc articulo prædita sunt, ita variantem ab humano possident, ut meritò Hipp. naturam humanam distare à reliquis animantibus, præcipuè domesticis, ac communibus, nullo



enim potest  
priori, si  
fer ligamen-  
um. Quare  
explican-  
quærens,  
nullum  
rum pro-  
in quadam  
pedem in-  
Si itaque  
dubio ex  
aliud  
aut arte  
vult, qui  
mij, hu-  
on accu-  
hoc ar-  
ad alijs  
finis  
viculo  
et, et  
o præ-  
opoli-  
in hu-  
ribus,  
nibus,  
nullo

nullo excepto, dixerit. Quare ex his col-  
ligens, dicam Hippocratem per ἀκρωμίων  
ligamentū, quod spinæ appendicem &  
iugulum colligat, intellexisse, aut cum  
Galeno fuisse in eadem sententia (quan-  
quam ipse Galenus non animaduerte-  
rit) quod sit articulus inter scapulam  
& iugulum constitutus. Tu hæc, quæ  
dixi, perpendens: vnà cum loco illo Hip-  
pocratis, & postea per otium sententi-  
am tuam ad me scribes.

In humero vel brachij osse, præter alia  
anatomicorum præcepta obseruauit, in-  
feriorem partem ipsius duabus appen-  
dicibus donari, altera quidem, quæ to-  
tum tuberculum internum exornat, al-  
tera verò, quæ tuberculum extremum,  
cui radius iungitur, occupat, & partem  
etiam cavitatis, quæ trochleam imitatur.  
Inter has duas quædam cartilago collo-  
catur, quæ vltra septimum annum ossea  
facta, & eiusdem cavitatis partem, atque  
supercilium exterius perficiens, pro ter-  
tia appendice à curioso anatomico addi  
posset. Quamuis omnes hæ appendices,  
longiori temporis successu, ita tandem  
ossi vniantur, vt nullius appendicis, ne-  
dum



dum triplicis vestigium aliquot relin-  
quatur.

Item anatomici aliquot superiorem  
partem cubiti appendice destituunt, ali-  
quot processum posteriorem quadam  
parua appendicula donant. Ego verò to-  
tam illam partem superiorem cubiti car-  
tilagineam esse obseruavi, dū oritur fœ-  
tus, posteriorem scilicet & priorem pro-  
cessum *κορῶνικη* vel *κορῶνον* à Galeno di-  
ctum, vnà cum media sigmoide cauitate.  
At ex his postea prior processus vnà cū  
cauitate ipsa certissimè in os vertitur, &  
appendicis vestigium statim deletur, po-  
sterior verò totus, ac extremum illud,  
quod *ἐλκυσανον* à quibusdam & *ἄγκωρ* ab  
Hippocrate, teste Galeno & Ruffo, voca-  
tur, vsque ad septimum annum appen-  
dix est, & quasi cartilagineum visitur:  
post septimum autem durescere incipit,  
ac osseum penitus factum reliquo ossi  
adglutinatur.

Ossa carpi, primæ partis ipsius palmæ  
per synarthrosin coniungi asserunt a-  
natomici, à quibus ego dissentio: cū  
videam primum ordinem dictorum os-  
sium coniungi cum secundo eiusdē laxo  
quo-



quondam articuli genere, in quo aliqui is  
adeſt motus & ſatis manifeſtus, præci-  
puè ad poſteriora. Prætereà omnia oſſa  
inter ſe ita colligata video, vt per diár-  
throſin potiùs, quàm per ſynárthroſin  
ſint iuncta, quamuis motus non ita ma-  
gnus adſit, vt in genu & cubito.

Prætermiſere anatomici, quod omnia  
iſta oſſa, dū naſcitur fœrus, non oſſa, ſed  
cartilagineſ ſunt, quæ poſteà oſſeæ ſunt  
ſpōgioſa ſubſtantia prædita, vt reliqua  
omnia, quæ ex cartilaginibus oſſa facta  
ſunt. Exemplo addantur appendices, &  
oſſa pectoris & coccyx, atq; ſimilia. Sed  
quoniam ex his omnibus octauum poſi-  
tum à Galeno, vltimū eſt, quod fiat oſſe-  
um, & diutiùs cartilagineoſum, quàm re-  
liqua viſitur, ideò à vertebris, vt opi-  
nor, cartilagineū eſt vocatum. Huic oſſi  
quidam Galeno imponentes, id, quod  
ipſe nunquam ſomniauit, aſcribunt in  
ſimijs ſinū quendam, cui vlnæ proceſſus  
ſtyloides dict' aptatur. Verùm in ſimijs  
hoc nō reperitur, neq; Galenus ſinum  
hunc vnquam in dicto oſſe ſomniauit.  
Verū tertio primi ordinis oſſi aſſignat,  
vti planè in ſimijs reperitur.

In



In digitorum ossibus nihil, quod non sit à reliquis anatomicis proditum, reperi, hoc vno excepto, quod primi & secundi internodij ossa appendices habent suprà, infraque satis insignes. Tertij verò articuli phalanx tantummodò habet suprà: cùm caput extremum carni, aut vngui iungatur, nullaque ideò appendice egeat.

Sæpè ac sæpiùs miratus sum, qua ratione antiqui scriptores in osse ilium illud fecerint, quod in omnibus aliis erat prætermisum. Nam non memini me vnquam vidisse alicuius ossis, quod vnicum sit, partes propria nomina habere, ossaque distinctis vocibus appellari: sed aut spinæ, aut capita, aut processus, aut appendices, aut cavitates huius vel illius ossis appellatæ sunt. In hoc verò esse video vnam ipsius partē os λαγόνωμ, id est ilium: alteram os ἰχίωμ, id est coxendicum: tertium os ἰβυσ. pubis scilicet vocari, totumque ipsum os, teste Galeno in lib. de ossibus, nomine est destitutum. Quanquam præterea ab eodē Galeno, & ab Hippocrate 3. de Arti. tex. 96. aliquando nomine ἰχίς totum appelle-



pelletur, atque etiam ab ephesio λαγόνω  
 & αὐτῷ, & à Celso, coxæ nomine totum sit  
 vocatum. Omnis enim regula aliquan-  
 do fallit. Rem istam non sine ratione ab  
 antiquis factam esse credebam, cū ta-  
 men eam ignorarem, neque apud ali-  
 quem anatomicum scriptorem reperi-  
 re possem. At natura ossis diligentissi-  
 mē à me observata rem manifestavit.  
 Nam inueni hanc partem osseam ad se-  
 ptimum vsque annum ex tribus ossibus,  
 quæ simul in ipsa cotyle multa cartila-  
 gine iunguntur, constare. Quorum ma-  
 ius totam amplitudinem illum in se con-  
 tinet, & cotyles etiam partem superio-  
 rem format. Minus illud est, quod ad  
 pubem pertingit, & partem anteriorem  
 tantum cotylæ efficit, nec non dimidiam  
 quasi partem illius foraminis, quod ma-  
 ximum omnium visitur in hoc osse. In  
 parte enim inferiori simul & anteriori  
 dicti foraminis cartilagine multa diri-  
 mitur à tertio. Quod quidem tertium  
 quod ad magnitudinem ipsam medium  
 est inter dicta, totamque huius partis  
 ilium posteriorem, & inferiorem regio-  
 nē occupat, & acetabuli inferiorē ac po-  
 G                      sterio-



steriorem, & quasi etiam totam mediam continet. Vnde factum est, vt cauitas hæc *ioxi*: potius & coxæ, quàm ilium aut pubis dicta sit. Hoc item tertium os magni foraminis totam superiorem, ac posteriorem, & fermè dimidiam inferiorem peripheriam in se habet. Igitur cùm hæc ego inuenerim, mirari desij, eo quæ magis, cùm causam, cur ita à natura formatum sit hoc os, optimè nouerim: quæ à me alibi explicabitur, tibi quæ in præsentia historia satis sit, quam veram procul omni dubio reperiēs.

In femoris osse, & tibia, fibula quæ nil reperi, quod multa dignum sit admiratione, in quo ego ab alijs anatomicis differam: Cum quibus etiam consentio, patellam cartilagineam penitus esse, dum oritur animal, talem quæ pluribus mēfib<sup>9</sup> permanere, atq; osseā postea fieri & duram valdè, qualis in adultis apparet.

In pede omnia ossa tarfi in ortu pueri, & ad plures menses etiam veluti carpi ipsius ossa, cartilaginea sunt, excepto calcis osse, quod eo tempore nescio quid ossei in medio continere mihi visum est. Cur autem Natura ossa carpi, atque



que hæc tarfi pariter priùs formârit car-  
tilagines, quàm ossa, locus hic non re-  
quirit: vt ego indicem. cùm & vsus, &  
causas reliquorum ossium, de quibus  
loquutus sum, prætermiserim. Pedij præ-  
tereà & omnium digitorum ossa suprâ,  
infraque, appendices habent. Excipiun-  
tur extrema, quibus heret vngues, quo-  
niam in superiori tantùm parte appedi-  
cibus prædita sunt.

De sessaminibus, quod cartilagines  
sint, & perdurent vt plurimùm vsque  
ad cōsistentiæ annos, exceptis illis duo-  
bus, quæ in pede sub pollicis primum  
articulum reperiuntur, assero. Quoniam  
ea multò citiùs obdurescunt, & ossea e-  
uadūt. In vsu istorum ab aliquot anat-  
omicis dissentio, sed de re ista in hoc libel-  
lo minimè tractabo.

In genere cartilaginum verarum, quæ  
scilicet semper cartilagines remanent,  
pauca sunt, in quibus à reliquis anatomi-  
cis dissentiam, eaque potiùs vsus & col-  
locationem, quàm naturâ, aut numerum  
ipsarum respiciunt. Quare, vt ad ea,  
quæ grauiora sunt deueniam, cartilagi-  
nes prætermittam, hoc vno tantùm ad-

G 2 dito,



dito, quod nullus anatomicus hucusq;  
ita descripsit asperæ arteriæ cartilagi-  
nes, vt illas nosse, aut figuram, aut ne-  
xum ipsarum videatur. Sed de his ego  
suo loco dicam.

Nihil, quod auribus tuis dignum sit,  
habeo in ligamentorum historia, quibus  
ossa inter se colligantur, eoq; minùs,  
cùm quicquid ab antiquis, & quicquid  
à diuino Vesalio proditum est de liga-  
mentis, si optimè, atque attentè legeris:  
totum veritati respōdere inuenias. Qua-  
re ad musculos venio.

In hoc capite, nisi historia me retra-  
heret, vellem, quòd disputationem quan-  
dam legeres, qua constituo, quid senti-  
endum sit de vnitate, aut multitudine  
musculorum, cùm in hoc anatomici val-  
dè inter se discordes sint, addoq; cano-  
nem, quo vnusquisque musculus cogno-  
sci potest, an alterius pars sit, & an potiùs  
per se distinctus consistat. Sed quoniam  
in ea tractanda prolixior sim, quàm hic  
locus requirat, ideò disiunctam ab hac  
historia, cùm nouum dabitur otium, ad  
te mittam. Musculosq; nunc aggredi-  
or, inter quos illis, qui occiput tenent,  
primum



primum locum ascribam . Secundum musculis aurium . Tertium frontis, ac postea reliquis suum, seruatō eo ordine, quem Vesalius sequutus est.

In occipite gemini muscoli reperiuntur, à reliquis omnibus anatomicis prætermisī, vnus dexter, & alter sinister. Qui tenues admodū, oriuntur ab illa linea transuersa in occipite, in quam desinunt muscoli, qui mouentes scapulam & caput ipsum, in ceruice sunt collocati. Ab hac itaque linea fibris recta sursum ascendētibz dicti muscoli manifestè inter se disiuncti oriuntur, qui breues admodum sunt (nam longitudinem non excedunt, quam transuerso pollice metiri possumus) sed ita lati, vt vnusquisque quasi auriculam sui lateris tangat. Isti desinunt in chordam vnicam tātūm latam, ac tenuissimam, quæ ex panniculo carnosō facta videtur, totūque caput occupans, & musculos aurium anteriores, frontis quoque perpetuos musculos simul cum dictis copulat . Dixi frontis perpetuos musculos : Quoniam vt illos in omnibus, quæ secui cadaueribus semper reperi, ita vice versa hos occi-

G 3 pitij



pitij musculos, aut aurium anteriores dictos, sæpè, ac sæpiùs non inueni. Hinc fieri opinor, quòd plurimos reperimus, qui totum capitis corium mouent, cùm tamen maior hominum pars motu isto destituta sit, aut ita paruum habeat, vt sensu dignosci minimè possit. Munus horum duorum musculorum est, cutem capitis ad posteriora diducere.

Auricularum musculi tres aliquando reperiuntur, atque in illis præcipuè, qui dum viuerent manifestissimè aures motabant. Horum primus, qui in anteriori parte collocatus est, oritur à fine extremo & superiori musculi frōtis eius lateris, in quo est auricula ipsa, in quam desinit. Musculus hic valde tenuis descendit versus aurem, & suo fine inferitur in eam ipsius partem, quæ ἀντιλόχορ, & in principium illius, quæ ἑστὴς auriculæ vocata est. Munus ipsius, est ad superiora ac anteriora auriculam trahere. Secundus musculus, inō, vt aliqui opinati sunt, à mammillari processu, sed supra ipsum ab occipitio oritur, vbi desinunt musculi posteriores, qui scapulam & caput mouent,



uent, Hic augusto principio exortus per  
transuersum fertur descendendo, & pa-  
rùm latior factus, veluti si in tres digi-  
tos diuideretur, posteriori auriculæ im-  
plantatur, vt illam ad posteriora, & ali-  
quantisper altiora trahat. Tertius muscu-  
lus ille est, qui primus inter mouentes  
genas & faciei cutem connumeratur,  
κλέτισμα μυώδης dictus. Nam hic aliquā-  
do ita carnosus fit, itaque ascendit, vt in  
partem inferiorem auriculæ, quæ sub  
fibra latitat, inseratur: hancque ad infe-  
riora trahat. Musculos hos sæpius vidi,  
atque alijs ipsos indicaui. Veruntamen  
sæpè etiam accidit, vt non reperiantur.  
Quæ varietas potissima fortasse fuit cau-  
sa, quod horum veluti neque illorū, quī  
in occipite sunt, nulla ab alijs anatomicis  
facta sit mētio. Vnum autem in ipsis ob-  
seruaui, quod quotiescunque priores in  
occipitio positi reperiuntur, semper &  
isti auriculæ omnes manifestè apparent.

In musculo frontis, aut vnus, aut gemi-  
ni sint, quòd non magni facio, à diuino  
Vesalio dissideo: quoniā musculum esse  
atque ad id à natura factū credo, nō au-  
tem panniculum carnosiores redditū.

G 4 & fi.



& fibris pluribus auctum. Cùm motus & ductus omnium fibrarum penitùs similis, quæ duo in carnosio panniculo considerantur, hoc indicent. Ortum huius musculi non ab inferioribus, sed à superioribus partibus esse censeo, cùm illuc attollantur supercilia & cutis simul totius frontis. Neque ab hac fronte tantum media oritur, sed ab ea superiori parte, in qua capillorum finis adest. Aliquando etiam ab vltiori vsque ad coronalem futuram exortum vidi. Neque ob id cū illis sentio, qui ductum fibrarum huius musculi obliquum esse credunt, non autem rectum. Quoniam superciliorum motus rectus ad superiora, & dissectio ipsamet contrarium indicant.

In musculis palpebrarum, qui oculos tegunt ac detegunt, diu erravi, vnà cum Galeno & diuino Vesalio, atque simul cum tota anatomicorum schola. Quoniam semper exteriorem illum, qui totum oculum ambit ab interno angulo ortum in duos dissecui, vnamque ipsius partem aperire, atque alteram genas claudere opinatus sum, mihiq; ipsi pluries æquè, ac alijs in publicis dissectionibus



nibus & priuatis imposui. Postea cum in  
 Oribasij locum incidissem in lib. de dis-  
 sect. musculorum ex Galeno cap. 29. qui  
 liber est 25. collectorum, cœpi dubita-  
 re de hac re, neque ob id sciebam à no-  
 do me extricare. Locus Oribasij hic  
 est. Naturæ quidem in palpebris fabri-  
 candis artificium inuenisse, riteque  
 exposuisse (vt modò diximus) optimi  
 dissectandi professores visi sunt. Ego ve-  
 rò ipsis vtique omnia crederem, si mi-  
 hi ipsi magni anguli musculum exactè  
 ac certè vidisse, persuaderem. At neque  
 adhuc manifestè ipsum vidi: Et dum ma-  
 nuaria opera vitium illud, quod egilo-  
 pa vocant, curatur: locus ille non solùm  
 plerunque exciditur, verùm totum eti-  
 am adeò exuritur, vt à subiectis ossibus  
 squammæ exiliant. Neque tamen pro-  
 pterea palpebræ motus vlla ex parte vi-  
 tiantur, quocircà res ista consideratio-  
 ne egere mihi videtur. Locus hic suspi-  
 cionem iniecit in animum, atque ita di-  
 ligentem me fecit, vt tandem veritatem  
 inuenerim, sed vide, qua ratione. Anno  
 ab ortu Christi millesimo quingentesi-  
 mo quinquagesimo tertio, quarto Ca-

G 5 lendas



lendas Ianuarias, dum hîc Patauîj in pu-  
blica anatome totus essem, Matthias  
Guttich medicus Germanus (vir non so-  
lùm phlosophorum ac medicorum disci-  
plinam, & latinæ, græcæque, ac hebraicæ  
linguæ cognitionem doctus, verùm etiã  
in penetrandis medicamētorum medul-  
lis per ignis vim, atque sublimationem  
vocatam ita excellens, vt omnes, quos  
ego adhuc nouerim, penitùs superet) ad-  
mirabili quadam ratione Venetijs medi-  
cinam faciens, ad me misit caput phocæ  
in foro piscario emptum, detulit autem  
Rubertus Phinch tunc auditor meus, ac  
veluti filius amantissimus, qui postquã  
in excellentem Philosophum & medi-  
cum euasit, artem medicam nunc exer-  
cet summa cum laude & gloria apud Se-  
renissimam Sarmatiæ, vel Poloniæ Re-  
ginã. Ab hoc diuino propemodùm inge-  
nio plurima ego expecto æternitatis  
monumenta, si diuturnam, vt spero, De-  
us Optimus Maximus vitam illi con-  
cesserit. Hoc acceptum caput secare ce-  
pi, atque secando obseruaui animal hoc  
vtrâque palpebram mouere, & oculum  
vndequaue detegere, instrumenta erãt  
quatuor



quatuor muscoli rubri admodum in oculi orbita, vnà cum reliquis ocularibus musculis latentes, & cum ortu illorum, qui motuum rectorum oculi opifices sunt connati, vnus in parte superiori, alter in inferiori, tertius in interno angulo, quartus in exteriori situs erat. Hi in quatuor chordas desinebant, quarum vna in superiorem tarsum, altera in inferiorem, tertia in internum angulum, quarta in oppositum inferebatur, à quibus oculus vndequaq; detegebatur, tractis musculis, Quam structuram publice in theatro ostendi, atque inde admonitus, statim in bouino oculo simile instrumentum, quo superior tantum palpebra tollitur, disquirere cepi: illudq; vnicum inueni. Ab hoc exemplo doctior factus, etiam in humano oculo reperi musculum paruum & tenuem admodum, cuius principium ab eodem penitus loco oritur, vnde etiam manat principium musculi, oculum recta ad superiora attolentis. Hic parvus musculus in chordam admodum latam desinens, totum in palpebræ superioris tarsum inseritur, atque palpebram attollens oculum detegit.

Vnicus



Vnicus autem est, quoniam hæc sola palpebra sursum attollitur. Musculū ipsum maxima animi mei voluptate in eadem anatome publicè ostendi. Gloriorque, quòd primus in Italia fuerim, qui nòdum ab Oribasio propositum dissoluerim. Nam neque, cū ego anatomicum opus Valuerdæ nuper Hispanica lingua Romæ excussū lego, vllam huius à me promulgati musculi mentionem factam reperio, quo argumento adducor, vt credam anatomicis etiam Romanis, quorum ex sententia plurima noua profert Valuerda, musculum hunc ad hanc vsq; diem esse ignotum.

In musculis nasi, buccarum & labiorū à Vesalio hac ratione dissentio. Quoniam, vt à sexto pari ab ipso proposito, quod in narium amplitudine locatum est incipiam, in hoc minimè mihi satisfacio, neque quid apertè asseram, aut negem, habeo. Aliquando enim adesse videtur; aliquando non. Audio ciuem tuū Columbum planè asserere musculum hunc figmentum esse. Ego, mi Petre, non audeo ita apertè hoc negare: quoniam in aliquot nasutis cadaueribus (vt dixi) mihi



mihi visus sum vidisse, in aliquot verò  
 non. Quare opus habeo præceptore, at-  
 que donec aduenerit, qui rem patefaci-  
 at, anceps ero, aut potius in Columbi sen-  
 tentiam inclinabo. Dum tertium par de-  
 scripsit, nouum musculus prætermisit  
 carnosum totum, sed gracilem atque te-  
 retem, qui oritur à cavitae illa, quæ ma-  
 lis subijcitur, & in labrum superius, vel  
 potius in frenum ipsum inseritur. Hic  
 musculus multa pinguedine obuolutus  
 in omnibus cadaueribus à me repertus  
 est. Quintum par ego tale reperio, quod  
 non membraneum, sed carneum vide-  
 tur: neque à malarum osse tantum ori-  
 tur, sed etiam à tota cavitae, vel à cana-  
 li illo osseo, qui circa nares est. Hoc par  
 narium pinnam anteriorem occupat, &  
 in labium superius inseritur. Quædam  
 etiam carnosæ fibræ, non paucæ à medio  
 supercilio, & spina narium exortæ, quæ  
 obliquæ descendunt, prædicto musculo  
 adduntur, atque pinnæ implantantur, ad  
 hanc fursum reuellendam. Has posset a-  
 liquis pro pari musculorum recensere,  
 quòd nares dilatet: posset etiam quinti  
 paris partes asserere, quod nihil refert,  
 modò



modò cognoscat vsum, quem in reuellē-  
da pinna habent. Alium prætereà inue-  
nio musculum carneum, sed parvū, qui  
circa radicem pinnæ narium exoritur, at  
que illam ascendens per trāsversum, vf-  
que ad summum ferè dorsum nasi ascen-  
dit, vt contractus ad suum principium  
depressa pinna nares claudat. Hic ab ipso  
prætermisus est. Ultimo in loco adden-  
da est moles illa carnea, musculosa tamē,  
quæ vtrunque labium format. Nam &  
hæc in duos musculos diuiditur, quo-  
rum alter superius, alter verò inferi-  
us labrum efficit, suosq; motus distin-  
ctos à motibus aliorum musculorum ha-  
bet. Ex hoc sequitur nouem esse muscu-  
lorum paria, quibus narium pinnæ labia,  
& totius faciei cutis mouentur.

Primum scilicet traditum à Vesalio: Se-  
cundum ab eodem descriptum.

Tertium, quod ab illo pariter adiūctum  
est.

Quartum, prope hoc exortū, quodque  
ab illo est prætermisum.

Quintum, quod ab ipso, quarto in loco  
recensetur.

Sextum ab ipso quinto in loco numera-  
di



tum, quod vti dictum est, in duo diuidi potest. Sed pro vno, cum non multum referat, censeatur.

Septimū, quod ab ipso est prætermis-  
 sū. Octauū, quod ille sexto in loco recenset  
 Nonū, ac vltimum illud est, quod vtrū  
 que labium efficit.

Omnes, qui de musculis oculorum  
 hucusque scripsere, aut publicè profite-  
 res (quod ego sciā) loquuti sunt in pub-  
 licis dissectionibus, malè planè illos enu-  
 merarunt, Nam vt à diuino Vesalio inci-  
 piam, ipse nobis septem musculos enu-  
 merauit, qui quidem in boue reperiun-  
 tur: quatuor scilicet motibus rectis, &  
 & geminos circularibus inseruientes,  
 non rectè tamen, mea sententia, vt sunt  
 in boue, collocatos. Septimum addidit,  
 qui magnus ad radicem oculi situs est.  
 Verū octauum prætermisit, qui mu-  
 nus habet trahendi membranam illam  
 cartilaginosa, quæ ab Aristotele 2. de  
 Hist. Ani. cap. 12. vocatur *Δίγμα ἰν τοῦ  
 καύου*. hac niētantur animalia bruta, cum  
 aliquid, ne in oculos incidat timent, &  
*σκαρδαμύτις* tunc dicuntur ab eodem  
 Aristotele. Musculus igit, qui hāc trahit,  
 à Ve-



à Vesalio prætermisus in bobus, qui ipso donati sunt, octauus erit: vel saltem pars illius, qui oculum ad exteriorem angulum trahit. Quæ autem ratione oriatur, quoue in loco situs, & vti membranæ illi alligetur, quæque sit dictæ membranæ structura, collocatio, & vsus, à me prætermittuntur: cum in humano oculo minimè sint. Iam addatur Lycus antiquissimus anatomicus, qui voluit quinque tantum esse oculorum musculos, cuius sententiæ Romanos etiam anatomicos esse, ex Valuerdæ Hispani libro colligere possum. Ex his quatuor rectis motibus præsumunt, vel etiam circularibus, nec non sistendo oculo continendoque, qui motus omnes à dictis quatuor musculis, mea etiam sententia, fieri possunt, vno illo excepto circulari, qui, vt opinor, ab his musculis successiuè motis fieri non potest. Quoniam fieri nequit, vt ex refractis duobus vel pluribus motibus rectis resultet circularis: cum inter rectum & curuum nulla detur proportio. Sed risum continere aliquando nequeo: cum videam in humano oculo adesse circularis motus opifices, musculos



Ios hosque ab exercitatissimis anatomicis minimè videri. Quintum addunt musculum, in quo, quid sibi velit doctus Valuerda, ingenuè fateor, ignoro. Id autem fortasse fit, aut quia nimis breui oratione eum descripsit, aut quia Hispanicum dialectum non ita ego possideo, uti in eo intelligendo loco requiritur. Quare, ut vides, cum omnes negligenter de his musculis tractarint, synceram ipsorum historiam, uti se habent, in humano oculo, sic habeto. Posteaq; iunctis ad sydera palmis Deo Optimo ac maximo, qui humanos oculos tam insigni magisterio ornarit, hymnum laudis canito.

Sunt itaque sex numero in hominis oculo musculi à me explicandi, si que aperientem oculum elatagena adiungere voluerimus, septem numero erunt. Verùm hoc ultimo prætermisso, sex tantum nos tractemus. Ex his quatuor sunt, qui rectis motibus præfecti, ita sunt collocati, eamque originem & insertionem planè habent, quam reliqui anatomici adscripsere, quiq; si omnes simul agant, intro oculum trahunt & sistunt. Alij duo in gyrū flectunt, quorū prior,

H      qui



qui & longior & gracilior reliquis dictis est, in interno angulo collocatum, oritur ab eodem penitus loco, vnde is incipit, qui recta oculum ad internum angulum trahit: hic non in hominibus solum, sed etiam brutis ipsis, cum ad anguli interni exteriorem ferè marginè peruenerit, cui lachrymalis caruncula subiecta prominet, & vbi vterque lachrymalis meatus vnitur, in chordam teretem, gracilemque desinens, eam trochleæ obuoluit, quæ chorda reflexa ad angulum rectum versus regionem superiorem oculi, in illam inferitur. Inter implantationes duorum illorum musculorum (si rectè memini) quorum alter sursum, alter verò ad angulum exteriorem recta oculum trahit. Trochleam verò appello cartilaginem quandam, quæ canalem habet, per quem currit dicta chorda, & ligamento membraneo ita ab angulo pendet, vt trochleæ penitus imaginem in se contineat. Quæ cum in oculis bouinis valdè magna sit, & in humanis non minima, miror, quomodo fieri potuerit, vt ab anatomicis non fuerit obseruata, aut si notata fuerit, qua ratione

alijs



alijs non communicarint. De ijs loquor,  
 qui libros anatomicos ediderunt. Mus-  
 culus hic quintus dum intro, ad princi-  
 pium trahitur, chorda sua circulari quo-  
 dam motu oculum ipsum ad angulum  
 internum obuoluit: cui opponitur se-  
 xtus, qui in parte inferiore orbitę ori-  
 tur ab ea rima, quę ceu futura apparet  
 facta ab illa squamma ossea, sub qua la-  
 tēs neruus tertij paris ad malas exterior-  
 res per satis amplum foramen transmit-  
 titur. Aliquando etiam ortum observa-  
 ui, quasi in exteriori margine ab ea su-  
 turę parte, quę in orbita inferiori ap-  
 parens, coniungit primum os malarum  
 cum illo, quod maximum omnium à Ve-  
 salio quarto in loco numeratur. Ab alte-  
 ro itaque ex dictis locis parum intra  
 ambitum anteriorem carnosum principio  
 ortus hic musculus gracilis, & teres per  
 transuersum ad angulum anteriorem af-  
 cendens, oculumque transuersum am-  
 plexatus breui chorda in ipsum inferi-  
 tur, ita propè insertionem quinti, ut ali-  
 quando illius atque sexti istius una atq;  
 eadem chorda videatur. Dicti musculi  
 munus est, ut dū deorsum trahitur, versus

H 2 prin.



principium suum in gyrū, ad angulum  
exteriorem oculum uoluat. Huic histo-  
riæ Capredonum nostrum testem addo,  
cui primū inuentum hoc monstraui,  
dum vnā mecū Patauī cadauer quoddā  
dissecaret. Quoniam autem hic muscu-  
lus sextus transuersus latitat inter ocu-  
lum, & chordas duorum musculorum,  
quorum alter infrā, alter in angulo ex-  
teriori collocatus est, ideò anatomicorū  
mentem ita perturbauit, vt aliqui dixe-  
rint, ipsum ab oculo ortum in eūdem in-  
feri.

Anatomici omnes, quatuor tantū  
musculorum paria maxillæ adscripse-  
runt, quintūque ignorârunt, non sine  
magna Naturæ contumelia : cū tamen  
& perspicuum inter secādum sit, & pro-  
prius vsus ipsum etiam prodat. Mini-  
mè enim negandum est (nisi veritas ip-  
sa sit iugulanda) quartum par musculo-  
rum à Vesalio descriptum os aperire.  
Temporales verò os claudere, & maxillā  
malis validè adstringere. Massiteras etiā  
tū stringere, tū ad latera maxillā didu-  
cere, vnde massiteres dicti sunt. Laten-  
tes quoque in ore, cū à cauitate process⁹ ali  
for-



formis oriantur, & ad anteriora parùm  
 decliues in maxillam interna in facie ci-  
 tra angulum inferiorem inferantur, pro-  
 ductam maxillam retrorsum reuocare.  
 Quod si hæc vera sunt, vellem ego, vt  
 par illud, quo maxillam ad anteriora  
 producimus, proponerent. Nam maxil-  
 læ motus simplices sex sunt, & vnus cō-  
 positus. Simples sursum & deorsum,  
 dextrosum & sinistrosum, antrorsum  
 & retrorsum. Compositus verò ex dex-  
 tro & sinistro, & eo, qui antrorsum & re-  
 trorsum fit, ille est, quo videtur circun-  
 duci maxilla. Si igitur motus sursum tē-  
 porales, deorsum quartum par, ad dex-  
 tram & sinistram massiteres, retrorsum  
 verò latētes in ore opifices sunt: Requi-  
 runtur necessariò gemini musculi, vel  
 vnus saltē, qui antrorsum hanc eandem  
 partem protrudat. Scio, mi Petre, quod  
 talem argumentandi rationem, falsam  
 esse dicere poteris, cū tibi liceat vnā  
 cū reliquis anatomicis hos mot⁹ alia ra-  
 tione distribuere. Verū, ne verbosis  
 rationibus litē hanc finiamus. Sed gladi-  
 olis ipsis, auferas temporales musculos,  
 auferas massiteras, & diligētissimè afe-



ras, quoniam sub his statim nouum par-  
 musculorum uidebis, quod distinctum  
 est ortu, ductu, & insertione ab ijs, qui  
 latentes in ore vocantur. Nam illi oriun-  
 tur ab intima cauitate, vel canali proces-  
 su aliformium, isti verò principio par-  
 tim neruoso, & partim carnofo exordi-  
 um ducunt, ab ala vel latere exteriori i-  
 psorum processuum, & à facie dicti late-  
 ris extrema, quæ aspera & inæqualis est.  
 Aliqua etiam ex parte oriuntur ab apice  
 illo ossis sphenoidis asperiore & acuto,  
 qui in temporum cauitate ex aduersum  
 os iugale respiciens, rimæ imminet am-  
 plissimæ, quæ ab eodem sphenoides &  
 maximo malarum osse est formata. Illi  
 præterea antrorsum declinantes inserun-  
 tur in maxillæ regionem dictam. Isti ve-  
 rò satis carnosi pro ratione magnitudi-  
 nis facti, & ad posteriora usque oblique di-  
 ducti in maxillæ ceruicem, & capitis ei-  
 usdem internam in faciem inferuntur. Mu-  
 nusque, ut luce clarius videbis, hoc impo-  
 situm habet, ut maxillam antrorsum tra-  
 hant. Vide quæso, quàm multa sunt præ-  
 termissa à diuinis anatomicis, ut poste-  
 nos inuenientes hæc, planè cognoscamu

ins



in hoc organo diuini animi plurima etiam latere, quæ fortasse Deus gloriosus nostris oculis non manifestabit.

Cùm musculos hyoidis ossis recensent anatomici, quatuor tantùm paria constituunt, quæ os istud moueant, atq; aliquando secundum hyoidis par cum primo mouente linguam ita confundunt, vt idem pro duobus depingant. Ego autem à natura rei edoctus, sex paria musculorũ, quæ hypsiloides moueant esse dico, quæ uero omnibus accuratè dissecantibus planè apparere possunt, eaque hoc ordine recensebo.

Primum par illud sit, quod à summo pectoris osse ortum in dictum os, vt alij asserunt anatomici, inseritur: hocq; primum Vesalij sit. Secundum par quasi cutaneum (quia immediatè sub illis, qui maxillam deorsum trahentes os aperunt, cuti subijcitur) ortum à summo mento, atq; eius latebris, & obliquis fibris deorsum declinās, in os hyoides inseritur. munus ipsius est, vt altero trahente musculo obliquè fursum feraturos, vtroq; verò trahente recta ad apicem menti fursum ac antrosum vellatur.

H 4 Terti-



Tertium par illud sit, quod tertio in loco à diuino Vesalio numeratur ortum à calcari, & aliquando à quarto musculo os aperiente perforatum in latera hyoidis, ea sanè insertione, quæ ab ipso proposita est, inseritur.

Quartum gracile admodum à scapula ortum, ac in hyoidis latera insertum, ipsum deorsum trahit, quod quarto etiam in loco à Vesalio collocatur.

Quintum à nemine proditum, & rectis fibris ortum à medio, internoque mento in os hyoidis inseritur. Hoc reliquis anatomicis ignotum est, aut inter partes primi mouentis linguam collocatum, cum tamen nullâ cum lingua communicationem habeat.

Sextum par efficiunt geminæ carnes musculorum effigiem gerentes, quæ ab eodem mento ortæ, aliqua ex parte commixtæ apparent cum primo mouente linguam. Verum vlteriùs ad inferiora procedentes inseruntur in latera ossis hyoidis, munusq; habent hoc vnum, vt ad mentum ipsum os trahant.

Multū ac diū laboraui in disseccandis linguæ musculis, neque vnquam humana

næ



nã aliorum anatomicorum placita qua-  
 drare inueni. Vesalius diuinus nomen  
 musculos assignat, qui motuum linguæ  
 opifices sint. Valuerda decẽ esse asserit.  
 Ego verò tot reperire nequaquam po-  
 tui, quanquam summam diligentiam,  
 atque studium in his inuestigandis ad-  
 hibuerim. Quot igitur à me inuenti  
 sunt, audi. Primùm reperi par ab asperi-  
 tate quadã in interno ac medio mento  
 posita ortum, principio satis angusto, à  
 quo deinde latiùs factũ, in mediam fe-  
 rè linguam inferiorem implantatur, atq;  
 maxima ipsius pars versus radicẽ linguę,  
 minima verò è regione dictæ versus an-  
 teriorem apicem fertur, ita, vt eiusdem  
 musculi partes contrariam subeant ope-  
 ram. Nam cùm maxima fibrarum portio  
 agit ad exortum, tracta exerit linguam  
 extra dentes & labia. Cùm verò minima  
 munere suo fungitur, introrsum eandẽ  
 reuocat. Dictorum autem musculorum  
 aliquot fibrę aliquando ossi hyoidi com-  
 municantur. vt idem ad mentum at-  
 trahant. Primùm hoc par moles illa car-  
 nea videtur, quæ pro nono musculo à  
 Vesalio numerata est, Cuius etiam pri-

H 5 mum



mum par linguæ ascriptum, nisi pars i-  
 stius sit, vti in homine reperiatur, ego  
 planè ignoro, meque nunquam vidisse  
 fateor. Secundum par ab ossis hyoidis  
 lateribus oritur, atque in radicem, &  
 latera ipsius linguæ inseritur. Hoc in  
 homine simplex est, quamnis in bobus  
 reperiatur geminū, idem Vesalij etiam  
 secūndum dici potest. Tertium par ab ex-  
 terna calcaris facie oritur, nō vti in bo-  
 bus carnosum & crassum, sed gracile, at-  
 que inseritur non ad finem implanatati-  
 onis secundi paris, sed circa ipsam medi-  
 am, ac vlteriū procedens quasi ad apicē  
 linguæ summum peruenit. Hoc Ve-  
 salij tertio pari respondet. Quartum,  
 quod & faucibus ascribi potest, oritur  
 ab interna facie caltaris gracile admo-  
 dū, atque ad anteriora declinans, in  
 membraneum veluti definit tendinem,  
 qui primæ laryngis cartilagini, ac hyoi-  
 dis lateribus, nec non & extremæ lin-  
 guæ inseritur. Huius munus est, linguam  
 & partes dictas retrorsū ac fursū at-  
 trahere, & fauces in deglutiendo con-  
 stringere. Hoc æquē inter faucium mus-  
 culos, ac inter linguæ motores enume-  
 rare



rare possumus. Quare si linguæ ascribe-  
mus, quatuor erunt paria, quæ ipsam  
mouebunt: sin faucibus, tria tantum: Sci-  
asque planè nullos alios præter dictos  
musculos reperiri in homine, si quis re-  
ctè secare voluerit.

Verum mirari iam desine. Quod  
ego hæc inuenerim, cum videas homi-  
nes in accusando Vesalio audaciores  
cuncta eius vestigia sequi, nihilque,  
quod ab ipso sit prætermisum, addere.  
Nam Vesalius faucium musculos leui  
quadam negligentia (quoniam non om-  
nia possumus omnes) prætermisit. Qui  
posteriores fuere, quique Galeni & O-  
ribasij librum de dissectione musculo-  
rum aut legerunt, aut legere debuerunt,  
ita horum faucium musculorum obliti  
sunt, veluti si non adessent, aut saltem à  
Galeno indicati minimè fuissent. Vesa-  
lij enim opus editum erat, antequam ci-  
uis meus Augustinus Gadalpinus Medi-  
cus doctissimus, & de studijs nostris cò-  
munib⁹, quàm optimè meritis, libellū  
Galeni de dissectione musculorum Lati-  
num à se factum in lucē dederit. Ut igit  
omnes anatomici, qui post editum opus  
Vesa-



Vesalij scripsere, hoc nomine accusandi sunt, ita ille ab hac nota liberandus est. Sed ad rem. Galenus in eo libello duos describit musculos faucium, quorum alterum in dextra, alterum in sinistra parte collocat, ac reliquos prætermittit. Quamobrem quomodo se habent hi muscoli in homine, & quot sint, audi: discasque, quam diligentius anatomici veterum scripta debeant observare.

Tria sunt istorum musculorum paria, quæ faucibus dilatandis, aut constringendis inferuiunt. Quorum primum (vt ab hoc artificioso incipiam) oritur nervoso, atque tenui principio ab apice quodam cuneiformis ossis, qui vltta foramen illud paruum est, per quod arteriola per membranā dispergēda in calvariā ingredit, quiq; apex articulū maxillæ cum osse temporum quasi tangit. Ab hoc igitur principio ortū, & gracile admodum per cavitatē pterigoidis interne eius alæ, vel lateri attensum descendit, ac desinens in tendinem nerveum, tenuē quidem, sed latiusculū, transit per mirabilem quandam rimam, quæ in extrema

ma



ma dicti pterigoidis ala insculpta est, atque inseritur in cavitatem, illam palati partem, à qua gurgulio dependet. Munus istius paris est, quia reflectitur ad dictam rimam, ut sursum atque antrorsum quodammodò gurgulionem, & extremum palatum trahat. Si quæ ipsius alter tantum musculus agit, opus est, ut partes dictas trahat ad illum latus, in quo situs est. Secundum par nervoso itidem principio ab eadem propinqua parte, unde primum oritur, atque deorsum declinans ad faucium latera in partes, quæ amygdalas vocatas continent, inseritur, & quasi totam partem faucium lateralem, ac posteriorem amplectitur. Munus istius est, ut amygdalas sursum, ac ad latera trahat, totamque faucium cavitatem in diuellendo quasi dilatet. Tertium ortum ab ea parte, qua basis capitis ceruici iungitur, tenue admodum totam faucium posteriorem, ac lateralem cavitatem vestit, & descendens inseritur in hyoidis latera, & in primam cartilaginem laryngis, & aliquando in radicem linguæ, obscure tamen. Munus istius est, fauces angustare, atque (uti opinor) offæ deuolutioni  
vel



vel deglutitioni inferuire. Si quis etiam velit, poterit per me quartum linguæ par his adiungere, cùm ad idem opus conferat, & quatuor faucium paria constituet, quorum duo ad dilationem, atque ob motum cibi vel humidi alicuius in vomitibus ad superiora propulsi, ne ad nares ferantur, sunt facti. Duo verò reliqui ad cōstringēdas fauces, guttur q̄; attollēdū ob deglutitionē sunt destinati. Mi pater cū obseruaris. certò scio, quòd ita placebūt, vt si nihil aliud noui indicārim, tibi tamen hac vna in re satis sup̄erq; satis factum esse fatearis.

In musculis tamen laryngis quædam etiam habeo, quæ tibi cōmunicāda sunt. Et primū circa p̄prios vocatos, in quorum primo pari atque secundo Galenus se ipsum decepit, ac simul etiam Vesalium, cū in septimo de vsu part. cap. ii. & in lib. de dissect. organorum vocalium cap. 5. quatuor hos dicat esse musculos, quòd falsum est, non solū in homine, sed in larynge etiam bouina, cū vnū tantū sit par, quod exortum à cricoide cartilagine in scutiformē inseritur. At pręterea excusandus est  
Gale-



Galenus, cùm in libello de dissect. musculorum tacitè se ipsum castigans, pro vno pari tātum numerârit. Quod in secunda æditione minimè fecit Vesalius, neq; Valuerda, qui cùm asserat tantam diligentiam ac studium adhibuisse, vnà cum ciue tuo Columbo, in indagandis laryngis musculis, non viderit se par vnum tantum bis repetitum, pro duobus proponere (vnum etenim re vera est, non duo) neq; præterea animaduertit locum Galeni à me citatum: Verùm hi quoque excusatione digni sunt, cùm alios anatomicos excusamus, à quibus maiores adhuc errores, quàm hi sint, patratos videmus. Nescio autem, quò oculos intentos habuerit Ciuis tuus, atque simul idem Valuerda, dum musculos laryngis simul disseccarent. Asserit enim hic in opere Hispano nunquam in conspectum ipsorū venisse quintum par musculorum inter proprios laryngis à Vesalio descriptum, cùm fortasse nullum aliud isto magis conspicuum sit. Hoc tamē Valuerdæ dono, quia postea fuit valdè diligens in obseruando quarto pari communium, quoniam re vera in homine nō adest, egoq; tan-



tantum in ruminantibus reperire potui. Sed adhuc ipsum fuisse diligentio- rem vellem, in discutiendo sexto pari à Vesa- lio inter proprios laryngis descripto: an vnus scilicet sit musculus, an duo, quod que munus habeat, an dilatandæ con- stringendæ uel ligulæ, Nam vnus mihi vi- detur, qui ligulæ partem dilatet. Hæc tantum, habeo de musculis laryngis di- cenda, in quibus ab alijs dissentiam.

De scapularum musculis taceo, quia optimè omnia à diuino Vesalio sunt pro- dita. Idem minimè obseruare possum in illis, qui humerū, vel brachium mouēt. Quoniam reperio omnes recentiores a- natomicos in hac esse sententia: quod se- cundus mouens humerum *Δελτοειδής* di- ctus ab auctoribus grecis *επωμίο* vocatus sit, quod falsum est, Hippocratis, Gale- ni, Ruffi Ephesij, atque tandem Oribasij auctoritate, vt superiùs probaui: cū in acromio tibi sententiam meam aperi- rem. Quare admonendi erunt omnes, vt auctorum verba diligentius perpendāt. Rursus Vesalius, ac Valuerda in descri- bendo quarto musculo, qui humerum eundem deorsum trahit, prætermiserunt muscu-



musculum hunc aliquando cùm ad an-  
 gulum inferiorem scapularum peruene-  
 rit, indè plurimas carnosas fibras recipe-  
 re, & quasi nouo alio, sed minimo prin-  
 cipio donari, quod non in vno, vel alte-  
 ro tantùm cadauere, sed in quàmpluri-  
 mis obseruauì. Quanquam minimè ne-  
 gârim, aliquando hoc non reperiri. Ve-  
 rùm maioris momenti musculus est, qui  
 ab ipsis prætermittitur, cùm tamen mul-  
 tò antea non fuerit prætermisus in si-  
 mijs à Galeno 98. cap. libelli de dissect.  
 musculorum, neque etiam in secundo  
 de Anat. admin. cap. primo. Nam in ho-  
 minibus quoque reperitur, & à tertio  
 sibi proximè hæreti omnibus notis di-  
 stinctus est, chorda scilicet, insertione,  
 tunica, & ortu, cumque ita se res habeat,  
 vt omnibus patere potest, hic octauus  
 meritò erit musculus, qui in omnibus  
 hominibus, quos secui, oritur à parte su-  
 periori costæ inferioris scapularum, quæ  
 ceruici iungitur, brevisque est admodum:  
 sed non ex carnis, à reliquis omnibus  
 manifestè seiunctus, qui neruoso fine  
 propè septimi musculi insertionem, in  
 humerum implantatur, cumque huius

I munus



munus ipso vix conspecto statim pateat, ideo illud prætermittam. Quâdo autem musculum hunc requires, videto quæso, an pars tertij à nemine dici possit, meque admoneto.

Iam ad capitis musculos venio, doleoque, quod in his minimè sim concors cum reliquis anatomicis. Quoniâ nunquam ita rerum nouitatem affectaui, ut gratis ab aliorum sententia recedendum esse iudicârim. Neque illam laudem, quam ex alieno vituperio mihi acquisierim, veram aut solidam esse censeo. Cùm illud vnum semper mihi satis fuerit, in scholis posse fideli dissectione, aliorum ac præcipuè veterum anatomicorum placita ita explicare, ut ab omnibus meis auditoribus apertè intelligi, ac memoriæ mandari potuerint. Quamobrem, nisi vrgeret veritas ea, quæ mihi per plures annos perspecta videtur, certò scias, me nunquam à Vesalij dogmatibus esse recessurum, quod in musculis capitis facere cogor, cùm ea diuisio, quæ ab hoc summo anatomico facta est subiectæ rei minimè respondere videatur. Quare audi, quales à me reperi-



periantur. Primus musculus mouens caput, oritur neruoso principio à spinis primæ, secundæ, tertiæ, quartæ, quintæ, & sextæ vertebræ thoracis. Deinde ascendens oritur etiam carnosio exordio à ligamento illo medio, quod per spinas ceruicis vsque ad occipitium medium currit, ita, vt principium dicti musculi perduret à sexta thoracis, vsq; ad tertiam ceruicis vertebram, qui musculus inde obliquè carnosus factus ad caput ascendit, atque ab illa parte, quæ à thoracis spinis oritur duas mēbraneas chordas producens, easdem in processus transversos primæ & tertiæ vertebræ ceruicis, vel secundæ & tertiæ, & quartæ aliquandò inserit. Altera verò parte carnosiori, quæ vt dictum est, à ceruicis ligamento oritur, ad occipitium usque ascendit, atque in ipsum implantatur, ea sanè ratione, quæ à Diuino Vesalio prodita est, quadā neruosa particula excepta, quæ in mammillarē processum inferitur. Vfus istius est, vt circūducat caput, atq; eas ceruicis partes, quibus adnectitur. Quod si vnà cum coniuge suo æquè ad propriū principiū vellatur, rectà dū

I 2 abnuir



abnuimus, retrorsum caput ac cervicē trahit. Secundus musculus oritur triplici principio, primò scilicet (quod aliquando, sed rarò deest) à spina septimæ cervicis vertebræ, & aliquando à prima vel secunda tantum thoracis spina, alter verò nascitur principio à transversis processibus primæ, secundæ, tertiæ, quartæ, & quintæ thoracis vertebræ: Quod ita variat, ut aliquando neque à quinta, neque à quarta oriatur, sed à primis tantum tribus, aliquando etiam loco quartæ & quintæ oritur quodam tenuissimo initio, à processu transverso octavæ. Tertium atque ultimum huius musculi principium est à transversis processibus quinque inferiorum vertebrarum cervicis. Ex his itaque tribus locis, continuata tamen serie, exortus musculus, (dicant, quicquid velint alij de mole carnea) atque ascendendo vnus ita effectus, ut minimè diuidi possit, comparique suo quasi connatus in occipitium ratione tradita à Vesalio inferitur. Neque, ut aperte videre poteris, portio illa quarta descripta à Vesalio huic adiudicanda est, sed potius pro tertio musculo est

nu-



numeranda. Isto agente caput retrorsum ad latus trahitur, agente verò toto pari rectà retrorsum vellitur. Tertius musculus non admodum grandis, nec crassus oritur nervoso principio à transversis processibus sex priorum vertebrae cervicis (adde, quod etiam aliquando incipit à processibus transversis primæ, secundæ, tertiæ, quartæ, & quintæ thoracis, sed hoc rarò admodum) carnosusq; leniter factus nervoso fine inferitur in radicem posteriorem māmillaris processus. Hunc pro quarta parte secundi musculi tradit Vesalius: cum tamē exactè distinctus sit musculus. At fibræ aliquot cuiusdam dorsalis musculi, quæ cum principio huius commisceri videntur, erroris causa fuere. Munus istius est, ut ipso agente retrorsum trahat caput, & ad latus, adiuuante verò suo compari retrorsum tātum leniter ducat. Quartus musculus is penitus sit, qui tertio in loco à Vesalio censetur. Quintus sit quartus ab ipso descriptus. Sextus sit quintus à Vesalio enumeratus, in cuius usu, ego valdè ab ipsius sententia dissentio. Quoniam huic ascribit munus



mouendi caput in gyrum, vnà cum musculo sexti paris, quod mihi penitus à veritate abhorrens in hoc quinto videtur. Nam si non potest moueri caput in gyrum, nisi ad motum primæ vertebræ, quæ circa dentem secundæ obuoluatur, necessarium erit, ut ab hoc musculo prima moueatur, & ad motum ipsius caput pariter vertatur: hoc autem fieri non potest: ergo sequetur, nō esse instrumentum motus capitis in gyrum. Videamus enim ortum, atque insertionem: si vertebra est circunducenda, ortus erit in occipitio, & insertio in processu transverso dictæ vertebræ. Iam agat hic musculus, si intereà caput moueatur, agere non poterit, quia opus est quiete ipsius partis vnde oritur, si trahere debet. Si igitur detur, quod caput quiescat. musculo agente circunducetur vertebra, at ad motum ipsius circunducitur etiam caput: ergo accidet, vt simul & semel moueatur caput, & quiescat. Sed demus caput moueri, dū agit hic musculus. Quæro iam, an motu contrario vel eodem moueri debeat? Si contrario moueatur, concursus procul dubiò fiet, atque ita  
ad mo-



ad motum vertebræ non mouebitur caput, quia vertebra dextrorsum, caput vero sinistrorsum motibus contrarijs agitantur, per quos concurrent. Verum sit idem motus, ut sinistrorsum vtrunque feratur. Quæro iterum, quodnam ex ipsis in motu præcedat, caput scilicet, an vertebra? Videtur esse respondendum vertebram præcedere, quoniam ipsa per se moueatur, caput vero per accidens ad motum illius. At à capite adest motus principium, quia inde musculus oritur, qui ipsam trahit: ergo sequetur, à capite vertebrarum moueri, & non à vertebra caput, quod est contra dogma ipsius. Aliquis tamen respondere posset, quod circunducitur caput ab hoc musculo, à vertebra exoriente atque in occiput desinente. Verum si hoc daretur, sequeretur, quod iste musculus moueret caput per se, & non per motum vertebræ & in proprio articulo, qui articulus secundum Vesalium est ineptus ad motum circularem. Quare si concedimus musculum hunc sextum, vel Vesalij quintum inseruire circulari motui, necessario sequitur, aliquod ex his incommodis,

I 4 quod



quod verum dogma, imò verissimum de capitis motu in gyrum per accidens destruat. Decepit autem istius sexti musculi positio diuinum hūc anatomicum, quæ quasi contraria positioni videatur musculi septimi paris. Verùm si ad hanc positionem oculos valdè intentos habuisset, poterat facilimè deceptionem vitare, cū istius sexti paris musculi ab occipite orti quasi rectà deorsum inclinātes in transuersos primæ ceruicis vertebræ implantari videantur, non autem obliquè declinare, vti in motu circulari requiritur, & quemadmodum septimi paris musculi se habent. Si igitur in gyrum non mouet hoc par, quis erit suorum musculorum vsus? ille perfectò erit, qui ascribitur à Galeno in lib. de dissectione musculorum cap. 9. vt si integrum par trahat, faciat, quod recta leniter abnuamus. Sin alter tantū musculus, vt retrorsū caput in illam partem inclinet. Septimus prætereà musculus ille sit, qui sextus à Vesalio describitur verus opifex istius motus in gyrum, dum vnicus tantū agit. Quoniā si integrum par aget aut sistet caput, aut illud retrorsū



sum vix trahet, ad motū scilicet ac quietem vertebræ, cū hæc capiti ob ipsam accidant. Octauus & penultimus ille sit musculus, qui septimo loco ab eodem explicatus est. Huic nonus musculus, vel par nonum musculorum addatur aliqua ex parte, sed non integrè à Galeno propositum, quod in anteriori ceruicis facie sub gula collocatum, oritur nervoso principio ab omnibus ferè vertebra ceruicis, chordis quibusdam originem à principio processuum trasuersorum ducentibus. Nam à septima, sexta, quinta, quarta, & tertia quoque vertebra hæc ratione enatum, & carnosum aliquantis per factum ascendens inseritur sine carneo in capitis basim, inter vtrunque processum, quo cum prima vertebra articulatur, ad hoc vt manifestè caput ad anteriora flectat. Vltimo in loco notandi sunt muscoli duo admodum parui, qui à processu transuerso primæ vertebræ orti, valdè graciles ascendunt ad caput, & in illud inseruntur prope mammillarē processum, videnturq; particulæ illius, qui à me tertio in loco numeratus est. Horū mentionē fecisse vide-



tur Galenus in lib. de dissect. musc. dum loquitur de vndecimo musculo vel pari caput mouente. Tu nunc meam hanc sententiam sub incudem ponas, vt cognoscere possis, quod ὁ δὲ ἰσὶ πονηρὸς κόμματῳ, vt est in adagio, hæcque de musculis capitis tibi satis sint.

Sequuntur abdominis musculi, in quibus penitus cum diuino Vesalio, ac reliquis anatomicis idem sentio, hoc vno excepto, quod rectis circa principium ascribunt quandam partem carnosam à pube ortam, quæ nulla ratio illis ascribenda est, causas postea subiungam, cum prius partem hæc descripfere. In inferiori itaque abdomine inter lineam illam albam, in quam concurrunt chordæ omnium ferè musculorum atq; principium neruosum rectorum, oritur musculus quidam totus carnosus, principio non admodum lato ab osse pubis, quasi à parte ipsius exteriori, qui oblique ascendens versus lineam dictam in acutum desinit, totusque obliquo fibrarum ductu in ipsam inseritur. Longitudo istius musculi non admodum magna est, cum non pertingat ad vmbilicum vsque,



usque, nec spatium quatuor transuersorū  
 digitorum excedat. Vfus est ipsius, mea  
 sentētia, vt obliquē deorsū lineā illā  
 nerueā atq; agente suo coniuge alterius  
 lateris rectā eādē deorsū trahat, ita, vt  
 ad cōpressionem subiectarum partium  
 ad inferiora faciat. Nam si adhibita dili-  
 gentia musculos obliquē ascendens ob-  
 seruabis, illos iuxta anatomicorum pla-  
 citum à summa ilium spina initium du-  
 cere videbis. Si quē ductū deindē prose-  
 quaris, chordam vtriūque, dextri scili-  
 cet & sinistri parū infra vmbilicum  
 concurrentem reperiēs. Qua ratione fit,  
 vt musculi isti obliquē deorsū compri-  
 mant omnia, quæ in abdomine sunt à su-  
 perioribus vsque ad vmbilicum, aut pa-  
 rū infrā. Atque in summe continent  
 viscera, ea ab his nequicquam comprimi  
 possunt. Quare hac ratioe sequit, iniustā  
 esse naturā, cū obliquē descēdentes, &  
 trasuersi, & recti omnia cōprimant, ob-  
 liquē verò ascendentes ea tantū obli-  
 quē deorsū trudent, quæ superiora  
 sunt, inferiora verò minimē tangant.  
 Hæcque tantū à rectis ad dorsum, atq;  
 à trasuersis compressa elidantur. Quare

Natura



Natura æquitatem suam seruans ob istorum defectum duos hos musculos paruos & obliquos, in inferiori abdomine collocauit, vt quicquid infra vmbilicum est, obliquè deorsum trudent, atque defectum obliquè ascendentium corrigant. Audio quosdam, qui se mihi amicos profitentur, publicè hanc opinionem aliquando irridere: atque rationes etiam aliquot adferre, quibus probent auditoribus suis hos non esse musculos distinctos, sed potiùs rectorum partes. Nam asserunt, Particulæ istę musculorum definitionem minimè habent: ergò, musculi distincti non sunt. Secundò. Carnes istæ aliquando non reperiuntur: ergò, quantum par musculorum à Natura institutum minimè faciunt. Quoniam si hoc esset, semper reperirentur. Tertio, Nullum habent vsum propriũ: ergò, musculi non sunt. confirmatur autem ab his nullum habere vsum carnes istas. Primò, quia non faciunt ad priapũ ipsum erigendum: quoniam nullam cū ipso coniunctionem habent. Secundò, quia nec vesica, nec aliquod aliud viscus in inferiori abdomine contentum  
ab



ab his comprimi potest, cum satis validè  
ab omnibus octo reliquis musculis cõ-  
primantur. Tertiò, non credendum  
est, quod rectis opem ferant, cum ita  
magni validique ij sint, vt nullo adiu-  
mento præcipuè istarum minlmarum  
carnium egeant. Quamobrè ex his om-  
nibus sequitur (vt ipsi asserunt) carnes  
has quintũ musculorũ par minimè cõfi-  
cere: sed esse potiùs rectorum particulas.  
Doleo ego, quòd isti virium suarum nõ  
sint æqui æstimatores: quoniam non ita  
liberè in alios anatomicos loquerentur,  
sed per me liceat, quicquid in me velint,  
amicitiæ enim nostræ illud dono, atque  
contentionis istius occasionem laudo.  
Quoniam ἀγαθὴ δὲ ἰσὶς ἔστι ἐφορῶσα, vt  
ait Poeta, semperque ex huiusmodi li-  
tibus aliquid in commodum illorum,  
qui addiscere volunt, cedit. Sed tu audi,  
quàm se ipsos decipiant, quàm uie friuo-  
læ rationes istæ sint, quibus infringere  
par hoc musculorum nonũ tentāt. Nam  
cũ primò dicunt, quòd definitionem  
musculi minimè habent, ingenuè fate-  
or me ignorare, quid sibi velint per defi-  
nitionē musculi. Quoniã si definitionē  
intelli-



intelligunt, quæ tragelaphum nobis exprimat, hæc procul dubiò istis minimè competit. Verùm si illam agnoscunt, quam ego, & ante me Galenus in principio primi de motu muscu. agnouit: Musculum scilicet esse immediatū motus voluntarij organum; Di co, hanc definitionem summòperè ipsis quadrare, esseque voluntarij motus vera organa: atque suminis partes voluntaria compressione obliquè deorsum trudere, & consecutione certa musculof esse, atque à me ideò appellari. Ad secundam verò rationem, quod aliquando carnes hæ nō reperiantur, atq; ideò nisi sint partes rectorū musculorū, nullum par nouum constituent, nullumque proprium vsum habeant, respondeo. Primū, hāc obseruationem dici posse falsam. Quoniam & ego plurima dissecai cadauera, neque hos musculof aliud quidquam vnquam passos vidi, quam hoc solū, quod ita inuicem connati essent, vt ex duobus vnus tantū appareret factus: hoc verò semel vidi. Sed demus istos hoc obseruasse. Nam fieri potest, vt musculi isti sint aliquando a Natura prætermissi, vt fit  
in



In musculo latefcentis tendinis in manu,  
 cuius aliquando obliuiscitur Natura, vt  
 ipsi optimè nôrunt, qui tamen, quando  
 adest pro musculo habetur, & munus  
 suum subit. Quod si valeret istorum ra-  
 tio, his quoque dici posset musculum  
 non esse, quia aliquando desit:& ideò  
 numerandum pro parte primi, aut secū-  
 di flectentis manum, quibus adnascitur.  
 Hoc autem, si nunquam dicere audent,  
 nec in his dicta ratione idem audeant.  
 Ad tertiam verò rationem quod vsum  
 non habeant, respondeas vsum potissi-  
 mum habere, vt viscera in sumine con-  
 tenta obliquè comprimant deorsum,  
 atque confirmationem istius rationis  
 primam ita confuto. Quod non ita faci-  
 le ego ad priapum recurro, neq; vnquā  
 dixi, quod ab his musculis pars ista mo-  
 ueretur. Neque vnquam anatomicus fu-  
 it ita stolidus, qui in homine recensuerit  
 aliquem musculum, qui in abdomine  
 collocatus, colli inferuiat. Concedo i-  
 gitur, musculum hunc colli non inferui-  
 re, atq; simul consequentiā nego, quod  
 vsum non habeat. Secundam verò con-  
 firmationem tollas, negando vesicam &  
 reliqua



reliqua fuminis viscera obliquè deorsum per se ab aliquo ex octo musculis abdominis trudi. Nam obliqui descendentes hoc nō faciunt, cū sursum obliquè trudent. Recti verò minimè aut transuersi, cū ad latera & ad dorsum propellant. Obliqui quoque ascendentes cū originem suam altiore habent, atque parū infra vmbilicum in lineam mediam chordæ ipsorum inserantur, non possunt esse opifices istius expressionis, nisi cū trahunt deorsum viscera superiora, atq; his medijs illa, quæ infima sunt, trudent, quæ expressio per accidēs est, vnde postea sequetur, quod vesica cōprimi nulla ratione possit per se deorsum, nisi superiora viscera quoque illuc impellantur, quod minimè dicendum est: cū in nobismetipsis quotidie experiamur, vesicam ipsam cōpressam lotium reddere absq; vlla reliquorum viscerum cōpressionē, dum mingimus leniter. Atque apertè cognoscimus abdominis musculos ad hanc actionem, nisi violenta sit, nunquā concurrere. Nam cū validè lotium eiaculari tentamus, totū tunc abdomen manifestè ad inferiora con-



contrahimus. Si igitur verum hoc est,  
 necessarium erit, aliud dari instrumen-  
 tum præter dictos maiores musculos,  
 quo leniter vesicæ deorsum exprimatur.  
 Galenus in lib. de dissectione muscu.  
 hoc munus parti inferiori rectorum ad-  
 scripsit. Ego verò, cum sciam musculos  
 rectos non deorsum, sed ad spinam pro-  
 pellere, asserui obliquos illos paruos isti  
 us levis motus esse opifices. Neque mi-  
 hi visus sum absurdum protulisse, cum  
 à regione, vesicæ minimè distent, sed po-  
 tiùs immediatè illi hærentes tangant.  
 Deinde etiam, cum non ita parui sint, ut  
 munus hoc explere minimè valeant. Quo-  
 niam, primò cum lotium aperto ceruicis  
 vesicæ musculo quasi per se effluere po-  
 sit descendendo: Secundò, cum substan-  
 tia vesicæ tota carneis fibris contexta se  
 ipsam contrahat, hancque expressionem  
 adiuuet, meritò requirebantur parua  
 instrumenta exteriora, quæ rem istam  
 perficerent. Neque magnis egebat Na-  
 tura, cum nihil frustra agat. Hi itaq; erunt,  
 qui moderatas expressiones vesicæ effi-  
 cient, violentis verò inseruiunt vnà cum  
 his maiores abdominis muscoli, ip-  
 sum

K

sum



sum totum & vnà uesicam exprimentes. Ad tertiam verò rationem, qua probant musculos hos nullum habere vsum, quoniam credendum minimè sit, ipsos rectis musculis magnis admodum, atque validis opem ferre. Respondeo, me nunquam hoc somniâsse, quod rectis opem ferant. Quoniam recti thoracem rectà deorsum trahunt, atque in seipso contracti, quæ in abdomine cõtinentur, per accidens ad dorsum propellunt. Isti verò parui obliquè deorsum partem illam tantum, in qua sunt, deprimunt. Verum quid deinde sequeretur incommodi, si opem afferrent mea sententia rectis, validissimisque musculis? hoc ne fortasse esset præter consuetudinem Naturæ humanæ? Conspicias, mî Petre, tertium Vesalij & Valuerdæ musculum, qui pedem mouet, atque conferas quæso cum primo, secundo, & quarto, quoniam videbis illum multò minorem tribus his posterioribus validissimis musculis, quàm sint hi parui in abdomine ad rectos relati, & tamen ad eundem vsum penitus factus est ille paruus musculus, ad quem reliqui tres dicti, ad extensionē  
scili-



scilicet ipsius pedis. Possem quoque aliquot alia istius rei proferre exempla, quæ breuitatis causa nunc prætermitto, atque simul colligo, hos non ita faciliè mirari debere, si quis aliquadò dixerit, Naturâ iuuare maxima organa, illisque opem afferre minoribus aliquot, imò minimis organis adiunctis. In hac cōtrouersia iudicem te, atque vnà tecum Capredonum nostrum constituo, quo sententiam feratis, vtri nostrum veritatem protulerint. Sed prius audi rationes, quibus ego actus, hoc dogma publicarim.

Prima est, quoniam ego viderim musculos hos membranula quadam tenuissima à rectis esse distinctos.

Secunda, quia istorum fibræ nunquā cum fibris rectorum commiscentur, neque in aliquam illarum transuersarum linearum, quæ in rectis neruæ sunt, desinunt.

Tertia, quia recti musculi rectas penitus possident fibras, isti verò obliquas habent.

Quarta, quoniam desinunt semper in illam mediam lineam neruosam, nunquam autem in rectos musculos.

K 2 Quin-



Quinta, quia video illos necessariò illíc requiri, cùm obliquè ascendentes in Epifio, vt plurimùm operam suam minimè nauare possint, vt obliquè deorsum partem illam exprimant. Dixi autem vt plurimùm, quoniam aliquando accidit (hocque à reliquis anatomicis minimè est animaduersum) vt dictorù musculorum principium non incipiat primùm à spina ilium, sed inferiùs à ligamento illo valido, quod ab eadem spina, vsque ad ossa pubis percurrit, atque tunc temporis secundum hoc musculorum par ea, quæ sunt inferiora, in fumine etiam deorsum trahit. Verùm hoc admodum rarò accidit.

Sexta & vltima ratio est, quòd horum actum manifestissimè non ego solus, sed plurimi alii apertè in se ipsis agnoscunt. His de causis ego commotus, geminos musculos & non partes rectorum esse dixi.

Ad testium musculos descendo, in quibus aliam sanè originem reperio ab illa, quæ ab anatomicis prodita est. Quoniam manifestissimè eos semper video ab osse ilium, vel ab illo ligamento, cui  
men-



mentionē nuperrimē feci, initiū ducere, sub chorda musculorum obliquē descē-  
 dentium, atque vnā cum peritoneo & vasis per foramen chordæ egredi. Ali-  
 quandō etiam obseruauī, à partibus an-  
 terioribus ossis pubis aliquot fibras car-  
 neas dictis musculis communicari, ita, vt  
 geminus aliquando ipforum obserue-  
 tur ort⁹, qui cū in simijs fermē perpe-  
 tuō geminus sit, & exquisitē distinctus,  
 & manifestē carneus, fuit in causa, vt Ga-  
 lenus cap. 27. lib. de dissectione musc. af-  
 feruerit, geminos musculos habere vtrū  
 que testem, qui postea coeuntes in vnū  
 desinant. In mulieribus quoque semper  
 musculos (simplices tamen) reperi ab e-  
 odē loco ortos, atque per foramen chor-  
 dæ obliqui descendētis vnā cum cre-  
 masteribus vteri egredientes, breues  
 quidem atque decurtatos, neque vllam  
 cum testibus fœminarum coniunctio-  
 nem habentes. Hæc de musculis testes  
 attollentibus.

Iam ad thoracis musculos venio, in  
 quibus cū ita vastus sit numerus, mi-  
 rū fortassē tibi videri posset, si nihil à re-  
 liquis anatomicis dissētiam. Ego verò

K 3 non



non libenter ab aliorum sententia recedo, eoque minùs, cùm in re maximi momenti illud agendum fit, quæ aut me summæ audaciæ, aut alios anatomicos, præcipuè Diuinum Vesalium, quem veluti miraculum aliquandò admiror, negligentia maximæ arguet. Sed cùm hæc in publicis Scholarum theatris à quàm plurimis probata viderim, non erubescam eadem tibi communicare, vt iudicium tandem, quod de ipsis feceris, audiam. In primo & secundo, atque tertio thoracis musculo, cùm rectè ab alijs anatomicis descripti sint, nihil addam, præterquàm, quod secundum lubentiùs inter scapulæ musculos, quàm thoracis numerarem. In quarto verò notandum hoc est, quod illius partes non inferuntur in oēs costas, sed tantū in sex inferiores, ea quidem ratione, quam tradit Vesalius: monet tamen, non has sex tantum inferiores, sed etiam reliqua superiores sex. Vide autem, qua ratione. A duodecima & vltima costa prope insertionem dicti musculi oritur quædam chorda, quæ carnosa efficitur, atque iterum excarnis facta ascendens in sextā costā inferitur, & mus-



musculi gracilis effigiem habet. Ab vndecima item costa pari ratione vna oritur chorda, quæ inferitur in quintam. A decima item vna, quæ in quartam, & à nona alia, quæ in tertiam inferitur. Sic quoque ab octaua & septima geminæ, quæ in secundam & primam implantantur, omnesque istæ chordæ musculi distincti videntur: ita tamen inuicem, & cum prædicto quarto in superficie complicati, vt partes ipsius videantur, cum re vera non sint. Dum igitur quartus musculus sex inferiores costas deorsum trahit, reliquas etiam superiores sex prædictorum additamentorum ope mouet, cum tamen re vera vsque ad primam minimè ascendat. In sexto thoracis musculo obseruavi, quod ab omnibus anatomicis, qualis potius in canibus reperitur, quàm qui in homine sit descriptus, carnosus totus, tenuis, atque septem costarum integrarum cartilagines occupans. Quæ notæ vt plurimum in hominibus non inueniuntur. Nam musculus hic potius neruosus est, quàm carnosus, ita, vt quibusdam in partibus neruosa tella videatur carne infarcta. Neq; vn-

K 4 quam



quam ultra secundam costam vel ipsius  
 cartilaginē ascendit, quod ego obserua-  
 ui in omnibus cadaueribus, quæ adhuc  
 secui. Accidit etiam aliquando, vt ad se-  
 cundam ipsam costam non pertingat.  
 Quare mihi credas, quod neque ortus  
 carnosus est, neque omnes integrarum  
 costarum cartilagines occupat. Reperio  
 deinde tres alios musculos, quos ego  
 thoracis proprios esse opinor, quæque  
 nisi addantur, non adsunt instrumenta,  
 quibus ad superiora thorax ipse eleua-  
 tur. Nam primus musculus thoracis à re-  
 liquis anatomicis huic muneri designa-  
 tus, cum à iugulo oriatur, iugulum verò  
 ipsum ossi pectoris, atq; acromio, quod  
 thoraci innititur, copulatum sit, non  
 potest validè omnium costarum eleua-  
 tioni inseruire. Tertius deinde thoracis  
 musculus eleuationi costarum ab anato-  
 micis præpositus, quamuis illas attollat:  
 tamen quia paruus atque obliquus de-  
 bilem insertionem habet, solus hanc  
 muneris functionem integrè obire non  
 potest. Quamobrem absurdum minimè  
 esse iudicârim, si pro septimo thoracis  
 musculo addatur ille, qui neruoso prin-  
 cipio



cipio ortus ab interna facie processuum  
 transuersalium tertiæ, quartæ, quintæ,  
 & sextæ vertebræ cervicis, carnosior-  
 que factus inseritur in primam costam,  
 vt illam ac totum simul thoracem attol-  
 lat, hic à nemine est descriptus. Cui octa-  
 uus adiungitur, secundus scilicet inter  
 dorsales à Vesalio connumeratus, qui  
 oritur ab omnium vertebrarum cerui-  
 cis transuersis processibus (quanquam  
 prima & secunda aliquando excipian-  
 tur) atque inseritur in primam costam,  
 & aliquando etiam in secundam thora-  
 cis; & quamuis ortus istius musculi ner-  
 uosus sit, insertio verò carnosæ, cum vi-  
 ce versa potius esse deberet, hoc tamen  
 impedimento minimè sit, quoniam par-  
 tis ratio, vnde originem ducit, hoc postu-  
 lat. Deinde idem facere consuevit Na-  
 tura, vt planè apparet in primo, secun-  
 do & tertio mouentibus caput, & in  
 aliquot scapulæ musculis, in tertio hu-  
 ic parti, thoraci scilicet à Vesalio asscri-  
 pto. Hic attollendo thoraci inseruit.  
 Nonus sit ille musculus, qui ortus à pro-  
 cessibus transuersis quartæ & quintæ  
 vertebræ cervicis in secundam costā in-  
 K 5 feritur,



feritur, & aliquando etiam in tertiam carnoſo ſine. His ego tribus poſterioribus atque illi, qui in ordine omnium tertius eſt, laborioſam eleuandi thoracis operam aſcribo, cùm mea ſententia ab vno tantùm tertio perfectè id fieri minimè poſſit.

Ad intercoſtales venio muſculos, in quibus omnes anatomici penè lapſi ſunt: primusque fuit Galenus, qui cùm in lib. de diſſect. muſc. cap. 23. rectè dixiſſet, muſculos hos in vnoquoque latere viginti & duos eſſe errorem geminum: ſtatim ſubiunxit alterum quidem, dum aſſeruit omnium iſtorum muſculorum fibras vniformes eſſe, vſque ad extremum inter coſtas nothas, at inter integras vniformes tantùm eſſe vſque ad cartilagineſ. Quoniam cùm illuc peruenirent vniformes, tunc mutant ordinem, atque ductu priori contrario feruntur, quæ ſententia fuit in cauſa, vt Auicenna prima primi cap. de Anat. muſculorum thoracis deceptus hac fibrarum mutatione dixerit, in vnoquoque ſpatio inter coſtas integras quatuor muſculos contineri, quod ita veritati alienum



alienum est, quàm quod alienissimum.  
 Alter verò Galeni error est, cùm inter-  
 costalium musculorum exteriores tho-  
 racem dilatare, intimos autem contra-  
 here asserit: quod falsum esse patet, si  
 quis voluerit animum ad rem ipsam re-  
 uocare. Nam quamuis aliquot nostro-  
 rum temporum anatomici sibi ipsis atq;  
 alijs imponētes: in dissectionibus viuo-  
 rum hoc opus ostendere tentent: illis  
 tamen non succedit, tuncque fide maxi-  
 ma, qua omnia illis credātur, magis q̃ o-  
 culis opus est. Nullus enim musculus in-  
 tercostalis vti instrumentum volunta-  
 rium potest costarum spatiū, in quo con-  
 tinetur, dilatare, vel costā, à costa seiun-  
 gere. Ea autem ratione, qua ligamenti  
 munere fungitur, quo costæ inter se iun-  
 gūtur, ac ligātur, per accidēs facit ad di-  
 lationem. Nam exempli causa, dilatatis  
 costis inferioribus deorsum à musculis  
 extrinsecis, aut eleuatis superioribus à  
 musculis extrinsecis: reliquæ mediæ se-  
 quuntur costæ, atque spatia media dila-  
 tantur, quod opus musculorū interco-  
 staliū ratione fit, quoniā ipsi costas tra-  
 hunt: & hac ratiōe per accidens dilatāt.  
 Quod



Quod nisi adessent instrumenta exteriora, ab ipsis minimè fieret. Possunt etiam alio modo intercostales muscoli spatia media dilatare, si illi, qui collocati sunt, inter primam & secundam, attrahant vnam ad alteram. exempli gratia: secundam ad primam, quoniam hoc pacto dilatabitur spatium, quod inter secundam & tertiam cadit, cum illa versus primam feratur. Hæc tamen dilatio non fiet per se, nec à musculo in spacio dilatato existente, sed ab illo, qui spatium superius contrahit, & idcirco per accidens. Sed de hoc lis minimè instituta est. Quoniam quærimus, an musculus collocatus inter primam & secundam, & exterior has cōtrahat costas, huic verò subiectus & magis intimus an easdem dilatet. Hoc Galeni, atque omnium anatomicorum pace dicā, mihi non probatur, neq; etiam Diuino Vesalio, aut vlli docto viro, qui ab omni passionum genere sit immunis.

Doleo prætereà Vesalium in hanc deuolutum esse opinionem, quod in singulis spatijs costarū integrarū cōtineantur quatuor intercostales muscoli, cum  
duo



duo re vera tantum sint, vnus exterior,  
 qui incipit in parte posteriori vsque, à,  
 qui deficit, processu transuerso verte-  
 bræ, cui adnectitur costa, atque oblique  
 antrorsum declinatibus fibris pertingit  
 ferme vsq; ad cartilaginis initiũ, qua co-  
 sta ossi pectoris iungitur, ibique finit:  
 Alter verò huic subiectus, nõ à processu  
 incipit, sed à parte illa, in qua flectitur,  
 curuaturue costa, & fibris antrorsum ob-  
 lique ascendentibus vsq; ad os pectoris  
 peruenit, spatiumque inter cartilagines  
 ipsas contentum replet. Hoc autem notatu  
 dignum est, quod quãtò exterior vlteriùs  
 oritur in posterioribus partibus à pro-  
 cessu scilicet vsque, tantò etiam citiùs  
 finit in anterioribus: & vice versa, quãtò  
 interior tardiùs à flexura costæ incipit,  
 tantò etiã tardiùs finiendo ad os vsque  
 pectoris pertingit. Tota hæc pars secun-  
 di muscoli, quæ explet spatium inter car-  
 tilagines contentum, cum aliquãtis per  
 eleuetur ad exteriorem illius spatij su-  
 perficiem, locumque ipsius exterioris  
 muscoli, qui non adest occupet, fuit in  
 causa, vt ipsam nouum esse musculum  
 Vesalius sit opinatus, qua quidem abla-  
 ta cum



ta, cum adhuc fibræ carnosæ contrario ductu positæ statim appareant, has idem opinatus est esse quartum intercostalem muscolum: cum tamen Deo Optimo Maximoque teste, sint partes sexti musculi, de quo suprâ locuti sumus. Quare pace tanti viri assero, in vno quoque costarum integrarum spatio duos tantum reperiri musculos, anteriorem scilicet atq; exteriorē: tertiumq; ab ipso designatum esse secundi interioris partem: quartum verò sexti, qui in cavitate thoracis continetur, portionem. Ex his sequetur, quod in vndecim vnus lateris costarum spatijs, viginti tantum & duo contineantur muscoli, non autem triginta & quatuor, hocque omnium oculis, qui perfidiosè secare noluerint, manifestè patere poterit. At fortasse minus fide dignum tibi videbitur, quod Vesalius vno iactu vigintiquatuor musculos addiderit, qui in hominis thorace non reperiatur, quodque partes sexti musculi pro intercostalibus recensuerit. Hoc idē ego quoque fateor, mihiq; ipsi & alijs, quāmaximi anatomici auctoritate freti, per plures annos imposui,



fui: neque triginta quatuor tantum in vnoquoque latere ostendi, sed etiam tot, ut ostenderem, feci. Veruntamen cum Deus postea aurem velleret, non potui veritatem suppressere, aut tenebris obscurare: credoque Vesalium ob eam ingenuitatem, quam in alijs etiam desiderat, non solum hæc grauitè non laturum, sed potius mihi immortales gratias esse habiturum, si unquam ad illius doctissimas aures hæc nostra puenerint. sed hæc satis de musculis thoracis, quos dorsales sequuntur.

Dorsi totius musculi ita varij & complicati sunt, ut non sit mirum, si anatomici scriptores inter se concordēs non erunt. Nam ut quid sentiam ingenuè profitear, indigesta moles, atque confusum chaos musculorum mihi videtur, in quo præceptorē desidero, qui distinctè ante oculos hos mihi dissecet, ipsiusque partes ad certum numerum ac ordinem diducat. minimè enim his musculis explicandis, quod in paucissimis alijs accidit, mihi satisfacio, eoque minus, cum videam, quod si ego voluerim meliorem instituere diuisionem, ob rei difficile naturam, alius fortasse anatomicus

eam



eam assequi non poterit, ob infinitam fibrarum & originum, & insertionum, quæ in hoc chao continentur, multitudinem. Est enim veluti plurimarum viarum labyrinthus, in quo tamē coram te, quid obseruārim, liberè dicam.

In sex paria musculorum totam hanc molem carneam satis commodè diuidi posse, mihi visum est. Quorum quidem parium primum illud sit, quod primo etiam in loco a Vesalio est connumeratum. Nam nihil, mea sententia, huic addi debet. Cui addatur secundum par triplici ortum principio, priore quidem à processibus transuersis primæ, secundæ, & tertiæ vertebræ thoracis, vel à processibus tertiæ, & quartæ: & quintæ, nam aliquando ab his, & ab inferioribus usque ad octauam deriuatur principium hoc. Secundum verò principium subministratur veluti pars quinti musculi, dorsum mouentis. Nam ab extrema illius parte portio quædam huic musculo admiscetur, quæ aliquando non indè, sed à costa septima, sexta, quinta, & quarta orta apparet, hocq; secundum à me dictum principium transuersis processibus primæ



me, secunde, & tertie vertebrę attēsum,  
 ac ascendens vnitur cū priori, & tertio,  
 vltimoue exortu, qui est veluti portiū-  
 cula extrema musculi illius, q̄ inter mo-  
 uentes thoracem quarto in loco ab ana-  
 tomicis enumeratus est. Hac ratione cō-  
 iunctum vnū in vtroque latere format  
 musculum, qui in processus transuersos  
 septimę, sextę, quintę, quartę & tertię  
 vertebrę ceruicis, & aliquando in om-  
 nes penitūs inseritur. Hoc par musculo-  
 rum ita uidetur misceri cum tertio capi-  
 tis pari, vt imponens Vesalio pro vno e-  
 odem q̄ue tertio dicto ab ipso lineatum  
 sit. Tertium par illud sit, quod totam cer-  
 uicem occupat, insertum non solū in  
 spinas ipsi: sed etiam in processus trans-  
 uersos, & illorum radices varijs varijsq;  
 modis. Oritur hoc par à processibus trās-  
 uersis vertebrarum thoracis, incipiens à  
 nona, vel ab octaua vsque ad primā. O-  
 ritur quoque ab omnibus processibus  
 transuersis vertebrarum ceruicis vsque  
 ad secundam, atque inseritur, vti dictum  
 est. Vsus ipsius, vti reliquorum, satis  
 patet. Quartum addatur par, quod sub  
 quinto nuper dicendo occultitur, & ad-

L mo.



modum carnosum exterior ab ea cauitate, quæ inter os ilium & spinam sacri iacet, atque ascendens varijs principijs augetur ab omnibus transuersis processibus vertebrarum lumborum, cumque ad thoracem peruenerit, ab illius pariter vertebris augetur varijs principijs, quæ tria videntur. Vnum elatius ab extremo vniuscuiusque processus transuersi: alterum inferius, quasi à radice eiusdem processus: tertium verò a spinis singularum vertebrarum incipit, ita, vt tria musculorum genera simul mixta esse videantur. Vno quidem exteriori fibris longioribus constante. Altero verò intimiori existente, quod fibras breuiiores habet. Vltimo etiam adhuc breuiore, quod à spinis ortū est. Vnus tamen musculus, mea sententia, censendus est, qui dicto multiplici principio incipiat. Hic plurimas chordas emittit, quibus inferitur in omnes lumborum ac thoracis vertebrae multiplici insertione, alia quidem exteriore, alia magis intima, atque alia etiam in spinas ipsas, aliaque in processus transuersos, & vltima in sedem inter has dictas geminas contentā inferitur.



tur. Huius musculi cognitio ortu, ac in-  
 fertione, vsus statim patet. Quintum ve-  
 rò par illud sit, quod maximum omni-  
 um dorsalium est, veluti pars illi<sup>9</sup>, quod  
 mouens thoracem, quarto in loco nu-  
 meratum est, oriturq; neruoso princi-  
 pio à dorso ossis sacri, atque ab osse ili-  
 um parte in posteriori, qua iungitur sa-  
 cro, nec nō à spinis omnibus vertebrarū  
 ipsorum lumborum, sub quo neruoso  
 principio tanquam sub tegumēto quo-  
 dam aliud summè carneum exordium  
 latitat. Ab hoc principio exortum par  
 istud, robustissimumque factum, interea  
 dum ascendit, tres insertionum species  
 habet. Nam primò quibusdam chordis  
 paruis admodum inseritur in omnes co-  
 stas, quo inseruntur etiam chordæ quar-  
 ti paris, ac proprii ipsius thoracis: acci-  
 dit tamen, vt quandoque non in omnes,  
 sed in octo tantum costas implantetur.  
 Secundò quibusdam alijs chordis inseri-  
 tur in omnes processus transuersos ver-  
 tebrarum thoracis. Tertiò verò implan-  
 tatur in spinas vertebrarum eiusdem  
 thoracis, incipiendo à decima, atque af-  
 cendendo ad quartā vsque: aliquādo ve-



rò à sexta tantùm vsque ad tertiam. Hęc-  
 que insertio fit neruoso fine. Ab hoc ex-  
 tremo pari principiũ quoddam oritur,  
 cuius in secundo pari facta est mentio.  
 Sextum atque vltimum musculorum  
 par illorum sit, qui à diuino Vesalio  
 quinto in loco sunt enumerati, quos-  
 que inter  $\phi\acute{o}\kappa\sigma$  à Græcis vocatos muscu-  
 los contineri asserit, non sine aliqua no-  
 ta. Quoniam re vera muscoli  $\phi\acute{o}\kappa\iota$  ab  
 Hippocrate, Galeno, & ceteris dicti, &  
 à quibusdam alijs  $\nu\epsilon\upsilon\rho\omicron\mu\acute{\epsilon}\tau\omicron\rho\iota\varsigma$  &  $\acute{\epsilon}\lambda\acute{\omega}\pi\iota\kappa\iota\varsigma$   
 appellati, duo illi sunt, qui à Vesalio  
 numerantur sexto in loco, inter femo-  
 rum motores. Et quamnis Clearchus  
 auctore Polluce, vel Clitarchus, au-  
 ctore Ephesio, dorsales musculos exteri-  
 ores his nominibus vocari dixerit, in er-  
 rore tamen, teste eodem Ephesio, fuit.  
 Legas Galenũ in libro de dissectiõ. mus-  
 cu. cap. 25. & quinto de Anat. Admin. ca.  
 nono, vbi  $\phi\acute{o}\kappa\sigma$  istos explicat. quibus di-  
 missis ad  $\phi\acute{o}\kappa\sigma$  Vesalij redeo, qui sextum  
 par dorsaliũ explent: itaq; ab ipso rectè  
 explicantur, vt nihil à me desiderent.  
 Hęc est ratio musculorum dorsalium,  
 qua nisi ipsis talis ordo imponatur, re ve-  
 ra vti



ra uti sint disponendi, me ignorare ingenuè fateor.

In musculorum numero, qui cubitū, atque manū mouent, quīue in brachio & vlna continent, penitus Vesalio assentior. Quoniam omnia, quæ ad horum historiam pertinent, diligentissimè explicauit, nihilque aliud addendum est, quàm hoc vnum: Quod latefcentis chordæ musculus aliquando geminus reperitur in vtroque brachio, & ab eodem loco penitus vterq; ortus, quorum vnus in chordam latam desinit, alter in ligamentum transuersum in carpo inferitur, quod ego ter, aut quater ad summum obseruauī. Verū in illis musculis, qui in summa & extrema manu continentur, non ita cōcors sum. Primò, quia in volæ parte illa, quæ ab Antiocho Tibertio Lunæ mons vocatur, reperio in panniculo pingui ipsius manus carnem quandam, quæ musculorum effigiem habet, sed musculorum tenuium satis ac breuium, qui duo frequentes sunt, & aliquando etiam tres, orta que hæc caro in syluestriac inferiori illius montis parte, vbi octauū carpi ossiculū sitū est,

L 3 à pan-



à panniculo carnosio per pinguedinē disperſo, vel à membrana musculum Lung monticulum formantem veſtiente, atque in interiorem & mediam volam per tranſuerſum lata, ad chordam uſque lateſcentem peruenit & implantatur, tota penitus panniculo carnoſo ac pingui cōplicata. Munus huius eſt, mea ſententia, ut potiùs cutem illius partis corrugēt, quàm quod extendat. Hoc equidē meū inuentum non eſt, ſed Ioannis Baptiſtæ cannani Ferrarienſis Medici, viri uti ſine vlla controuerſia inter anteſignanos anatomicos collocandi, ita omni genere doctrinæ & morū probitare comitateq; nemini ſecūdi. Hic celeberrimus anatomicus, cū ego Ferrariæ profiterer (agi- t̄ fermè decimus & tertius annus) ſuum iſtud inuentum mihi cōmunicauit, egoq; poſtea Piſis, atque hīc Patauī ita publicè propalaui, ut ad omnium anres facili- mē peruenire potuerit. Primus autem, qui publicis ſcriptis musculos hos com- mendārit, fuit Valuerda in anatome ſua, hispano idiomate ſcripta, quamuis non ſatis rectè, cū vnum tantū musculū eſſe, atque ad extenſionē factum dicat.

Se-



Secundò diffideo ab eodem Vesalio in his musculis. Quoniam dum tradit insertionem & vsum illorum quatuor, quæ parui admodum in vola hærent chordis secundi musculi tertium digitorum internodium flectentis, asserit hos musculos implantari in primum digitorum os, atque munus hoc subire, vt digitos intrò agât, & ad pollicem adducant. Quæ res valde diuersa à me reperta est, atque etiam (agitur fermè decimus annus) dū adhuc Pisis essem, in vulgus edita, testēque huiusce inuentionis habeo anatomicum ac Medicum clarissimum Antonium Ponzanellum, qui in academia Pisana tunc temporis auditor erat meus, posteaq; mihi suffectus est, dū inde discederem non sine magna nominis sui celebritate, atq; insigni animi mei voluptate, cū illum æquè ac fratrem ob eximiam ipsius virtutem valdè diligam. Verum ad rem rediens, dico musculos hos non inseri in primum os digitorum, sed potius desinere in chordam posteriorem, quæ omnes digiti articulos extendit, atque insertio hæc circa medium primi internodij fieri solet: ex qua pa-



tet primarius istorum musculorum v-  
sus. Quoniam ipsis ad principia contra-  
ctis extenduntur digiti, non integri ta-  
men: sed secundus tantum & tertius il-  
lorum articulus, in qua re deceptus est  
Valuerda. Nam cum aliquid de extensio-  
ne facta ab istis musculis audiuisset (per  
totam enim Italiam ab auditoribus meis  
hoc dogma iam multos ante annos dis-  
seminatum erat) neq; diligenter suarum  
chordarum insertiones inspexisset, in a-  
natomico opere, ubi istius rei facta est  
mentio, dixit, musculos hos digitos ex-  
tendere, cum potius esset dicendum,  
alteros atque postremos digitorum ar-  
ticulos ipsos erigere. Et re quidem ve-  
ra cum chordæ istorum paruorum ultra  
primum articulum coniungantur, cum  
chordis extendentibus, non possunt eun-  
dē primum dirigere, sed potius flectere  
debent. His adde, quod cum dictæ chor-  
dæ in transitu ad exteriorē digitorum  
regionem colliguntur, cum ligamento  
lateralī primi articuli, id accidit, ut mu-  
sculi ij leniter etiam possint primum in-  
ternodium digitorum quodā leui motu  
ad pollicem adducere.

Tertiò



Tertiò, ab' eiusdē Vesalij sententia recedo. Quia locutus de musculis illis octo, qui inter ossa metacarpi continentur, atque singulis dictis ossibus gemini distribuuntur, ait, quod muscoli isti chorda sua inseruntur in latera prima ossis digitorum, atque hunc usum habent, ut digitos flectant. Quod in ipsa rei historia minimè inuenitur. Quoniam chordæ istorum octo veluti & aliorum quatuor, qui nuper à me dicti sunt, colligatæ aliquantisper ligamento primi articuli digitorum, per latera feruntur ad exteriores chordas, quæ extendunt, atq; in illas inseruntur, ad usum extendendi secundi & tertij articuli omnium digitorum: neq; quicquam variant ab usu prædictorum quatuor, sed potiùs istorum tendines cum illorum chordis ante insertionē aliquādo cōiunguntur. Miror autem, quomodo Valuerda, vel qui illū docuit, admonitus ab illis primis quatuor, nō cognouerit quoq; istorum usum: & si vnquam hominem viderit, à quo ob vulnera metacarpo exteriori inflicta primi digitorum articuli extendi non possint, non obseruārit, quā citò, &

L 5 quā



quàm validè secundus & tertius articuli extendantur. Quod si obseruauit, cur præterea non animaduertit ita celerem & vehementem, aut validum motum ab illis solis quatuor gracilibus musculis fieri non posse? curque hos non inuenit, qui dictis opem ferunt? Sed non omnia possumus omnes. Valuerdè etiam non leues habendæ sunt gratiæ, quod anatomicū librum ita facili breuitate conscripserit, & venustissimis imaginibus ornârit, vt non parùm omnibus, qui hispanâ linguam callent, prodesse possit.

Quarto in loco numerum, aut ordinem illorum musculorum non probo, qui pollicem mouentes, ab alij anatomicis sunt descripti. Numerum quidè, quoniam in plures possunt diuidi, quàm ab ipsis sit factum: ordinem verò, quia ab aliquot ita confusè vnà cum illis, qui collocantur in vlna, sunt explicati, vt si quis musculos paruos in vola positos, pollicemque mouentes quærat, difficilimè, longoque labore inueniat. Sum enim ego istius sententiæ, quod simul omēs hi parui musculi, qui pollicis inseruiunt sunt simul explicandi maioris faci-



facilitatis gratia. Quare à me ita explicen-  
 tur. Primusq; ille sit, quo indici pollex  
 adducitur, estq; vigesimus quartus Ve-  
 salij. Hic carneo principio, partim etiam  
 nervoso, oritur ab osse metacarpi, quod  
 indici subiicitur, atq; carnosus implāta-  
 tur in totū primum articulum pollicis.  
 Neq; ego vnquā inuenire potui nerueū  
 illum tendinem, quo (vti traditum est  
 ab alijs) in secundi ossis radicē inseritur.  
 Secundus sit decimus quartus Vesalij,  
 ortus & insertus, vt optimè ab ipso tra-  
 ditum est. Tertius sit eiusdem decimus  
 quintus, cum eadem penitus origine at-  
 que insertione. Quartus sit decimus se-  
 xtus propositus ab ipso, cui hoc tantū  
 addendum est, quod etiā nervoso quo-  
 dam principio oritur ab osse metacarpi  
 minimo digito subiecto, vbi cum carpo  
 iungitur. Atq; simul notādum est, quod  
 hi tres muscoli, quartus scilicet, tertius,  
 & secundus definunt in vnam tantū,  
 atque eandem chordam, quæ attensa se-  
 samino ossiculo interno, inseritur in la-  
 tus secundi ossis eiusdem digiti. Quin-  
 tus musculus subiectus his tribus proxi-  
 mē dictis & carnosus, oritur ab osse me-  
 tacar-



tacarpi, quod subditur indici infra me-  
 dium vsque ad iuncturam cum carpo, &  
 iungitur eadem chorda, quater dicti  
 secundo ossi ipsius pollicis. Hic præter-  
 missus est ab anatomicis. Quidam tamen  
 intuitus omnes hos quatuor posteriores  
 musculos vnicam chordam habere, at-  
 que hanc lateris interioris sesamino hæ-  
 rentem in os inferi, fortasse diceret, v-  
 num tantum esse musculum, atque eò  
 magis, cum isti quatuor à me enumerati  
 omnes in eandem partem pollicem tra-  
 hant, differantque motus istorum per ma-  
 gis & minus tantum, quod per me qui-  
 dem licebit. Nam, vt horum difficilem  
 diuisionem euitem, libenter ex ipsis v-  
 num constituam. Verum, si quis aliorum  
 auctoritate fretus priores secundum sci-  
 licet, tertium, & quartum tres esse volue-  
 rit, necessariò etiam quintus erit distin-  
 guendus. Sint igitur omnes hi aut quatu-  
 or aut vnus, non multum refert, modò  
 quātus sit, & vndè oriatur, optimè pate-  
 at. Sextus paruus musculus est, qui ner-  
 uoso principio ortus partim à metacar-  
 pi ossibus indici ac medio subiecti, vbi  
 cū carpo iunguntur, partim etiam ab illo  
 osse,



osse, quod in brachiali subijcitur pollicis,  
 ab eo propemodum loco, vnde liga-  
 menti transuersi pars inferior oritur, at-  
 que inde ascendens in chordam desinit,  
 quæ ita amplexatur sesaminum inter-  
 nū secūdi articuli pollicis, veluti chor-  
 da septimi, & octauī, & noni musculi  
 extendentis tibiam amplexantur patel-  
 lam in genu, atque deindē inferitur in  
 latus internum, atque antērius ipsius se-  
 cūdi ossis pollicis ad illud flectendum.  
 Septimus oritur à ligamenti transuersi  
 parte superiore, atque satis excarnis de-  
 sinīt in tenuissimam chordam, quæ in la-  
 tus externum versus posteriora secūdi  
 ossis inferitur, ad totum abducendum  
 pollicem ab indice, vt opinor. Octauus  
 musculus oritur à media sede ligamenti  
 transuersi, atque priori septimo conti-  
 nuus, & admodū similis est, desinitque  
 in chordā pleniorē, quā sit septimi  
 chorda, ac inferitur in latus externum  
 tantū dicti secūdi ossis, propē eiusdē  
 septimi insertiōem. Coniunctum habet  
 musculum prædicto. Verū, si quis vo-  
 luerit hos duos musculos pro vno nume-  
 rare, istud per me sine vlla controuersia  
 facere



facere poterit. Nonus oritur partim à sede infima ligamenti transuersi, partim ab osse carpi, à quo dicta pars ligamenti prodit. Principium autē ipsius est carnosum, & partim neruosum, totusque musculus satis carnosus in duos, si quis vellet diuisibilis, sed vnus tantum sit, & in chordam latiusculam finiat, quæ exterius sesaminum amplexata, inseritur in anteriorem faciem ossis secundi pollicis. Munus habet, vt secundū os dictum flectat, & vnā cum primo osse pollicem totum ad mediam volam, & vltra minimum digitum ducat. Nam primus & quintus ad indicem adducūt: secundus ad internum latus medij: tertius ad internum latus annularis: quartus verò ad latus internum minimi: at hic nouus vltra minimum etiam adducere potest. Decimus oritur à sede summa & media ligamenti transuersi: ac ascendens in os primum pollicis latere in externo implantatur, atque etiam obscure inserit aliquot fibras in secundum os eiusdem. Hic respondere posset duodecimo à Vesalio descripto, qui latitans sub septimo & octauo abducit pollicem versus Lu-



na montem. Vndecimus, qui decimo tertio Vesalij respondet, oritur à fede infima ac media ligamenti transuersi, & ab illo osse carpi, à quo dictum ligamentum manat. Hic musculus latens sub decimo & nono inseritur in primum os pollicis in internum, latus externum versus. Insertio verò est à radice huius dicti ossis, usque ad extremum ipsius. Munusque habet adducendi pollicis ad volam. Si quis tamen nollet ita curiosè hæc distinguere, posset postremos hos duos musculos pro vno tantum recensere. Quamobrem si ita placuerit, tu poteris ad breuiorem numerum omnes hos redigere, ita, vt sex tantum numero sint: primus scilicet, qui primo loco est enumeratus: secundus, qui secundum, tertium, quartum, quintum contineat: tertius, qui sextus est descriptus: quartus, qui septimum & octauum continet: quintus, qui nonus est: sextus, qui ex decimo & vndecimo constat. Hæc de musculis paruis in summa manu constitutis satis sint.

Iam ad musculum vesicæ uenio, cum in musculis penis ab alijs anatom. minimè differam



feram, excepto usu ipsorum, de quo postea, sicuti & de alijs infinitis rebus, quas hic prætermitto, alibi tractabo. In hoc vesicæ musculo, video omnes anatomicos in magnum satis incommodum devenire. Quoniam si ipsum constituent, ut faciunt, infra glandulosa corpora, nunquam poterit egredi semen sine lotio in coitu. Nam si debet semen egredi, opus est, quod musculus, cum infra sit, dilatetur, ipso autem dilatato egredietur etiam lotiū, aut saltem aliqua eius stilla. Quoniam eo tempore & ani, & abdominis muscoli contrahuntur, & per consequens vesica quoque premitur: præterea in diuturno seminis profluvio cum semine etiam egrederetur lotium, cum sit ipso valdè tenuius. Tertiò, si hoc esset, lotium semper versaretur circa meatus illos, per quos ingreditur semen in canalem, atque eosdem corrumpere, ac perpetuò semen impurum exiliret. Quæ tamen incommoda cum non superueniant, aperto inditio sunt, musculum dictum non infra glandulas, sed supra in prima ceruice vesicæ esse collocandum. In quo non expectes integram musculi,

&amp; à

*musculus in hunc locum  
Aur. postquam  
in corpore  
glandula  
lucet*



& à subiecto canali distinctam substantiam in partibus exterioribus sitam, uti in ano, ac similibus partibus apparet. Sed est ceruicis substantia carnosior, transuersis plurimis fibris texta, quibus hoc agit, ut se ipsam constringat. Fibræ autem istæ latent inter rectas, in ipsa ceruice. Nam cum rectas exteriores detraxeris, postea apparet musculus transuersus, vel fibræ dictæ, & sub his aliæ adhuc rectæ continentur. Quare, mihi crede, in homine nil aliud est iste musculus, quàm quod à me dictum est, atque inexercitatis dissectoribus non adesse potius, quàm adesse videtur. Sed adest tamen ea ratione, quam dixi, supra glandulas collocatus. Quoniam verò in canali infra glanduloso parastatas apparent aliquot transuersæ fibræ, idèò has anatomici nostri decepti, musculum esse opinati sunt. Verùm si musculum vesicæ, qualem ego exposui, cognoscere volueris, ut elixes oportet aliquantisper vesicam, nec penitus coquas. Quoniam tunc facilè in prima statim ceruice ipsius inter fibras rectas tunice exterioris, ut dixi, reperiēs, musculū hunc la-

M ten-



tentem transuersum, & cum glandularū corpore connatum. Neque (scias) vnq̃ alia ratione inspicere poteris.

In musculis ani, miror, cur anatomici non obseruârint locum Galeni in lib. de dissec. musc. cap 30. vbi primo in loco enumerat musculum quendam cutaneum & circularem in extrema sedis ora collocatum, qui ita cuti impactus est, vt non possit ab ipsa separari, quod illis quoque accidit, qui in palpebris, fronte, & similibus partibus reperiuntur. Quare cū in homine hic quoq; musculus sit, iustum est, vt quatuor describantur ani muscoli, non autem tres tantū, vt ab anatomicis factum est.

Ad musculos mouentes femur veniamus, in quibus penitus mihi non satisfaciunt huius artis magistri. Quoniam pro quinto musculo ita insignem, atque ita variam carnis molem proponunt, vt in ipsorum historijs non musculorum diuisionem, sed potius vnionem mihi affectare videantur. Est enim dicti musculi principium, & fibrarum ductus, & insertio ipsa ita varia & multiplex, vt saltem plures habere partes (si vnus est) videatur



deatur, quæ, mea sententia, erant descri-  
bendæ. Si quæ liceret ea, quæ ab alijs tra-  
dita sunt, penitus euertere, ego planè  
tot esse musculos dicerem, quot sunt  
partes istius quinti, cū inter se ortu, fi-  
bris, insertione, tunicis, atque etiam ali-  
qua ex parte vsu ipso varient. Sed dem-  
vnum esse musculum, tu tamē audi, qua-  
les sint ipsius partes, & quot numero, ac  
reliqua, quæ ab alijs prætermissa sunt. In-  
ter quæ hoc principē tenet locum, quod  
huic quinto debuerat etiā octauus mu-  
sculus à Diuino Vesalio descriptus ad-  
scribi. Quoniam ita istius pars est, vt̃ re-  
liquæ omnes à me explicandæ. At hoc  
minimè factum est. Scio, neq; reuocare  
tento, sed voluissē, quod cū ex tot  
partibus quintū constituāt musculū, vt  
contractior, & ideò faciliior enumeratio  
musculorum femur mouentium sit, (ni-  
mia enim rerum multitudo ex omnium  
sententia cōfusionem parit) ita etiam, vt  
adhuc breuior esset, octauum huic quin-  
to adiunxissent: Quoniam ita cum isto  
quadrat, vt̃ reliquæ omnes partes, quæ  
octauo isto excepto quatuor numero  
sunt. Atque harū prima à Vesalio mini-

M 2 me



mè descripta oritur ab osse pubis, à linea superiori nerueo principio, ac descendens inferitur in lineam femoris asperam suo fine. Huius tamen pars vna definit in quandam ἀνωύρσιον, quæ vnitur cum tendine quartæ partis iam dicendæ, atque inferitur in alterum femoris caput, quod internum ac inferius genu ipsum constituit; hæc q; pars statim subiacet, & quasi quoque coniuncta est cum musculo octauo. Secunda pars quinti, vt ait Vesalius, oritur à tota fermè linea, qua ossa pubis simul iunguntur. Hæc satis carnosæ, & lata obliquis fibris descendens, implantatur in partem superiorem asperæ lineæ femoris. Tertia pars ita vario fibrarum genere constas, vt geminus musculus videatur (nāque superiores sunt fibræ, quasi trāsuersæ, inferiores verò plurimæ obliquæ sunt) oritur ab appendice coxendicis, atque à toto coxēdice in gyrum circa foramen latum, quod nonus musculus occupat. Principium autem carnosum, & aliquantisper nerueum est, à quo musculus descendens vel pars dicta inferitur statim sub minore rotatore in totā lineam



lineam asperam. Quarta pars & vltima, quæ tamen prima est Vesalio, ab appendice coxendicis neruoso principio orta, descendit ac desinit in chordam tere-tem, quæ sibi adiuncta aponeurosi satis tenui partis primæ, de qua superius locutus sum, inseritur in internum tuberculum femoris inferioris. Hæ quinti musculi quatuor partes, vel quinque potiùs, addito octauo ita describendæ atq; ordinandæ mihi videntur.

Asserūt prætereà anatomici recentiores, decem esse musculos mouentes femur, neque vident: quod vndecimum pretermiserunt, qui oritur ab ischio posteriori, brevis, sed satis carnosus, & inseritur in rotatorem maiorem in parte posteriore supra insertionem decimi, vel interspatium illud medium inter rotatorem maiorem & minorem ad hoc munus, vt in gyrum femur rotet ad posteriora. Hæc de musculis femoris satis sint. In mouentibus tibiam non habeo aliquid auribus tuis dignum, nisi velim de usu & magnitudine, & loco, & compositione differere, quæ ad præsens institutum minimè pertinent.

M 3 Ad



Ad musculos itaque pedem mouen-  
tes veniam, in quorum enumeratione e-  
go apud reliquos anatomicos eum or-  
dinem non reperio, quem ars fortassè  
requireret. Sed quonià hoc ad historiam  
non necessariò pertinet, ideò ad aliud  
me cōuertam, quod magis animi duerfi-  
one dignum sit. Illud autem primum est  
quod cū natura principium primi &  
secundi musculi mouentis pedem sumāt  
ab illa cauitate posteriori, quæ statim est  
supra tuberculum vtrunque in inferio-  
ri femore, cumque in cruris directione  
tubercula illa gemina retrò valdè fe-  
rantur, & ad posteriora quasi concul-  
cent, ac comprimant principia dicto-  
rum musculorum, nequid mali inde ac-  
cideret, eadem valdè prouida apposuit  
sesamina ossa, atque inseruit dictis prin-  
cipijs, singulum singulo apponens, ne  
atterant aut lacerent, qd' à nemine nota-  
tū est (quod sciam) præterquam à Vesalio  
per transēnam in administratione di-  
ctorum musculorum. Hoc in simijs ita  
frequens est, vt in illis perpetuò reperie-  
rim: in homine verò accidit, vt sæpè &  
sæpius alterum deficiat, nunc internum,  
nunc



nunc quoque & externum, quod in si-  
mijs, vt dixi, nunquam vidi.

Quintus & sextus musculus inter mo-  
tores pedis, quamuis optimè descripti  
sint à Vesalio: illud tamen notatu dig-  
num continent, quod vt plurimùm ea  
in parte, in qua sub tarso ac pedio refle-  
ctuntur, insertam habent cartilaginem,  
asq; sesaminum ossiculum ab attritione  
ibi magna industria à Natura collocatū.  
Sed hæc fortasse leuia, illud maioris mo-  
menti est, Quod extremos quatuor mu-  
sculos, quos inter motores digitorum  
pedis descripsit Vesalius, reperio eadem  
ratione, qua in manu suis chordis im-  
plantari in chordas exteriores, quæ ex-  
tendunt: atque horum munº esse assero,  
non flectendi, aut adducendi, sed exten-  
dendi, non equidem totos digitos, sed  
secundum tantum, & tertium illorum  
articulum. Reliqui verò decem parui  
musculi, quorum quatuor collocantur  
inter media ossa pedij, quatuor verò in  
planta sub iisdem ossibus, & duo ad la-  
tera, vnum scilicet pollicis & alterum  
minimi, non ita manifestè desinunt in  
easdem chordas extendentes digitos,

M 4 vt



vt in manu, sed potius videntur desinere in ligamentum primi articuli ipsorum digitorum, facti ad hoc, vt magis flectant, quàm quod extendant. Extensio enim non ita necessaria in digitis pedum est, veluti in manu.

† De venis, atque ortu ipsarum satis diffusè tractaui in ea disputatione, quam ad te scripsi aduersus Aristotelicos, pro tuenda Medicorum sententia. Nempe quod venarum fons sit hepar, & non alia nobilis corporis humani pars. Quare ne bis eadem repetam, cumque non ita ad institutum faciant, omnia hæc præmittam, atque ipsorum loco noua. aliam controuersiam addam, quæ quamuis extra carceres mihi propositos contineatur, cum ad vsum pertineat: tibi tamen nequaquam displicebit: hacque de causa nunc immaturiùs fortasse de ipsa tecum ago, vt maturiùs sententiam tuam audire possim. Afferunt anatomici venarum fibras rectas attrahere, transversas verò exprimere, atque obliquas retinere succos, qui in illarum cavitatibus cōtinuò sunt, cū ex hoc triplici genere fibrarum membrana ipsarū cōstet: quod



quod dogma mihi quasi figmentum videtur. Quoniam fibræ in hac membrana ita latent, vt potius in potetia sint, quam in actu, neq; moueri loco possunt ob cõnexionem, atq; densam, mutuamq; inter se texturam. Nam cùm omnis attractio, quæ fit, sit duplex: Vna quidem vera & vniuoca, de qua Aristoteles septimo physic. tex. 10. loquitur, estque species motus localis, in qua motum ab alio, & non à seipso mouetur, cum hac tamen lege, vt mouens non quiescat sed moueatur, velociorq; motu, quam motum vel tractum ipsum, neque vnquam ab eodem moto seiungatur: Altera verò sit æquiuioca & non vera attractio, de qua loquitur Auer. in comm. illius 10. tex. dicti, in hac trahens quiescit & non mouetur, tractum verò tantum fertur, & ista est species motus localis prima, proposita ab Aristotele in eodẽ loco, qua motum seipsum mouet, & non ab alio. Sed quoniam seipsum mouet ad aliquẽ determinatũ motum, aut scopũ: ideò dici trahi ab illo, veluti ferrũ trahi à magnete & alimentũ à mēbris ipsis dicitur: cùm tamen re uera nō attrahantur

¶ 5 tur



tur, neque vera sit hæc attractio, sed analogica, quia motus iste localis non fit ab alio, sed à uirtute intima, qua ferrum vel alimentum mouent se ipsa ad determinatam magnetem, aut membrum. Præter has autem duas species attractionum, nullæ aliæ adduntur, quas ego sciam. His ita constitutis, cum dicant anatomici, venas fibris rectis sanguinem attrahere, vel alios humeros, ab ipsis ego quero, quanam specie attractionis illud faciant priori videlicet an posteriori? Prior equidem constitui non potest, quia opus est, ut fibræ rectæ moueantur loco, & velocior sit illarum motus, quam sanguinis vel humoris tracti, cuius motus exemplum, luce meridiana clariùs apparet in fibris rectis stomachi vel gulæ. Quoniam dictæ fibræ carnosæ, puræque & non implicatæ locali mouentur metu, dum cibum, potumque attrahendo mouent. At in venis ita textæ sunt hæ fibræ cum obliquis ac transuersis, ut nullo modo moueri possint, eoque minùs, cum carne vacent, & in potentia potiùs, quam actu esse videantur, nisi dicamus miraculo diuino moueri, quod philosophus  
natu-



naturalis non concedet. Quod autem  
 posteriori attractione & æqui-uoca san-  
 guinem attrahant fibræ rectæ, procùl  
 omni dubio concedi potest, cùm ipsæ  
 quoq; alātur. Verùm animaduertendū  
 est, quod neque hac specie attractionis  
 priuādæ sunt transuersæ, neq; obliquæ,  
 cùm omnes alantur, vel ad ipsas alimen-  
 tū æquè feratur. Quare ego colligam vl-  
 la ratione fieri posse, quòd rectæ venarū  
 fibræ faciant, ad veram humorum at-  
 tractionē. Idem assero de transuersis ex-  
 pellētibus. Quoniam si expellere debēt,  
 opus est, vt loco moueātur: quamuis po-  
 steà (teste enim Aristotele deficit expel-  
 lentis motus) ipsarum motus defectu-  
 rus sit: motus autem iste adesse minimò  
 potest, quoniam ita contextæ, implica-  
 tæque sunt, vt potentia potiùs, quàm a-  
 ctu inesse videantur: ac prætereà, quòd  
 maioris momenti est, excarnes sunt. Sin  
 autem expellunt æqui-uocè ita, vt illud,  
 quod expulsum dicitur, seipsum mo-  
 uens illas tanquam contrarium fugiat,  
 idem scias cōmodè de rectis etiam dici  
 posse. In obliquis prætereà quæro, quo-  
 modò retineant, an æqui-uoca, aane ve-  
 rare.



ra retentione: in æquiuoca cōsentimus, quia sanguis seipsum mouens ad illas illuc se etiam ipsum sistit, atque principium huius retentionis in sanguine intrinsecum est, at in vera dissentimus, quoniam opus est fibras istas, si quid agere debent, se ipsas contrahere: quod si contrahantur, in se ipsas cavitatem contentam per obliquum angustiores reddēt, & per cōsequens, obliquē exprimēdo expellunt. Quare istarum motus ad expressionem potius faciet, quā ad retentionē. Quamobrem his explosis v-  
sibus, scias nulla alia de causa triplici hoc genere fibrarū venosam mēbranam à natura esse factā, quam ob *Λυσπάθεια*. Nam cū sanguis aliquādo nimium redundans extendat venas violentis extensionibus, aliquando rectis & aliquando obliquis, opus fuit, vt mēbrana ad positiones rectas, & obliquas diuisa extendi posset, nō autē lacerari, quod illis accidit ob ductū rectū, trāsuersum, & obliquū fibrarū latentium in ipsius substantia. Tu, qui in dialecticis optimē versatus es, rem istam perpendas quæso, mihiq; sententiam tuam communices.

In



In vasorū cōiunctione, quæ fit in hepate, vident anatomici hoc sentire, quod venarum extrema oscula ab illa vena, quæ *σπληχιαία* dicitur orta osculis illarū, quæ à caua sunt, simul iungantur, & sibi inuicem respondeant, quam rem nunquam potui satis apertè cognoscere, quāuis summam diligentiam, studiumque adhibuerim. Quare si tu vnquā hoc inspicere poteris, mihi significato, atque simul etiam modum, quo idem assecutus fueris. Verūm hoc audi, quod fortasse problematis alicuius non inutilis occasionem tibi subministrabit. Aliquando reperiuntur rami venarū à portæ trunco per hepar disseminati, qui ab extremo apice sinistræ fibræ ex hoc viscere egrediuntur, & per ligamentum, quo in illo latere hepar aliquando septo transuerso iungitur, repentes, atque ipsi septo communicati, descendunt per posteriora ad dorsum usq; , ibiq; iunguntur sub pancreo cum quibusdam alijs venis, ab eodem portarum trunco extra hepar obortis, ad quē verò vsum meāder iste sit factus, fateor, ignoro. Adde, quod aliquādo rami aliquot ab eadē fibra extrema



ma sinistri lateris egressi, per ligamentum quoddam intermedium in liënem declinant, atque per ipsius substantiam disseminantur: veluti faciunt illi, qui à vena caudicis per mesenterium ducti in eundem liënem inseruntur. Aliud item obseruaui, quod ramuli venæ cauæ, qui perforato diaphragmate illi propagines subministrant, non solùm ad cordis inuolucrum pertinent, sed etiam ad membranas *ἐκ φάρυγγος* dictas. In quibus ita iunguntur cum illis venarum ramis, qui à iugulo sub osse pectoris per easdem membranas descendunt, vt eadem vasa penitus ascendentia & descendentia videantur.

In vena sine pari plurima adnotaui, quæ (vt mihi videtur) ab alijs aut falsò erant addita, aut negligentia non leui prætermissa. Addita quidem hæc erant. Nam Amatus Medicus Lusitanus (vt ab ipso incipiam) in prima curationum medici, centuria, in scholijs curationis 51. comprobare volens in pleuritide eiusdem lateris affecti venam in cubito secandam esse, asserit, quod in principio venæ istius sine pari adfunt membranae

nulae



nulæ seu ostiola, vel opercula dicta,  
 qualia in orificijs vasorum cordis ap-  
 parent, quæ ingressum sanguini conce-  
 dunt: egressum verò in cauam venam-  
 minimè: vnde sequitur, quòd secta ve-  
 na in cubito quatumuis euacuet cauam,  
 nil tamen sanguinis educit à vena sine  
 pari. Quoniam ostiola illa regurgitatum  
 sanguinem in cauam egredi impediunt.  
 Testimonia partim viua, & partim neci  
 subiecta adiungit. nam testatur hoc  
 sibi ostensum fuisse à Ioannæ Baptista  
 Cannano nobili Anatomico, atque in  
 duodecim dissectis humanis, & totidem  
 alijs brutorum cadaueribus idem peni-  
 tûs fuisse compertum. Vellem, mi Petre,  
 quod Ioannis Baptistæ Cannani inte-  
 gerrimos mores, atque solidam doctri-  
 nam optimè, vt ego facio, cognosceres,  
 Quoniam hominem ad quamlibet ali-  
 am operam potius, quàm ad fingendas  
 fabulas aptum esse iudicares. Neque  
 credas hoc dogma ab ipso vnquam (nisi  
 vt fortasse per iocum aliquot, qui cum  
 Amato adessent, deluderet) esse prodi-  
 tû. Nam reuerà opercula hæc nō reperi-  
 untur in hominibus, nec etiã in brutis,  
 quæ



quæ ego fecui . neq; ita ineptus est Cannanus, vt secando patentē atq; amplam venæ sine pari in exordio cavitatē optimè conspicerē non potuerit. Quare ego in Amatū, virum alioquin doctū, potius culpā huius criminis reijcerē: quoniam non ita rectè omnia, quæ ad anatomen pertinet, aut uiderit, aut intellexerit, vt rectè sunt à Cannano explicata.

Addidit idem Amatus, quod ab axilla prodit vena quædam cum axillari ipsa connata, quæ ad thoracis exteriora descendens in plures venulas diuaticatur, quæ postea iunguntur cū internis illis, quæ à uena sine pari ortæ, octo! inferiores costas nutriunt. Hoc equidem partim verum, partim etiam à vero alienum dici potest. Quoniam ab axilla uena ea prodit, cuius tres, vel ad summum aliquando quatuor rami iunguntur cum tribus aut quatuor propaginibus venæ sine pari. Quorum vnus inter tertiam & quartam costam: alter inter quartam & quintam: tertius verò inter quintam & sextā: atque vltimus, qui quartus est, inter sextam & septimam, perforatis intercostalibus, musculis iungitur cū vasis



sis interioribus. Neq; vnquam ego potui talem connexionem, aut infra septimam, aut supra tertiam reperire. At vice versa, sæpè ac sæpiùs vnum tantum aut geminum connexum loco trium, aut quatuor inueni. Quam rem, antequam Amati Centurias legissem, ipse quoque meo labore, ac Marte obseruaui.

Additum etiam à diuino Vesalio est, venæ sine pari residuum per diaphragmatis foramē, vel diuisionem ad aliquot lumborum vertebrae descendere, quod nunquam inspicere potui, quamuis summum studium, ac diligentiam in hoc inuestigando adhibuerim. Vt plurimum autem vidi, atque in publicis theatris auditoribus meis ostendi, extremam venæ sine pari partem dextram & sinistram, ad latera corporum ipsarum vertebrarum sub diaphragmatis immam insertionem serpere ad inferiora, neque ipsum vnquam perforare, aut per rimam arteriæ dicatam progredi. Vidi quoque has partes venæ sine pari admirabili quadam ratione cum alijs vasis inferioribus copulari. Nam vt à sinistra incipiā, hæc circa trāsueros verte-

N bra-



brarum processus descēdens, ac sub diaphragmatis & sexti musculi mouentis femur origine latens, ad emulgentem venam sinistri lateris inseritur, vario tamen modo. Aliquando enim in partem superiorem ipsius in aduersum semina-riæ venæ: Aliquando in partem posteriorem, ita, vt huius insertio non appareat: Aliquando verò accidit, vt ab emulgente ipsa in parte, qua dorsum respicit, oriatur quædam vena, quæ ad inferiora corpora nutrienda declinet. In hanc itaque cū ab emulgente exorta est, inseritur vena, de qua loquor. Aliquando etiam accidit, vt hæc pars venæ sine pari tribus aut quatuor ramulis superioribus, posterioribus, ac infimis emulgentem adeat. Frequentiùs tamen in ipsam immediatè vnico ramo implantatur. Quamobrem si aliquando per lotium expurgari pleuritim videris, non amplius dicas per venam sine pari materiam, quæ inflammationem fecerit, ad cauam, & ad cordis dextram auriculam, ac tandem per emulgentes ipsas ad renes transmitti, cū immediata vena ad renes pateat. Dextra verò pars reliqua latens



tens sub membranis circa processus trā-  
 sversos eiusdem lateris, & sub dextro  
 principio diaphrágmatís, & sexti mus-  
 culi femur mouentis, descendit vsque  
 ad tertiam lumborum vertebram, ibi-  
 que iungitur cum ramo venæ non ab e-  
 mulgente, sed à caua parùm infra emul-  
 gentem ortæ, & inde descendens cùm a-  
 lijs quibusdam ramulis venarum iuxta  
 lumbos ab eadem caua subortis iūgitur,  
 præcipuè verò cum vno satis insigni,  
 qui erumpens iuxta vltimam lumbo-  
 rum vertebram à ramo magno ipsius  
 caux, qui femur petit, fursùm ad late-  
 ra ascendit. Hunc connexum, vt pluri-  
 mùm in dextro latere talem obseruauí,  
 raroque admodùm reperi in hoc eodem  
 latere venam sine pari cum emulgente  
 coniūgi. Ex his iam colligas, an in pleu-  
 ritide incipiente vena in poplite secta  
 possit non leue adiuumentum afferre  
 ipsi sanationi, cùm tanta sit coniunctio  
 venæ sine pari cum illis, quæ infra vmbi-  
 licum sunt. Has coniunctiones tanti  
 momenti, vsusque inter illa, quæ dixi, à  
 reliquis anatomicis esse pretermissa, nu-  
 merabis.

N 2 In hu-



In humeraria vena hoc notato, quod axillaris vocatæ propago est in hominibus, atque omnibus, quæ iugulum habent. In ijs verò, quæ iugulum non habent, ramus est, oriundus à vena iugulari externa. Quam rationem ortus nunquam (quamvis studium addiderim non leue) in hominum cadaueribus inuenire potui.

Vnum addit Diuinus Vesalius in vena iugulari externa. Nempe, ipsam maiorem esse interna, quod obseruationibus meis valdè repugnat. Quoniam vt plurimùm internas iugulares externis maiores ac latiores reperi: exceptis aliquot scæminis, in quibus vice versa hoc mutatum vidi. In his autem vnum aliud obseruaui, quod ramorum diuarcatio illa tradita ab alijs anatomicis, non adamussim tota à me reperta est. Quare vti vnaquæque ex his venis ascendens distribuât, audi. Exterior iugularis vena vnà cum interiori, atque vnà cùm illa, quæ ad axillam tendit, oritur sub musculo caput ad thoracem adducente, ab altera duarum illarum partium, in quas tota vena caua diuiditur, cùm ad iugulum



gulum peruenerit. Hæc itaque exterior  
statim orta ramulum à se dimittit, vnâ  
cum axillari quasi connexum & sub  
iugulo reptantem ad nutriendos mus-  
culos, qui sub scapula latitant, & ad a-  
cromium, & partes circa humerum col-  
locatas. Ab hoc ramo statim orto aliquâ-  
do deriuantur venæ aliquot, quæ des-  
cendentes ad mammillas feruntur. Sed iste  
aliquando desunt, mutatoque loco ori-  
untur statim a trunco magno, vnde iu-  
gulares, & axillares ipsæ nascuntur. Qua-  
re sub initio iuguli, vbi iungitur cum  
osse pectoris, perforatis musculis ad mā-  
millas deorsum descendunt. Ipsa deinde  
vena iugularis supradictum musculum  
ascendens, collum vniuersum, ac partes  
ipsius cutaneas vsque ad mammillarem  
processum vix sensibilibus venulis nu-  
trit, ibique consistens, diuiditur tota in  
duos ramos: Quorum altero, qui anteri-  
or est, coniungitur cum alio ramo iugu-  
laris internæ, cuius iam ego mentionem  
faciam, factaque ex his duabus vnica ve-  
na disseminatur, vti ego dicam. Altero  
verò posteriori perreptat per partes po-  
steriores ipsius auris: atque per illas, quæ



circa mamillarem processum sunt, ibique finit.

Interior verò iugularis à dicta fede, vnde & exterior, & orta, & vna cum soporali arteria coniuncta (quibus etiam attenditur sexti paris nervus) superiora petens, ac sub musculis latitans, varias à se promit venas. Inter quas prima illa est, quæ ad glandulas inferiores transmissa musculis ibi collocatis, atque subiecto œsophago propagines distribuit. Secunda est illa, quæ ad superiores dictarum glandularum partes perueniens, musculos pariter laryngis superiores nutrit. Tertia, quæ sat is insignis ac magna vena est, atque in plures alias diuisa tendit varijs ramis ad diuersas partes. Nam primò irrigat posteriores ac laterales laryngis musculos: Secundò vena alia ad musculos hyoidis peruenit, quæ partim in illos inferitur, partim verò cutanea ascendens ad meat' mediam regionem, illic dispergitur. Hæcque eadem sub mēto medio vnita cum coniuge oppositi lateris, venam vnicam gignit, atque eandem cutaneam, quæ vsque ad iugulum descendens, ibique diuarcata articulum iuguli



iuguli vtriusque, ac membranas circum-  
 positas nutrit. Tertiò, ad musculos lin-  
 guæ laterales ramum immittit. Quartò,  
 magnâ satis venam ad angulum maxil-  
 læ inferiorem, ac posteriorem fundit:  
 quæ vena in duos diuiditur ramos. Quo-  
 rum primus ascendens per genam ad an-  
 gulum oculi internû venit: sed antequâ  
 illuc pertingat, ramulum propagat ver-  
 sus narem sui lateris, qui in duas partes  
 sectus, altera radicem cartilaginis ipsius  
 pinnae subit, altera verò ad mediam ferè  
 pinnam ascendens in internam narium  
 tunicâ definit. Hæcque vena est, cui hi-  
 rudines applicandæ sunt internæ. Prior  
 autem pars est, cui exteriores applicatur  
 pinnae, vel fibræ narium.

Cùm igitur prior dictus ramus ad  
 angulum venerit, quandam insignem  
 partem de se in cauitatem mittit, quæ  
 per oculi musculos, & membranas exte-  
 riores spargitur. Aliam quoque emittit  
 particulam ad supercilium, quæ cum  
 coniuge alterius lateris coniuncta per  
 nasi dorsum cutanea vsque ad extremû  
 tuberculum descendit. Huicque appli-  
 candæ sunt hirudines, quæ à medicis ali-

N 4 quan-



quando summo naso apponuntur. Terti-  
 am fundit postea propaginem ad fron-  
 tem, quæ cum oppositi lateris compa-  
 ri, vel coniuge vena coniuncta solet for-  
 mare illam, quæ ab Hippocrate recta  
 vocatur. Sed ut plurimum utraque di-  
 siuncta manens, ac per frontem ascen-  
 dens disseminatur. Secundus verò dictæ  
 quartæ venæ ram<sup>9</sup> plures de se propagi-  
 nes ascendendo producit. Quarum vna  
 subingressa, maxillam per laterales lin-  
 guæ musculos dispergitur, simulque ve-  
 nulam per maxillæ foramen vnà cum  
 nervo & arteria, ad dentium radices trā-  
 smittit. Altera massiterem petit. Tertia  
 cum arteria ad tempus ascendens iuxta  
 auriculæ radicem anteriorem per totam  
 regionem temporalis musculi disse-  
 minatur. Quarta verò cum ramo illo  
 iugularis externo (cuius facta est men-  
 tio) coniuncta duos statim producit ra-  
 mos, atque priorem mittit ad articulum  
 malarum, & ad massiterem latentem,  
 omnesq; ad illas partes, quæ summis in  
 faucibus latitant: posteriorem verò, ad  
 auris regionē posticā, ubi tot<sup>9</sup> dispergi-  
 tur. Vltimò totum, quod reliquū est, ip-  
 sius



sius venæ iugularis ( quod quidem totius fermè dimidium est ) ascendens ad capitis basim posteriorem per proprium foramen insculptam partim additamento lambdoidis: partimque in osse petroso in fontem ipsorum sinuum membranæ durioris cerebri terminatur. Quorum sinuum veram & certam historiam inferiùs audies. Quando igitur iugularis interna maior est, quàm sit exterior ( quod fermè perpetuò reperitur ) in corpore benè venoso tali diuarcatione prædita semper à me visa est. Capillamenta verò ipsius extrema ac minima nõ sum profecutus, q̃a id fieri à me comòdè non potuit. Si autem ( quod rarò accidit ) extrema maior, interna verò angustior sit, immutatur aliquando ratio, & faciei venæ ab hac exteriori originem ducunt. Quod tamen perrarò ( vt dixi ) ego obseruaui.

Succedit tertio in loco, quæ per transversos vertebrarum cervicis processus ascendit. In hac non labores, vt inspicias introitum vnà cum adiuncta arteria in caluariam, quem illi Diuinus Vesalius adscribit. Nam asserit, quòd cùm ad sum-

N s mam-



mam ceruicem venerit hæc vena, residu-  
 um ipsius vnà cùm coniuge arteria tran-  
 sit per foramen sub capitulo vtroque,  
 quo caput cum prima vertebra articula-  
 tur contentum, ac ad sinus membranæ.  
 Quod tu nunquam reperies. Quoniam  
 primò arteria ipsa non inferitur in ali-  
 quem sinum duræ: deinde non ingredi-  
 tur per dictū foramen in caluariam, sed  
 per latissimū amplissimumq; illud, per  
 quod medulla ipsa ad spinam descendit:  
 tertio, vena ipsa per primæ vertebræ  
 processus vnà cùm arteria minimè tran-  
 sit. neque per prædictum foramen in-  
 greditur: sed vt feratur, audi. Statim cū  
 vena hæc in iugulo orta septimæ ver-  
 tebræ processum superârit, indè ramum  
 insignem mittit in sinū ceruicis: deinde  
 superata sexta idem facit: alium enim ra-  
 mum in eundem sinum emittit: item su-  
 peratis omnibus vertebrais vsq; ad secū-  
 dam idem penitus facit. Nam cū ad pri-  
 mam peruenerit, quod reliquum ipsius  
 est, partim in dictum sinum desinit, par-  
 tim in posteriora ceruicis dissemina-  
 tur: neq; primam vertebraam attingit. Nō  
 solūm autem dum ascendit communi-  
 cat



eat ramos sinui cervicis: sed etiam ex  
 aduerso venas transmittit ad musculos  
 cervicis posteriores. Quæ venæ inui-  
 cem, ac simul cum quibusdam alijs col-  
 ligantur, quæ ex sinibus membranæ du-  
 rioris per foramen dictum extramittun-  
 tur. Quoniam multæ sunt venæ, quæ à  
 dura membrana & per suturas, ac per fo-  
 ramina propria ad exteriora capitis pro-  
 pagantur. Quæ quidem cum iungantur,  
 cum aliquot exterioribus ansam erro-  
 ris anatomicis præbuerunt. Quoniam  
 ipsi credunt atque asserunt, esse venas  
 exteriores, quæ per illa foramina ingre-  
 diantur ad mēbranam: cum potius sint  
 internæ, quæ egrediantur, atque copu-  
 lentur cū externis ipsis. Dictæ autē ve-  
 næ sunt diligēter obseruandæ, in ipso ca-  
 pite, cum duces sint facultatum, quæ à  
 medicamētis sincipiti appositis cerebro  
 communicantur.

Sed quoniam mentio facta est à me  
 sinuū ipsius cervicis, meritò hīc quere-  
 re posses, quī nā isti sinus sint. Cū ne-  
 que apud Vesalium, neque apud alium  
 quenquam mentionem factam legeris.  
 Scias duos esse sinus, qui à foramine ca-  
 pitis



pitis maximo alter dexter, & alter sinister incipientes, vsque ad finem ceruicis perueniunt, eadem ratione duram meningem perforantes, vti faciunt alij finus in intima capitis cavitare. Sed de his tractabo diffusius, cum de reliquis finibus inferius loquar.

Illud quoque obseruatione dignum est: quod tu, si summam adhibueris diligentiam reperiēs venas, quæ per musculos rectos ascendunt, ita vniri cum illis, quæ descendunt à iugulo sub osse pectoris vsque ad cartilaginem mucronatam, vt vnica penitus vasa esse videantur, non autem à duobus locis, ijsque aduersis orta. Ratio autem, qua iunguntur, duplex est. Nā ab ijsdem venis ascendentibus videlicet & descendentibus communicantur propagines quædam ipsi cuti suprapositæ, quæ inuicem concurrentes cōnascuntur & vniuntur, manifestissimè rem hanc intuentibus oculis ipsis. Alia etiam ratio idem fit. Quoniam dictarum venarum extremæ partes circa hypochondria in extrema ac summa rectorum musculorum parte in facie ipsorum interna inuicem iunguntur.

Ex



Ex hac gemina cōiunctione apertissimè  
cognosces, magnā esse sympáthiam inter  
cervicē vteri & māmās. Nam venæ ascen-  
dētes oriūtur à ramo, qui originē habet  
candem, quam ille, à quo venæ ad vteri  
cervicē ac sinū propagantur. Descēden-  
tes verò per spatia media cartilaginum,  
quæ costas pectori vniunt, propagines  
manifestissimas vnà cū arteriolis (quam-  
uis de his dubitet Vesalius) mammillis  
communicant. Quare magni illius, qui  
adeft cōsensus, hæc potest dici potissima  
causa. Si tamē aliqua potest reddi causa  
ipsoꝝ consensuū, qui inter partes cor-  
poris humani reperiuntur.

Magnum etiam ob hæc vasa agnosci-  
mus consensum, inter nares ipsas & abdo-  
minis partes exteriores, quæ in hypo-  
chondrio continentur. Quoniam venæ  
descendētes nascūtur circa iugulum, ab  
isjramis maioribus cauæ, vnde & iugu-  
lares ipsæ erumpūt, à quibus postea na-  
rium venulæ ortum habent. Quamob-  
rem non ineptè præcepit Hippocrates,  
quod fluente nare dextra imponamus  
cucurbitulam hypochondrio dextro: &  
sinistra, fluente sinistro. Quia istorum  
vasorum



vasorum ac coniunctionum opera sanguinis fluxio sistitur.

Sed postquam in mentionem incidimus istarum coniunctionum, hoc minimè præter institutum negotium erit, si addam omnes venas, quæ per corium disseminantur, vniuscuiusque partis oppositas tandem inter se copulari, ac coniungi. Veluti in capite, quæ sinistri sunt lateris, cum dextris magna ex parte copulantur: in facie etiam aliquot adsunt exēpla: veluti in recta vocata vena frontis, in spina narium, sub mento, ac similibus alijs locis. Idem apparet in mammis, & in hypochondrijs, vti dictum est, atque in lateribus abdominis, ac thoracis. Nam venæ, quæ à iugulo ad mammas descendunt, cum aliquot alijs erumpentibus à cavitare pectoris ita vniuntur, vt vnica vasa ex duobus faciant. Similiter venæ cutaneæ, quæ ab vtraque axilla erumpunt, ad inferiora per cutim, ita suis extremis coniunguntur cum illis, quæ ab inguine vtroque ascendunt, vt vnus tantum vasorum ductus appareat. In cubito atque summa manu axillaris dicta vena, & humeraria ita simul  
iun-



iunguntur, vt aliquando nil referat, aut hanc, aut illā secemus. Idem in crure accidit, cū extremæ propagines venæ, ab istis saphenæ appellatæ, ita in pedes ac fura cum ramis Ischiadicæ dictæ copulentur, vt non à varijs principijs, sed ad eodem omnes exoriri videantur. Eadem coniunctio etiam datur, inter exteriores atque internas. Nam sinuum, qui in membrana durioris ipsius cerebri sunt, venæ cum exterioribus sæpè coniunctæ apparent. Iugularis interna atque externa aliquot ramis inuicem nexus copulatur. Que per cutē ad mammillas feruntur, cū internis pectoris sæpè videntur coniunctæ. Quemadmodum & propagines aliquot ab axilla descendentes (vt dictum est) copulantur cum illis, quæ à vena sine pari per spatia media costarum feruntur. In abdomine etiam venę ab inguinibus ortę, ac per cutem disseminatæ ita frequentibus venulis iunguntur cum illis, quæ interiores per musculos serpunt, vt mirum sit. In cruribus quoq; ipsis tribus, aut quatuor in locis neſtuntur internæ venę cū cutaneis manifestissima ratione. Quamobrem



obrem veram testemur esse sententiam Hippocratis, cum ait in libro de alimento. *ὑπερβολία μία. ὑμπνοία μία. ὑμπαθία πάντα.* Sed ad historiam.

A vena illa magna, quæ per inguina crus vtrunque petit, antequam ex inguine penitus exiliat, gemini nascuntur rami. Quorum alter exterior vnà cum arteria adiuncta versus spinam ossis ilium fertur per cutem ipsam, ad partes illas laterales nutriendas. Alter verò magis anterior fursùm per abdominis cutem anteriorem, ac lateralem etiam reliqua ex parte diductus, infinitus propaginibus totam hanc partem exteriorem nutrit, atque extremis oculis iungitur cum illis cutaneis venis, quæ ab axillari ortis thoracis lateralem partem nutriunt, descendentes vsque ad abdomen. Venas has & connexionem ignorarunt anatomici, aut saltem non descripserunt veluti etiam non viderunt ramum, qui à saphena statim in initio ipsius ortu ad abdomen & ad pubem disseminatur manifestissimis propaginibus.

Dum anatomici explicant venas, quæ umbilicales dicuntur, asserunt, quod in interna



interna membrana foetum inuolvente,  
 quæ *Ævi* *⊙* dicitur, paruulæ venæ conti-  
 nentur, quas ego nunquam uidere potui:  
 adesse tamē nō negārim, in ea præcipuē  
 parte, quæ prope placentam est.

Aliud etiam: vmbilicales venas, ante-  
 quam ad vmbilicūm perueniant, coire  
 in vnam venam solam, cum à duabus ar-  
 terijs & vraco ad vmbilicum perueni-  
 re. Quam rem vellem, quod vti intelli-  
 gant, explicarent. Nam si de brutis lo-  
 quuntur, Ego respondeo, quod geminæ  
 semper sunt venæ atque geminæ arteriæ,  
 quæ vsquē ad vmbilicum vnā cum vraco  
 perueniunt. Venæque statim, antequam  
 abdomen ingrediantur, in vnam coē-  
 unt, quæ ad portas iecinoris pertingit,  
 vt in ouibus, capris, ac vaccis omnibus,  
 quorum foetus secui, obseruauī. Sin au-  
 tem contrā de humano foetu loquun-  
 tur: assero me aliquando geminas arteri-  
 as vmbilicales nō vidisse, sed vnam tan-  
 tūm arteriam, atque vnicam venam, vnā  
 cum vraco ad vmbilicum ascendentes,  
 vbi iterum arteria in duas scinditur, quæ  
 postea ad ossis sacri latera permeant.  
 Hæc in venarū historia habui, quæ tibi

○

com-



communicanda esse iudicaui.

In arteriarum historia illud primum in memoriam venit, quod non leuem admirationem excitat. Qua ratione factum sit, quod anatomici ferè omnes tã negligenter obseruârint partem illam canalis vel arteriæ, qua iungitur vena arterialis circa basim cordis ipsi aortæ, cùm in fœtu tam aperta pateat, tantusq; sit aditus ab aorta ad venam arterialem, per quem totus sanguis vitalis fertur ad pulmones formandos, & nutriendos, dum fœtus in vtero seruatur. Et quamuis postea siccetur: tantam tamen crassitiam in se habet, vt nulla ratione sensum effugere debuerit. Nam si vmbilicalium arteriarum mentionem faciūt, cur hanc prætermisere, cùm ipsam notare debuerint? Primò, quia satis magna est particula, statimq; dum originem aortæ, atque arterialis venæ ductum querim⁹, vtrò occurrit. Secundò, quia à Galeno in decimo quinto de vsu partium cap. 6. aliquot (paucissimis tamen) verbis designatur. Tertiò, quia multùm facit ad veram cognoscendam historiam vasorum, quæ à corde oriūtur. Tu itaque diligen-



ligēter in fœtu tam humano, quàm brutorum obseruato canalem hunc, per quē ab aorta ad arterialem transitus sanguini datur. Nan tantus tibi videbitur, vt cogites aliquando arterialem ab aorta potiùs, quàm à dextro cordis ventriculo originem traxisse.

Ab arterijs duabus, quæ sub iugulo ortæ ad mucronatam cartilaginem sub pectoris osse descendunt, propagines manifestas ad exteriora transmitti, & ad mammillas præcipuè se ignorare asserit Vesalius: cùm tamen admodùm conspicuæ sint. Quare obseruato has quæso, & videto, an principis anatomici (qualis ipse est) nisi neglexerit, sensum latere potuerint.

In arterijs, quæ soporificæ, vel soporales, vel soporariæ ab anatomicis nostris dicuntur, & à Græcis *ναρκαριαι* sunt dictæ, non multa notatu digna reperi, intereà, dum per ceruicem disseminantur. Verùm pòst, quàm ad caput peruenēre, tunc à diuino Vesalio dissentio. Quia non reperio nisi tres ramos arteriarum in vno quoq; latere, qui ad membranas cerebri pertingant. Quomodo

O 2

autem



autem isti ferantur, audi. Prima arteria illa est, quę orta, vnde ait Vesalius, atque eadem serie per transuersos processus vertebrarum cervicis ducta vsque ad caput, membranam duriolem, quę medullam spinalem vestit, perforat in latere altero inter caput ipsum, & primam cervicis vertebra: atque caluarię cavitatē ingressa, sub medullę origine ferē media iungitur cum sua coniuge oppositi lateris, vnaque facta arteria repit sub basi media ipsius cerebri, donec ad fellę regionem, in qua glandula continetur, pertingat. Ibi diuiditur iterum in duos ramos, quorum alter dexter repit ad dextrum latus fellę, vsque ad secundum nervorum par: idem facit alter suo in latere, cumque illuc pervenerit, vterque in infinitas propagines diuisus, inter primum & secundum par nervorum disseminatur, complicaturque; molli cerebri membranę his propaginibus, quę propemodum infinitę ad formandum plexum choroiden tendunt.

Secūda & tertia ex tribus dictis arteria à soporaria magna oritur, capitiq; cōmunicatur, ratio autem ortus atq; com-  
muni-



municationis hæc est, *uaporia* vocata, arteria statim, cū in vtroque latere orta est, vt̃ optimè docuit Vesalius, atque cōiuncta vnà cum ingulari vena, ad partes faucibus propinquas peruenit, ramum quendam ad laryngis glandulas transmittit per ipsas, ac partes alias vicinas dispergendum. Deinde ramum secundū effundit ad easdem glandulas, sed in superiorem ipsarum regionem, & ad omnes musculos laryngis, aliquotque etiā ipsius hyoidis. Tertiū postea gignit ramū, qui quasi dimidia totius caudicis pars dici potest, cuius varias arterias, varijs quoque partibus distribui cernuntur. Prima enim nō admodū magna ad ossis hyoidis musculos fertur. Secunda verò, quæ & maior valdè est, ad maxillam inferiorem tendit, à qua varij rami distribuntur ad glandulas ibi positas, & ad musculos hyoidis & linguæ ipsius; & ex his vnus satis insignis ad alterum menti latus emissus, ac in duos furculos distinctus: altero in labium oris superius: alteroque in inferius distribuitur. Post secundam tertia arteria ad eosdem linguæ musculos, & ipsammet linguam perue-



nit. Quarta inseritur in muscolum superficiali, qui caput ad thoracem adducit. Quinta autem ad partes, quæ circa mammillarem capitis processum sunt, defertur. Sexta quoque ad eundem mammillarem reptans partes aurium posteriores finit. Quod præterea reliquum est totius dicti rami, ascendens aliquot propaginibus in linguæ radicem & in massiterem, & aliquando in maxillæ foramen, atque aliquot alijs in internam faucium cavitatem, & in narium amplitudinem pertingit. Aliquot etiam furculos transmittit ad latentes faucium ac maxillæ musculos, ex quibus vnus, qui grandior existit, ascendens per proprium foramen in osse cuneiformi, iuxta foramen tertiæ partis partis tertij neruorū cerebri, factoque sibi canali in duriori membrana per illam infinitis furculis distribuitur: atque in causa est, vt ipsa hæc membrana pulsare videatur. Residuum verò vltimum huius tertij rami, iuxta radicem anteriorem auriculæ, & articulum maxillæ per tempus reptans vsque ad frontis latera peruenit, ibiq; terminatur. Post tertium atque ita insignem ramum



mum arteriæ distributum tota reliqua  
 arteria, quæ paulò minor dimidio cau-  
 dice totius soporalis est, quamuis etiam  
 aliquando maior ipsius pars sit, ascendens  
 integraque manens peruenit ad pro-  
 prium foramen, quod in petroso osse in-  
 sculptum est, perque ipsum in cavitatem  
 caluariæ, & ad sellam dictam ascendit,  
 ubi sub dura membrana adhuc latens in  
 brutis animalibus infinitas propaguncu-  
 las à se dimittens, rete mirabile effor-  
 mat, in hominibus verò non insigne hoc  
 reticulum, sed ipsius potius umbram, ac  
 imaginem quandam producit. Has au-  
 tem propagines dicta arteria de se mit-  
 tit, eo pacto, ut ipsa tamen semper inte-  
 gra maneat, minimeque in has propa-  
 gines absumatur, quod in alijs vasis ac-  
 cidere solet. Ipsa itaque tandem perfo-  
 rata, dura membrana erumpit in cavitatem  
 sub cerebri basi, inter primum &  
 secundum neruorum par, ibique in du-  
 os ramos tota diuiditur, quorum, qui in-  
 terior est, iungitur cum interiori coniu-  
 gis arteriæ oppositi lateris, factaque vna  
 arteria ex duab<sup>9</sup>, distribuit ac absumit in  
 plurimas arteriolas, circaque initiū primi



paris neruorum dispergitur per tenuem membranam &, ipsius cerebri substantiam Qui verò exterior est ramus, infinitas similiter producit arteriolas, quarum aliquot vniuntur cum arteriolis illius, quæ prima p̄ basim capitis sub cerebro, vti dictum est, ad hanc eandem sedem peruenit. Aliquot verò disiunctæ per tenuē meninga disseminantur, vt̄ illæ, & per cerebrum ad plexum choroidem formandum. Hæc vera est arteriarum ad caput internum pertinentium historia, quā ego sæpiùs obseruaui, neq; quod aliter se habeat vnquam, videre potui.

Galenus in lib. de Admin. Anat. nono, & in octauo de vsu partiũ, venulas ac arteriolas per cerebrum disseminari testatur. Verũ in verborum progressu videtur asserere, quod huiusmodi venę atq; arteriæ cum meninge molli semper texuntur ac ligantur: itaque textę diffunduntur per ipsum cerebrum: quam sententiam anatomici imitati, asserunt vasa potius cerebro attendi, atque in membrana contexta accumbere, quàm per ipsum disseminari. Quoniam per cerebri substantiam nullæ neque arteriæ, neque venę



venæ diductæ apparēt. Quod ego haud  
cōfirmare possum. Quoniam & venulas  
& arteriolas capillares plurimas per can-  
didissimam ipsius substantiam dissemi-  
natas video, atq; conspicuas in theatro:  
aliquot iam sunt elapsi anni, quibus au-  
ditoribus meis quotannis ostendo.

Doleo, & mirum in modum doleo,  
quòd diuinus Vesalius, quem amo, atq;  
vti praeceptorem colo, venerorq;e, ali-  
quando, dum acrius accusat Galenum  
ac alios anatomicos, ipse erret: quod ipsi  
accidit in vasis describendis, quæ ad si-  
nus ipsius membranæ durioris cerebri  
pertingit. Nam accusat Galenum, ac  
reliquos anatomicos, qui non uiderint  
sinus dictos pulsantes, cū illud ma-  
nifestissimè, faciant. Deinde non inue-  
nerint arterias, vnà cum venis ad eosdē  
sinus pertingentes. Quorum vtrunque  
mihi videtur aliquantisper ab historiæ  
veritate recedere. Nam quamuis sinus &  
membrana pulsent: nō id tamē faciunt  
alia ratioe, q̃ quod disseminatas arterias,  
atque eas frequentes per ipsius substan-  
tiam habent. Rami enim arteriæ sunt in  
causa, vt tota membrana pulset, ipsaq;ue

O s agita-



agitata, causa quoque est, ut agitentur sinus. Possumus etiam & adiungere, quod hæc durior membrana pulsatur, quia infinitas aliquot in locis habet subiectas arteriolas, per tenuem membranā disseminatas, quarū motu agitur. Huic rei argumento est, quoniam substantia ipsa sinuum pulsationi inepta est, & quamuis concedamus arterias (quod ipsi sensui repugnat, neque concedendū est) desinere in hos sinus: tamē, quia ipso rū substantia, ut dixi, nō est apta pulsationi, nam venæ substantia fermē est, ideō non potest pulsare. Quod si fieret, sequeretur etiam venā cauam, cū cor adiunctam habeat ac connatam, pulsare. Item & arteriam venosam, quæ tamen vasa nō pulsant. Sciasq; omnes rationes, quæ pro astruenda hac opinione adduci possunt, esse leues: ut faciliē cognoscere poterit, quicumque disputationem illam legerit de natura arteriæ, in opusculo contentam, De natura partium similium, atque communium corporis humani à me conscripto, quod propediē editurus sum. Quod autem nulla arteria ad sinus membranæ perueniat, ita sensibus mani-



manifestum est, vt ne verbum quidem  
de re ista dici debeat. Quare his ita con-  
stitutis, colliges primam anatomicorum  
arteriam minimè ad sinus duræ menin-  
gis pertinere: secundam verò à me non  
reperiri, multoque minùs lateralibus fi-  
nibus vniri: tertiã præterea adesse atq;  
distribui ea ratione, quæ à me dicta, atq;  
descripta vltimo in loco est: quartam  
atque vltimam eam esse, quæ à me secun-  
do in loco est enumerata, quæue disper-  
gitur per ipsam membranam.

Arteriam ἀσπάρτην in lumborū regio-  
ne diuidi in duos ramos insignes nota-  
to, quod omnes asserunt, non in illa qui-  
dem parte, vnde incipit os sacrum, sed in  
ea præcipuè, in qua est, ligamentū carti-  
lagineum, quo tertia & quarta vertebra  
lumborum colligantur: veluti etiam ve-  
na caua non diuiditur in principio ossis  
sacri, sed penitùs supra corpus quartæ  
lumborū vertebræ. Prosequaris deinde  
hos ramos insignes arteriæ, quousque  
ad inguina pertingunt, ibique videbis  
propaginem ab alterutro ipsorum or-  
tam satis insignem, quæ cutem petens nō  
solùm partes cutaneas, quæ ad pubem,  
sed



sed etiam illas, quæ ad ilia & abdomen  
pertinent, fouet. Hanc ab anatomicis ne  
glectam scias. In reliquis arterijs, quod  
aut nouitate, aut alia de causa, tuis auri-  
bus dignum sit, nihil dicendum habeo.

Cùm igitur omnia, quæ obseruârim  
in historia venarum & arteriarum, aut  
saltem ea, quæ maioris momenti mihi  
visa sint, tibi communicârim: Iam ad  
neruos venio, in quibus primùm pro-  
bare non possum, anatomicorum illam  
sententiam: Quod nerui vsque ad ex-  
tremum duabus tunicis, cerebri modo,  
induantur. Nam quamuis in disputatio-  
ne neruorum asseram quemlibet ipso-  
rum ex triplici illa substantia constare: hæc ta-  
men ratione potiusque sensu distinguū-  
tur, neque exceptis visoriis alicuius ner-  
ui durius, molliusque simul indumen-  
tum per anatomen indicari poterit. De  
transmissione verò ac fluxu spirituum  
animalium per neruos, an fiat, nec ne, de-  
que usu neruorum, quo alij molles  
inseruiant sensui, alij verò duriores  
motui, non requirit hic locus, vt agam,  
cùm alibi diffusius atque oportuniùs de  
hac re tractaturus sim.

Pro-



**Processus cerebri mammillares descri-**  
**psere** anatomici omnes, quos etiam ol-  
 faciendi organa appellârunt. Verùm ita  
 negligenter aut obseruârunt, aut expli-  
 cauerunt, vt neque ortum, neque forma-  
 tionem ipsorum docuerint. Equidem in  
 hominibus horum cognitio satis diffici-  
 lis est, quia nimis tenues ac parui sunt:  
 vnde accidit, nos reliquis animalibus in  
 hoc sentiendi actu valdè esse inferiores.  
 At in brutis vti bobus, capris, ouibus, ac  
 similibus alijs haud difficile est videre o-  
 culis apertis, quod processus isti ab extre-  
 mis ventriculis anterioribus oriuntur:  
 atque foramen manifestum è ventriculo  
 quoque in quemque processum pertin-  
 git. Isti meatum habent ab hoc foramine  
 vsq; ad collocatoriũ os, qui meatus pro  
 ratione processus magnus aut paruus est.  
 Nam in bouino processu magnus, in hu-  
 mano, verò angustissimus est: atque ita  
 angustus, vt nisi in recentissimo, atque  
 integerrimo cerebro tractetur, nunquã  
 patere possit. Quod fortasse in causa  
 fuit, vt reliquis anatomicis horum pro-  
 cessuum historia minimè cognita fuerit.  
 Per eosdem processus ac canales ipso-  
 rum



rum, aërem & vapores ad cerebri ventriculos deferri opinor, mi doctissime Petre. Sed in his non amplius immoremur, cùm ad reliquos nervos sit deveniendum.

Horum Vesalius primum per diuino quodam modo explicavit, neque quicquam ad illa, quæ ipse tradidit, addi potest, nisi quod cerebri substantiam mollem in se continent, quæ per expressionem in lucem venit: indicatque hoc raram esse istorum structuram, non autem manifesto canali perforatam, per quam facillimè spiritus, atque iidem copiosissimi refertim ad oculos meare possunt. Utinam autem hic diuinus Magister ita ad amussim reliqua nervorum paria delineasset, uti hoc primum fecit. Quoniã ego ad alia nunc declinarem. Sed cùm in ijs hominibus, quos ego secui, rem istam multò à præceptis Vesalij alienam reperiã: Ideò sine aliqua ipsius, aut aliorum confutatione, uti nerui isti oriãtur, atque disseminentur, tibi explicabo.

Secundum itaque nervorum par prope originem primi, ortum nervo utrobi que vno, qui relatus ad visorium valdè  
graci-



lis atque tenuis est, per proprium foramen optimè ab anatomicis descriptum, vnà cum quibusdam alijs nervis, quos postea explicabo, ad cauitatem oculum ipsum continètem delabitur, attensum visorio, statim, cùm os perforarit. In isto autem primo vestibulo secundum hoc par ramulum à se mittit, qui supra visorium ascendens, disseminatur in musculum illum, qui palpebram attollit, oculum uè aperit, atque in illum etiam, qui rectà oculum ad superiora vellit. Reliqua pars istius nerui sub visorio cōtenta, aliquot insignes neruulos de se fundit: vnum quidem valdè conspicuū pluribus propaginibus in musculū, qui oculum rectà ad internum angulum trahit disseminandum: secundum pariter conspicuum, qui bifido ramo, ac pluribus fibellis inseritur in musculum oculum rectà deorsum trahentem: tertium etiam adhuc insignē emittit, qui inseritur in musculum sextum, cui ducēdi oculum ad exteriorem angulum in gyrum onus inditum est. Aliquot prætereà istius paris sunt fibræ tenues, quæ visorium comitata, in mēbranas oculi exteriores, & in



in intimam quoque venam disseminantur. Hæc vera est secundi paris distributio, quæ ad omnes musculos oculi non pertinet, sed ad quatuor tantum, & ad illum, qui attollit palpebram: neque ad temporalem musculum transmittit propagines, vt aliquot imaginati sunt. Vnū autem scias, quod, nisi maxima adhibeatur diligentia, ac in secundo simul multū adsit otium, quod tanta est complicatio istius nerui cum alijs describendis, vt nō solum ad musculum temporalem, sed etiam ad dentes descendere videatur. Si quis tamen patientia, ingenio, atque manu pollens fecerit, hæc quæ dixi, vera omninò reperiēt. Sed ad tertium venio.

In tertio pari, toto cœlo dissideo à reliquis anatomicis. Quoniam illud, quod ipsi pro gemino pari tertio scilicet, & quarto recensent, ego pro vno tantum numero. Nam quamuis origo istius nerui videatur pluribus chordis, aliquot quidem mollioribus, & aliquot magis duris constare: Tamen cū vna sit, atq; vno ex loco orta, & vnica tantum in sede duram membranam perforet, non est quod ipsam nos distinguamus. Quintū enim,



enim, & sextum, & septimum par neruorum ex pluribus propaginibus originē ducit, atque sextum præcipuè fibra quadam ab origine ipsius valdè distante augetur. Tamen quia vnitæ istæ fibræ, ac simul collectæ vnico ex foramine duræ membranæ exeunt: singularia ista paria non autem gemina, aut multiplicia describuntur. Prætereà cùm paris quinti portio, vna mollis valdè sit, altera durior, vtraque tamen simul collecta pro vno pari, & meritò censetur. Ergo cùm vna sit origo tertij, omnesque fibræ simul iunctæ per vnicam viam ex dura egrediantur, pro vno tātūm pari ego describam. Sed fortasse dixerint: nervus hic statim cùm extra mēbranam est, antequam ex caluaria prodeat, in duas partes diuiditur, quarū vtraque per proprium foramen delata, hæc tertium, illa quartum par edit. In neruorum paribus distinguendis foramina caluariæ, mea sententia, non sunt obseruāda. Quoniam si hoc esset, cùm per vnum atque idem foramen secundum par, & tertij portio, & totum quartum, & octauum quoque ad oculum ferantur, omnes hos

P      neruos



neruos vnum par esse sequeretur. Nam si hæc duo paria sunt, quia per duo foramina: hæc quoque quatuor vnum sunt, quia per vnum foramē ducuntur, quod minimè dicendum est. Sed potius distinctionis occasio prouenit ab origine atque vnione, vel diuisione intra membranas facta: quibus addatur etiam earūdem membranarum, meatuum vel foraminum vnitas. Quod si dicta diuisioni extra duram membranam factæ obstinatè quis adhuc hære voluerit, atque ideò distinguere: addas tu neruum hunc non in duos distingui, sed in tres potius: videlicet in vnum, qui ad oculum: in alterum, qui ad faciem: atque vltimò in tertium, qui ad linguam & ad cæteras partes, quas audies, fertur, quæ manifestissima diuisio est. Si ergo diuiditur in tres neruos, & per tria foramina elabit: ex caluaria tria erunt proculdubio paria: tertium nempe, quartum, & quintū, quod minimè cōcedendum est, si quintum illud esse volumus, quod ad aurium labyrinthos fertur. At, mī Petre, in hoc controuersia non consistit. Quoniam facile meum hoc ius illis cederem, dum  
hæc



hæc duo paria facientes, rectè vti diu-  
ricantur, describerent. Sed cùm hoc mi-  
nimè faciant, de iure suo, quodcunq̃ue  
fuerit disturbati cedant, velint nolint,  
atque vti hoc par tertium disseminetur,  
audiant.

Tertium igitur par satis ampla ori-  
gine vltra secundam exortum à media  
fermè ipsius cerebri basi multis ex par-  
tibus simul tamen iunctis constans, at-  
que ad latus ossis declinans, in quo glâ-  
dula continetur, duraq; membrana vni-  
co ductu perforata, in medium fermè  
plexum retiformem in animalibus, in  
quibus adest, incidit, vel in coniunctio-  
nem duorum illorum sinuum membra-  
næ duræ, qui in basi capitis ad sellam v-  
niuntur. Hoc par cùm extra membra-  
nam est, statim in tres propagines diui-  
ditur. Quarum illa prima est, quæ ad an-  
teriora diuertens, vnà cum secundo pa-  
ri, & cum quarto & octauo, vel si de mo-  
re aliorum loqui voluerim, vnà cum se-  
cundo pari, & cū propaginib<sup>9</sup> minorib<sup>9</sup>  
tertij, & quinti paris transit per foramē  
secūdi in illam, quæ oculum continet, ca-  
uitatem. Quò cùm peruenerit, reliquis

P 2 cum.



cum nervis & arteriis venulisq; ligata statim in duas partes scinditur, quarū maior ac crassior supra par secundum per oculi partem elatiorem serpens inter perioestiū ac pinguedinem, qua musculi oculum mouentes plurima teguntur, vsque ad palpebrę superioris terminum procedit, ibique manifestè in duos furculos diuisa (quāquam diuisio hæc in primo statim exordio latens inceperit) in alterum, qui exteriorem angulum respicit, & per proprium canalem, vel foramen aliquando osseum in supercilio ad frontem ascendit. In hoc deceptus est diuinus Vesalius, ratus esse germen minoris propaginis tertij paris. In alterum verò furculum, qui internū respicit angulū, quiq; prope dictū angulū egredit, in musculum oculum claudentem & in frontis musculos disseminandus. Hic autem furculus insculptum aliquando canalem per quem feratur, habet in ambitu osseo, aliquando verò non. Minor præterea in superioribus dictæ diuisionis par ab eodem secūdi paris foramine procedens, inter ramum primum & secundum eiusdem paris secundi sub musculo



sculo, qui attollit oculum fursùm, & sub illo, qui attollit palpebram quasi per transversum lata, ad eam cavitatis regionem accedit, quæ respondet angulo oculi interno, cumque illuc pervenerit comite sibi adiuncta arteria, quæ è calvaria vnà cum visorio nervo egressa erat, & vena quoque, quæ ab eiusdem anguli exterioribus venis in cavitatem prodit, in duas fibras diuiditur, quæ quidem perforato osse ad duram membranam, vbi colum in interna capitis cavitate vestit, feruntur, & per illam disseminantur. Membrana autem ipsa per meatus, ac futuram colatorij permeans nervo admixto, internâ narium atque ossis spongiosi tunicam efformat. Tria autem notanda sunt: Primum, quod duæ istæ ultimæ fibræ solent esse aliquando tres, & aliquando vna tantum: Secundum, quod minor ista pars, quæ nunc descripta est, quamvis sit pars primæ propagationis dictæ tertij paris: solet tamen aliquando oriri distincta, vsque à prima totius paris origine, distinctaq; semper manet ab altera parte, etsi per idem foramen feratur, eademque tunica vestiatur.

P 3 Terti-



Tertium notandum est, quod ab hac eadem propagine cum per transuersum declinat, inter dictos musculos aliquot tenuissima capillamenta disseminatur per pinguedinem, quæ tunicam visorij ambit, quorum quædam iuxta neruum ipsum percurrunt, usque ad duram ipsius oculi tunicam. Hæc de prima tertij paris propagine dicta sint.

Secunda tertij paris propago, vel truncus pluribus ex fibris, veluti nervis constans, ad foramen proprium peruenit, contentum in osse cuneiformi sub rima vel foramine secundi paris vocato, per quod satis crassa, ac insignis, pluribusque membranis inuoluta, & pinguedine latens propago hæc procedit anteriora versus, & simul per rimam quandam in oculi orbita satis conspicuam, inter cuneiforme & maximam malorum os, iuxta extremos maxillares contentam. Quandiu autem in hac rima latitat, plures neruulos de se in temporalem musculum mittit, atque facto veluti reticulo quodam ex pluribus fibris ascendentes arteriolas amplexatur, quæ per palatum, narium cavitatem,



tem, malasque, & per musculos ibi latentes disseminantur, ac deinde ab eodem reticulo aliquot minimos nervulos ad oculorum sedem distribuit. Postea ex hac rima exiliens propago in oculi orbitam, latensque sub duplicato illo osse, quod suturæ speciem ementitam exprimit, ad eiusdem orbitæ ambitum inferiorem, & ad foramen in malarum osse maximo contentum pervenit, indeque egreditur una cum arteria, quam sæpè ac sæpius huic nervo attentam reperi, & disseminatur per omnes faciei musculos. Sed antequam per foramen dictum ad aciem egrediatur, nervum producit, qui in partes oculum inferiorem ambientes distribuitur; deinde novum alium, dum prope dictum foramen est, antequam elabatur, producit nervum, qui tendens versus angulum exteriorē orbitæ, ruptoque osse descendit ad cavitatem illam vacuum, quæ in maximo malarum osse latitat: atque membranæ illam cavitatem vestienti implicatus, una cum arteriola quadam sibi aliquando distributa recurrit, versus angulum internum & nares sub foramine dicto

P 4 repens,



repens, per quod ereptura est ipsa propago maior. Cùm igitur neruus hic per cauitatem dictam lapsus ad nares peruenit, perforato iterum osse partim inferitur in membranam intimam, que extremas nares illinit: partimque radices dentium anteriorum petit. Hoc ignorârunt anatomici, cùm distributionem hanc minori tertij paris propagini adscribant. Ipsa autem propago dicta ex foramine prætereà erumpēs, per faciē distribuitur: vt̃ ab alijs traditum est.

Tertia propago, vel truncus tertij paris, qui crassior ac posterior duobus alijs dictis est, per proprium foramen ad exteriora vnà cum vena quadam caluariam aliquando ingrediente fertur. Hocque foramē in cuneiforme osse insculptum est, inter illud, per quod secunda propago dicta elabitur, & illud, per quod in caluariam incedit arteria per duram membranam dissemināda, quam ego inter illas, quæ caluariam ingrediuntur, secundo in loco numeravi. Hic itaque truncus statim cùm extra foramen est, multa membrana obuolutus, in plures diuiditur ramos: Quorum primus statim



statim ad musculum temporalem delatus, atque per ipsum deorsum ad anteriora declinans, plurimas illi, & latenti musculo quoque aliquot fibras communicat, postremoque perforata in parte laterali ipsius temporis chorda, vel (quod aliquando accidit etiam non perforata) prope latus eiusdem ad faciem fertur, in qua baccarum musculis propaggines distribuit, & tandem fermè totus dispergitur in secundum dictarum buccarum musculum, & in subiectam cutem, & gingivas, & in extremum palatum, faucesque, ubi amygdalæ collocatæ sunt: tantusque est huic nervo nexus prædicto musculo secundo, atque cum subnata cute, ut inde auelli minimè possit. Secundus ramus ortus ab eodem loco unde primus, cui crassitie nequaquam cedit, in eundem temporalem musculum inseritur, ipsoque iuxta maxillæ articulum perforato, descendit in internam faciem massiteris exterioris, totusque per dictum musculum disseminatus, tandem in ipsius chordam desinit. Connectitur autem nervus hic, dum illac transit, cum ligamento articuli in tem-

P 5 pore



pore. Tertius æquè magnus, ac secūdus, labens per priorem musculum latentem in ore, & ex se veluti reticulum constituens, amplexatur venam & arteriam, quæ ibi sunt, atque procedens ad partē superiorem, ac posteriorem articuli ipsius maxillæ, vnā cum arteria & vena illā diducta, ad anteriorem radicem auriculæ pertingit, multisq; propaginibus in partem temporalis musculi ibi positā, & in auriculam disseminatur, sed præcipuè in ipsius radicem anteriorem, vel in ἀντιλόβιον à Græcis dictum. Quartus dictis tribus maior, descendens per exteriorem latētis musculi superficiem, peruenit ad foramen internum maxillæ, vt per illam disseminatus radices dentium inferiorum adeat: huiusq; nerui portio per eiusdem maxillæ foramen exterius, atque antè elabitur ad musculos, & ad labium, & ad cutem ibi collocatam. Notandum autem est, quod ab isto quarto neruo, antequàm maxillam ingrediatur, solet oriri neruulus quidam validus, qui longus admodum, ac gracilis sub maxillam serpit, donec inferatur in quartum maxillæ musculū, qui os aperit,



aperit, & in illos quoque, qui sub mento positi, partim in os hyoides, partim in linguam inferuntur. Quintus nervus prædicto quarto aliquantisper minor, (quanquam maior aliquando etiam reperitur) per musculos latentes in ore transiens, ad linguæ latus infernum pervenit, atque in totam illius dimidiam partem inferitur, usque ad superficiem superiorem. An verò tunica, vel crusta ipsius linguæ exterior ab his nervis fiat, adhuc cognoscere non potui. Ab eodem prætereà confinio, ubi quinque hi nervi à tertio trunco dicto oriuntur, tres aut quatuor alij nervuli deducti distribuuntur, per musculos in ore latentes. Hæc vera est, mi Petre, tertij paris in vno quoque latere distributio, multo longoque labore, ac studio à me cognita, quam nullus vnquam assequetur, nisi studium idem, ac diligentiam cum labore iunctam adhibeat, simulque etiam calleat mechanicam secundæ peritiam, sine qua anatomicus quicquam præstare nequit. Nam solent aliquot anatomici dissecto nervo quodā, eodēque tracto inspicere, an aliqua simul moveatur



ueatur pars, cumq; vident tres, aut quatuor simul moueri, colligunt, in has omnes dictum neruum inseri, cum tamen satis commodè fieri possit, quod aliquot ex his moueantur, quia sint colligatæ quadam alia ratione cum illa parte, in quam solam neruus inseritur, atque ideo ad motum istius moueantur, cum tamen neruum non admittant. Accidit quoq;, quod nerui membranis aliquot in locis obuoluantur, quæ multas etiã alias partes colligent, vnde fit, vt tractis neruis omnes illæ partes consentiant dictarum membranarum: ergo, cum tamen neruum communicatum minimè habeant. Quamobrem opus est, cum anatomicus sit artifex sensatus, vt ad extremum vsque prosequatur neruos ipsos, atque oës minimas particulas, si voluerit certam ipsarum insertionem, ductumque cognoscere: quod sine labore, aut studio, aut, vt dicebam, sine peritia mechanica fieri non poterit. Sed ad quartum par reuertamur.

Quartum par neruorum à quibusdã anatomicis proponitur recentioribus ex auctoritate Vesalij sub nomine  
minoris



minoris propaginis quinti paris, maleq;  
 etiam ex eiusdem sententia describitur.  
 Quoniã in his difficilimis rebus (quan-  
 quam omnes profiteatur se posse pluri-  
 bus notis diuinum Vesalium inurere) à  
 præceptoris scripto nequicquam disce-  
 dunt, cumque inferi neruum hunc in  
 temporalem, & latentem musculum a-  
 pud ipsum legerint, conceptis ijsdem  
 ferme verbis tandem historiam referūt.  
 Sed multò aliter res se habet. cum igitur  
 ex tertio & quarto vnum par ego colle-  
 gerim, neque reliquis paribus nomina  
 mutare uelim: cumque quinti & sexti  
 ita crebra subinde habeatur mentio, vt  
 nil in arte anatomica crebrius repetatur,  
 ne sedes vacet inter tertium & quintum  
 par, apposui quartum illud, quod alij a-  
 natomici minorem propaginem quinti  
 appellāt. Hanc si inspicias, certò cogno-  
 sces par neruorum distinctum esse, ne-  
 q; posse pro alio, quàm pro quarto pari,  
 censerī. Igitur par istud à media penitus  
 basi ipsius cerebri oritur, & quasi ab  
 incipiente origine spinalis medullæ, ac  
 aliquantisper sub cerebro serpens, ad an-  
 teriora & lateralia versus, perforat mem-  
 branam



branam inter secundum ac tertium par  
dictum, indeque aliquando cum quadā  
arteriola adnexa, & aliquando non, per  
foramen secundi paris in orbitam oculi  
ingreditur, & totum fermè in illum  
inseritur musculus, qui rectā ad angu-  
lum anteriorem oculum trahit, neque  
vllum manifestum consortium habet  
cum temporali, aut cum latente muscu-  
lo. Vide quā differat hæc insertio ab  
illa, quæ ab alijs prodita est: vellemque  
mi Petre, quod Capredonum cogeres,  
atque impelleres ad dissectionem du-  
ctuum istorum nervorum. Quoniam a-  
pertè cognosces nulla alia, quā à me  
dicta, ratione ferri. Sed ad vltiora pro-  
cedamus.

Quintum nervorum par ortum ab  
ea sede, quæ etiam reliquis ab anatomi-  
cis explicata est, duabus partibus, vel  
potius nervis cōstat, antè, quā è mem-  
brana egrediatur. Altero quidem, quo  
nullus nervus mollior est, exceptis vi-  
forijs, hicque ad auditum destinatus est.  
Alterò verò, qui quinto pari etiam af-  
signatur: quia nascitur ab eodem pe-  
nitùs loco cum molliori dicto, & cum  
eodem



eodem ad os petrosum venit: sed reuera distinctus est neruus & durior priori, atque æquè durus, vt reliqui nerui, qui tertium & quartum, ac reliqua paria efficiunt. Neque vlla ratione videtur pars mollis dicti. Sed quoniam alij anatomici hoc asserunt, ne ab ipsis in omni- bus dissentiam, pariter & ego quintum par constare ex parte dura atque molli, vel neruo duriori, mollioriq̃ue dicam: ac simul vtrūque, quo feratur, vel distri- buatur, describam. Scias autem, quod si qua in parte anatomes laboraui, ac in- sudaui, hæc illa fuit, vt apertis oculis co- gnoscerem auditorij organi structuram, atque huius quinti nerui ductum. Sed ad rem. In osse petroso in cavitare capi- tis contento, atque in facie eius, quæ po- steriora respicit, inest quoddam for- men, vel meatus satis insignis, qui rectè versus exteriora aliquantisper os di- ctum perforat, parùm autem procedit, quia statim occęcatur. Sinus hic in pue- rulorū ossibus breuior est, & cuiusdem fornicati antri, vel porticus etiā speciem habet: in adultis verò adaucto osse, mu- tataq; priori specie meat⁹ ac cuniculi for-

mam



mam penitus recipit. Ad hunc igitur v-  
 terque nervus mollis scilicet, auditorius  
 à me vocatus, & durior etiam venit,  
 atque vtrique meatum usque ad extre-  
 mum, ubi finit, subeunt. Tunc durior re-  
 perto proprio canali (quem meatum  
 cœcum falsò appellant) in latere dicti  
 antri, quod partem cerebri anteriorem  
 respicit per os petrosum perforatum  
 fertur sub illa superficie, quæ anterior  
 est, ibique aperto aliquantisper canali  
 comitem admittit arteriam, quæ oritur  
 ab illa, quæ membranam duram disse-  
 minatur, postquam calvariam ingressa  
 est. Nervus hic cum prius per petrosum  
 versus anteriora iuerit, tunc admissa ar-  
 teria, reflexoque ductu per idem os ad  
 posteriora recurrit, sed ita obliquè, ut  
 inferiora etiam atque exteriora simul  
 petat, ac descendit in cavitationem illam in  
 osse contentam, quam tympanum suprà  
 ego appellavi, perque illam labitur, latès  
 semper in proprio canali osseo, veluti  
 in fistula quadam, quam ego aquædu-  
 ctum, cum tympanum in superioribus  
 describerem, nominaui. Quo quidem  
 artificioso ductu fit, ut iste nervus tran-  
 seat,



feat, & nō transeat per tympanum, tran-  
 seat quidē, qui per canalem, qui in tym-  
 pano est, iter facit: non transeat verò,  
 quia non in cauitate, sed in proprio ca-  
 nali continetur: hoc tamen nullius mo-  
 menti est. Cū igitur ad tympanum de-  
 scenderit neruus aperto iterum canali  
 proprio arteriæ comitis partem emit-  
 tit membranæ, quæ vestit tympanum di-  
 stribuendum, ac partibus reliquis ibi  
 contentis, ipseque neruus adhuc integer  
 cum reliqua arteriæ parte, quasi peracto  
 semicirculo, ac circumlustrata fenestra  
 ouali ipsius tympani manens semper in  
 suo canali, ac ad posteriora magis refle-  
 xus, per os mamillare vocatum aliquan-  
 tis per currit, ac tandem peruenit ad il-  
 lud foramen, quod medium est inter ba-  
 ses mamillaris processus & calcaris. Sed  
 antequam egrediatur comitem, dimit-  
 tit arteriam, quæ per os labens, in alterâ,  
 ac oppositam partem in cauitatem cal-  
 uariæ, perforato eodem osse petroso e-  
 labitur. Nam in facie anteriori ossis pe-  
 trofi ingressa erat canalem nerui, in po-  
 steriore verò ex osse egreditur. Neruus  
 igitur hic dimissa à se arteria, vnicus sem-

Q

per



per existens, dicto ex foramine elabatur,  
 perforatisque quibusdam carnosus par-  
 tibus, quæ mammillari processui hærent,  
 sub auriculæ radice ad anteriora serpit,  
 cumque ad maxillâ venerit, in plures di-  
 stinguitur ramos, quorum primus, atque  
 omnibus inferior, per maxillâ diductus  
 inseritur partim in massiterem, partim  
 etiam in illû, qui ex panniculo carnosus  
 (ut aiunt) factus, primus inter mouentes  
 facië numeratur. Secundus, qui etiâ me-  
 dius est, & capillaris, disseminatur per  
 partes glandosas, ac membranosas, quæ  
 circa auriculæ radicem sunt. Tertius, qui  
 est maior nerui portio, ac duabus reli-  
 quis elatior, sub auriculæ fibra percurrës  
 in illâ, atque simul in totâ eiusdem auricu-  
 læ radicem anteriorem, inferiorem, atque  
 simul posteriorem disperit. Notandum  
 quoque, quod neruus hic quinti paris,  
 cum extra foramen elapsus est, capilla-  
 menta quædam in quartû maxillæ muscu-  
 lum, qui os aperit, & in tertium hyoidis  
 perforatum à dicto quarto, in utrosque  
 scilicet à calcari ortos fundit.

Altera quinti paris portio, quæ mol-  
 lis est, & neruus auditorius à me voca-  
 tur,



etur, vnà cum dura ad extremũ illius an-  
tri perueniens quibusdã angustissimis  
foraminibus medijs, in cauitates distri-  
buitur geminas, atque illas quodãmodò  
sublinit, quarum vna labyrinthus, altera  
cochlea, vel cochlearis à me inter ossa vo-  
cata, atq; descripta est, neq; vlteriùs pro-  
cedit, ullũmue neruum à se dimittit ad  
exteriora. Neq; tu, neque alius quisquã  
(vt mihi persuadeo) aliquã ab hoc quin-  
to pari, neruosam propaginem, quæ vl-  
lius momenti sit, præter à me dictas, in-  
uenire poterit, magna que commenda-  
tione dignus erit, si inueniet. Frustrà vi-  
sa est fortasse explicatio quinti huius pa-  
ris, cùm etiam à reliquis tradatur: sed si  
illorũ sententiã cum hac cõtuleris, fru-  
strà non esse cognosces. Ad sextum par  
venio, quod cùm ab alijs etiam aliqua  
ex parte, non omninò tamen in ipso di-  
ssentiam, quale à me sit obseruatum, tibi  
describam.

Sextum par, quamuis intra caluariam  
ex pluribus fibris constare videatur: vni-  
cus tamen neruus in vtroque latere  
obductarum fibrarum vnionem habi-  
tus est. Quæ quidem fibræ non eò vsq;

Q 2 vniuntur,



vniūtur, aut miscētur : quin re vera duo  
 semper videantur nerui sub vno inuo-  
 lucro tantū contenti, eodemque ex fo-  
 ramine prolapsi, atque ego pro duabus  
 partibus, quæ vnum sexti paris neruum  
 forment, semper recensebo. Sextum i-  
 gitur par ortum, atque egressum per fo-  
 ramen, vt omnibus anatomicis notū est,  
 cū sub membrana latentes duos ner-  
 uos dictos habeat, alterum quidem an-  
 teriorem, ac valdè minorem, alterū ve-  
 rò posteriōrē, qui valdè maior anteriori  
 est: ex his minorem anterioremque; par-  
 tem ego prius describā. Minor hæc por-  
 tio, vel neruus statim cū extra caluariā  
 est, rectā deorsū tendit ad musculos  
 linguæ & ad illos, qui fauces vestiunt,  
 maioriq̃ue ex parte in os disseminatur:  
 quanquam etiam propago quædam in  
 radicem linguæ finiat. Hæc sexti portio  
 anatomicis alijs ignota videtur, quam-  
 uis reuera adsit: egoque iam præsentia  
 gemina cadauera habeo, secōque, & in  
 utroq; maxime conspicuam video. Ma-  
 ior verò portio, statim cū extra caluariā  
 est, emittit ramū in illos musculos dis-  
 seminandum, qui ceruicem occupantes  
 à Ve-



à Vesalio in descriptione sexti paris numerantur. Deinde descendens ramum alium ad musculos laryngis transmittit: ad illos præcipuè, qui internam laryngis cauitatem occupant, hi sunt, qui quartum par efficiunt, quinto in loco enumeratum. Aliquot etiam tenues ramulos quandoque geminos, quandoque verò plures à dicto seiunctos, ad faucium musculos transmittit, sed ex his insigniorem in musculum à larynge ortum, gulamque ambientem propagat. Quod autè reliquum est, istius nervi sub subiugulali vena, atque soporali arteria latens, ad inferiora descendit. Verùm vnum notetur, quod maximi momenti est in hoc sexto pari: quod tunica, vel membrana illa, qua vestitur, dum per foramen elabatur, aliquando manifestè absorbens aliquot fibrellas istius nervi, aliquando etiam immanifestè, cū extra caluariam est, producit quoddam corpus oblongum oliuaris figuræ, aliquando simplex, aliquando geminum in utroque latere, quod colore carneum videtur, at substantia nerueum durumque admodum est. Hoc corpus oliuare

Q 3 in



in quādam definit fibram nerueam, quæ per ceruicem declinans propaginibus quibusdam neruorum, qui à ceruice oriuntur, à primo scilicet, & secundo pari, & quarto, & quinto, & sexto, vel à primo, secundo, quinto, sexto, & septimo copulata est, & velut reticulum, aut complicationem quandam efformat, quæ per totam ceruicem in vnoquoque latere anteriori descendit, atq; in ista complicatione noua alia corpora oliuaria aliquando concrescunt, incerto tamen numero, quæ nulla alia substantia quàm neruea, & quasi in callum concrescere constant. Cùm ego primus talem neruorum copulam obseruârim, primus quoque nomine imposito plexum sexti paris appellabo: à quo plexu plures nerui ad cordis basim feruntur, vt suo loco dicam, atque ab hoc eodem sæpè ac sæpiùs neruus, qui ad septum transuersum fertur, in vtroque latere ortum ducit: quanquam incrementum accipiat maius à quinto & quarto pari neruorum ceruicis. Ab hoc item plexu principium ducit neruus ille, qui descendens per thoracē iuxta costarum radices, ad mesente-



senterij origines venit, quamuis addat  
 Vesalius, quod dictus nervus principi-  
 um ducit à propagine transmissa ad pri-  
 mam thoracis vertebram à nervo mag-  
 no sexti paris, per iugulum descenden-  
 te. Sed relicto hoc plexu, ad ramum sex-  
 ti paris maiorē reuertamur: in quo prae-  
 ter illa, quæ optimè à Maximo anatomi-  
 corum Magistro dicta sunt, illud quoq;  
 notandū est, quod cū in sinistro latere  
 infra caput arteriæ deorsum flexæ ve-  
 nerit, producta propagine recurrente,  
 quæ aliquandò multiplex est, adhuc aliā  
 parū infra producit, quæ reflexa ad cor-  
 pus venæ arterialis, ad plexum quendam  
 neruosum sub basi cordis contentum  
 fertur. De quo suo loco dicam. In dex-  
 tro verò latere statim cū hic nervus  
 recurrentem dextrum fecit, quandam  
 propaginem à se producit, quæ coniu-  
 cta cum alio neruulo à plexu dextro e-  
 iusdem sexti manante sub arteria, quæ  
 ad iugulum ascendit, declinat ad cordis  
 basim: desinitque in eundem plexum  
 nerueum ibi contentum, cuius luculen-  
 tam mentionem faciam, cū de nervis  
 cordis tractabo. Idem nerui sexti paris

Q 4 vtri-



utriusque lateris cum secundum pulmonum radices transeunt, multas fibras non ad huius visceris membranam exteriori tantum communicant: sed etiam ad ramos asperæ arteriæ, quæ fibris dictis ramis quasi connatæ, per totos pulmones distribuuntur. Addendum prætereà est, quod dum dicti nervi stomacho hæere incipiunt, aliquot etiam furculos ipsi communicant. Posteaque ad os ventriculi descendunt, & disseminantur, uti optimè tradidit Vesalius. Animaduertendum tamè est, quod ab ea oris ventriculi parte, quæ dorso incumbit, vna, & aliquando geminæ propagines à dictis nervis oriuntur, quæ in unam coniunctæ feruntur in plexum nervum mesenterij, neque unquam ego inspicere potui (quod volunt quidam) nervos ab istis sexti paris ad renes & ad uterum pertingere. Sed iam tempus est, ut revertamur ad nervorum origines, atque ad septimum ipsum par.

Septimum hoc par ortum, atque ex caluaria elapsum, uti docuit Vesalius, integro constans nervo non miscetur, sed colligatur cum sexto pari. Nam servato



uato suo corpore, ac filo rotundo ac integro, ad linguam deorsum fertur, sed antequam annexu cum sexto pari recedat, ipsi communicat minimam quandam sui portionem, quæ vnica aliquando fibra, aliquando verò gemina constat: at cùm ad linguam peruenerit nervus hic, minori sua portione diffunditur per illius atque ossis hyoidis musculos: maiori verò propagine tota inseritur in linguæ substantiam, ac percurrit vsque ad extremum apicem: huiusque fibræ aliquot confundi ac commisceri videntur cum fibris quinti nerui, qui à tertia propagine paris tertij ortus, similiter per linguam disseminatur. Hæc vera septimi paris distributio est.

Vnum adhuc superest neruorum par, ex ijs, quæ à cerebro vel medulla intracaluariam oriuntur, quod à diuino Vesalio ob modestiam, ne numerum ab alijs anatomicis positum & confirmatum turbaret, pro distincto pari non est propositum, sed pro minori propagine tertij paris enumeratum. Quæ si ita descripta esset ab ipso, vt in homine reperi, à me etiam probaretur: sed quoniã nihil

Q 5 com-



commune habet cum tertio pari, & à regione cerebri valdè distante ab origine tertij oritur : déinde etiam, quia plurimum propaginum tertij paris à me facta est mentio, ideò ne nouam pariam confusionem, elegi pro octauo pari numerare, cùm extra seriem omnium aliorum nascatur, eoq̃ue audaciùs à Vesalij placito declino, cùm ipse quoque in eo describendo neruo ab historia naturali diuertat. Octauum igitur par neruulo perexiguo oritur ab infima & posteriori sede vel basi illorum cerebri processuum, qui <sup>radices</sup> ab anatomicis vocantur. Neruulus hic indè ortus ad latus basis ipsius cerebri veniens, atque in dura membrana latitans ad anteriora fertur, secundum illam regionem, per quam ex dura membrana egrediuntur secundum, & tertium, & quartum neruorum paria. Itaque neruulus hic in dicta membrana latitans, peruenit ad foramen secundi paris, illudq̃ue penetrans in cauitate oculi continente, totus inseritur in musculum quintum in angulo interno collocatum, qui ad trochleam cartilaginofam reflexus, oculum ad angulũ internũ in gyrũ tra-



trahit. Et veluti anatomicorum nemini hæc quinti mnsculi positio & insertio patuit: Ita neque istius nerui ortus, ac implantatio potuit patere. Hæc satis sint inter illa, quæ ad origines neruorum mollium pertinent.

In medulla spinali illud notato, quod quamuis anatomici omnes ferè asserant, in exitu caluariæ eam esse pleniorē, ac crassiorē: déindè sensim & sensim vsq; ad extremum ossis sacri semper attenuari: in illis tamen partibus, à quibus oriuntur magni nerui, crassior ac plenior est, quàm in reliquis inferioribus, aut superioribus. Nam in illa parte, quæ cōtinetur ab vltimis vertebris cervicis, quæ uero origo & magnorum illorum neruorum, qui per brachia feruntur, pleniorē procul dubio medullam reperiēs, ac crassiorē, quàm in partibus paulò superioribus aut inferioribus. Ita quoque in lumbis crassiorē eam partem medullæ inuenies, à qua maximi illi nerui oriuntur, qui ad crura descendunt, nō autem tenuiorē, quàm sit in regione superiori dorsi vel thoracis.

In Peritonæo vnum notant anatomici,



ci, quod simplicissimum sit corpus, nullasq; fibras habeat: quod dogma historię repugnat. Nam quamuis carnosas nō habeat, aut neruosas ita inter se distinctas, vt primo aspectu statim sensum feriant: tamen si parū ipsius tella distrahatur, disrupta aliquātisper textura, statim omnium generum fibræ apparēt. Prætereā in omēto vix tantū eleuato, in humano cadauere, ita apertē apparēt fibræ, vt nihil apertiūs: at hoc peritonēi propaginē esse nemo negabit: cumque à simplicissimo corpore compositum nullū prouenire possit, nisi aliud addatur: sequetur, quod si in omento composito fibrarum adest, etiam in peritonæo, à quo oritur, saltē latitat. Aliud addebatur à diuino Vesalio, quod in peritonæo fœminarum non adfunt ductus illi, aut meatus ad inguina, qui sunt in viris (de illis loquor, quæ vasa seminaria ambiunt) at contrarium ego reperio, nam in fœminis quoque sunt, & deferunt cremasteres vteri ad pubē ipsam, vt suo loco dicetur, & adfunt suspensorij musculi, & foramina illa in chordis musculorū obliquē descēdentiū, veluti etiam in viris ipsis, cunctisq; qui



qui diligenter ea loca inspexerint, pate-  
re possunt. Quæ nisi adessent, foeminæ  
herniosæ nunquam euaderent, quod ge-  
nus morbi sæpè & sæpiùs ita patiuntur,  
vt intestina copiosissima in inguen de-  
scendant, ipsæque per sectionem, anti-  
quorum etiam testimonio, sanentur.  
Quod indicat easdem vias in illis re-  
periri, quæ & in viris. Circa peritonæi  
ortum, in hanc communem sententiam  
anatomici veniunt, quod ipsum oriatur  
à ligamentis, quæ lumborum vertebrae  
copulant: ego verò geminum principi-  
um illi ascribo, vtrunq; scilicet mesen-  
terij exordium. Nam à plexu illo ner-  
ueo gemino, & non aliundè oriri, mihi  
videtur. De hoc autem principio nerueo  
mesenterij dicam, suo loco. Quæ verò  
me mouet ratio, hæc est: Quoniam dum  
separo peritonæum ab omnibus parti-  
bus exterioribus, ipsum integrum totū  
feiungo à vertebrae lumborum, & ab il-  
larum ligamentis, ita, vt manum aut di-  
gitos à lumbis dextris ad sinistros sub pe-  
ritonæo transmittere possim. At princi-  
piò vtrique mesenterij ita annexum est,  
vt integrū inde auelli minimè possit. Tu  
vide-



videbis, iudexq; eris: in re tamen, quæ non magni momenti est, quoniam hoc facillimè illis etiam concedo ac dono. In eiusdem peritonæi foraminibus aliqua esset quæstio, an tot sint, quot tradita sunt ab alijs? Déinde an illa, quæ ad inguina veniunt, sint foramina, an canales: & si canales sunt, an peruij fistulosiue sint, vel potiùs pleni ac densi? quæ cum primo aspectu patere possint, à me, cui satis est digito hæc indicare, dimittuntur. Huius farinæ quoque sunt vasa quædam, quæ in ipso peritonæo duplicato canales habent, per quos permeant ad sua loca, ita, vt in ista duplicatione contineantur, talia sunt  $\sigma\upsilon\pi\alpha\kappa\omicron\theta$ , vena & arteriæ vmbilicales, venæ & arteriæ ac pori feminales, atque etiam meatus vrinarij.

Ad  $\beta\iota\sigma\sigma\phi\acute{\alpha}\gamma\omicron\mu$  vel gulam venio, in qua tunicæ aliter, quàm ab alijs traditum est, sunt obseruandæ. Nam duas habet, quod omnes confirmant, alteram internam, alteram verò externam: interna tamē talis est, vt à me semper reperitur, non vt à alijs est descripta. Est enim dissimularis substantiæ: quia in intima superficie veluti quoddā habet velum, fibris rectis,



rectis, carnosis, tenuissimisque constans,  
 quod totam illam superficiem vestit: re-  
 liqua verò substantia tunicæ tota ner-  
 uosa est omni genere fibrarum donata,  
 veluti tunica ventriculi & intestinorum  
 interna, nihilque carnis in ista est. Prima  
 hæc tunica ab illa oritur, quæ neruosa  
 existens fauces intimas vestit, & vsque  
 ad os ventriculi elatius fertur. Quæ quã-  
 uis seiungi possit ab illo interiori ve-  
 lo, veluti cuticula à subiecto corio, pro  
 vna tamen vtranque ego recenseo, cum  
 mihi satis sit, varietatem substantiæ nos-  
 se. Exterior autem tunica gulæ carnosa  
 admodum ac crassa, veluti si esset muscu-  
 lus perforatus, ortum ducit à secunda  
 laryngis cartilagine, quæ chricoides à  
 me vocata est, ab illa præcipuè linea per-  
 currente per dorsum ipsius cartilaginis,  
 quæ cervicem spectat, inter musculos la-  
 ryngis secundo in pari contentos. At-  
 que inde descendens ambit totam gulã  
 à priori tunica formatam, ipsamque am-  
 plexatur, vsque ad os ventriculi dictum.  
 Tunica hæc fibras habet transuersas, ma-  
 iori ex parte: superficiem verò totam  
**exteriorem, veluti quodã velo rectis cõ-**  
 stante



stante opertam: sed pro vna tantum tunica ab alijs, & à me quoque tota hæc censetur, quamvis in duas diuidi possit. Si tu crudum oesophagum manu arripas, atque secare tentes, hæc videre integrè minimè poteris. Verùm si aliquantisper elixes (cùm elixatio illa nimiam partium humiditatem terminet, quæ certam fibrarum diuisionem impedit) & postea dissectionem tentes, omnia, quæ dixi, inesse luce meridiana clariora conspicias.

In vētriculum definit stomachus, vel oesophagus, vt optimè nō sti: locus autē est vndecima thoracis vertebra. Nam in homine ibi collocatur ventriculi os superius. In quo ventriculo, primū scias falsum esse illud dogma: Quod fundus ipsius carnosior ac crassior sit reliquis partibus. Quoniam illæ, quæ circa πύλορον, vel os superius, & circa dorsum sitæ sunt, carnosiores, crassioresque apparēt. Tunicarum ventriculi naturam præterea cognoscas, cū valdè ab ea distet, quæ ab anatomicis explicatur. Tribus tunicis constat, vna à peritonæo, & duabus proprijs interna, exterioriq;: quod omnes



omnes quoque affirmant. At postea ita exponunt, ut nihil expositio cum re ipsa conueniat. Quare dimissis ipsorum sententijs, uti res se habet, explicemus.

Interna ventriculi tunica tota nervosa est, & per ipsam ducuntur vasa, atque in ipsa etiam terminantur. Omne genus fibrarum habet rectum, obliquum, & transuersum: sed intextum, neque sine distractione apparens, veluti in reliquis nerveis membranis, ad hoc, ut optimè continere humida corpora, ne tanquam per colum efluant, utque etiam extendi ad omnes positiones possit. Verum in intima superficie quadam donatur, veluti crusta: quæ nervea non videtur, sed carnea potius: habetque meatus & veluti fibras non per rectum, vel obliquum, aut transuersum ductas, sed quasi à centro ad circumferentiam, veluti in panno illo sericino, vel bombicino patere potest, quæ velutū vocamus. Nā in hoc duo cognoscimus, primum scilicet tellam ipsam varijs filis rectis, transuersis, & obliquis optimè textam. Secundū autem, partem illam villosam, quæ filamenta habet, ac fibras à cetro ad superficiem

R

ficiem



ficiem ductas. Si igitur ex hoc panno fieret canalis, atque texta tella exterior esset superficies, huius procul dubio partis fibræ omnium generum essent, villosæ verò partis internæ, neque rectæ, neque obliquæ aut transversæ: sed à cetro ad circumferentiam ductæ viderentur. Ita quoque in hac, quam dixi crustam, meatus vel breuissimæ fibræ feruntur, à centro ad circumferentiam, vel ab intima superficie, quæ respicit cauitatem ad superficiem exteriorem, qua cōnascitur cū vena nervosa à me dicta. Talis cōpositio vel substantia gemina interioris tunicæ vetriculi manifestè apparet in brutis animalibus, vt in boue, & cane, atq; in hominibus etiam manifestissimè, si aliquātisper per elixationē ventriculū coquamus. Nā in crudo nimis difficilis est ista separatio, in semicocto autē, crusta hæc dicta tota optimè separari à nervea tunica potest, veluti si distinctū esset inuolucrū. Sciasq; hoc ita se habere, certamque hanc esse dictæ tunicæ compositionem. Quod si à me quæras, cur natura incrustarit internum ventriculum hac villosa tunica, quamuis hoc minimè à presenti



à præfenti instituto requiratur: (de vfu  
 enim partium non tracto) tamen vt ti-  
 bi fatisfaciam, refpondeo: quod ad eun-  
 dem vsum inftituta eft, cui & huic fim-  
 lis in tota lingua inferuit. Nam linguæ  
 fuperficies fimili crufta veftita eft, quæ  
 quafi villis conftat. Primò, vt afperior &  
 minus lubrica, qualis eft neruofa fuper-  
 ficies faciliùs arrepta cibaria, ac liquores  
 contineat, & per os ipfum obuoluat:  
 déinde, vt humores faciliùs imbibiti per  
 meatus dictæ cruftæ rectà ferantur ad  
 veram linguæ fuperficiem. Hęc enim  
 veluti fpongia eft, quæ foramina omnia  
 verfus fubftantiam linguæ conuerfa ha-  
 bet, quæue fucco guftabili turgens rectà  
 ftatim illum transmittit ad intimā ac le-  
 nem eiusdem linguæ fuperficiē. Postre-  
 mò inferuit crufta hæc, veluti fi ftupa  
 vel goffipium ob tutelam impofitum ef-  
 fet, ne in longa elocutione, aut perpetua  
 comefura, tādē callofa aut durior fiat  
 linguæ fuperficies, in qua fuma requi-  
 ritur mollitudo, fi ftatim faporis fensus  
 excitari debet, ob vitam hominis feruā-  
 dam, ne noxij fucci ipfe minimè confcio  
 in vétriculum ferantur. Ita quoq; & in

R 2 ven-



ventriculo adest, ne à plurimo ingesto  
 cibo, potuque, ac diutius inibi conten-  
 to callosior tandem & densior fieret ner-  
 uea illa tunica, atque ne inde capillamē-  
 ta venarum, quæ pro fugendo chylo ita  
 necessaria sunt, obcærentur. Nam du-  
 bium non est, quin dum chylus confici-  
 tur in ventriculo, sensim etiam à venis  
 eiusdem, quæ porta hepatis sunt, aliqua  
 ex parte sugatur: aliter citissimæ resecti-  
 ones, quæ vino odorato, iusculisque, at-  
 que eiusmodi alijs alimentis fiunt, mini-  
 mè constarent, si nihil sugerēt venæ ip-  
 sius ventriculi. Itaque si dictæ venæ su-  
 gunt, neque immediatè cibaria tangere  
 debent, ne temporis successu callosio-  
 res factæ obcæcentur, meritò tunica ista  
 spongiosa veluti, ac villosa apposita est,  
 quæ prior sua ratione chylum & humo-  
 rem suctum rectà subministret venis ip-  
 sis sugentibus. Tertiò etiam, dum hæc  
 tunica neruea ventriculo se ipsum cōtra-  
 hente cibum colligit, minimè requirit  
 lubricam superficiem, ne cibus facilè la-  
 bat, ideò crusta huiusmodi apposita est,  
 ad moderatā quandā retentionē. Ista autē  
 circa internā ventriculi tunicā fatis sint.

Exte-



Exterior eiusdem tunica tota carnosæ  
 est, pluribus fibris, iisque carneis con-  
 stans. Nam tota ab ore superiori ad pylo-  
 ron usque, vestitur transversis, ita inui-  
 cem contextis, ut ex illis solis tunica fa-  
 cta videatur: quæ fibræ statim detracta  
 tertia, quæ à peritonæo nascitur tunica:  
 apparêt & carnosæ, sub quib' aliud gen'  
 continetur, quæ obliquæ sunt, carnosæ  
 quoque ac satis crassæ, quæ ortæ à regio-  
 ne circa os elatius: atque ab illa dorsi ip-  
 sius ventriculi parte, quæ sinistra est, in-  
 de feruntur: aliquot quidem ex ipsis re-  
 ctæ versus pyloron per dorsum eiusdem  
 ventriculi dextrum: reliquæ verò, quæ  
 plures sunt, obliquè ad fundum versus  
 eundem pyloron descendunt. At hæ fi-  
 bræ, quæ obliquæ à me appellantur, non  
 multæ admodum sunt, sed paucæ, satis-  
 quæ plenæ ac carnosæ, neque cum trans-  
 versis permiscentur, sed sub illis iacent.  
 Preterea circa os superius ventriculi sub  
 origine dictarum obliquarum, aliæ car-  
 nosæ fibræ suboriuntur circulares penitus  
 atque eiusdem generis, cuius sunt ille, quæ  
 in oesophago transversæ appellantur.  
 Hæ dictum os ventriculi ambientes strin-  
 gunt,



gunt, clauduntque : transuersæ verò totum ventriculum pertransuersum stringentes, si moderatè illud faciunt, cibum amplexantur : sin autem validè stringant ipsum, exprimunt : ita etiam obliquæ mediocriter contractæ, per obliquum eundem cibum amplectuntur. Sin verò robustè agunt, per obliquū expellunt. Ista autem est vera exterioris tunicæ ventriculi constructio, verusque fibrarum vsus. Nam, vt tibi mentem meam atque animi sensum aperiam, scias, quod exceptis arterijs, quæ vitali potius, quàm voluntario se motu agitant, nulla alia particula mouet se ipsam, motu voluntario, quæ non habeat fibras carnosas, nisi sit motus cōuulsionis, aut palpitationis, vel alterius generis, quod præter naturam sit. Nam in particula, quæ se ipsam mouet, quatuor hæc obseruamus. Primum nempe motum, quo mouet se ipsam : secundum, facultatem intimam, qua illud agit. Tertium, cū facultas hæc non insita sit partibus se ipsas mouentibus, sed à cerebro tanquā fonte defluat, à nobis obseruandus est iste facultatis defluxus. Quartū est apta,  
ac



propensa partis natura, ad hanc concipiendam facultatem, qua seipsam mouere possit. Hæc quatuor sunt obseruanda, vt dixi, in omni particula se ipsam mouente, quæ haud consistere possunt, nisi particula ipsa fibris prædita sit, atque illis penitus carnis. Nam, vt à motu incipiam, in hoc requiritur fibrosa natura ipsius corporis moti: quoniam quicquid mouet seipsum (vt experientia docet) motu contractionis, aut extensionis illud facit. Exemplo, adsint musculi, qui aut seipsos contrahunt, aut extendunt. Cùm autem in vnaquaque particula motus hic certus sit, & determinatus ad aliquam positionem, ideò necessarium fuit, vt tota substantia subiecti corporis disposita esset, & directa ad talem positionem, ne cùm corpus contrahitur, aut extenditur, incerto motu agitetur. Talis autem dispositio substantiæ nihil aliud est, mea sententia, quàm coordinatio minimarum particularum ad ipsam positionem dictā. Cū aut minima alicuius corporis ad aliquam positionē coordinentur, duo necessariò consequuntur: alterū, q̃ dētur meatus ordi-

R 4 nati



nati ad illam positionem, alterum verò, quòd fibras habeat illud corpus. Nam fibræ nil aliud sunt, quàm minima illius substantiæ aliqua serie, & ordine compacta. Si igitur moueri debet corpus per contractionem, aut dilationem ad aliquam certam positionem, pariter necessarium est, vt ad eandem positionem fibrosum sit. Rursus si obseruemus facultatem, mihi videtur requiri, quod sit per vniuersum corpus mouendum distributa: & ita contineatur in proprio subiecto. Proprium autem voluntariæ facultatis motricis subiectum, dicitur spiritus: spiritus autem hic, dum latitat in ipso corpore mobili, necessariò requirit meatus, in quibus sedeat. At quemadmodum corpus requirebatur suis minimis particulis dispositum ad motum certæ positionis: ità etiam necessariò requiritur, vt spiritus, in quibus concepta est facultas, contenti & dispositi sint ad eandem positionem motus. Quoniam si inordinate locati essent, inordinate etiam & indispositè ipsa facultas vndeque agigaret corpus, ipsumque indispositè agitatam inordinate seipsum moueret.



moueret. Ne igitur hoc fiat, spiritus hi  
ordinatam locationem requirunt. Hoc  
ita constituto patet, pro ipsis spiritibus  
ordinatos requiri meatus, at ordinati  
meatus in aliquo corpore necessariò ef-  
ficiunt fibras. Fibrosum ergo ratione  
ipsius facultatis mouentis requiritur,  
quod sit illud corpus, quod seipsum mo-  
uere debet. Tertiò, ratione transmissio-  
nis. Nam excepto ipso corde nullum ali-  
ud corpus se mouet, per insitam faculta-  
tem, sed aliundè recipit. Cùm autem fa-  
cultas ista aliundè fluat, & per totum  
corpus mouèdum, statim & copiosa flu-  
at, necessarium est, vt meatus adsint di-  
sposti, qui per dictum corpus percur-  
rant, quiue spiritus contineant, vt po-  
steà in illis spiritibus ita còordinatis fa-  
cultas spiritualis, veluti illuminatio quæ-  
dam & irradiatio à parte post partem,  
momentaneo quasi in instanti fiat, &  
fluere videatur. Nam si ad vnicam tan-  
tùm corporis partem perueniret, & non  
ad totum per huiuscemodi meatus: tunc  
pars illa dicta seipsam moueret tantùm:  
reliquum verò corpus moueatur tātùm,  
non autem seipsum moueret. Quamob-

R 5 rem



rem ego colligam ob hoc, vt facultas ad vniuersas corporis mouendi partes statim defluere possit, necessariò requiri, quòd illud quàm maximè fibrosum sit. Quartum, quod dicebam esse obseruandũ, cuiusq; causa requirebatur fibrosa substantia, atque eadem carnea ad hunc motum: est necessaria propensio atque apta natura corporis subiecti ad hanc concipiendã facultatem, quæ quidem propensio à carne dependet. Quoniam ego video, corpora quædam fibrosa, & quæ habent adiunctos neruulos, à quibus facultatem habent communicatam, & tamen se ipsa nõ mouent. Alia autem se ipsa mouet, cū tamen negari minimè possit, priora illa habere transmissam facultatē. Nam cū eadē vis transfluxa per neruos faciat, & ad sensum tactus & ad motum, neque ipsa facultas variet specie, quamuis effectus specie differentes edat, sequetur, quod cū dicta corpora vim sentiendi habeant, habeāt quoque motus facultatem, & tamen non mouentur, quod exemplis plurimis patere potest. Et primū panniculi carnosī, cuius aliquot partes mouentur, & sentiunt:



sentiunt: aliquot verò sentiunt tantùm,  
 & nō mouentur: & tamen omnes fibro-  
 sæ sunt, omnesque transmissam habent  
 per neruos facultatem. Mouentur enim  
 partes, quæ in occipitio in fronte, atque  
 etiam in collo ipso anteriori sunt, & in  
 brutis animalibus plurimæ, quæ circa  
 dorsum. Reliquæ verò his dictis con-  
 iunctæ, vel alibi per corium dispersæ  
 vlla ratione mouentur. Sed hoc mani-  
 festiùs apparet, in ipsis musculis, quo-  
 rum cùm geminæ sint partes, altera qui-  
 dem, quæ musculi corpus carnosum cō-  
 tinet, altera verò chordam: ex his dua-  
 bus corpus tantùm musculi se ipsum mo-  
 uet, & contrahit: chorda verò tantū tra-  
 hitur, neque se ipsam mouet, vti in viuis  
 corporibus manifestè cognoscere pos-  
 sumus. At in chordam iidem sunt nerui  
 commixti cum ligamento, qui & in cor-  
 pore musculi reperiuntur: ipsa pariter  
 fibrosa est, & habet meatus dispositos,  
 atque per illos facultas æquè transfun-  
 ditur, hocque indè patet, quod sensu p-  
 dita sit. Cur igitur, si hæc omnia adsunt,  
 se ipsam non mouet, vt musculi corpus:  
 sed potiùs ad illius motum contra-  
 ctæ



Et mouetur? Profectò nil aliud respon-  
 dere possum, nisi illud Aristotelicum de  
 visu senum. Nam illi ineptè vident, quia  
 ineptum possident organum. Quod si  
 senex oculum adolescentis haberet, vti  
 adolescens inspicere potest, cùm seni fa-  
 cultas ipsa minimè desit, organum au-  
 tem sit ineptum. Idem pariter genus  
 causæ adscribam huic rei, dicamque sub-  
 iecta hæc corpora, quæ seipsa mouent, a-  
 pta esse ac propensa ad concipiendam ta-  
 lem facultatem, qua hoc modo agant. Il-  
 la autem, quæ nequicquam seipsa mo-  
 uent, ineptiora esse instrumenta istius  
 actus. Si quis autem quærat, vnde proue-  
 niat hæc propensio: obseruemus, quæso,  
 differentiam dictarum particularum, vt  
 indè eliciamus causam hanc. Corpus mu-  
 sculi præter fibras neruosas, atque (vt  
 dicam) ligamentares, carneam quoque  
 substantiam infartam his fibris habet,  
 quæ in chorda desideratur: similiter &  
 pāniculus carnosus aliquot in partibus  
 carnem admixtam habet, in quibus agi-  
 tat se ipsum, in quàm plurimis autem ab-  
 solutè nerueus est, atque motu orba-  
 tus. Cùm igitur hoc videam, colligo ego  
 carnem



carnem ipsam fibris nerueis commixtā  
 illud esse, quod subiectum organum  
 aptum ad concipiendam hanc faculta-  
 tem motricem reddat. Hac potissimū  
 ratione: quoniam facultas ea, quæ facit  
 sensum, intensior & magis vrgens requi-  
 ritur ad motum. Vigor autem faculta-  
 ti addi potest à caliditate ipsius partis,  
 cui subministratur: at corpus fibrosum,  
 quod carne infartum est, calidius procul  
 dubio est, quàm illud idem carne desti-  
 tutum: ergo sequetur, in corpore muscu-  
 li, atque in panniculi partibus muscu-  
 losis carnem esse, quæ corpora hæc apta  
 ad hanc facultatem concipiendam red-  
 dat. Non ineptè igitur assereram, nullā  
 partem motu voluntario se ipsam posse  
 mouere, nisi primū fibrosa sit, deinde  
 etiam carnea. Hoc idem pluribus exem-  
 plis confirmare possem: sed hoc vnum  
 mihi satisfacit: omnes scilicet membra-  
 nas, quæ se ipsas mouent, factas esse car-  
 neas: & vt ventriculum ac intestina di-  
 mittam, in quibus aliquis posset asserere  
 membraneas illas tunicas carneas esse fa-  
 ctas, non ob motum, sed ob alimenti cō-  
 coctionem. Venio ad oesophagum, in  
 quo



quo tota exterior tunica crassa & carnea facta est, & intimæ quoque interna superficies carnea, fibrosa; est, cur non tota neruea? cur ita carnea? nullus erit, mea sententia, stolidus, qui aliam afferat causam præter motum. Sed quid dicam de vesica urinaria? ut de utero & ipsius ceruice taceam, Nonne in hac videmus, tunicam anteriorem carneam manifestè? nonne in ipsa, cum aliquando intromissa est fistula argentea, ut suppressum lotium educatur, manifestum persentimus motum, quo seipsam constringit, & veluti, si quædam manus esset, ipsam fistulam arripit? Nonne poterat Natura, veluti intimam tunicam ex puro neruo texuit, anteriorem quoque formare? proculdubio mea sententia potuit: Cur igitur illud non fecit? dicēs ne mi Petre, ut carne lotium foueret: hoc equidem non est dicendum, sed potius ut motu uoluntario, aut saltem mixto seipsam moueri possit vesica hæc, ratione istius carnosæ tunicæ. His exemplis adhuc magis confirmatus, veram hanc esse sententiam assero. Nullam particulam in animali seipsam mouere, nisi fibrosa sit, ac carnē ad mixtam



mixtam habeat : & per carnem non intelligo substantiam sui generis, (quia in neruis etiam caro hæc adest) sed veram carnem intelligo, communem scilicet illam substantiam, quæ in musculis tomenti modo fibræ nerueis impacta sensu ipso à neruea materia distingui non potest, quæque in vulneribus ac vlceribus expurgatis pura concrescens, sensui etiã patet. Deq; hac in disputatione partium similarium diffusè tractaui. Hinc manifestè apparet, qua de causa ossa, cartilagine, hepar, liẽ, cerebrum, atq; similes particulæ seipsas non moueant: quia fibrosæ non sunt. Patet etiam, cur membræ cerebri, & succingens costas, & peritonæum, & nerui ipsi, chordæ, ac ligamenta, nec nõ & commune corporis inuolucrum, panniculus carnosus, vbi nerueus est, cùm fibrosæ sint corpora, seipsa tamen non moueant: quia fibræ illorum minimè sunt carnosæ, id est, non sapiunt naturam fibræ musculosæ, quæ musculosa fibra proprium (vt opinor) organum est motus voluntarij. Hoc ita posito colligere poteris, internam ventriculi tunicam (de neruea loquor) quamuis

textu



texta sit ex omni genere fibrarum, quia  
 tamen carnem non habet, nulla ratione  
 se ipsam mouere. Idem dicas de Venis: i-  
 dem de neruosa tunica intestinorum:  
 idem de tunica vesicæ orinariæ intima:  
 quæ quamuis fibrosæ sint: tamen quia  
 carne carent, ideò mouere se ipsas non  
 possunt. Quare iam patebit, non esse ma-  
 nifestum, aut certum vsum illum ab a-  
 natomicis ascriptum fibris rectis vena-  
 rum, & transuersis, & obliquis quoque,  
 vt priores attrahant, & alteræ expellant,  
 postremæque retineant. Qua enim arte  
 id facient, si se ipsas mouere nequeunt?  
 ergo, venæ priuantur tribus istis faculta-  
 tibus? nequaquam, imò venæ attrahunt,  
 retinent, & expellunt, sed æquiucè (vt  
 dicam) non vniucè: vniucè enim at-  
 trahit interna superficies oesophagi, &  
 vniucè expellit externa tunica eiusdē,  
 & externa tunica ventriculi: vniucè  
 quoque retinet πύλωσ, aut ceruix vesi-  
 cæ: & vteri, & σφιγκτηρ. At venæ vti ossa  
 quoque, & reliquæ animalis particulæ  
 tria hæc efficiunt, sed æquiucè non se  
 ipsas mouendo, sed quiescentes similitu-  
 dinis aut dissimilitudinis ratione, veluti  
 ma-



magnes attrahit, vel retinet, vel expellit quoque ferrum, sine aliquo motu ipsius magnetis locali: de qua re (vt superius etiam memini) tam manifestè & clarè loquit Diuinus Auerroes in 7. physico comm. tex. 16 in aurea quadam digressionē, quam si quis legerit, hac mea explicatione minimè egebit. Extergas igitur ex oculis caligantem hanc anatomicam, Manna mihi, tibi que certò constituas nullam fieri attractionem, aut retentionem ab interna tunica vetriculi, neque ab interna intestinorum, quia totæ nervosæ sunt, carneque destitutæ: idem de venis asseras, atque de omnibus alijs membranis nerveis, addasque in ventriculo adesse tantum motum expressionis, cum exterior tunica seipsam per transversum vel obliquum, aut rectum contrahit: quia carnosa, & fibras, quales requiruntur, habet: ventriculum autem tunc continere dicas, cum pylorus se ipsum constringit: atque tunica exterior ipsum leniter amplexata, supra cibum quiescit.

Expurges quoque animum tuum ab hæretico illo dogmate anatomico, quod fibræ obliquæ faciant ad retentionem

S (loquor



(loquor iam de carnosis, quæ seipsas cō-  
trahunt) & quod transfuersæ ad expul-  
sionem, quoniam mea sententia, omnes  
expellunt, & in transfuersis quidem con-  
cordes sumus, in obliquis idem probo.  
Nam ego quæro ab anatomicis, an reti-  
neant dum agunt, vel dum quiescunt: (a-  
ctum voco motum contractionis, vel di-  
latationis: quietem verò relaxationem  
illam, dum non mouentur) Si responde-  
būt ex anatomicis ij, qui crassiores sunt,  
fortasse dicent, fibras has retinere, dum  
quiescunt: cui responso sequetur, quod  
dum quiescunt agant, maximum quip-  
pe absurdum, aut respondebunt: quòd  
retineant æquiucè, ratione similitudi-  
nis, non autem, quia fibrosæ sint sub-  
stantiæ ad motum destinatæ: quam re-  
sponzionem posteriorem ego cōcedam.  
Quod si respondeant prudentiores, for-  
tasse dicent: fibras has retinere, dum agūt  
ac contrahuntur: At tu dicas: dum fibræ  
oblique contrahuntur, dubium non est,  
quod illud idem per obliquum faciunt:  
quod per transfuersum agunt, transfuersæ  
dum contrahuntur. Istæ verò duo hæc  
faciunt, Primò coangustant cauum per  
trans-



transuersum, & secundò, per transuersum expellunt: ergo, & obliquæ per obliquū coangustant spatium, & per obliquum expellunt: ergo, velint nolint non retinent. Quod si iterum respondeant, quādo istæ fibræ retinent, dum non validè contrahuntur, sed moderatè admodum ita vt vix amplexentur cibum, & ita retineant; aduersum hos dicas, quod idē faciunt transuersæ, cū moderatè agunt, quoniam & ipsæ vix amplexatæ cibum, illud quodāmodò retinent. Quod in ipsis manib⁹ etiā apparet, quando lutum digitis, aut aliud corpus molle corripimus. Quoniam si illi moderatè contrahuntur, retinent: sin verò validè agunt, exprimunt ac expellunt. Quare colligamus, in ventriculo retentionis munus nō esse obliquarum fibrarum, sed pilori ipsius, qui stringitur, exitumque impedit, atq; ad hoc opus prætereà concurrunt fibræ tam transuersæ, quàm obliquæ, sed (vt dicunt) quasi negatiuè, quia supra cibum quiescant, non autem exprimant. De hac autem re diffusius in disputatione partiū similarium tractaui.

In omento nil habeo, quod referam,

S 2 nisi



nisi ignorationem eam attester, qua in hac parte ita mentis oculi caligine crassa mihi obducti sunt, vt videre nequeant, ad quem vsum Natura omētum formārit. Loquor de parte illa, quæ liberè uaga est, non autem de illa, quæ colo intestino pro mesenterio inseruit. Scio equidem, quid dicant alij, & non acquiesco. Quare tu, qui plurimū in naturali ipsa speculatione potens es, si quid inuenieris, quod validis rationibus firmare possis, mihi communices, quæso.

Ad intestina ex ventriculo descendo, diuisionemq; in crassa & gracilia, atque vsum & collocationem ipsorum probō: nihilque historiæ, quam scripsit diuinus Vesalius addi posse, existimo. At compositioni aliquid addam. In crasso intestino concamerata illa inuolucra, & cavitates additas esse nōsti, vt diutiū feces detineantur, neue subinde facile egredi possint, quod fit in multis animalibus, præcipuè auibus quibusdam, quorum intestinum fornices has minimè habet. Gracile verò intestinum cauernas huiusmodi minimè requirebat: quoniā si adessent in ipso feces, facile retinerētur, ac  
retentæ



retentæ chyli distributionem impedire possent. Ideò leui superficie erat formandum intestinum hoc, ita tamen leui, vt lubrica penitus non esset: cum chylo, svt absorberi à uenis commodè possit, necessariò moderatam quandam in gracili hoc intestino moram trahat, aliter quidem ad crassum intestinum, & ad feces ipsas statim flueret. Mora hæc uoluntaria minimè dici potest, sed coacta & violenta, ob internam intestini gracilis humani tunicā, quæ ita formata est (hocque notato ab alijs prætermisum) vt moderatè ipsum chylum retineat. Nam plurimas rugas transuersas habet, quæ ad moderatam retentionem faciunt, neque violenter chylum cohibent. Rugæ autem istæ adsunt, quia longior multò est tunica hæc interna, quàm exterior sit: & ideò crispatur, rugatur, uti apparet etiam in virili pudendo, in quo cutis exterior: quia interna neruea substantia longior est. Nam desidente ipso, semper rugas contrahit. Ita quoque & hæc tunica cum valdè exteriori longior sit, rugas dictas contrahit & crispat, quæ quidem rugæ veluti in penis cute stabiles

S 3 minimè



minimè sunt, neque huic vel illi parti  
 adnexæ, sed mobiles facilè ex hac sede  
 in illam propelli possunt, quod ad mo-  
 derationem & minimè violentam chyli  
 retentionem facit. Rugæ istæ non so-  
 lùm euerso intestino apparent, sed eti-  
 am non euerso digitis ipsiis percipiuntur,  
 dum in exterioribus intestinum ipsum  
 comprimimus. Si quoque intestinũ fla-  
 tu turgidum luci exponatur, apparent  
 transuersæ illæ duplicationes, quæ ru-  
 gas faciunt, quas ego aliquando decep-  
 tus esse venarum ductus latentes opina-  
 bar. Ita autem frequentes aliquot in lo-  
 cis rugæ istæ sunt, vt si interna tunica ab  
 exteriori excorietur illis expansis fini-  
 bus non duplo modo, sed triplo etiam  
 exterioris dictæ longitudinem excedat:  
 Hoc primò in interna gracilium intesti-  
 norum tunica obseruabis, quod in cra-  
 ssis non ita apparet, cùm rugæ in ca-  
 uernas & recessus illos sint expansæ.  
 Aliud etiam in hac eadem tunica inter-  
 na obseruabis, quod cùm neruosa peni-  
 tès sit, & omni fibrarum genere constas,  
 non autè transuerso tantùm (vt opinati  
 sunt anatomici) cumque capillamenta

vena



venarum extrema in se contineat, habet quoque crustam illam, vel tunicam internam, parti villosæ veluti sericini assimilata, quam etiam internum ventriculi inuolucrum adactam possidet. Hęc crusta, vt opinor, eosdem vsus habet, quos & in vētriculo (vt dictum est) prestat, atque in dysenterijs illa est superficies intestinorum, quæ excoriata aliquādo egreditur: Si rem diligenter inspexeris, videbis intestinorum gracilium tunicam internam parū, aut nihil differre ab eadem interna ventriculi. Externa autem intestinorum tunica crassior est, quā interior (quāquā contrariū asserat Vesalius) estque carnosā. Huic fibræ maiori ex parte transversæ sunt ob motū expressionis, verū in exteriori superficie habet, veluti quoddam velum integrum ex fibris rectis textum, quæ ita iunctæ sunt, vt in oesophagi superficie, vt integram quasi tunicam efforment, neque ratæ sunt istæ rectæ fibræ (vt asserunt anatomici) sed crebræ, velumque spissum efficiūt, tenuissimum tamen: atque ego ob dictam tenuitatem non distinguo partem hāc à subiecta, sed vtrū-

S 4 que



que pro vna tunica exteriori recensco,  
cui postea obuoluitur nervosa à perito-  
næo membrana, vti omnibus notū est.

In mesenterij historia multa docent  
reliq anatomici, partim à Galeno, & par-  
tim à Vesalio assumentes. Verū (quod  
miror) principium vel primam originē  
ipsius non explicant. Tu igitur scias,  
quod mesenterij duplex est origo: vna  
quidem superior, altera verò inferior.  
Suprema est circa primam lumborum  
vertebram: infima autem est circa terti-  
am eorundem lumborum. At occasio  
superioris principij oritur à geminis ar-  
terijs, quæ erumpunt ab aorta supra re-  
gionem emulgentium, atque ab ea qui-  
dem aortæ parte, quæ, vtdixi, primæ  
lumborum vertebræ hæret. Circa has i-  
gitur arterias statim fit quidam neruo-  
rum plexus maximus ac robustissimus, i-  
ta: vt originem ipsarum valdè occultet,  
qui nervi varijs ex partibus ibi simul  
complicantur, atque à plexu ipso infini-  
ta neruorum maiorum ac minimorum  
propago, arteriarum ductum ad omnia  
vsque viscera concomitatur. Ab hoc eo-  
dem principio membrana eiusdem sub-  
stantiæ



stantiæ cum peritonæo suboriens, vasa  
 hæc vestire incipit, ibique principium  
 mesenterij superius est constituendum.  
 Plexus autem iste originem ducit à tri-  
 plici neruorum genere. Primum quidē  
 ab illis geminis neruorum ductibus, qui  
 oriūtur à sexto pari, vel à plexu eiusdem  
 sexti paris in ceruice, & secundum costa-  
 rū principia sub membrana succingen-  
 te per vniuersum thoracem, descenden-  
 tes cum singulis exortibus neruorum  
 à vertebriis thoracis erumpentium con-  
 nectuntur, ac indè incrementum aliquod  
 mutuati singuli in vtroque latere sub  
 septo transuerso, & sub musculis, qui  
 sexto in loco femur mouent, vocantur-  
 que τῶα à Græcis, per lumbos, vnde & a  
 liquid incrementi à neruis, qui inde sca-  
 tent, accipiunt, ad hanc dictam regio-  
 nem perueniunt, vbi vtrinque concur-  
 rentes simulque connati plexum hunc  
 circa arterias exordiuntur. Secundum  
 verò genus neruorum ab illis est, qui  
 à ceruice exorti, atque cordis inuolucro  
 adhærentes descēdunt ad septum, tran-  
 suersum, ac per ipsum disseminatur. Ab  
 his igitur simplex neruus aliquando  
 S 5 oritur



oritur, aliquando verò gemini, qui descendentes ad hunc plexum ita validum in ipsum inferuntur, distribuuntur. Tertium præterea genus est, ab ore ventriculi superiore, quâ dorsum respicit: nã duo ibi nascuntur nervi, vnus ab vno, alter ab altero ex ijs geminis, qui à sexto pari ad ventriculum veniunt, qui duo nervi circa dorsum sub ventriculi parte posteriori vniti, in vnam propaginem ad eundem plexum deueniunt, simulq; miscentur. Neque ego vnquam potui ita hos geminos nervos secando prosequi, vt illos viderim aliquot propaginibus in renes, aut in vterum inferi, quod anatomicis quibusdã placet. Ex hoc igitur triplici nervorum genere conflatus plexus primam originem mesenterio præbet. Nam ex hac pendet maior ipsius pars robustissimè suspensa.

Inferioris verò principij occasio oritur ab arteria vnica, circa finem tertiæ vertebræ lumborum, ab aorta erumpente. Hæc enim nouo alio nervo plexu statim circûndatur, qui varijs nervis illam comitatur per totum rectum intestinum vsque ad sedem & per partem  
colli



colli. Plexus autem hic originem ducit à  
superiori dicto. Quoniam indè in vtro-  
que latere prò nago vnica neruorum, ac  
satis crassa descendit, quæ à paribus ner-  
uorum, quæ è lumbis scatent, adaucta &  
ex aduerso concurrens plexum hunc mi-  
norem parit, indeque gemina membra-  
na substantiæ eiusdem cum peritonæo  
exorta, totam hanc mesenterij partem in-  
feriorem vestit. Talem itaq; obseruabis  
vtriusq; mesenterij originē, in quo col-  
locatæ sunt glandulæ plures, quibus vsū  
hunc adscripsere anatomici, vt sint velu-  
ti ligamenta vasorum, ne disrumpantur,  
aut lacerentur in magnis, ac violētis mo-  
tibus, qui vsus nullus mihi videtur. Ra-  
tiones autem in alio opere audies, tan-  
tumq; in præsentia verò tibi hic, ppona-  
tur vsus, vt impediunt, ne vasorum du-  
ctus comprimantur, vel à repletis inte-  
stinis, vel à prono decumbente animali,  
vel compresso abdomine aliquo alio  
modo. Nam si ipsi comprimerentur, chyli  
distributio commoda minimè fieri pos-  
set. Aliud etiam non minùs incertum  
addunt anatomici, glandulam  
dictam ob fulcimentum ventriculi fa-  
ctam



Etiam esse asserētes. Quod si verum esset, inutile penitūs reperiretur hoc corpus in brutis, quæ prona incedunt. Quoniam πένκτας in istis supra ventriculum iacet, non sub ventriculo: verus autem ipsius vsus est, vt insculptum canalem habeat, per quem vena illa insignis, quæ à portis iecinoris, ad lienem tendit, tutò feratur. Illi namque veluti puluinus insternitur, atque ab omnibus comprimētibz defendit. Sed hæc nihil ad institutum.

Anatomicum dogma est, atque ab omnibus receptum, quod πόροι κοιλίδοχοι, qui per iecur disseminantur, omnes collecti in vnum meatum, rectà ferantur in ceruicem vesicæ felleæ vocatæ. Quod dogma minimè concors est cum natura rei. Nam si quis studium adhibere voluerit, certò cognoscet, πόρος istos per rectum meatum ferri in intestinū duodenum, rectoq; tramite, ac continuo in illud bilem flauam ad vsus oportunos exonerare. Sed quoniam semper commodum non est, dum chylus copiosus & recens reperitur in intestino gracili, vt subinde ex ipso intestino à bile proritato, ac



to, ac seipsum contrahente exprimatur, quia non fieret suetus, aut distributio eiusdem chyli ad hepar oportuna: Ideò Natura magistra omnium pulcherrimarum inuentionum, insertionē istius meatus, per quem fertur bilis in intestinum, artificiosè ita construxit, vt dum extenditur ipsum intestinum, atque tunica tunicæ constringitur, non possit hoc excrementum in cauitatem duodeni exonerari. Hoc autem fit, dum intestinum plenum chylo in opere distributionis, quasi turgēt, atque eo oblectatur. Ne autem excrementum in hepar regurgitaret, diuerticulum fecit Natura, in quo colligetur, vesicam scilicet bilis, quā huic meatui medio in ductu ceruice implantauit, vt in illam ad tempus regurgitans bilis recedere, ac colligi possit. Vnde postea aperto meatu duodeni refluens in intestini cauum se exonerat. Egreditur autē bilis tunc temporis ex vesica, quia vas hoc ita est hepatis affixum, vt ab illo semper leuiter comprimatur in rectis animantibus: in brutis verò comprimitur à ventriculo, quia ex leui compressione fit, vt aperto ductu bilis facilimè viam inueniat in



at in intestinum. Si hoc obseruabis, verū manifestumq; esse illud, quod dixi, inuenies, ac simul agnosces, vanū esse illud anatomicorum inuentum in facultate triplici huius vesicæ, quā attrahat, & retineat propter oblectationem quandam ipsum fel, tandemq; idem expellat, cū neq; ipsa vesica attrahat, neq; retineat, neq; expellat p se, sed oīa efficit ea ratione, q̄ dixi: & si qd attrahat, illud est alimentum, quod per venas ad illam, vt alatur & conseruetur, fluit. In hac autem re decepti sunt nostri anatomici, à situ ipsius vesicæ. Quoniam cū viderint fundum inferiora respicere, & quæ ad ceruicem pertinent, ad portas hepatis ascendere, ideò opinati sunt meatus rectā in vesicam ab hepate ferri. Verū si obseruauerint, quod ceruix propè portas quasi duplicata reflectitur, atq; ipsius pars altera, quæ cū meatu coniuncta est, quod non sursūm ad portas, sed deorsum ad duodenum respicit, simulq; diligenter inspexerint ductum, ac insertionem ipsius in meatum, non dubito, quin *παλινοδία* mutata sentētia canant, ac verum vesicæ vsum recognoscant, In  
cuius



cuius historia quædam tecum disputa-  
rem libenter de concertione lapidis co-  
piofissimi, atque maximè, quem ego  
sæpè & sæpiùs cùm in ipsa, tùm in mea-  
tu ab hepate ad intestinum lato reperi:  
sed locus hîc minimè istud concedit.  
Quare ad historiam. In qua vltimò ad-  
dendum cêseo, quod bis aut ter ad sum-  
mum obseruauî meatû hunc, quo exo-  
neratur bilis, cùm prope duodenum est,  
diuidi in geminum canalem, & vtrun-  
que paruo interiecto spatio in idem in-  
testinum inferi, seruata in vtroque arti-  
ficiofa illâ insertione. Nunquam autem  
vidi meatum aliquem ad ventriculum  
deferri, quamuis illud minimè fieri posse  
negârim, aduersus testimonium grauiissi-  
mum antiquorum, atque diuini Vesalij,  
qui hoc uidit, hominemque in quo vide-  
rit, attestatus est.

In lienis historia nihil est traditum ab  
eodem, quod penitùs mihi non satis fa-  
ciat, nihilque habeo, quod à me sit ad-  
dendum: nisi, quod hîc Patauij publicè  
cadauer secuerim, in quo triplicem lie-  
nem reperi, vnum iustæ magnitudinis,  
alterum dimidio minorem, tertiû verò  
magni-



magnitudinis oui columbini, atque vnusquisque suas venas & arterias & nervos possidebat, sedesque omnium sinisterum hypochondrium, eadem omnium substantia, & eadem tunica & ad summum eadem erant omnia.

In renibus hoc obseruavi, quod ab aliorum placitis differt, meatus rectos in substantia ipsorum esse, atque per omnem renum carnem à circumferentia ad sinum medium ferri, qui sub oculis omnium patent. Hoc constituto necessario etiam sequitur, in illis dari corpus fibrosum, cum omne corpus quæ frequentissimos meatus habet, atque longos, & ordinatos, necessario fibris constet. Quæ sententia reliquis anatomicis minimè placet. At quænam sint fibræ istæ nervosæ necne, an carnosæ, vel vtriusque generis potius, tibi discutiendum relinquo. Obseruavi quoque, atque publicè hîc Patauij auditoribus meis indicaui, geminos meatus vrinarios, ac geminos sinus medios, in vnoquoque rene in quodam corpore humano, in quo multa alia à stata naturæ consuetudine recedentia notavi, In hoc eodem cadauere  
geminas



geminas insignes emulgentes venas, & geminas arterias ad vnumquemque renem ferri vidi. Locus autem in omnibus ferè cadaueribus, quæ ego secui, vnde oriantur venæ & arteriæ emulgentes, est, vbi secunda & prima lumborum vertebraligamēto medio inter se copulantur. In renum substantiam, ac corpus disseminari venas, & arterias vsque ad extremum, atque vnà cum arterijs nervulos per totam substantiam ferri, non autem in exteriorē tunicam vnum tantum neruū definere, oculis cuiuscunque patere potest. Nam in hominis renibus non reperio ego, sinum illum perforatum & exteriorē à Vesalio proditū, per quem ferantur venæ, ac arteriæ: sed video manifesta ipsa vasa, per totam horum viscerū carnem diducta, & in arterijs ac venis hoc observavi, quod in renibus ita attenuatur ipsarum substantia, veluti in illis vasis fit, quæ per cerebrum feruntur. Hæc tenuitas fortasse cū sit aptissima ad lacerationem, efficiatq; ne vasa tam facilè sensum feriant, fuit in causa, vt hoc ab anatomicis minimè sit animaduersum. Sinum etiam illum se-

T cundum



cundum, & interiorē ab eodem Ves-  
 falio, traditum non reperio, sed alium  
 huius loco positum. Nam inter venas &  
 arterias, quæ in duas partes diuisæ disle-  
 minantur, aliæ per substantiam renis  
 posteriorem, aliæ per anteriorem pro-  
 pe renis portas ( portas appello finam  
 illam partem, per quam ingrediuntur  
 vasa, & egrediuntur meatus vrinarij) vel  
 parum intra substantiam ipsius, sinus  
 quidam est factus ex neruea membrana,  
 qui plures possidet ductus vel fistulas:  
 veluti si digitos perforatos haberet, in  
 quibus fistulis extremis singulis opercu-  
 lum est carneum, veluti verruca quæ-  
 dam, acutum, quod aliquantisper in fi-  
 stulam ingreditur, illamque obturat, &  
 lotij stillicidium constituit. Nam oper-  
 culum hoc ex substantia renis constat,  
 quæ ad illud foramen, vel fistulam per-  
 tingat, vt in cavitatem lotium percolet.  
 Et aliquando in vnoquoque renis sinu re-  
 periuntur octo, vel decem foramina,  
 aut fistulæ dictæ: quibus huiusmodi ca-  
 runculæ aptantur, quæ ipsas operculi in-  
 grediētis modo obstruunt. A venis igitur,  
 ac arterijs transfunditur omnis san-  
 guis



guis aquosus ad renes, huic similitudi-  
 ne substantiæ consequitur serum, San-  
 guis postea retinetur pro nutritione, qui  
 quia parum ob tenuitatem alit, multus  
 subindè attrahitur, atque ideò mul-  
 tum feri continuò subsequitur, quod  
 retento sanguine tanquam noxium per  
 carunculas dictas expellitur, & instilla-  
 tur in sinum: ibique collectum in latio-  
 re sinus parte fluit ad meatum, qui ori-  
 tur ab eodem sinu & vrinarius vocatur,  
 deorsumque latus definit utroque in  
 latere in vesicam. Vera hæc est renis hu-  
 mani constructio, non autem canini, aut  
 caprini. Nam in capris, aut canibus ista  
 minimè sunt explicanda: quod utinam  
 animaduertisset Preceptor meus Ve-  
 salius. Quoniam neque in larynge, ne-  
 que in lingua, neque in oculo ita facilè  
 lapsus esset, deceptus potius à bouinis  
 vel aliorum animalium partibus, quas  
 humanarum loco aliquando secuit, ac  
 declinavit: quàm aut negligentia, aut in-  
 genij crassitie, cum in minutissimis, qui-  
 busdam rebus ipsum oculatissimum,  
 maximeque diligentè, ac perspicacissi-  
 mum fuisse videamus. Nimis enim in re-



num hominis anatome pinguedinem, non ita tamen timendam, timuit, atque inde manauit describendi renis brutorū occasio. Si autē velis, mī Petre, sinus dicti certam assequi cognitionem, aduer- tas, ne sectionem moliaris in dorso, ac giba renum parte, sed imposito specillo in meatum vrinarium secando vsque ad sinum illum gladiolo ascendas, simulq; ipsum in sima parte diuidas per longum, à superioribus ad inferiora. Quoniam hac ratione, apertis renibus, videbis totū sinū, & meatus, ac foramina illa extrema, simulq; & carunculas, vel stillicidia hæc obturantia. Sed de istis satis.

Ad vesicam iam venio, in qua non æ- què diligentes fuere anatomici, ac in multis alijs partibus. Quoniam non obseruârunt substantiā ipsius, quæ partim neruosa, partimq; carnosa cū sit: ipsam tamen totam nerueam esse asserunt. Scias igitur vesicam tres habere tunicas, vti ventriculus & intestina habent. Vnam à peritoneo communē, & duas proprias. Alteram quidem, quæ tenuis admodum est, nerueam, lucidam, & candidissimā, omniq; fibrarū genere neruoso den-



densissimè textam, à Natura institutam  
 ad cōtinēdum lotium, ne extrà excolet.  
 Hæc tunica facilimè, si aliquantisper ve-  
 fica infletur, ab exteriori separari potest:  
 ita, vt ego aliquādo fermè totam separā-  
 rim sine aliquo negotio, q̃ magni fuerit  
 momenti. Alteram etiam habet exterior-  
 rem, carnosamq̃: dum autem carnosam  
 dico, non ita rubicundam carnem vide-  
 re expectes, qualem in musculis, sed sub-  
 albidam, qualem in ventriculi, ac intesti-  
 norū tunicis videre potes. Ita enim car-  
 nosam hanc tunicam reperiēs, & cau-  
 dā, & semicoctā: nam opus est, vt omne  
 experimentum tentes. Hæc eadem dum  
 vesica diffidet, satis crassa est, ipsa verò  
 extēsa tenuior fit, distractis valdè fibris,  
 per quas nisi interna adesset tunica, facile  
 egredi lotium posset. Fibræ quæ ipsam  
 constituunt, sunt satis crassæ per lon-  
 gum & transuersum vesicæ maiori ex  
 parte, ac per obliquum etiam aliquot  
 collocatæ ad hoc, vt vndequaquē com-  
 moda fiat vesicæ contractio, atque lotij  
 expressio: non vt retineant, attrahant, &  
 exprimant, sed vt expressioni tantum,  
 quod in ventriculo etiā dixi, incumbāt.

T 3      Artifi-



Artificiosa verò illa meatuum vrinario-  
rum insertio, quam fieri tradit Vesali-  
us illis perreptantibus inter tunicam à  
peritonæo, ac propriam, fit re vera inter  
duas has proprias : exteriorē scilicet, at-  
que internam. Hoc diligenti sectione à  
te faciliè cognosci poterit. Quod cum  
feceris, videris quæ hanc tunicam exte-  
riorem carnosam, & ab interna peni-  
tùs distinctam, confirmabis profectò  
sententiam meam, veram quæ esse dices:  
quòd nulla pars se ipsam mouere possit,  
nisi fibras habeat, vt secundum illarum  
ductum se ipsam colligat, contrahat quæ,  
atque nisi etiam easdem carnosas (excep-  
tis arterijs) possideat. Nam cum vesica  
se constringat motu quasi voluntario,  
habuit à Natura secundam hanc tuni-  
cam carnosam: quæ qua ratione fieri po-  
tuit, vt reliquos anatomicos latuerit?  
De vesicæ musculo suprà locuti sumus,  
quare descendamus ad partes generati-  
oni dicatas.

In testium tunicis illud primùm ob-  
seruauimus: Maximam esse controuersiam  
inter anatomicos. Nam alij tres tantum  
constituunt, alij quatuor: alij quinque,  
vel



vel sex etiam numerârunt. In his tamen illos magis probo, qui quatuor esse dixerunt, duas scilicet exteriores, ac communes, duasque proprias & interiores. Nā qua ratione acti proprias vniuscuiusque testis tunicas quidam tres esse dixerunt, nescio: potuerant, si vellent, non tres tantum, sed quatuor etiam efficere. Verum summi magistri diuisio mihi semp placuit, quod quatuor sint, & vtinam ipse nomina ita oportune his imposuisset à scriptoribus, qui de his scripsere, assumpta. Quoniam nil in hac historia amplius desiderari posset. Nam <sup>o</sup> *ἐξωτερική* vocauit, exteriorē tunicam ex cuticula & cute conflata, scrotum à nostris dictam, & optimè quidē: quia à Galeno similiter & à reliquis Græcis omnibus vocatur. Secundam verò communem innominatā reliquit, cum tamen à Ruffo Ephesio *ἀγροῦ* vel *ἀγροῖ* plurium voce appelletur, atque etiam à Paulo Aegineta li. 6. cap. 61. Hæc à panniculo carnosio ortum ducit, & *ἀγροῦ* vocatur, quia in excoriatione maximè apparet, & quia facilimè ab externo scroto, internisque alijs membranis excoriari potest, vel cum illa sit, quæ

T 4 exter-



externum corium ( vt ait Paulus ) glutinat cum internis membranis , opus est, vt ipsa excorietur ac secetur, si externam ab internis seiungere velimus . Tertiam quoque optimè descripsit, orta à peritonæo, veluti etiam Paulus confirmat, atq; hanc verè inominauit, nam *ιλυτροειδής* vocatur à Galeno, Ruffo, & Paulo: quam *ιρυθροειδής* passim legatur voce corrupta, quæ in *ιλυτροειδής* vertēda est. Nā cūm desinentia istius vocis *ιρυθροειδής* similitudinem significet, quæ sit ista similitudo cum rubore, non video, à quo tunica ipsa rubro vel rubori similis sit dicenda: potiùs *ιρυθρά* debuerat vocari, quàm *ιρυθροειδής*: sed quoniā nulla adest in ipsa rubedo, neque etiam *ιρυθρά* dici potuit. Quare optimè *ιλυτροειδής* vocata est à Græcis, ob vaginæ & inuolucri similitudinem. A Paulo etiam vocatur *ιλυκοειδής*, quia ab illa membrana oritur, in qua sunt *ιλυκίς* venarum & artiarum: imò per hanc etiam disseminantur, vnde capreolaris, vel capreolo similis vocata est. Vnum prætereà notandum est ex Paulo, quod huius tunicæ illa pars, quæ simæ ac posteriori testiū faciei hæret,



ret, vocatur ἡ ποσὶα πρόσφυσις. Quartam  
 deinde atque ultimam tunicam optimè  
 describit, sed malè appellat, & immeri-  
 tò alios anatomicos nugaces vocat. Nā  
 verum istius tunicæ nomen est δάγρον  
 ex Galeno: at ex Ruffo Ephesio ὑμῶν νε-  
 γάνκος πρόστυκός appellanda est. Quod  
 autem ἐπιδιδυμῖς vocari debeat hæc tu-  
 nica (vti opinor) falsum est. Quod ego i-  
 ta probo, atque auctoritate primū. Nā  
 apud quem primū nos legimus vo-  
 cem istam, fuit Galenus, qui etiam huius  
 pluribus in locis meminit. At ipse testa-  
 tur in primo de semine cap. 15. & 16. esse  
 corpus aut particulam quandam corpo-  
 ris, capiti ipsius testis impositam: ergo,  
 non est membrana vestiens testē. Quod  
 autem non possit Galenus intelligere  
 membranam hanc, probo. Quoniam in  
 lib. de dissec. vteri ait, testes fœminarum  
 habere δάγρον, vt̃i habent testes viro-  
 rum, quæ est tunica vestiens substanti-  
 am testis: In 14. verò de vsu part. testes  
 mulierum non habere ἐπιδιδυμίδας ait:  
 aut si habent, esse ita paruas, vt̃ vix appa-  
 reant: hoc certè non potest intelligi de  
 membrana testium, cūm dicat nō appa-

T 5 rere



rere in testiculis fœminarum, quod non dixisset, si per vocem *ἰνιδιδυμίδα* tunicam innueret. Præterea asserit in primo de semine, cap. 15. *ἰνιδιδυμίδα* aliquando plenam semine reperiri, quod de tunica minimè dici potest. Quare ex his ego colligo, Galenum nunquam hac voce appellasse tunicam dictam. Quod si ab ipso primùm promulgatam habemus vocem hanc, atque etiam ipsius explanationem, cur nos abusi nomine volumus tunicam testis improprie, ac immeritò *ἰνιδιδυμίδα* vocare? Non video equidem huiusce rei causam. Sed demus Galenum aut non explicasse vocem hanc, aut cum ipsam legerit apud Herophilum, vel alium scriptorem, non rectè intellexisse. Probo ego iam à verbi ipsius vi, non posse tunicam hanc significare. Quoniam *ἰνιδιδυμίδα* vox composita est ex duabus, altera quidem *ἰνι*, quæ in, aut suprâ significat, altera verò *διδυμίδα*, quæ cum desinentiam *ῥῶν* *ὑπονομισινῶν* illorum habeat, quæ in *ἰσ* sub fœmineo genere desinât, ac pari ratione formetur, necessariò inter eadem *ὑπονομισινῶν* erit connumeranda.



da. Cumque diminutiua hæc nomina idē  
aut natura, aut similitudine quadam, aut  
vfu cum prototypo significant: diminu-  
tum tamen ac tenuius, idēδ *διδυμις* de-  
ducta & *πρωτος διδυμς* significabit quoddā  
corpus, quod aut natura, aut similitudi-  
ne, aut vfu idem sit cum teste: sed tamen  
diminutum, idque erit testiculus. Iam  
videamus, an hoc dici possit de tunica  
hac, de qua tractamus. Proculdubio non  
eadem est natura huius tunicæ cum te-  
ste, nulla similitudo, aut figura, nisi in  
rotunditate illa ouali: nulla ipsius vfu  
communitas, cūm hæc ad ambiendam  
substantiam testis, ipse verò ad gene-  
rationem seminis sit factus. Quamob-  
rem sententia mea dicendum minimè  
est, tunicam *διδυμς* dictam vocari posse  
vnquam *διδυμις*, sed potius vox ipsa  
corpus quoddam paruum, quod testē re-  
ferat, notare videtur, ac postea addita  
illud idem supra testem, aut aliud corp⁹,  
de quo mētio habeatur, insidere signifi-  
cat. Hoc comprobatur similibus quibus-  
dam vocibus, quarum crebrò meminere  
anatomici, earumque vna est, *ἐπιδιδυμις*,  
quæ cuticulam natura, figura, atq; vfu cū  
cute



cute eandem, tenuiorem tamen significat.  $\pi\iota\gamma\lambda\omega\tau\tau\iota\varsigma$  addatur, quæ corpus paruum, figura tamē idem cum lingua, quæ  $\gamma\lambda\omega\tau\tau\alpha$  dicta est, significat. Idem confirmat  $\pi\iota\mu\theta\lambda\iota\varsigma$  vox Hippocratica, quæ molam parvam genu affixam notat, quam partem  $\pi\iota\gamma\kappa\iota\varsigma$  etiam vox apud eundem explicat. His vocibus anatomicis satis clarè patet, quod per istam vocem  $\pi\iota\delta\iota\varsigma$  debem⁹ intelligere aliquid, quod aut substantia, figura, aut usu (paruū tamen) testi sit simile, illique postea insideat, ut ipsa  $\iota\sigma\iota$  requirit. At quæres, quisnam sit iste testiculus? Respondeo, quod est corpus illud oblongum utriusque extremo testis in parte sima alligatum, capiti scilicet, atque fundo. (Caput autem Aristo. & Galenus vocant partem testis superiorem protuberantem:  $\pi\upsilon\theta\mu\iota\nu\alpha$  verò, idest fundum vocat Pollux inferiorem partem) atque in medio seiunctum, in quod seminales venæ & arteriæ magna ex parte desinunt, & à quo canalis feminarius ortum ducit. Particula enim hæc malè observata ab anatomicis, quāvis in homine videatur in superficie ipsa nervosa: tamen re vera intimis glandosa



dosa est, & si secetur ex minutissimis quasi glandulis, veluti etiam & gurgulio constat, formari videbitur: quod velim observes in crudo coctoque teste, quoniam hoc certum esse reperiēs. Glandosa autem huius substantia solidior aliquantisper videtur, quàm sit substantia testis, hocque illud est, quod Galenus, aut diuinans, aut forte ab Herophilo assumen dixit *ἡμισυμίδα*, quo ad substantiam, esse mediam inter testem ac vasa spermatica, molliorem scilicet his & duriorē illo. Cū itaque in hoc corpore eadem sit substantia cum teste, idemque vsus. (Nam & in ipso semen fieri concedit Galenus, & refertum semine sepè reperitur) neque varia adsit figura, merito testiculum appellare poterimus, *ἡμισυμίδα* scilicet: cumque ipsi testi adhæreat, *ἡμισυμίδα* etiam vocabimus: atque illud præcipuè corpus est, quod in quibusdam hominibus ita laxo nexu cum teste iungitur, vt diuisi testiculi parui specimē præbeat: vnde aliqui *ὑποσχισ* vocantur ob hoc symptoma.

Quoniam autem Natura mirū in modum appetens conseruationem huma-



næ speciei, non quasdam statas constitutiones, aut tempora ordinavit, quibus uti multa alia bruta, ita homines turgore veneris affecti liberis operam darent: sed omnes tempestates, omnesque horas aptas, ac opportunas esse voluit ad Veneris usum, atque ad procreandos liberos: cumque hoc minimè fieri possit, nisi perpetuò apta subministretur materia, ideò quoque eiusdem Naturæ instinctu testes & vasa reliqua generationi seminis destinata ipsum continuò producunt, quod deinde à testibus per *epididymida* & meatum seminalem perpetuò ad cervicem vesicæ, & ad penis originem fertur: ut hoc medio in uterum tanquẽ in seminarium spargatur. Verũ in veneris negotio homo multus esse non potest, neque perpetuò illi incubere. Quare necessariũ est, ut semẽ hoc colligatur & aceruet, donec opportuna superueniente hora spargi possit. At in homine multi seminis nõ satis erant meatus, neque epididymis, aut substantia testium ad continendum semen, quod duorum, aut trium, & aliquando etiam plurium mensium spatio coaceruatur.

Qua-



Quamobrem natura prope implantationem meatuum seminalium, quos *πέρσσωματικὸς* vocauit Herophylus & Galenus, atque etiam *ἀγγία σπέρματικὰ*, vbi vniuntur simul, vt semen effundat in canalem, ad latera ipsorum circa ceruicem vesicæ apposuit geminas quasi vesiculas, vnam in vno latere, aliam in altero, quæ vesicæ nerueæ sunt, satisque insignes ac magnæ: neque vnam habent cavitatem, vt aliæ vesicæ, sed multiplicem & anfractuosam, videnturque varicum complicationem formare: & nihil in humano corpore reperitur, cui magis assimilentur, quàm varicoso vasi. In has vesicas, tanquam in castellum quoddam aquarium exoneratur semen continuò, quotiescunq; apertos meatus, quibus in canalē influat, minimè reperit. Ne autem copiosum semen totū in vnica cavitare contentum corrumpere, ideo natura plures canales ac meat⁹ in his vesicis effinxit, in quibus semen integrius seruetur: atq; prætereà voluit plures esse & anfractuosas, ne statim semen totum vno in veneris congressu affatim efflueret, magnòue ita copiosi humoris impetu (si tot⁹ simul efflueret)



efflueret (ne aut meatus nimis dilatarentur, aut, ne (quod sæpè ac sæpiùs in alijs vasis accidit) ex plenitudine quædam obstructio statim fieret. Semen igitur ex illis varicibus sensim se explicans tutiùs ac moderatiùs exit. Vesicæ autem hæ, quamvis magnæ sint, latitant inter ligamenta recti intestini & væsicæ vrinariæ, semperq; copioso semine ita turgent, vt quandoque demirer, qua ratione Diuinus Vesalius has non viderit, nobisque potiùs seminaria vasa canina, quàm humana descripserit, nihilque pro ipso respondere possum, nisi, quod aliquando bonus dormitat Homerus: neque hoc illi turpitudini, aut dedecori mea sententia est. Vesicas prætereà istas aut vasa non dubito illa esse, quæ à similitudine *παρὰσάτας κυρτοειδῆς* vocauit Herophylus, in humanorum corporum dissectione valdè exercitatus, quâquam Galenus extremam meatuum seminalium partem sit interpretatus. Hos igitur varicosos adstites observes, mî Petre quia pulcherrimum in se continent naturæ artificium.

In penis historia à Vesalio tradita hæc  
desi-



desiderantur, quæ etiam apud alios anatomicos defunt: Nam quâuis reperiatur scriptores anatomici, qui vt Aristarchi videantur, liberè inuehuntur in Vesalium, & quasi semper immeritò: in rebus tamè difficilimis ab illis dogmatibus, quæ ab ipso tradita sunt, nec per latû pilum recedere audent. Talis est historia hæc, in qua nihil à Vesalij placitis recedunt, nisi fortè, dum aliqui negant, neruos & venas ad penem deriuari. Sed ad institutum nostrum. Penem in intimo canali non cauum, sed spongiosum esse constat fungosa quadam materia repletum, non carnea quidem (vti ipse ex Aristotele asserit) sed neruea, ac ita dura, vt quasi nerui duritiem excedat. Per hanc spongiosam materiâ vsq; ad summâ glandem vasa feruntur insignia, arteriæ nempe, quæ ita aliquando conspicuæ sunt, quàm q̃ maximè cōspici potest. Ad penē duo genera vasorum feruntur. Alterū cutaneū, quod non curo. Alterum verò illorum vasorū, quæ per corpus nerueū ipsius penis distribuūtur, deq; his ego loquor. Sūt enim gemini nerui, qui per mediâ illam bifurcationē, à qua originem trahit penis, ascendentes ad dorsum ipsius, & per dorsum idem currentes, propaginibus non

V paucis



paucis subiecto neruo communicatis tandem in glandulam ac totum extremum colem inferuntur. Nerui sunt insignes ac valdè manifesti, ita, vt nisi lusciosos latere possint: ijque sunt, in quibus, ac simul in ipsorum inuolucris fiunt ganglia nō dolorosa, vel glandulæ vocatæ ab empiricis, quæ postea sunt in causa, vt dum pudendum erigitur, veluti arietinū cornu intortū turgeat, & nō distendatur, quod genus morbi, mea sentētia, propemodū inmedicabile est. Sunt præterea geminæ arteriæ intra neruos ipsos vsque ad glandem delatæ, à quibus vasis satis insignibus propagines manifestæ ad fungosam penis substantiam feruntur. Hæ pariter arteriæ per bifurcationem mediam dictam vnà cum neruis ascendunt ad dorsum. Postremò adsunt geminæ venæ, quæ vt plurimùm cū ad mediam bifurcationem peruenerint in vnā tantū coalescunt: à qua quidem vena sub osse pubis propago quedam insignis ingressa abdomen dissemnatur per ligamentum, quo vrinaria vesica ossibus pubis vincitur. Hæc itaque vena ex duabus vt plurimùm coalescentibus orta, currit per medium dorsum exquisitè ipsius penis, inter vtrasque arterias



rias vsque ad glandem. Horum vasorum neminem ego reperi, qui veram originem nobis descripserit. Quamobrem tibi hanc ante oculos ponam.

Cùm vena caua & arteria aorta in duas partes diuisæ recesserint à quarta lumborum vertebra versus inguina, antequam illuc pertingant, ramum insignem ac crassum vtraque à se propagat ad cauitatem illam, quæ ab osse sacro, & toto osse ilium in infimo abdomine formatur, qui ramus in duas propagines, in exteriorem scilicet & interiorem optimè à Vesalio descriptas ibi distribuitur. Harum exterior, quæ & maior est, tota quodammodò (vt præceptoris verbis vtar) inter sacrum & coxendicis os, quâ maximus neruorum crus petentium ducitur, in exteriora transuersa prorepat, & numerosa ramorum serie in musculos varios dispensatur, vtì optimè ab ipso proditum est. Ab his itaque tribus particulis, venæ scilicet, atque arteriæ propaginibus & neruo maximo, statim dum egrediuntur per spatium illud inter os sacrum & ischium, rami satis insignes oriuntur, neruus scilicet à neruo maximo, & venula & arteria ab alijs duabus propaginibus. Quæ

V a tria



tria vasa reptantia & quasi circumducta ad inferiorem coxendicis ambitū procedūt ad anteriora vsque, & ad illam partem ascendunt, in qua pubis ossa simul iunguntur, & per bifurcatam penis originem penetrantia ad dorsum ipsius feruntur. Verū hoc accidit, vt fermē semper vnus lateris vena, vbi in pube coniugatur cum opposita, & fiat vnicū vas venosum, quod medium inter arterias ducatur usque ad glandem, quod quidem vnionis genus in nervis istius partis fieri nondū observauī. Vera hæc est (vt opinor) vasorum origo, quæ per penem diffunduntur, neq; vnquam alia à me inueniri potuit: satis quæ tibi sit hæc inter illa, quæ pertinent ad instrumenta, femini in uiro ipso dicata. Nam ad muliebria venio.

In vteri ceruice mihi videtur, quod anatomici nostrorum temporum, ferē omnes, qui de hac re locuti sunt, aliquantisper lapsi sint. Quoniam partem illam, quæ verē ceruix non est, ceruicem appellant veram autem ceruicem ignorant. Nam totus ille meatus, in quem virilis penis inditur, ab istis vocatur ceruix, cū tamen ab antiquis anatomicis, Galeno scilicet, atque præcipuē à Sorano in tract. de vtero vo-



vtero vocetur *ἡ δὲ ὀρὶς τὸν αἰκίον*, nec nō eti-  
 am *κόλπ. τὸν αἰκῶ*: nunquam autem cer-  
 uix, nisi improprie loquatur. Scito igitur  
 partem hanc, sinum vel pudendum foemi-  
 neum esse vocandam: veram autem cerui-  
 cem vteri eam esse partem, in qua est osti-  
 olum illud angustum, in quod penis non  
 ingreditur quidem, sed tantum attingit:  
 semen verò per ipsum in fundum vteri  
 procedit. Sed hæc leuia: grauiora, quæ  
 sequuntur sunt. Auicen. 3. lib. fen. 21. cir-  
 ca finem meminit cuiusdam partis in pu-  
 dendo muliebri sitam, quam virgam vel  
 albathara vocat. Hanc Albucasis lib. 2.  
 cap. 71. tentiginem appellat, quæ solet  
 aliquando ad tantum incrementum per-  
 uenire, vt mulieres hanc habentes co-  
 eant cum alijs, veluti si viri essent. Par-  
 tem hanc Græci *κλητορίδα* vocarunt: vn-  
 de verbum *κλητορίζειν* obscænum dictum  
 est. Anatomici verò nostri penitus  
 neglexerunt, neque verbum quidem  
 de ipsa faciunt. Particula hæc eadem vi-  
 rili peni respondet, & ex duplici neruo  
 constat intus spongioso, atque atriori  
 crassiori quæ sanguine referto, vti in vi-  
 ris. Oritur bifurcato principio ab osse  
 vtroque pubis, atque in vtroque prin-

V 3

cipio



cipio dicto musculum satis manifestum, paruum tamen pro magnitudine partis habet, vasa per dorsum currentia adsunt, quemadmodum in virili membro, definitque in quoddam extremum, quod ceu glans uideretur contenta quadam pelle veluti præputio, quæ pellis iungit pudendi exterioris gemina illa corpora, quæ à Græcis, præcipuè à Sorano *πτερυγώματα* vocantur. Totum hoc pudendum, quia paruum est, & latitat in pinguiori pubis parte, ideò anatomicos etiam latuit, atque ita latuit, vt ego primus fuerim, qui superioribus annis idem patefecerim : & si qui alij de hac re locuti sunt, aut scripserunt, scias, quod ipsam aut à me, aut à meis auditoribus accepere, neque tamen ob id rem ipsam benè nōrunt. Extremam glandem istius penis statim reperies in parte superiori ipsius pudendi exterioris, vbi iungūtur, vel vndè incipiunt dicta *πτερυγώματα*.

Aliud etiam notandum in hoc finu mulierum est, quod anatomici aliquot reperiuntur illos deridentes, qui hymen ibi collocant. Verùm mea sententia non sunt ita deridendi, quoniam re vera tu videre poteris in virginibus, membranam quandam



dam nerueam, non autem carneam, quæ  
 immediatè post  $\sigma\upsilon\gamma\eta\sigma\tau\alpha\mu$  (ita enim vocant  
 Græci canalem, per quem mingunt fœmi-  
 næ, vel rectiùs collum ipsius vesicæ) adest,  
 & claudit sinum per transuersum. Attamè  
 non est integra hæc membrana, sed in me-  
 dio perforata tanto foramine, vt minimus  
 digitus manus suo apice in adultis faci-  
 lè ingredi possit, hocque virginalè clau-  
 strum est, ac per foramen ipsius facilimè  
 egrediuntur menses: hoc noluit Soranus  
 esse membraneum, sed potiùs esse ipsius si-  
 nus muliebris angustias factas, ex qui-  
 busdam rugis collectis, quæ à vasis ex v-  
 tero illuc prodeuntibus contrahuntur:  
 cumque hæ dictæ rugæ extenduntur in  
 stupratis virginibus, atque dum vasa dicta  
 disrumpunt, dolorè pariunt, & sanguinè,  
 veluti si mactata esset victima, effundunt.  
 Pace tamen ego tanti viri dixerim, quod  
 mihi potiùs videtur membrana non ad-  
 modùm crassa, atque in medio annuli mo-  
 do perforata, quæ postea lacerata in  
 stupro, ac præter modùm distenta dolo-  
 rem incutit, & tandem veluti in viris fit,  
 dum laceratur, glandis frenum euanes-  
 cit.

Ad vterum iam venio, in quo si aperte

V 4 sen-



sententiã meã explicabo, dubito, ne hãc ir-  
rideas, cùm ea dicturus sim, quæ nõ solùm  
antiquorũ & recentiorũ historiã redargu-  
at : sed etiam funditùs euertant dogmata  
quẽdã, aut saltẽ titubare faciant. Non defi-  
stam tamen, neque ita modestũ risum do-  
cti viri pertimescã, quin id, quod oculis ip-  
sis sæpè ac sæpiùs uidi, alijsq; etiã ostendi,  
palàm enarrẽ. Scias igitur fœminarũ vterũ  
geminos habere *κρεμασῦρας*, vnum dextrũ  
ac sinistrum alterum, qui ipsum in fœmi-  
nis suspendũt, veluti in viris testes ipsos.  
Hos opinatus est Vesalius esse musculos  
vteri, atque satis malè depinxit, calamoũe  
delineauit. Musculi enim non sunt, quã-  
uis aliquando rubri & carnei videantur:  
sed sunt gemini processus neruei ab vteri  
laterib⁹ orti, atque aliquãdo oppleti quo-  
dã carneo tomẽto, ita, vt rubri reddãtur, q̃  
ascendentes ad inguina, ac perforãtes peri-  
toneũ, veluti in viris vasa seminaria faciũt,  
per foramẽ chordẽ musculorum obliquè  
descendentium egrediuntur, atque cũ his  
statim extra abdomen iunguntur musculi  
suspensorij, veluti in viris, sed parui admo-  
dum: (Nam his musculis fœminæ quoque  
donantur.) Processus isti cùm extra abdo-  
mẽ sunt, parũ vergunt versus pubem, i-  
biq̃ue



biq̃ue finiūt in pinguedine latentes, neq̃;  
 vnquam inuicē iūguntur, neq̃; ad tentigi-  
 nē pertingūt, sed semper ab ipsa duūm di-  
 gitorū spatio distant. In extremo autē ij-  
 dem processus sep̃e ita caui sunt, vt in scul-  
 ptam mēbranā elytróiden referāt, hęc q̃;  
 cauitas aliquando pinguedine infara re-  
 peritur, atq̃; sedes hęc illa est, in qua fœmi-  
 narum ramex fieri solet, quemadmodū in  
 viris ipsis. Ego q̃ue opinor, quod vt in fœ-  
 mina oēs partes adessent, quę sunt in viro,  
 ideò pro cremasteribus, ac tunicis vagina-  
 libus à Natura facti sint hi processus gemi-  
 ni. Omnes anatomici vno ore asserunt, in  
 testibus fœminarum semen fieri, & quod  
 semine referti reperiantur: quod ego nū-  
 quam videre potui, quāuis non leuē ope-  
 rā, vt hoc cognoscerē, adhibuerim. Vidi q̃-  
 dem in ipsis quasdam veluti vesicas aqua  
 vel humore aqueo, aliās luteo, aliās verò  
 lymphido turgētes: Sed nunq̃ semē vidi, ni-  
 si in vasis ipsis spermaticis, vel delatorijs  
 vocatis. Aliud asserūt, quod vasa ista sper-  
 matica oriūt̃ à testib⁹, atq̃; cū illis omninò  
 copulātur, & desinūt in cornua ipsius vte-  
 ri ita appellata, quod minimè placet: quo-  
 niā nunquā obseruare potui meatus istos  
 seminarios coniunctos cum testibus, nisi

V 5 vterus



vterus malè affectus fuerit : in omnibus  
 autem alijs, aut virgines fuerint, aut viti-  
 atæ mulieres, vel ediderint cōceptum fœ-  
 tum aut non, semper disiunctos vidi testes  
 à dictis meatib<sup>9</sup>, neq; ulla apparet vena, aut  
 angustū vas, vel magnū, quod à testib<sup>9</sup> ad  
 hos meatus trāseat, solaq; adest mēbranu-  
 la tenuissima à peritonæo, quæ cū oīa  
 ibi cōtenta vasa venas scilicet & arterias  
 vinct, hos quoque meatus & testes simul  
 copulat, ita tamen, vt non se inuicē tangāt.  
 Nam inter ipsos spatium fermè dimidij di-  
 giti transuersi intercedit, tātumq; abest,  
 vt simul cōnascantur. Si igitur non cōnaf-  
 cuntur, vt re vera non faciunt, neque va-  
 sa media inrercedunt, vide, an uerum illud  
 sit, q<sup>d</sup> dixerim dogmata aliquot, quæ ad ge-  
 nerationē seminis pertinent: valde ne titu-  
 bent, laborare. Testes enim mihi adfuere  
 plurimi fide digni spectatores, q<sup>d</sup> sepius in  
 his meatibus semē exquisitissimum repe-  
 rierim, nunquam autem in testibus, præ-  
 tereaq; quod meatus ipsos nunquam cum  
 testibus cōiūctos, nisi in malè affecto vte-  
 ro, illis indicare potuerim. Nam si in vno  
 latere adfuit tumor vel cācer, eiusdē etiam  
 lateris testis ita cōtractus & colligatus cū  
 dicto meatu apparuit, vt connati simul vi-  
 deren-



derentur. At oppositi lateris sani scilicet testis, non ita se habere semper visus est. Sin aut vtrunq; latus erat affectū, vterque meatus pariter cōiunct<sup>o</sup> cum teste à me reperiēbat, hocq; bis aut ter ad summū vidi.

Meatus verò iste seminarius gracilis & angustus admodū oritur nerueus ac cādīd<sup>o</sup> à cornu ipsius vteri, cumq; parūm recesserit ab eo, latior sensim reddit<sup>o</sup>, & capreoli modò crispāt se, donec veniat ppe finē, tunc dimissis capreolaribus rugis, atq; valdè latus redditus finit in extremum qdā, quod membranofum carneumq; ob colorē rubrū videt<sup>r</sup>, extremumq; lacerū valde & attritum est, veluti sunt pannorum attritorum fimbriæ: & foramen amplum habet, quod semper clausum iacet concidētibus fimbrijs illis extremis, quæ tamē, si diligēter aperiant<sup>r</sup> ac dilatēt<sup>r</sup>, tubē cuiusdā æneæ extremū orificium exprimunt. Quare cū huius classici organi demptis capreolis, vel etiā iisdē additis meatus seminari<sup>o</sup> à principio vsq; ad extremum speciē gerat, idēdō à me vteri tuba vocatus est. Ita se hæc habent in oībus, nō solūm humanis, sed etiā ouinis, ac vaccinis cadaueribus, reliquisq; brutorū omnium, quæ ego secui.

Venæ



Venæ & arteriæ spermaticæ (quâvis tēstentur anatomici, vt̃ in viris, quod anteq̃ ad testes veniant, miscentur) seiunctæ aliquot vltra testē feruntur: atq; ita cōspicuē ad ipsum vterū & ad meatus seminarios, quos plurimæ ambiunt, tēdūt, vt ab omnibus distingui possint. Cūm autem ad vterū duplex venarū & arteriarū genus pertineat, alterum seminalium à superioribus descendens: alterum illarū, quæ à laterib⁹ vasorū ossis sacri oriūtur: Has in sinū vel (vt vtar ipsorum voce) in ceruicē vteri, illas verò in vterū ipsum vel fundū propagari dicūt. At sciēdū est, quod ista vasa superiora, anteq̃ omnia diffūdātur, per vterum iungunt cū aliquot ex inferiorib⁹, & ita iuncta inferūtur in partem fundi ppe ceruicē vel sinū ipsum. Quod si aliquādo in cōiuncta inferūtur, ab illis inferioribus semper aliquot rami ascendunt in fūdum inferendi: qui simul atque in substātiam vteri ingressi sunt, copulantur ac cōnascūtur cū dictis superioribus venis. Quare perpetua semp̃ adest cōiunctio, aut extra vterū, aut statim sub peritoneo, quo vterus vestitur, aut in ipsius met substantia. Hanc cōiūctionē, ab anatomicis neglectam, opinor factam esse, vt foetationis tēpore



pore sanguis nimis copiosus à seminarijs  
 vasis delatus (quod in aliquot pregnatib<sup>us</sup>  
 manifestū est) possit p has inferiores venas  
 in sinum muliebrē exonerari, cū aliās mē-  
 struæ purgationes rectā per vteri fundū  
 expurgentur. Nollem irrideri ab anatomi-  
 cis, si dixerim in substātia ipsius met vteri  
 horum vasorū dextrorū ac sinistrorū ali-  
 quot propagines etiam ita iungi, vt vnica  
 fiant vasa, non omnes dixi, sed aliquot, at-  
 q; ideò cōfēsū inter dextra ac sinistra vasa  
 dari, & ad fœtū ab utroq; vasorū genere  
 materiam trasmittere: quāuis vmbilicales p-  
 pagines in vno tantū latere vteri radices  
 iecerint. Vnū postremò obseruaui in om-  
 nibus, quas secui, fēminis, aut in partu, aut  
 post partū statim, aut ante ipsum mortuis,  
 carnem illam, quæ placenta à me dicitur,  
 semper occupare, vel hærere alteri tantū  
 vteri ipsius parti, in quam definit foramen  
 à meatu seminario veniens, atque illud  
 quoq; notaui, foramen hoc esse, quasi cen-  
 trum totius spatij, quod à placenta occu-  
 patur.

In illis partibus, quę ad fœtū pertinent,  
 aliquid habeo, in quo discrepē à reliquis  
 anatomicis: primūq; illud est, quod dixi,  
 dum de arterijs umbilicalibus tractarem,  
 nempe,



népe, nō ppetuō geminas esse arterias, quæ cum vena vmbilicali, & vraco ferantur ad fœtum, sed sæpenuerō vnā tantū, quæ vtī ex duab⁹ maximis arterijs chorijs simul iunctis conflatur, ita quoq; præ vmbilici forib⁹ statim in duas diuidit, vt ad ossis sacri arterias ferātur. Secundum est, quod placēta illa carnea, quæ pro vasorum securitate vtero coaluit, nequaquā inter inuolucra fœtus est cōnumerāda. Quāuis quidā asserāt, hāc à Galeno vocari choriō, q̃ falsum est. Quoniā Galenus hāc carnē optimē nouit, nō in homine quidē, sed in alijs brutis, & carnē concretā circa vasorum orificia appellat, nō autē chorion, veluti in primo de sem. cap. 7. & in 15. de vsu part. cap. 4: neq; credēdum est eum ita stultum fuisse, vt cū millies dixerit, chorion esse mēbranam ex semine factā, postea carnē hāc crassam, turpemq; concretionē ex sanguine chorion etiā appellet. Hanc vnicā in homine & multiplicē in cornigeris concretā, aliqui volebāt esse cotyledonas, de quibus loquitur Hippocrates. 5. Aph. 45. sed ij castigāt à Galeno in eodē loco, atq; etiam in lib. de dissect. vteri, vbi apertē carnes has non esse cotyledonas asserit, sed ipsa vasorum ora, quæ in vtero purgatio-

num



num tēpore acetabulares quasdā eminē-  
 tias innatas habēt, quales etiā in hæmo-  
 rhoidibus esse solent, veras cotyledonas  
 esse pbat ex auctoritate Praxagorę, cuius  
 verba etiā adiungit. Sed quoniā incidi in  
 mentionē acetabulorum, duo verba, cū  
 nihil de his in historia vteri dixerim, ad-  
 dam. Reperio cotyledonas nominatas a  
 quā plurimis, atq; in vtero collocatas,  
 verūm nō omnes per cotyledonas eadem  
 corpora intelligunt. Nā Diocles, vti habe-  
 m<sup>o</sup> apud Soranū in tracta. de vtero, voluit  
 κοτυληδόνας, quas & πλειτένας vocauit,  
 esse quasdam μακροδέσινους in spatio  
 medio vteri collocatas, quæ basim latam,  
 ac extremum acuminatum habeāt, vt fœ-  
 tus, dū est in vtero, ab his addiscere possit,  
 quomodo papilla sit trahēda. Alij voluēre  
 carnes illas, quæ adnatæ oculus vasorū fœ-  
 tui sunt, vt ipsa stabiliora reddāt, κοτυλη-  
 δόνας esse, de quibus suprā dixi. Alij appel-  
 lārunt κοτυληδόνας ora ipsa vasorum vte-  
 ri, q̄a cetabulares quasdā eminētias men-  
 struarū expurgationum tēpore habēt, atq;  
 in horum numero fuit Praxagoras, quē se-  
 quutus postea Galenus est. Alij fuerunt, in-  
 ter quos cōnumerat Arist. qui in terti ode  
 Histo. Anim. cap. i. asseruit in solis cornu-  
 tis



tis animalibus, aut altera tantum parte den-  
 tatis, quibus etiam additur ab ipso *δασύπο-*  
*δισ*, & mures, & vespertiones vtrinque  
 detati vterum habere acetabula. atq; eo  
 tempore tantum, quo foetus in vtero con-  
 tinetur, à quibus acetabulis embryo per  
 media vasa pēdet. Reliqua verò oīa, quæ v-  
 trinq; dentata, pedibusq; herentia animal  
 pariūt, asserit habere vterū interna in facie  
 leuigatū, à qua embryo suspēditur medijs  
 ipsis vasis, nō autē cotyledonibus, quoniā  
 non adsunt. Quæ verò sint cotyledones  
 istæ, idem Aristo. in 2. de Generat. Anim.  
 cap. 5. declarat: aitque esse corpora quædā  
 insculpta, quorum pars caua respicit fœ-  
 tū & internā vteri amplitudinē, pars verò  
 gibba respicit vterum, illiq; cōnata est, atq;  
 videntur veluti parvæ cotylæ: vnde (ut  
 credo) *κοτυληδόνες* sunt dictæ, quia *κοτύλη*  
 effigiem gerant. (quid autem fuerit men-  
 sura aut vasculū illud ab antiquis *κοτύλη* ap-  
 pellatum, qualīue constiterit figura, quod  
 noueris credo (quibus vmbilici venæ co-  
 pulātur, atq; inde alimentū trahūt. Quo-  
 niā autē nō adsunt cotyledones, nisi dum  
 in vtero foetus continetur, ac postea obli-  
 terātur, imò & antequā foetus nascatur  
 obliterari incipiūt, dū iā perfectus est, &  
 ad



ad exitum tendit, teste eodem Aristo. precipuè in 7. de Histo. Anim. cap. 8. meritò quærerem ego, qua ratione oriantur ista acetabula? nasci hoc modo respondet Aristoteles, quoniã natura sensim ac sensim tanquã ad mamas transmittit alimentũ sanguineũ ad capillamẽta extrema venarũ, quæ sparsa hinc indè sunt per vterũ. Hoc autẽ alimentũ plurimũ ibi coaceruatum facit, veluti ἰζάνθημα & φλεγμασίαν hoc est, tuberculum, in quo contineatur, atq; istud κοτυληδὼν corpus est, à quo postea aperto effluit alimentũ ad embryonem, quo deficiẽte, aut quia totũ suctũ sit, aut quia nõ ampliũ à corpore transmittatur, cotyledones omnes obliterantur ac evanescent: & vt utar Aristotelis verbo, συμπίπτει id est, concidunt, cauumq; delitescit. Hæc ex Aristotele acetabulorum historia est. Ultimo in loco aliquot fuere, qui κοτυληδὼνας istas figmẽtũ esse asserũt, veluti Soranus, qui de istis loquens ait, ἀφυσικὸς ἔστιν περὶ αὐτῶν ἰσαγόμενος λόγος. In hac scriptorum atque sententiarum varietate, quid ego sentiã, audi. Duobus modis loqui possumus de acetabulis, propriè scilicet, aut impropriè: quod si impropriè loquamur, infiniti erũt modi, atq; σέτετις,

X

quæ



quæ de ipsis proferri poterūt: sin cōtrà propriè loqui voluerimus, neq; per figmēta aut metaphoras progredi, opus erit, vt intelligamus velimus nolimus quædam esse corpora insculpta & caua, q̄cotylæ effigiē gerētia in vtero reperiātur. nā quæcunq; *κοτυληδόν* ⊕ nomine donata sunt, ea omnia cauitate quadā cotylā imitātur, quod in coxæ articulo patet, cūm cauitas illa ossea, in qua ingredit̃ caput femoris *κοτυληδών* ab Aristotele cap. 13. primi, & cap. 7. tertij de Histo. Animal. vocetur, quæ cauitas ab Hippocrate in libro de locis in hominibus, atq; in libro de Artic. vocatur *κοτύλη*, quo nomine etiam appellata est ab Homero in . 5. Iliados hoc carmine.

*Εὐθα τε μὲν οὖν.*

*Γ' ἔτι μὲν ἐν τῇ κοτύλῃ, ὅτε τῇ μὲν καλῇ οὖν.*  
vbi Eustathi<sup>9</sup> in cōm. ait, cotylē vocari à similitudine *κοτύλος* vasculi domestici, quo haurire, ac perfundere liquores solemus. Addamus & *κοτυληδόνας*, quibus polyporū pedes ornant̃, ita enim Aristoteles vocat cauitates quasdā in pedibus polyporū cōsistētes, quibus arripiūt corpora ipsa, maximaq; vi eadē retinēt: tantū enim est istorū cotyledonū robur, vt aliquando reperi-  
tus sit polypus, q̄ ipsis solidissima falsamē-  
tū



torū dolia Heliano teste in 13, fregerit. di-  
 cæ autem sunt κοτυληδόνες, à similitudine  
 κοτύλης, vt asserit Eustathius in 5. odyssæ,  
 in hui⁹ carminis Homerci interpretatiōe.

Πρὸς κοτυληδονόφιρ πυκναὶ λαΐγγες ἔχονται.

Est etiā plāta qdā apud Dioscoridē lib. 4.

κοτυληδών appellata à figura κοτύλης, quā

possidet, vt doctissimè explicat Marcellus

Virgili⁹ in cōm. illi⁹ Dioscoridiani capitis.

Huius plantæ veram effigiē (vnde etiā ad-

discere possis, quæ sit κοτυληδόνων reliqua

rum figura (videre poteris expressam in

diuinis illis cōmentarijs, quæ doctissim⁹

Petrus Andreas Matthioli philosophus

ac medicus Senēsis celeberrimus, patriæ

atque etiam totius Italiæ decus & orna-

mentū, nō solūm ad explicandū Diosco-

ridē, sed ad illustrandam cūctam plantarū

ac metallorum, ne dicam, animalium quoq;

historiam doctissimè ac elegantissimè cō-

scripsit. Cū igitur oīa, quæ legimus apud

pbatos auctores κοτυληδόνος appellatiōe

insignita ob similitudinē κοτύλης, quam

gestant eo noīe sint appellata, meritò col-

ligere possum, si ppriè loqui volumus, q

κοτυληδόνες istæ in vtero erunt corpora,

quæ necessariò acetabuli figura cōstabūt,

simulq; etiā colligemus, verā tantūm esse

X 2 fen-




sententiā atq; opinionē Aristotelis, qui  
 cū semper fuerit grauissim⁹ Auctor, ve-  
 rē etiā atq; propriē, vt scriptoris grauitatē  
 tueretur, de his corporibus loquutus est  
 sub nomine κοτυληδόνες, quod quidē non  
 obseruārūt alij, vt incipiā à Praxagora &  
 Galeno, qui impropriē & immeritò vocā-  
 runt κοτυληδόνες capillamenta venarum:  
 cū in his nō adsit vlla huius nominis oc-  
 casio. Multòq; adhuc min⁹ obseruārūt illi,  
 qui mammillares geminos processus vel  
 carunculas, à quibus fugēdi normā disceret,  
 embryo acetabula appellārūt. Quoniā nō  
 reperiūtur, neq; si adessēt illas fugere pos-  
 set, vt demonstrat aduersus istos Aristote-  
 les in 2. de Gene. Anim. cap. 5. Præterea si  
 etiā reperiantur, nullā cū habeāt figurā,  
 cotulæ non sunt cotyledones appellandę.  
 Quemadmodū neque carnes illę aut plu-  
 res sint aut vnā tātū zonę vel cinguli, aut  
 placentæ figura cōstans, quibus vasa stabi-  
 liuntur, & quasi ad vterū picātur, vlla ra-  
 tiōe κοτυληδόνες possunt dici, meritoq; hu-  
 ius sententiæ auctores à Galeno castigati  
 sunt. De Sorano verò, qui figmētum ace-  
 tabula esse dixerit, nihil addā, neq; in ipsū  
 inuehar, cū certò sciā, ipsum loquutū fu-  
 isse de vtero humano, in quo nō reperiū-  
 tur



tur. Acetabula igitur ea sint, de quibus locutus est Aristoteles, quæ re vera non inveniuntur in matrice humana, neque in canina, ut docet anatome: sed solum in cornutis animalibus, aut illis tantum, quæ recēset Arist. neque etiā veritate ipsa rem hanc indicante perpetuò adsunt in brutis, sed tantum dum embryo in utero continetur, quod ego sepius in bubalis, vaccis, ac ouibus uidi, plurimisque alijs etiam ostēdi. Loco autem ipsorum acetabulorum in vacuo utero prominent tubercula aliquot satis insignia, quæ in enixis vaccis, atque etiā in illis, quæ nondum taurum admiscere, neque conciperunt, apertissime cōspiciunt. Hoc ita constituto, quod dicendum est de Hippocrate, qui dum de humano utero loquitur, acetabulorum meminit? Mihi parcant manes tanti viri, quantum artis Medicæ fuit: dicam ego, quod falsa oratione vera testatus est. Nam si quis dubitaret (mea sententia) crudos aut frigidos humores, vel mucos ipsos in utero cōtētos esse, causā abortus, re uera in medio lumine cœcutiret: quod prætereā humores hi in cotyledonibus cōtineantur, falsum est, quia hi non adsunt. In oculis autem vasorum contineri possent hi humores, abortum tamē ideò minimè facient. Quoniam inibi retētus mu-



cus obstructionē pariet, ob quā fœtus a-  
 limēto distitutus necessariò abortu peri-  
 bit: nō autē, quia disrumpātur ligamenta,  
 pōdus ferre minimè possint: Necessariū e-  
 nim mea sentētia est, vt mucus iste illi ad-  
 iungat parti, cuius munus est colligere va-  
 sa vmbilici cū vtero, ac fœtū suspēdere: si  
 laceratiōis istius causa esse debet, hæc autē  
 caro placētē est, quæ si imbuať mucō, ita  
 laxa fit, vt facilimè disrūpatur, neq; em-  
 bryonē ampliùs suspēdere possit. Hac ita-  
 q; ratione patebit Hippo. improprie locu-  
 tū fuisse, sub nomine acetabuli de hac car-  
 ne, quæ quoniā in brutis cornigeris in ace-  
 tabulis cōtinet, neq; propriū nomē habet,  
 ab ipso breuitatis aphoristicę leges seruan-  
 te, vt lōgas circūlocutiones vitaret, κοτυλη-  
 δόν  vel acetabuli voce est explicata, &  
 cōtinentis nomine contentum ipsum per  
 συνεκδοχήν est appellatū. Quod si illi, qui  
 κοτυληδόνας carnes has interpretabātur,  
 tantū vt Hippo. mentē explicarēt, id di-  
 xerūt, nō sunt reprehēdendi: Sin autē ab-  
 solutē κοτυληδόνας carnes has esse dixēre,  
 nulla sunt digni excusatiōe. Quod autem  
 Hippo. intellexerit carnes istas nomine a-  
 cetabulorū, patet, quia in Aphorif. ipsis assi-  
 gnat munus sustinendi fœtus, atq; ait ipsa  
 lacerari,



lacerari, q̄ dici non potest, neq; de osculis  
 vasorū vteri, neq; de cōtinētib⁹ cauis, etiā  
 si adessent. Nā vasa vteri nō habēt hoc mu-  
 nus, vt sustineāt fœtum, ideò de illis nō lo-  
 quitur: cavitates verò si adessent, quāuis  
 faciāt ad sustinendū fœtū: tamē ipse nun-  
 quā disrūpuntur aut lacerātur: quare de  
 tomēto hoc carnosō intelligendum est,  
 quòd figurata oratione sit explicatū. neq;  
 mirari debemus, si Hippocra. nō valde in  
 hominū anatome exercitatus per allusio-  
 nē ad illa, quæ in brutis nouit, de rebus,  
 quæ ad hominē pertinēt, aliquādo locut⁹  
 est. Iā ad fœtū reuertamur, in quo illud ter-  
 tiū erit, in quo ab alijs discrepo, quod ge-  
 minē tātū sunt mēbranæ, quibus ipse in-  
 uoluitur, quāuis antiqui & recētiore tres  
 esse dixerint, illasq; etiā numerārint, quæ  
 in aliquot brutis, vt in oue, ac similibus re-  
 periūtur, geminē quippe, quæ ambiunt to-  
 tū fœtū, & tertia, quæ secundo in loco est,  
 continetq; lotiū, ἀλαντοειδής vocata à Græ-  
 cis. Nā in illis animalibus, quorū vterus ha-  
 bet acetabula, venæ vmbilici sunt disper-  
 se per totum chorion, nullaque est ipsius  
 pars, in qua non sit aliqua vena & arteria,  
 hacq; ratione chorion in his brutis inser-  
 uire minimè potuit ad cōtinendū lotium:

X 4

Quoniam



Quoniam, vt opinor, vasa diù hærētia ipsi lotio, refrigerata nimis fuissent, ac præterea cūm cōtinuò arteriæ dilatētur, semperq; aliquid dilatatæ attrahāt à circūfuis corporibus humidis, si hærissent lotio, procul omni dubio inde aliquid ferot si humoris aut vaporis attraxisset. Ideò natura cūm in his totū chorió sit refertū, vasis addidit (vt opinor) quēdā saccum ac nouā mēbranam, qua lotium cōtineatur, ne corpora vasorū ac præcipuè arteriarum tãgat. At in hominibus, in quibus  $\chi\omega\rho\iota\sigma\mu$  totum nō est plenū vasis, sed tātūm in illa parte, qua placētæ hærēt, totaq; reliqua mēbrana, aut nulla, aut q̃minima vasa pro sui nutritiōe habet. natura coacta minimè fuit formare nouā lagenā, p lotio, sed ipsum trāsfundit inter  $\chi\omega\rho\iota\sigma\mu$  atq;  $\kappa\mu\upsilon\epsilon\iota\delta\mu$ , nō quidē in regiōe, vbi sunt vasa dispersa p  $\chi\omega\rho\iota\sigma\mu$ : quoniā ibi quātum scilicet durat placēta, ita cōnatæ sunt istæ mēbranæ inter se, vt seiungi difficilè possint, (seiunctę tamen aliquādo reperiūtur.) At in reliquo ambitu quāuis pariter cōiunctæ sint: nō tamē is adest coalitus, qui ab augescēte lotio seiungi facilè possit. Abutitur itaq; in hominibus natura parte ipsius chori, atq; hinc fit, quòd geminę tantūm adsint mēbranæ,



branæ: exterior, quæ vterū totum subliniit,  
 & χωρίον ab omnibus vocat, quāuis falsò a-  
 liqui in hominibus hanc ἀλαντοιδήν appel-  
 lārint, quæ uē semp in exteriori superficie,  
 & si neruea sit tota, habet expāsā glutinis  
 modofubstantiā carneā, qua toti vtero ad-  
 glutinat. Hæc q; carnea substantia vnguib<sup>9</sup>,  
 ac nouacula facilimè abradi potest, quæ  
 nisi deradat, est in causa, vt mēbrana hæc  
 neruea nō ita lucida, vt est, appareat. Inte-  
 rior verò ex his duabus mēbranis ad cōti-  
 nendū fœtum, atq; sudoris excremētum  
 apta ἀμνιὸν dicta est. neq; mī Petre, aliā in  
 hominibus videre expectes, quia re vera  
 nō reperitur, at in brutis cornigeris, vel  
 omnib<sup>9</sup> habētib<sup>9</sup> vteri acetabula, tertiam  
 veluti farcimen, inuenies inter χωρίον &  
 ἀμνιὸν collocatam.

In ventre inferiori nihil ad ea, quæ di-  
 cta sunt potest addi à me, quare ad mediū  
 thoracē scilicet iā venio, in quo duo tātū  
 obseruauī, prætermiſſa à reliquis anatomi-  
 cis, q̄ mihi alicuius momēti esse videant̄.  
 Horumq; illud primū est, quod ad nervos  
 cordis pertinet, qui nerui secundū alios a-  
 natomicos vnici sunt in singulis homini-  
 b<sup>9</sup>, à recurrēte neruo sinistro oborti, quæ  
 sententia ita differt ab eo, quod ego fre-

X S quen-



quētissimè vidi, atq; infinitis p̄pmodum  
 auditorib⁹ meis manifestè ostendi, vt ve-  
 ra dici non possit, tantumq; ab auctoritate  
 istius nobilis ac ita necessarij visceris de-  
 trahit, vt ipsum quasi stupidum reddat.  
 Cùm enim in renes, in ventriculum, in lie-  
 nē, atq; in hepar tot nerui à sexto pari, & à  
 plexu illo mesenterij ferantur, vt illorum  
 ope lēiones proprias cognoscere possint,  
 iniusta p̄fectò videt̃ hęc nouerca Natura  
 appellata, si in cor nobilissimū oīum vis-  
 cerū vnicum tātum neruulum distribuat.  
 Deinde si à cōsequētib⁹ argumētari licet,  
 videmus in hoc viscere ita magnum, itaq;  
 exquisitū sensū adesse, vt nullā possit ne-  
 q; intēperiē, neq; solutionē cōtinui quā-  
 uis minimā ferre, sed statim valdè ingens  
 succedit dolor, q̄ homines iugulat. Si igi-  
 t̃ magnus dolor, magna etiā vis sentiēdi a-  
 dest: hęc autē cordi cōmunicari minimè  
 potest, vnico eodēq; minimo neruulo: Ne-  
 cessarium itaque est, vt aut vnus maximus  
 ad ipsum pertingat neruus, aut parui ac  
 plures. Cùm ergo dogma hoc receptum à  
 iustitiæ legibus recedat, atque ab oculata  
 anatomes demonstratione, ego ipso dele-  
 to tibi quot qualesūe sint nerui cordis re-  
 feram.

Sub



Sub basi ipsi<sup>9</sup>, vbi vena arterialis incipit  
 ad sinistrū latus flecti, atq; vbi adest meat<sup>9</sup>  
 ille insignis arterialis in embryone, q<sup>9</sup> cō-  
 iungit venam dictā cum arteria aorta, est  
 plexus quidā aut cōplicatione<sup>9</sup> neruea, qualis  
 etiā in mesenterio à me descripta est, sed  
 minor, robusta tamē ac solida, à q<sup>9</sup> abūdans  
 copia neruosæ materiæ totā cordis basim  
 amplexat<sup>9</sup>, perq; ipsam plures propagines  
 paruorum neruorum indē diductæ disp-  
 gun<sup>9</sup>, ac p totā ipsius substantiā, quamuis  
 illas minutim prosequi nequeā. Hoc ana-  
 tomici ligamētū fortasse rati neglexerūt,  
 hacq; ratione nō viderunt, quot nerui in  
 cor ferantur. Nerueus autē iste plexus ori-  
 ginē ducit à quinq; neruorum propagini-  
 bus, quę quāuis aliquādo quatuor tantū  
 sint, quinq; tamē vt plurimū reperiunt<sup>9</sup>:  
 harumq; prima illa est, de qua in superio-  
 ribus locutus sum, dixiq; oriri à ramo ma-  
 gno nerui sexti paris sinistri parū infra ex-  
 ortū recurrentis nerui, atq; indē delatā &  
 reflexā ad venā arteriale sinistrā in dictum  
 nerueum plexum ascēdere. Secunda uerō  
 & tertia propago in eodē latere sinistro o-  
 ritur à plexu illo, quem ego in ceruice de-  
 scribens plexum sexti paris appellauī. Ab  
 hoc igitur plexu in sinistro latere gemi-

ni



ni oriuntur neruuli (aliquando etiam vn-  
tantum est) qui descendentes ad cordis ba-  
sim per eundem plexum distribuuntur.  
Quarta etiam propago, & ipsa sinistra ea  
est, quæ ab alijs proponitur à recurrente  
eius lateris neruo exorta. Hæc simul cū ter-  
tia & secunda descendens in dictū plexū  
desseminatur. Quinta verò propago, quæ  
ultima in dextro latere sita est, geminum  
habet principium. Nam à plexu sexti paris  
dextro neruulus exterior, qui rectà tendit  
ad cor: similiter quoque à neruo eiusdem  
sexti paris, qui recurrētem dextrum facit,  
statim cū thoracis cauitatē ingressus est,  
alius neruus non admodum paruus ema-  
nat, qui cum priori dicto iungitur, vnicū-  
q; ac satis crassum neruum facit. Hic quin-  
tus à me vocatus duplici ex principio ma-  
nans sub arteria, quæ iugulum sinistrum  
petit latitans, venit ad eandem complica-  
tionem, ac in ipsa simul cum alijs quatuor  
confunditur, vnicumq; fit principium so-  
lidum ac nerueum, à quo postea veluti ri-  
uuli ad cor non pauci feruntur.

Alterum, quod obseruaui, hoc est. Om-  
nes anatomicos, dum loquuntur de carti-  
laginibus collocatis in aspera arteria, il-  
lis aut annularem figuram adscribere, aut



σιγμοειδῆ, quod quidē verum est in parte  
 ea arteriæ, quæ extra pulmones apparet:  
 & in principijs quoque illorum duorum  
 ramorum, in quos ipsa statim diuiditur.  
 Verū cū in angustiores propagines di-  
 stribuitur, ad extremos vsque pulmones  
 nō obseruāunt anatom. cartilaginosa illa  
 corpora nō ānularia esse, aut σιγμοειδῆ, sed  
 tessularum more varijs figuris cōstare: alię  
 enim ῥομβοειδῆ sūt, alia quadrata, alia triā-  
 gula, & vt vno verbo dicā: quot sunt figu-  
 ræ earum laminarum ferrearum, quib⁹ lo-  
 ricata capitis tegumēta nostris tēporibus  
 formāt, vt sub pileo latētia capitis verticē  
 tueāt: tot sunt facies istarum cartilaginū,  
 ex quibus veluti tessulatum cōstruit op⁹,  
 in his asperæ arteriæ minutioribus ramis,  
 vt ipsi nunquā, dum cōtrahuntur pulmo-  
 nes valida etiā cōpressiōe, stringi aut con-  
 niueri possint. Nam si cōniueant, neq; fu-  
 ligines, neq; vapores calidi, neq; etiā pul-  
 monum, aut thoracis excrementa (vti ali-  
 quādo fit) excerni poterunt. Quoniā istæ  
 cartilagines appositæ sunt ipsi arteriæ ad  
 hunc vsum, ne cadentibus pulmonib⁹ cō-  
 stringatur, nō autē, vt arteriæ materia sint:  
 quoniā vera tunica ipsius membranosa  
 est, talisq; etiam requirebatur, vt aer fa-  
 cilius



cilius per ipsam egredi & ingredi posset.  
 Nā si ex cartilagine cōstaret, facilis trāsitus  
 nō daretur p̄ ita durum ac solidum corp⁹,  
 quale est cartilagineum. Igitur arteria ex-  
 mēbrana facta est, cartilagine autem sunt  
 appositæ, veluti fulcimēta ad dictū vsum.  
 Hæc in thoracis uisceribus obseruauī, quæ  
 illis adiunges à me de vena sine pari, deq;  
 oesophago suprà explicatis.

Ab aspera arteria ascendamus ad fauces,  
 in quibus anatomi. mentionē luculentam  
 glādularū illarū, quæ *καρσιόδμια* dicūtur,  
 fecēre: uerū de tunica neruosa, qua ue-  
 stiūtur, nil dixerūt, quod propriū harum  
 est, nō aut cōmune cū reliquis glandulis.  
 Aliud etiā prætulerunt, quod maximi  
 est momēti, tunicā scilicet dictarum glan-  
 dularū pforatā esse, varijs in locis forami-  
 nibus satis amplis. quæ si aliquādo mode-  
 ratē intumeāt glandulæ, imponere nostris  
 medicis solēt (quod aliquādo notauī) ita,  
 vt vlcera esse credāt: partēq; ipsam, ceu vl-  
 cerata esset, curāt: cū tamē re vera vlcera  
 non adsint, deficienteq; glandularum tu-  
 more secūdu naturā penitūs se habeant.  
 Quoniā foramina ea, vt dixi, naturalia sūt.  
 Quare chyrurgos tibi familiares admone-  
 to, ne in istos crassos errores incidant.

In



In ijsdē faucibus prætermiſſum eſt, q̃ palatū, quod cōſpicitur, nō totū oſſeum eſt, ſed huius dimidia fermē pars poſterior in fauces deſinens à latere ad latus tenſa, glanduloſa conſtat carne, quæ ſatis craſſa eſt, quāuis in inferiori ſuperficie à palati membrana, ſuprà verò à nariū tunica veſtiatur. Ab hac glādoſa palati parte media ferē depēdet aliud glandoſum, nō autē carneum corpus, quod *γαργαριζών* vocant grēci, noſtri gurgulionē, laxa quadam ac molliſſima pellicula veſtitū. Hoc pēdens ſuprà *ὑπογλωττίδα* ac laryngē illam mediam aliqdq; q̃ limpidiſſimum ſit, ſemp̃ inſtillans humectat. Nam talis eſt huius pēduli corporis uſus, nō autē ille, quē ad tēperandum aērē, aut cōmoderandam vocem aſcribunt. Et quamuis quidam experimēta ſua in morbo gallico in medium afferant eorum comprobata exēplis, quibus vox deprauata aut corrupta eſt ob gurgulionis abſumptionē: ſcias tamē, q̃ vox tantū deprauat in illis, in quibus gallica vlcera nō gurgulionem ſolū, ſed magnam etiam illius glandoſi corporis partē, quod extremum palatum cōplet, exederint: aut palati os & mēbranam perforarint. Quorum tantū gurgulio exelus eſt, certō ſcias, nullum vocis detrimen-



detrimentū ipsis superuenire, egoq; huius rei plurima habeo exēpla, atq; tu, si hoc rectè obseruabis, apertè poteris cognoscere, quod nisi cum gurgulione pereat substantia palati, ne quidquam læditur vox, dicant quicquid velint alij,

Ad oculos ipsos ex faucibus egrediens venio, in quibus primū prætēmisēre anatomici duo foramina parua, in angulo interno posita (quorum vnum est in palpebra superiori, alterum in inferiori) in viuentibus adhuc hominibus, si quis inspicere voluerit apparētia. Quę foramina habēt meatus, qui sub caruncula *ἰνκavθιδος* vel *ἰνκavθιδος* dicta vniunt in quendā communem sinum, in nariū cavitatē desinentē, per canalē proprium in osse squamoso, quod internum angulum occupat insculptum. Per hos meat⁹ maior lachrymarum pars, vt ego in fletibus mulierum obseruaui, ad oculos emanat, ipforumq; sin⁹ aliquādo exulceratur, fitq; collecta sanie species illa vlceris, quę fistula lachrymalis dicta est. Hęc sanies, si, dum collecta est, exprimatur sinus, ita manifestè excernitur per meatus dictos in internum oculorum angulum, vt nihil manifesti⁹ conspicī possit. Meatus isti, lachrymalia vocātur à recens-



centioribus chirurgis, atq; semper à me eodem nomine appellabuntur.

In oculorū cauitate, maior anatomicorū pars, nullā ponit glandulā: quidā sunt, qui duas addunt, sed neutri placēt: Quoniam vna tantū manifesta ac perpetua, & satis insignis à me reperiť, in parte superiore oculi propē angulū exteriorem: prāter hanc verō nulla alia adest, quæ perpetuō appareat, ita, vt momēti alicuius esse videatur. At in reliquorū brutorū oculo, quæ niťari vidētur, & p̄cipuē in bouino reperitur quædā alia glādula collosa, ac durior in interno angulo collocata, q̄ ob lachrymas ibi (vt reor) minimē posita est, sed ratiōe illius mēbranæ, qua niťāt. Nam in dictis animalibus mēbrana quædā latitat interno angulo vngui similis, quæ cū cartilaginis, vel corneæ tunicæ naturā sapiat, tenuissima tamē est. Hæc mouet motu voluntario ad angulū extremū, & oculum apertis etiā palpebris, operit. de hac Aristo. in secundo de Histo. Anim. cap. 12. locutus est, vti superi⁹ dixi, quę circa radicē habet mēbranam quandā validissimē dictæ glandulæ callosæ hērentem, ad hunc prācipuē vsum (credo) vt dum trahitur cutis ad oppositum angulum, tendatur glandosum

Y

istud



istud corpus veluti cornu ipsius arcus, statimque remissa cute recurrat, atque ipsam in propriū angulum retrahat. Ducitur autem hæc membrana ad oppositum angulum duplici chorda, altera quidem superius, altera verò inferiùs sub adnata membrana latente, quæ à musculo quodam oritur in exteriori angulo collocato, qui musculus à me pro parte illius, quod totum oculū ad exteriora trahit, recēsetur. Sed ut ad rē redeā, præter dictā glandulam in parte oculi superiore prope angulum extremum collocatum, in humano oculo nullam aliam reperio, quæ sensu facile, ac perpetuò percipi possit, dignaque cognitione habeatur, cui postea in brutis adiungitur illa durior, de qua dixi.

In oculorū tunicis parū ab alijs dissentio, atque ijs præcipuè, quæ nō valde magni momēti sunt, quorum primū est membrana *καρατις* à Græcis dicta. Quoniā nō possum ego mihi persuadere, ipsam esse durioris partē, quæ à dura cerebri meninge oritur, cū nō solū subæantia, sed & crassitie ac figura videam differre. Quoniam hæc cornea per se sola quasi sphericam aliam cavitatem cōstituens extollitur extra superficiem duræ, & veluti nouum tuberculum



berculum efficit, quod in viuentibus hominibus facile apparet, ita, vt non ob o- culum vniuersum, sed ob humorem albu- gineum tantum facta videatur. In ciliari corpore illo, quod inter vueam & humo- rem crystallinum ac vitreum intercedit, à diuino Vesalio discrepo. Quia tunica mi- nimè est, sed potiùs nexus aut ligamen- tum, quo vuea iungitur extremæ mēbra- næ crystallini: ideò non est dicendum tu- nica, neq; pro tunica numerandū, sed potius pro ligamento, quod nos ciliare voca- bimus. In tunica illa, quæ ambit crystalli- num, non placet quorundam opinio, qui asserunt esse eandē cum tunica vitrei. Quo- niam hæc valdè solidior est, quàm sit illa vitrea tunica: deindè, ipse vitreus humor in cauitate etiā, in qua latet cristallinus, propriam habet tunicā. Quare cū huic nulla ratione inferuiat, dicēda non est ipsi- us tunica, sed crystallino potiùs adiudicā- da, atq; *ἄραχνοειδής* Arahno vocetur, vti ab omni- bus anatomicis fit.

Verū enim verò tunica, quæ vitreum humorē ambit, & in illa cauitate crystal- lo dicata, & in reliqua totius humoris su- perficie à Vesalio prætermissa, ꝑcul omni dubio addi debet. Et quāuis hæc nō cuius

Y 2 patere



patere possit, testimonio tamen diligentiorum anatomicorum semper probabitur: hancq; tunicā uelim connumerare inter illa, quæ difficillima (iā plures sunt annielapsi) à me fuere inuenta, quā posse ex Ruffi sententia vocare *ὕαλοειδῆ*, sed locus ille, in quo de tunicis ac humoribus oculorum tractat, ita corruptus est, omniaque ita simul confusa ibi leguntur, ut nihil inde, quod solidum sit ac distinctū obijci possit: ideo ne supra arenam ædificium erigere videar, hac dimissa appellatione, vitrei tunicam appellabo. In humoribus autē hoc notavi, quod quāuis Vesalius affirmet humorem *κρησαλοειδῆ* esse utraque in facie depressum, lenitisque formam (à Galeno assumens) exprimere: in parte posteriori tamē exactē sphericus est in humano oculo, in anteriori verò depressus, ita, ut hæc facies parū à plana distet. Superficies autem has necessariò inter se hac ratioe variare, si opticoꝝ campos ingredi liceret, probarem, sed nō licet. Quare nuda hæc tantū veritas tibi nunc satis faciat. In aqueo etiā humore quedā adsunt, quæ quāuis grammaticē aliqua ex parte sapiāt, à me tamen tua causa nō p̄termittent. Primū est, quod anatomici asserunt humorem hunc ita

τεταυα



tenuem vti aqua esse: ego verò semper aliquantisper crassiores reperi, nisi fortè illud accidit, quia refrigerato corpore concreascit. Secundū est, quod Vesalius negat Græcos contulisse hunc humorē oui albo, à quo quidem albugineus vocatur à recentioribus, quamuis Galenus illud fecerit in 10. de usu partium capite 4. his verbis. *ἀμα δὲ ὑγρὸν λεπτὸν καὶ καθαρόν διὸν περ τὸ ἐν τοῖς ὀφθαλμοῖς*. Aetius etiā idē fecit, qui lib. 7. cap. 1. & 25. vocat hunc humorem *ὕδριον ὑγρὸν*, neq; vnquam ego legi (vno excepto introductorio) apud aliquem scriptorem Græcum, vocari humorem hunc *ὕδατος*: sed semper apud Galenum reperi, quod appellatur, aut *ὑγρότης λεπτή* aut *ὑγρὸν λεπτόν καὶ καθαρόν* aut *ὑγρὸν κατὰ τὴν κόρυν*, aut similibus vocibus, & quamuis tenuis vocetur humor, id ob relationem ad reliquos humores fit, non autem, quia ipse aqueus sit, nec ita tenuis, vt aqua est.

Ascendamus ad superiora, & ad caput ipsum, in quo illud primū notādum est, quod membrana, quæ *περικράνιον* à Græcis dicitur, non solū ossa capitis vestit, sed etiā musculos temporales vsq; ad iugalia ossa vocata, quibus in locis valdè crassa est, ac dura: quæ quāuis ab anatomicis tunica

Y 3

tempora-



temporalium muscutorum vocetur: pars  
 tamen est pericranei dictos musculos am-  
 plexata, ob maiorem ipsorum custodiam.  
 Nam si hæc esset propria muscutorum tu-  
 nica, eos cunctos usque ad insertionem in-  
 duceret, neque ab ipsis unquam recederet,  
 quod tamen facit, cum prope os iugale  
 descendit: quoniam ibi inter membra-  
 nam ac musculum utriusque lateris pin-  
 guedo aliqua inuenitur, ac spatium, in quo  
 latitat. Aliud etiam observandum est, quod  
 idem pericranium veluti dura cerebri  
 membrana aliquot in partibus capitis po-  
 test (difficilimè tamen) in duas partes sepa-  
 rari, in alteram, quæ cuti hæreat, atq; alte-  
 ram, quæ ossi connascatur, utraque tamen  
 pars unum tantum corpus efficit, quod pe-  
 ricranium est: totumq; ortum ducit à liga-  
 mento intercurrente per suturas: neq; di-  
 stinguendum è pericranium à perioftio, quod  
 aliquot nostrorum temporum anatomici  
 faciunt. Quoniam idem penitus est in capi-  
 te pericranium, quod alibi perioftium: ca-  
 ueantq; anatomici, ne aliquando panniculi  
 carnosì, qui veluti chorda à musculis fron-  
 tis ad musculos occipitij & aurium quan-  
 doq; percurrit, partem aliquam secant, &  
 pro pericranio accipiant, verumq; pericra-  
 nium



nium pro perioftio: nam hoc facilimè fieri potest. Quemadmodum autem pericranium ossibus capitis in exteriori superficie pro perioftio adest: ita etiam internæ calvariaë superficiei perioftium subest membrana cerebri durior dicta, aut saltem exterior ipsius pars. Nam dura hæc meninx facilimè diuiditur in duas mēbranas, quarū, quæ exterior est durior, minusque texta, & quasi tendo quidā latus huic membranaë expansus ac connatus videtur: quæ autem interior, æqualior, atque solidior visitur, ac in ipsa sinus insunt, vt apertè anatome indicat. Pro perioftio igitur huic ossi inseruit pars dicta exterior ipsius meningis. Quod autē membrana hæc duplex quali sit, maiori ex parte ignorant anatomici.

In membrana eadem dura, canales quidam sunt, quorum numerus ab alijs anatomicis traditus illi non respondet, quem ego obseruavi. Constituendum autem primò est, de quo genere canaliū loquimur, cūm geminum ipsum sit in mēbrana hac. Vnum, per quod currunt vasa veluti arteriaë, quæ per membranam disseminantur. Alterū, in quod desinunt venæ, hocq; genus canalium loco venarū est, & tangui-

Y 4 nem



nem in se cōtinet, veluti in vena ipsa recō-  
ditum, & ab hoc vasa quædam oriunt, quæ  
venæ penitus sunt, per cerebrum, aut per  
futuras ad exteriora distribuendæ. De hoc  
igitur posteriori genere canalium vel du-  
ctuum loquor, qui διπλαῖαι, vel διπλώσεις  
ipsius mēbranæ vocantur à Galeno: neq;  
horū numerus integer propositus est, nec  
ipsa etiā conformatio. Nam veteres & re-  
centiorum aliqui asserunt venas per has  
duplicationes ferri, quod ego nunquam  
potui videre, quamvis non leue studium  
adhibuerim: at semper vidi venas in has  
duplicationes desinere, atque cum ipsis  
iungi, tanquam si venæ & ipsæ essent: vi-  
diq; ductus illos, quos ἱκετοῦς etiā vocat  
Galenus, disseminandos per varias partes  
ab his duplicatiōibus exoriri, veluti à ve-  
na aliqua maiori, neque vnquā potui ve-  
næ tunicam à meninge duplicata seiun-  
gere, meritoq; istud à Natura factū est, cū  
meninx ipsa eandem substantiam ac tel-  
lam, quam venæ habent, possideat. Quare  
frustrā fuisset tunica venæ, aut duplicatio  
ipsa, cū alterum ex his oportunè munus  
idem perficere possit. Nam quicquid phi-  
losophatur Galenus de securitate illa ve-  
narum, in 9. de usu partium capite 5. illud  
totum



totum ob ingenij fecunditatem commē-  
tatus est, non quòd duplicationes istæ,  
quas sinus vocant nostrorum temporum  
anatomici, quatuor tantum ab ipsis nu-  
merantur, duæ posteriores, tertia media,  
& quarta per rectum inter cerebrum, ac  
cerebellum tendēs: at reliquæ oēs, quæ sub  
basi cerebri sunt, prætermittuntur. Quare  
vt horum omnium sinuum certum nume-  
rum habeas, ita à me describantur.

Cùm vena iugularis, quæ defert sangui-  
nem ad cerebrū, à me superius descripta,  
peruenerit ad caluariam, vel ad os illud,  
quod petrosum dictum est, statim ingre-  
ditur sinum insignem, partim in osse petro-  
so, & partim in additamento lambdoidis  
exculptum, ibique definit in membranam  
duram, quæ totam hanc cauitatē perioftij  
more vestit. Ab hoc loco tãquam à peren-  
ni aliquo fonte omnes sinus vnius lateris  
mēbranæ dictæ scaturiunt, atq; ideò à me  
cauitas ista, fons & origo sinuum semper  
appellabitur, à qua primus oritur ductus,  
qui per duplicatam membranam sub basi  
cerebri, in insculpto canali osseo in addita-  
mento lambdoidis veluti latēs, fertur ad  
anteriora vsq; ad os illud, in quo est glan-  
dula, quodque ego à similitudine fellam

Y 5 voca-



vocare loleo: ibique coniungitur cum secundo eiusdem lateris sinu, de quo iam loquar. Ab hoc itaque primo sinu antè, quàm ad finem perueniat, aliquando venulæ aliquot oriuntur, quæ per mollem meningem ibi superpositam dispersæ apparent. Ab hoc eodem fontis principio oritur vena, aut canalis quidam, qui ad posteriora labès, perforato osse post illud tuberculum, quo caput cum prima vertebra copulatur, partim desinit in sinū cervicis à me quarto in loco describendum, partim etiam distribuitur per cervicem, & copulatur cum venis ibi disseminatis. Fons præterea ipse duplicationem postquã primas has soboles à se deriuauit, per insculptam sedē in osse temporis versus posteriora ascendit, vsque ad summum ossis petrosi dorsum, indeque vnica, & aliquando geminæ, tresue oriuntur venæ, quæ per futuram lambdoiden post mammillarē processum erumpentes ad posteriora aurium per cutem disseminantur, partesq; ibi collocatas, atq; aliquando cum exterioribus ascendentibus venis coniunguntur. Cùm itaque ad summum dorsum ossis petrosi peruenerit fons dictus, tunc angustatur atque desinit in duos ductus, in secundū scilicet



scilicet, ac tertium. Quorum prior perforata membrana sub basi pariter ipsius cerebri deorsum ad anteriora ac media capitis fertur per idem dorsum dictum petrosi ossis, donec perueniat ad sellam, ibique iungatur cum primo. Ab hoc dum prope sellam est, oriuntur venulae, quae per membranam tenuem prope arterias anteriores disseminantur, atque ab utrisque simul iunctis his sinibus, primo scilicet, ac secundo venulae oriuntur, quae ad cavitates varias ossium distribuuntur, & usque ad oculi orbitam etiam pertingunt. Posterior vero sinus, qui tertius est, ascendens per posteriora ad occipitij medium coniungitur cum suo opposito, veluti optimè traditum est à Diuino Vesalio, apud què hic tertius primus est, integreque descriptus. Quare ego de hoc nihil aliud addam, sed ad quartum venio, qui in ceruicis latere utroque collocatur. Nam cum meatus, vel potius vena illa, de qua secundo in loco dixi, orta à fonte, penetrarit extra os post capitis tuberculum, tunc reflexa supra primam vertebram ceruicis membranam in canali ceruicis contentam perforat, sinumque vnum efficit sui lateris in ea membranae parte, quae corporibus vertebrarum haeret. Hicque sinus  
usque



vsque ad septimam cervicis in utroque la-  
 tere satis ampla cavitare insignis pertin-  
 git, ac multo sanguine refertus est. Quo-  
 niam cum vena, quæ per transversos cer-  
 vicis processus repit, superârit septimæ  
 vertebræ processum, statim immittit ma-  
 gnâ propemodum sui partem in hunc  
 sinum, quodque reliquum est ascendens,  
 ac superata sexta novam propaginem in  
 eundem sinum inserit. Idem superata quin-  
 ta ac omnibus reliquis facit, vsque ad secun-  
 dam: cum enim illam superârit, tota in prin-  
 cipium dicti sinus definit, unico excepto  
 ramo, qui ab ipsa exorietur per exteriora latius,  
 in posteriores cervicis carnes disseminat.  
 Per processum verò transversum primæ  
 vertebræ, nunquam vena hæc, quod vide-  
 rim, transit, sed arteria tantum. Ab hoc  
 autem sinu unius lateris oritur meatus,  
 qui in alterius lateris sinum pertingit, ita,  
 ut his nexibus observatis, ac vasorum cō-  
 plicationibus, cum Hippo. dicere possim,  
 ὅτι ἑστὶν μία, ὅτι πῦρ μία, ὅτι πᾶσι πάντα.  
 Cum itaque quatuor sint hi sinus in uno  
 latere, si addantur totidem in opposito,  
 octo erunt omnes: quibus postea adiunga-  
 tur nonus, qui sub sagittali vsque ad fron-  
 tem pervenit, tertioque in loco à Vesalio



lio descriptus est: Addatur quoque & decimus, qui quartus aliorum est, qui que inter cerebrum & cerebellum recta ad glandulam in extremo tertio ventriculo cerebri contentam, atque peni similimam fertur. Ab omnibus istis duplicationibus venæ oriuntur, quæ ad plexus *χρυσιδιτις* formandos transmittuntur, ac distribuuntur per substantiam ipsius cerebri, quæ uero neruos cerebri, ac medullæ spinalis committantur, ac tandem, quæ ad varias partes extra caluariam alendas distribuuntur.

In tenui meninge ita se strenuè gesserunt reliqui anatomici, ut nihil ego, quod ab illis non sit proditum inuenire potuerim: veluti etiam in cerebro ipso, in quo utinam aliquando videre licuisset motum contractionis, ac dilatationis, quem primus ipsi crebro adscripsit Galenus, & nostrorum temporum anatomici aliquot approbaverunt. Quoniam ratio mihi contrarium penitus dicitur, neque argumenta illa, quæ afferuntur à Galeno in libro de instrumento odoratus, & in lib. de utili. respirationis, & in duodecimo de usu partium, tanti sunt momenti (parcat mihi magistri, cui omnia debeo, auctoritas) ut unquam persuadere potue-



potuerint motum adesse in hoc viscere, cui motui obstat tota ipsius substantia, quodq; pulsans sensu ipso (q' magis est) nunquam assequi potuerim, neque in vi- uorum brutorum anatome, neq; in maxi- mis capitis vulneribus, neque vlla alia eui- denti, quàm sensum subministraret, ratio- ne: quāuis summum studium, ac diligen- tiā hac in re adhibuerim. Adesse audacter non negarem, sed aut ob ipsius paruitatē, aut aliam ob causam, me nunquam hoc as- sequi potuisse affirmo.

Ad calcem iam perueni, mī doctissime Pater, enumerationis eorum, quę ego nul- lo dictante, nec labore leui in anatome de- prehendi: atque vtinam ita vera sint, vtī mihi sunt visa, tibiq; ita satisfaciant, vt ego in scribendo, dum voluntari tuę obtēpero (alióquin minimē) mihi metip- si satis feci. Atq; vtinā neminem ex ijs, ad quorum manus libellus hic peruenit, no- stra (quod summoperē exopto) offendat oratio, cū in ipso nihil à me scriptum sit, quod alios anatomicos ledere valeat, si iu- sti æquiue rei ipsius æstimatores esse ve- lint: Omnes enim, qui adhuc viuunt, a- mo ac colo, & illorum quoque, qui mor- tui sunt, manibus optimē precor: nullius  
illorum



illorum gloriæ, aut laudibus inuidens, cū  
 tam vastus sit optimæ existimationis cam-  
 pus, vt indè vnusquisque maxima orna-  
 mēta sine detrimēto alienę glorię sibi col-  
 ligere possit. Quod si aliquādo Diuino Vesa-  
 lio, aut alicui alij natomico nō lubēs sed in-  
 sciēs potiūs, vel inuit' vuln' aliquot inflixi,  
 oro, vt hoc antidoti loco à me accipiāt, q̃  
 aut imprudēter erraui, aut, si vera protuli,  
 oīa ipsis, pręsertim Vesalio, accepta refero.  
 Quoniā ita mihi viam strauit, vt vlteriūs li-  
 cuerit progredi, quod nunquam certē hac  
 ope destitutus facere potuissem. Vale, &c

Ioannem Baptistam Capredo-  
 num, nomine meo plu-  
 rimū salu-  
 tato.

**F I N I S.**



